

Жаҳон

АДАБИЕТИ

Адабий-бадиӣ, ижтимоӣ-публицистик журнал

1997 йил июндан чиқа бошлаган № 12 (187) 2012 йил, декабрь

Муассислар:
ЎЗБЕКИСТОН МАТБУОТ
ВА АҲБОРОТ АГЕНТЛИГИ

ЎЗБЕКИСТОН
ЁЗУВЧИЛАР
УЮШМАСИ

РЕСПУБЛИКА
МАЊНАВИЯТ
ВА МАЪРИФАТ КЕНГАШИ

Жамоатчилик кенгаши:

Бобур АЛИМОВ
Эркин ВОХИДОВ
Абдулла ОРИПОВ
Иброҳим ФАФУРОВ
Низом КОМИЛОВ
Муҳаммад АЛИ
Муҳаммаджон ХОЛБЕКОВ
Муҳаббат ШАРАФУТДИНОВА
Хуришид ДЎСТМУҲАММАД
Зуҳриодин ИСОМИДДИНОВ
Муҳаммаджон ҚУРОНОВ

Бош мухаррир:

Шуҳрат РИЗАЕВ

Таҳрир ҳайъати:

Усмон ҚЎЧҚОРОВ
(бош мухаррир ўринбосари)
Юлдуз ҲОШИМОВА
(масъул котиб)
Амир ФАЙЗУЛЛА
Тоҳир ҚАҲХОР
Назира ЖЎРАЕВА
Музaffer АҲМЕДОВ
Алимурод ТОЖИЕВ

ТОШКЕНТ
ДЕКАБРЬ

МУНДАРИЖА

НАВОЙ САБОҚЛАРИ	
“Ул сарви гулрў келмади” (Нусратулло Жумахўжса)	3
 НАСР	
Ирвинг Стоун. Ҳаётта ташналик. Роман. (Рус тилидан Р. Жабборов, М.Норова тарж.).....	9
Йоҳанн Петер ЭККЕРМАН. Гёте билин гурунглар. (Немис тилидан Янглии Эгамова тарж.).....	68
Хусрав ШОХОНИЙ. Ҳикоялар. (Рус тилидан Мурод Парнихўжаев тарж.)	101
 ШЕЪРИЯТ МИНТАҚАЛАРИ	
Немис мумтоз шеъриятидан намуна- лар.	48
Замонавий немис шеъриятидан.	94
 Николай Алексеевич НЕКРАСОВ. Шеър- лар. (Рус тилидан Раззок Абдурашид тарж.).....	117
 АДАБИЁТШУНОСЛИК. ФАЛСАФА	
Зигрид Клейнмихел: «Яна ва яна На- вой ижодига қайтаман». (Суҳбат)...	127
 Хуршид ЙўЛДОШЕВ. Немис фалсафий тафаккури.	132
 Шавкат КАРИМОВ. Ҳозирги немис нас- ри: анъана ва янгиланишлар.	136
 И.ҒАФУРОВ, Х.ДЎСТМУҲАММАД. Тар- жима муҳаббати ва оҳанрабоси.	140
 Нафас ШОДМОНОВ. Оғаҳийнинг таржи- ма мактаби.	146
 Акмал САИДОВ. Тинчлик элчиси.	150
 Жорес МЕДВЕДОВ. Владимир Лакшин майдонга тушади. (Рус тилидан Сайджас- лов Сайдумаров тарж.).....	158
 ЖАҲОН МАДАНИЯТИ ВА САНЪАТИ	
Глобус	165
Унутилмас сиймолар	169
Тақвим	200
Тарихда бу кун	202
 Йил мундарижаси	204

Навбатчи муҳаррир М.АҲМЕДОВ
Техник муҳаррир З.ФОЗИЛОВА
Мусаххих Д.АЛИЕВА
пьютерда саҳифаловчи Н.ДАВЛАТОВА

Жаңон адабиети, 12. 2012

ИНДЕКС 828, 829

2007 йилда №0252 рақами билан лицензия олинган.

Ўзбекистон Матбуот ва ахборот агентлигига рўйхатга олинган, №186

Уч босма табоқ ҳажмгача бўлган қўлёзмалар қайтарилмайди.

“Жаҳон адабиёти” журналида эълон қилинган асарларни кўчириб босиша да ва қайта нашр этишда таҳририятнинг ёзма розилиги олиниши шарт.

Тахририят манзили:

100129, Тошкент, Навоий кӯчаси, 30.
Телефонлар: 244-41-60; 244-41-61; 244-41-62.
Сайт: www.jahonadabiyoti.uz
E-mail: jahonadabiyoti@list.ru

Босиша рухсат этилди 24.12.2012 й. Бичими 70x108 1/16. Офсет қофози. Офсет босма. Шартли босма табоқ 18,2. Нашриёт босма табоби 20,0. Жами 1060 нусха. _____ ракамли буюргта. Баҳоси шартнома асосида. "Жаҳон адабиёти" журнали компьютерида терилиб, Ўзбекистон Матбуот ва ахборот агентлигининг "Ўқитувчи" НМИУда чоп этилди.
100206, Ўзбекистон, Тошкент ш. Янгишахар кӯчаси, 1.

© Жаңон адабиёти, 2012 й.



УЛ САРВИ ГУЛРҮ КЕЛМАДИ

Кечакелгумдур дебон, ул сарви гулрү келмади,
Кўзларимга кечаконг отқунча уйқу келмади.

Лаҳза-лаҳза чиқтиму чектим йўлида интизор,
Келди жон оғзимғаю ул шўхи бадхў келмади.

Оразидек ойдин эрконда гар этти эҳтиёт,
Рўзгоримдек ҳам ўлғонда қаронғу, келмади.

Ул париваш ҳажридинким йиғладим девонаевор,
Кимса бормуким, анга кўргандада кулгу келмади.

Кўзларингдин неча су(в) келгай, деб ўлтурманг мени
Ким, бори қон эрди келган, бу кечаку су(в) келмади.

Толиби содиқ топилмас, ўқса ким қўйди қадам
Йўлғаким, аввал қадам, маъшуқи ўтру келмади.

Эй Навоий, бода бирла хуррам эт кўнглунг уйин,
Не учунким, бода келган уйга қайғу келмади.

* * *

*Having shown her will to come, my mistress that flower fail'd to come
And for my longing eyes that night, a sleep till all hours fail'd to come.*

*And long and long grieved I, stared at the road she used to walk along
Methought in love of hers would die, as my joyful liar fail'd to come.*

*Still been severed from my fairy, made my rains furiously fall
And they all laughed at woe of mine, tho' sense of humour shouldn't have come.*

*For moonlit face of hers she cared, making it match the Moon in night
Tho' my sky was dark as mine soul, my moon didn't appear, fail'd to come.*

*And 'tis not me who's to be blamed for heavy rains pour'd from sore eyes
As they were not tears, but blood of mine, that night tears fail'd to come.*

*And could I see on doorway of mine any trace of trusty ones
If the one, who's said to be ever true to her lover, fail'd to come.*

*O Navoij with sweetest wine enjoy that manhood into thee
For whcre a cup of joy appears, a woe there never tries to come*

К. МАЪМУРОВ таржимаси

Ғазалнинг шарҳи

Ғазал арузнинг рамали мусаммани маҳзуф вазнида ёзилган. Ушбу вазннинг тақтеси қуидаги:

Фоилотун ғоилотун ғоилотун ғоилун
– V – – – V – – – V – – – V –

Ушбу ғазал Алишер Навоийнинг муҳаббат мавзуида ёзилган ошиқона ғазалларидан биридир. Ғазал бадиий қурилма (лирик композиция) си жиҳатидан воқеабанд ғазаллар туркумига мансубдир. У муайян ҳаётий воқеа таъсири ва турткиси билан яратилганлиги сабабли ҳам воқеабанддир. Ғазалдаги лирик сюжет ошиқ, яъни лирик қаҳрамон висол учун въъда берган севикли ёрини кутиш изтироблари тасвири асосига қурилган. Асар етти байтдан иборат бўлиб, барча байтлар матлада қўйилган мавзуни мақтагача изчил ёритишга сафарбар этилган.

Алишер Навоий мукаммал лирик куллиёти – “Хазойин ул-маоний”га асарларини умр фаслларига мувофиқ тақсимлаб қиритганида, “Ул сарви гулрӯй келмади” ғазали “Бадоеъ ул-васат”, яъни “Ўрта ёш гўзалликлари” девонидан ўрин олган бўлса ҳам, аслида, у шоирнинг ёшлиқ лирикаси маҳсулидир. Чунки ғазал Навоийнинг “Илк девон” и ҳамда иккинчи расмий девони “Наводир ун-ниҳоя” девонларида ҳам мавжуд. Улуғ шоир ўзининг ижодий такомили давомида ғазалнинг матний таркибига бирор жиддий таркибий ўзгартириш киритмаган. Ғазал шоирнинг илк лирикаси маҳсули эканлиги шундан далолат берадики, у йигитлик ишқининг нозик саргузаштлари, дунёвий муҳаббатнинг оташин эҳтирос ва туйғулари билан ёзилган. Мазкур далил эса ғазал мазмунини сунъий равища “ишиқ ҳақиқий”га боғлаб талқин этишимизга асос бермайди.

Матла байтда ҳижрондан шикоят мавзуси очилган. Тасвирдан англашиладики, кеча бораман деб висолга въъда берган севикли ёр ўз вақтида келмай қолади. Яъни, въъдасига вафо қилмайди. Висолга умидвор ошиқнинг кўзларига тонг отгунча уйқу келмайди. У ёрини тонг отгунга қадар ҳам умидвор кутади. Аммо ёр тонготарда ҳам келмайди. Ушбу ғазал шарҳларида “кеча” сўзини турлича тушуниш туфайли, уни воқеа содир бўлган кечқурун ёки шоир изтироблари ифодаланган кундан олдинги кун (ўтган кун) каби талқинлар учрайди. Бироқ ғазал мазмунидан, айниқса, учинчи байтдан аниқ англашилиб турибдики, въъда ва унинг ижросига интизорлик ғазал ёзилгандан аввалги кун воқелигидир. Матлада ғазал лирик сюжетининг яхлит мундарижаси ўзининг умумий аксини топган. Кейинги байтларда ошиқнинг въъда олган ойдин кундан то тонггача изтиробда ўтган қалб кечинмалари байтма-байт батафсил тасвир этилади.

Иккинчи байтдаги тасвирга кўра, лирик қаҳрамон дам-бадам ёр йўлига чиқиб, уни интизор кутади. Келавермагач, яна манзилига қайтади. Яна бесабру бетоқат бўлиб ёр йўлига чиқиб кўз тутади. Аммо ёрдан ҳамон дарак бўлмайди. Мутолаа жараённида оддий муҳлисларимиз “чектим йўлида интизор” шоирона сўз бирикмасини тушунишга қийналадилар. Айримларида “ёр йўлида интизор ошиқ нима чекди экан?” қабилидаги савол ҳам туғилади. Бунга сабаб шуки, Навоий даври тил ифодалари

буғунги тилимиздан ўзгачароқ. Аслида, юқоридаги сүз бирикмасидаги учта сўзниңг айнан ўзини ҳозирги тил тузилишида ифодаласак, буғунги ўкувчи учун тушунарли, аниқ мазмун келиб чиқади: “йўлида интизорлик чекдим”. Ошиқ ёрини чуқур изтироб билан сабрсиз кутаверганидан, жони оғзига келади. Бу ўринда шоир “жони оғзига келмоқ” халқ иборасини маҳорат билан қўллади. Уни қўллашдан мақсад фақат фразеологизмни мазмунга мутаносиб равишда ишлатиш эмас, балки тазод – қаршилантириш санъатини вужудга келтиришdir. Тазод ошиқ ва маъшуқ ҳолатлари ўртасидаги зидликни ифодалашга сафарбар этилади: ошиқнинг жони оғзига келади, бироқ маъшуқа келмайди, у ошиқнинг аҳволига лоқайд, беларво.

Байтдаги “шўхи бадхў” ибораси эътиборга сазовор. Ғазал шарҳловчиларининг луғат ва изоҳларида “бадхў” сўзининг “ёмон одатли”, “ёмон феълли”, “ёмон қиликли” каби маънолари берилади. Ҳақиқатан ҳам, бу сўз форс тилидан олинган бўлиб, “бад” – “ёмон”, “хў” – “феъл-атвор” маъноларини англатади. Бироқ, ошиқнинг муҳаббатига сазовор севиклига нисбатан “бадқилиқ” сифати жуда дағал туюлади. Агар ёри чиндан ҳам “бадфеъл” бўлганида, Навоий лирик қаҳрамони уни севмаган бўларди. Биз шоирнинг “шўх” сўзини ҳам назардан соқит қилмаслигимиз лозим. Назаримизда, шоир ушбу иборани ҳазил-мутойиба аралаш эркалаш маъносида қўллаган. Негаки, висолга ваъда бериб, ўз вақтида келмай, ошиқнинг сабр-тоқати, иродаси, садоқатини синаш ҳар бир қизга хос ҳаётий хусусият. Шу боисдан, унинг “бадхў”лиги ваъда бериб, ваъдасида турмаслиги, холос.

Кейинги байт мазмунини шоир “тажоҳули ориф” санъати асосига қуради. Ёрнинг ваъда қилинган вақтда келмаганлиги сабабини тусмоллайди, таажжуб изҳор этади: агар ёр кун худди унинг мунаввар жамолидек ёруғ бўлганида, бирор кўриб қолишидан уялиб, андиша қилиб, шарм-хаё, эҳтиёт юзасидан келмаган бўлса, айрилиқ азобидан зулмат қоплаган менинг ҳаётимдек тун қоронғу бўлганида ҳам келмади-я?! Байтда яна тазод санъати яратилган: ёрнинг юзи (орази) – нурафшон, ошиқнинг ҳаёти (рўзгори) эса қоп-қоронғу.

Тўртинчи байтда лирик қаҳрамоннинг аҳволи муболағали тасвиранади. У кута-кута тоқати-тоқ бўлиб, мажнунга айланади. Парисифат ёrim ҳажрида шундай девоналарча фарёд чекиб йиғладимки, – дейди ошиқ, – менинг бу аҳволимни кўрганда кулгиси келмаган бирор кимса бормикин? Бу байт мазмуни ифодасида шоирнинг яна бир бадиий маҳорати шундаки, у халқ ҳаётида учрайдиган типик тафсилга ишора қиласиди. Одатда, одамлар кўчадаги девона-жиннининг хурмача қилиқларига беихтиёр кулишади. Шунингдек, байтда ийғи ва кулги ҳолатлари асосида ифодаланган тазод санъати ҳам бадииятни кучайтирган.

Бешинчи байтда лирик қаҳрамоннинг руҳий ҳолати тасвири муболағали тарзда давом этади. Унинг аҳволига ҳайрон қолганларга лирик қаҳрамон: бунча кўз ўшларингни оқизасан, дея таъна-маломат қилманглар, – дея илтижо этади, – кўзларимдан ҳижрон кечаси сув оққани йўқ, келгани бариси юрак қонлари эди. Муболағадан ташқари, кўзлардан сув ўрнига қон оқиши маълум даражада тазодни ҳам ташкил этади.

Олтинчи байт оддий ғазалхон мутолааси учун бирмунча мураккаброқдир. Аммо Навоий даври ўзбек тили ва шеърият тилининг ўзига хос грамматик қурилишини билган одам уни осонгина тушуниб олади. Ушбу байтни тўғри тушунмасдан, мактаб дарслкларида “бегона байт” дея талқин этиш ҳолатлари ҳам бор. Аммо, адабиётшунослиқда ҳам, хусусан, ғазалшунослиқда ҳам “бегона байт” деган тушунча мавжуд эмас. Одатда, мақтадан олдинги байтда шоир лирик чекиниш тарзида бирор фалсафий хулоса, теран умумлашма фикр баён этади. Лекин у ғазал байтларининг мазмунан изчиллигига рахна солмайди. Олдинги байтларга мантиқан

боғланган бўлади. Бундай байтда изчил ёритилаётган мавзу юзасидан хулоса, ҳукм чиқарилади. Муаммонинг фалсафий ечими баён этилади. Мазкур байтда ҳам худди шундай ҳодисани кузатиш мумкин. Маълумки, олдинги байтларда лирик қаҳрамон, яъни ошиқ ҳижрондан шикоят қилиб келаётган эди. У заиф ва нолакор бир вазиятда турибди. Байтда шоир ошиқнинг бундай мавкеига танқидий муносабат билдиради. “Толиби содиқ”, яъни садоқатли талабгор топилмас экан, дея фикр юритади шоир. Ваъдага вафосиз ёрнинг жабру ситамларидан оҳ-воҳ чекиш билан кифояланиш чинакам ошиқнинг иши эмас. “Йўқса”, яъни бўлмаса, ёрнинг йўлига ким “аввал”, яъни биринчи бўлиб журъатли, дадил қадам кўйдиким, унинг маъшуқаси рўпарасидан пешвоз чиқмади?! Ер дийдорига садоқатли талабгор журъатли, жасоратли бўлиши лозим. Чинакам ошиқлик табиати шундай бўлади! Ошиқлик журъат, жасорат, фидойилик, керак бўлса, қурбонликни талаб этади.

Тугалланма байтда шоир май образига мурожаат этади. Лирик қаҳрамонни ҳижронзада кўнгил уйини бода билан шод-хуррам этишга чорлайди. Нима учунким, кўнгил уйи шод-хуррамлик билан обод экан, унга қайғу яқин йўлай олмайди. Бу ўринда бода майпарамстликни ифодаламайди, албатта. У қайғуга қарши шодлик рамзи, тазод унсури сифатида қўлланган.

Хулоса қилиб айтганда, “Ул сарви гулрў келмади” ғазали Навоий лирикасининг шоҳ асарларидан биридир. Ғазалнинг “Муножот” куйи билан ашула қилиб айтилиши халқимизнинг энг севимли асарларидан бирига айланишига сабаб бўлган. Муножотнинг мунгли навоси Навоийнинг ҳазин навоси билан шу қадар бир-бирига мостушиб, уйғунлашиб кетганки, ашула маҳоратли мақом устаси, халқимизнинг суюкли хонандаси Бертахоним Davidova томонидан биринчи марта радио орқали ижро этилганида, шаҳару қишлоқлардаги радиокарнайлардан янграганида, юриб бораётган одам борки, тўхтаб, вужудлари кулоқ бўлиб тинглаган. Ҳатто, ашуланинг номи ҳам “Муножот”га айланиб кетган. Кейинчалик бу ашулани Юнус Ражабий, Ориф Алимахсумов, Муҳаммаджон Каримов, Муножот Йўлчиева, Маҳмуджон Тожибоев сингари маҳоратли ҳофизларимиз ҳам қиёмига етказиб куйлаганлар. Умуман, мусикий савод чиқарган бирор санъаткор борки, бу ашулани ижро этмай қолмаган, десак муболаға бўлмас. Шу боисдан, халқимизнинг бирорта назм ва наво давраси, тўй ва бошқа тадбирлари “Муножот” ашуласи наволарисиз ўтмайди. Ғазалнинг мусикий талқини ундаги дард ва мазмунни минг чандон ошириб юборган ҳамда асарнинг мумтозу машҳур бўлишига омил бўлган.

Нурсатулло Жумахўжа,
филология фанлари доктори

Ғазалнинг таржимаси ҳақида

Ғазал нима? Ғазал – бу 5 байтдан 9-11 байтгача бўладиган, биринчи байтнинг ўзаро қофияланиб, қолган байтларининг иккинчи мисраси биринчи байт билан қофиядош бўлган шеър. Охирги байтда муаллифнинг тахаллуси келтирилади.

Шеърий таржимага асарнинг жанр тузилиши, шаклий белгилари катта таъсир кўрсатади. Мисол учун Шарқ шеъриятининг қасида, ғазал, рубоий каби жанрларини бошқа тилга таржима қилганда улардаги муҳим шаклий жиҳатлар сақланмаса, оҳанг ҳам, маъно ҳам юзага чиқмай қолади. Ғазалнинг ҳар бир байти ўзидан олдинги байт билан қофия, радиф, вазн орқали шоирнинг (лирик қаҳрамоннинг) кайфиятини ифодалайдиган интонацияда узвий боғланиб келади. Бу шеърнинг яхлитлигини

таъминлаб, ўқувчига кучли таъсир этадиган бадиий воситадир.

Аруз вазнида ёзилган ғазалларни инглиз тилига таржима қилишда, силлабо-тоник вазнни қўллай олишнинг иложи бўлмаса, силлабик, яъни хижо вазнни ишлатиб, бандлар сонини, бўғинлар сонини сақлаб ёки бироз ўзгартириб, бандлардаги қофиядош сўзларни қайта яратиш мумкин.

Масалан: Алишер Навоийнинг “Келмади” номли ғазали ва унинг таржимасини қиёслайлик.

Ғазални инглиз тилига хижо вазнида таржима қилса бўлади. Фақат аслиятда ҳар бир мисра 15 бўғиндан иборат бўлса, таржимада у яна бир бўғинга кўпаяди. Қофия ва радиф қайтадан яратиласди.

*Having shown her will to come, my mistress that flower fail'd to come
And for my longing eyes that night, a sleep till all hours fail'd to come.*

*And long and long grieved I, stared at the road she used to walk along
Methought in love of hers would die, as my joyful liar fail'd to come.*

Таржимада байт тузилишига риоя қилинган, унда арузнинг ўзи акс этмаган бўлса-да, шарқона оҳангни бир қадар ифодалайдиган шеърий интонация ҳосил қилишга уриниш сезилади. Атоқли таржимашунос олим Иржи Левий метрик вазнга асосланган шеърни бошқа вазнга ўтказиб таржима қилса бўлди, деб айтган эди.

Шарқ адабиётидан немис, инглиз, рус тилларига таржима қилувчилар бу борада кўп йиллар давомида тажриба олиб бордилар, ҳар хил усуулларни синаб кўрдилар. Кўпчилик таржимонлар ғазалнинг байт тузилишини беришга риоя қилдилар. Бу усул ҳозир ҳам давом этмоқда. Атоқли таржимашунос Иржи Левий кванттатив (метрик) вазнга асосланган қадимги шеъриятни (юнон, рим, форс, туркий шеърлар) ҳозирги Европа тилларига таржима қилиш талабларини таҳлил қилиб, қуйидаги назарий хуносаларни баён этган:

1. Вазнни сақлаш.
2. Бошқа вазнга ўтказиб ўгириш.
3. Эркин таржима қилиш.

Ғазални рус тилига ўгириш мушкуллиги хусусида Е. Дунаевский шундай ёзади: “Ғазал шаклини рус тилида бериш ҳаддан ташқари оғир вазифа..., Шаклни аниқ, қайта яратишнинг иложи йўқ, деб ҳисоблаймиз...”

Шунга қарамай, Алишер Навоийнинг машхур “Кечакелгумдир дебон...” деб бошланадиган ғазалининг В.Рождественский рус тилига қилган таржимаси анча муваффақиятли чиқкан:

*Кечакелгумдир дебон ул сарви гулру елмади,
Кўзларимга кеча тонг отгунча уйқу келмади.
Лаҳза – лаҳза чиқдиму, чекдим йўлида интизор
Келди жон оғзимаю, ул шўхи бадху келмади.*

*Кипарис мой – ты сказала, – жди меня! – и не пришла,
Я не спал всю ночь, дождался свето дня, – ты не пришла.
Поминуто умирал я, на дорогу ждать тебя,
Поминуто умирал, я жизнь кляня, – ты не пришла.*

Бунда В.Рождественский байт тузилишини беришга қатъий риоя қилган. Шунингдек, қофияланиш тизими, радифи, байтларнинг жойлашуви, мисралардаги бўғинлар сони таржимада сақланган, вазн ўзгарган бўлса-да, шарқона оҳангни ифодалайдиган шеърий интонация бузилган.

Энди айни шу ғазалнинг Л. Кметюк томонидан инглиз тилига қилинган муқобилини олиб қараймиз:

ЖАҲОН АДАБИЁТИ

*Thought she had promised, that night my willowy beauty
did not come.*

*That night, till very dawn, sleep
did not come.*

*My suffering drove me to scan the road again and again
But though my heart was break,
The frolicsome one didn't come.*

Кўриниб турибдикки, таржимон байт тузилишини чиройли қилиб беришга эриша олмаган. Мисралардаги бўғинлар сони ҳар хил – биринчи байтнинг олдинги мисраси 16 бўғиндан иборат бўлган бўлса, кейинги мисраси 11 бўғинга тушиб қолган. Радифни беришга ҳаракат қилган-у, қофия қайта яратилмаган. Аслиятдан товушлар тақорори, эвфония ҳолати қайта ҳосил қилинмаган. Аслиятдаги биринчи баётда “к” товуши 6 марта “е” унли товуши ҳам яна 6 марта тақорорланган. Таржимада бу ҳолатни сезмайсиз. Үмуман, Навоийга хос нутқий гўзаллик шакли ва олами қайта яратилмаган, шарқона оҳангни ифодалайдиган шеърий интонация бузилган, охирги 6-7 байтлар шеърий ўлчов ритмдан чиқиб кетган.

Д. СУЛТОНОВА, Ф. ҲАЛИМОВА



Ирвинг СТОУН

ХАЁТГА ТАШНАЛИК

Роман¹

Иккинчи кисм

ЭТТЕН

Тео бир кунни Винсент билан Брюсселда ўтказиб, кейин Парижга жўнаб кетди. Баҳор кунлари эди. Брабант кенгликлари жаннатий киёфа қасб этган, ўз таровати ила одамларни қучоғига чорларди. Винсент қора рангли дағал вельвет костюм, сурат чизиш учун сифатсиз қоғозлар сотиб олгач, поездда ота-онасининг кулбаси – Эттенга йўл олди.

Анна-Корнелияning наздида ўғли ҳамон қаттиқ изтиробда эди. Отаси эса тамомила бошқача хаёлда юрарди. Агар Винсент ўз ўғли бўлмаганида, ундан аллақачон юз ўйрган бўларди.

Винсент отасининг соchlари оқариб, қовоқлари салқиб қолганини энди пайқади. Йиллар унинг киёфасида мунгли из қолдириб улгурганди. Гарчи Винсент икки кўлинни бурнига тикиб қайтган бўлса-да, оила аъзолари уни яхши кутиб олишди ва анча кун худди меҳмондек парвариши қилишди.

Ёмғири кунларнинг бирида Анна-Корнелия ошхонага тушиб кўрдики, печь аллақачон қизиб кетган, унинг ёнида панжарага оёғини тираганча Винсент ўтирад, кўлида эса “Мехнат онларида” суратининг деярли тайёр нусхаси турарди. Онаси у билан илиқ сўрашди.

– Бунча эрта туриб олдинг, Винсент? – сўради меҳрибонлик билан.

– Озроқ ишламоқчи эдим.

Она аввал суратга, кейин ланғиллаб турган печга қаради. Унинг назарида сурат худди ёш болаларнинг эрмагига ўхшаб туюлди.

– Сен энди бутун умр расм чизиб ўтмоқчимисан?

– Ҳа, ойижон!

Винсент онасига кейинги режалари, отаси унга ёрдам бермоқчи экани ҳақида гапириб берди. Анна-Корнелия кулимсираб, елкасини қисганча чиқиб кетди ва бироз ўтгач, кўлида хат билан қайтди.

– Қариндошимиз Антон Мауве ҳам рассом, у анча пул топади. Мана бу хатни опамдан ўтган куни олгандим. Биласан, Мауве холангнинг қизи Йетга уйланган. Опамнинг ёзишича, унинг асарлари Гупилда 500-600 гулдендан сотилаётган экан.

– Ҳа, Мауве таникли рассомлардан бири.

– Битта суратни чизиш учун қанча вақт кетади? – сўради Анна-Корнелия.

– Ҳар хил, баъзиларини чизиш учун бир неча кун кетади. Айримларига йиллаб вақт керак бўлади.

– Йиллар, дейсанми? Вой, худойим!

¹ Охири. Боши ўтган сонда.

– Одамнинг расмини ўзига ўхшатиб чиза оласанми?

– Билмадим, ойи, мен ҳозир сизга байзи бир суратларимни кўрсатаман.

Винсент суратларни олиб қайтганида, онаси печь устига сув тўла чўян идишни кўйиб қўйганди.

– Сен ёқтирган творогли пудинг тайёрладим, – деди онаси. – Эсингдами, ўғлим?

– Албатта эсимда, ойижон!

У онасининг бўйнидан оҳиста қучди. Онаси жилмайиб қўйди. Кейин ўғлининг Боринажда чизилган суратларини кўздан кечира бошлади.

– Винсент, буларнинг юзига нима бўлган? – сўради ҳайратланиб.

– Ҳеч нарса. Нима қипти?

– Бу одамларнинг юзи қани?

– Ҳа-а! Мени уларнинг фақат ташқи тузилиши қизиқтиради.

– Лекин юзларини ҳам чизсанг бўларди-ку? Менимча, бу ерда, Эттенда ўз портретини чиздиришни истайдиган аёллар кўп. Бу касб билан кун кечирса бўлади.

– Ҳа, бунинг учун қандай чизиш лозимлигини ўрганишим керак.

Она товадаги кеча ўзи тайёрлаган творог устига тухум чақди.

– Қандай чизишни ўрганиб бўлганимдан кейин портретларимни сотиб олишади, демоқчимисан?

– Гап бунда эмас, – деди Винсент бош чайқаб қофоз устида қаламни бемақсад юргизаркан. – Мен ҳақиқий маънода яхши расм чиза олишим керак.

2

Ёмғир тиниб, ҳаво очилиб кетди. Винсент мольберт ва бошка расомлик анжомларини кўтариб, атрофни кеза бошлади. У кўпинча Сееп яқинидаги яланг тепаликларни, Пассьеарт ботқоқлигидаги нилуфаргуллар суратини чизишни ёқтиради. Ҳамма бир-бирини яхши танийдиган кичкина шаҳарча ҳисобланмиш Эттенда ҳамма бу йигитга бироз шубҳа билан қарабарди. Чунки бу ернинг одамлари қора вельвет костюм кийиши-мас, устига-устак, кап-катта бу одамнинг қофоз ва қалам кўтариб юриши табиийки, хаммада гумон уйғотарди.

Кунларнинг бирида у қарагай кесиши жараёнини қофозга туширди. Ўрмонда дараҳт кесиб юрган бир ўтинчи кўпинча унинг ҳаракатларини кузатгани келар, елкаси оша унинг ҳаракатларини кузатар, хоҳолаб куларди. Сурат бир неча кун давомида ишланди. Ўтинчи эса ҳар куни келиб, унинг устидан кулиб кетарди. Винсент, ниҳоят, бу кулгунинг боиси билан қизиқди.

– Сизнингча дараҳт шунчалик кулгилими? – хушмуомалалик билан сўради ўтинчидан.

– Тўғрисини айтсам, роса кулгили, – деди ўтинчи лаб-лунжини ийғишиштиролмай. – Сен эса, фирт тентаксан.

– Агар мен дараҳт ўтқазсам, тентак бўлламанми? – сўради Винсент босиқлик билан.

– Йўқ, албатта.

– Бу дараҳтни парвариш қилсан-чи?

– Албатта, йўқ.

– Унинг мевасини терсам ҳам тентак ҳисобланаманми?

– Нима, устимдан куляпсанми?

– Анави одамларга ўхшаб, дараҳт кессам-чи?

– Нега энди? Дараҳт бўлгандан кейин кесишида-да?
 – Демак, дараҳтни экиш, парваришилаш, мевасини териш, кесиши оддий хол, лекин унинг суратини чизиш тентаклик экан-да?

Ўтинчи яна тиржайди.

– Сен вақтни бекорга сарфлаётганинг учун ҳам тентаксан. Айтганча, тентаклигингни ҳамма билади-ку?

Кечкурун оила аъзолари каттакон ёғоч стол атрофида йигилдилар. Кимдир хат ёзар, кимдир газета ўқир, аёллар эса тикиш-бичиш билан машғул эдилар. Винсентнинг укаси ҳали кичкина бўлгани учун умуман сухбатга қўшилмасди. Синглиси Анна эрга тегиб кетганди. Елизавет учун акасининг бор-йўқлиги фарқиздек эди. Фақат Виллемина акасига нисбатан хайриҳоҳ, уни ич-ичидан яхши кўтар, аммо ҳис-туйғуларини сездиришни истамасди.

Стол тепасида нур сочиб туган абажурли чироқ ёруғида Винсент кун бўйи туширган чизмаларини оққа кўчиради. Теодор ўғли битта шаклни ўн мартараб қайта чизиши, ёқмаса, пешонаси тиришиб четга итқитишини жим кузатиб ўтиради. Охири отанинг токати ток бўлди.

- Винсент, қачондир расмни кўнглингдагидек қилиб чиза оласанми ўзи?
- Йўқ, – деди Винсент ўжарлик билан.
- Унда сен катта хато қилмаяпсанми, деб кўрқаман. Агар сенда истеъ-дод бўлганида илк уринишдаёқ яхши сурат чизолган бўлардинг.
- Балки шундайдир, – деди Винсент ўзи чизган деҳқон суратига маъ-носиз термулиб. – Дастрраб натура рассом учун қаршилик бўлиб туюлади. Аммо ҳақиқий мусаввир бу қаршиликни енгиши, курашиши лозим.
- Билмадим, – деди Теодор. – Лекин ҳеч қачон ёмонлиқдан яхшилик туғилмайди.
- Йўқ, дада, – асабийлашди Винсент. – Санъатнинг ўз қонун-қоидалари бор.

3

У туну-кун тинимсиз ишларди. Расм чизишдан чарчаган пайтларда эса мутолаага бериларди. Китоб ўқиш толиктирганида, ухлагани ётарди.

Винсент инсон тасвирини чизиши унга катта фойда келтириши, айникса, пейзаж устида ишлашида катта ёрдам беришига ишонарди. Масалан, у мажнунтолни чизаётганида унга худди тирик мавжудот сифатида қаарар ва бу ўз натижасини берарди ҳам. У пейзажни жуда ёқтирас, Гаварни, Домье, Доре, Де Гру ва Фелисьен Ройснинг шу йўналишдаги асарларини жуда кадрларди. Натура билан ишлаш маҳоратини кундан кун ошириб бораркан, Винсент қачондир журнallарга безак ишлашни ҳам ўрганиб олишга ишонарди. Шу тариқа то ўз соҳасининг етук вакилига айлангунига қадар ўз аравасини ўзи тортишни истарди.

Ўғли шунчаки бекорчиликдан мутолаага берилган бўлса керак, деган андишага борган Тео бир куни ўғлидан:

– Винсент, ҳар доим кўп ишлашинг кераклигини айтасан. Лекин нима учун кўп вақтингни манави аҳмоқона французча китобларингга сарфла-япсан? – деб сўради.

Винсент “Горио ота” китобининг керакли сахифасига белги қўйиб, ёпди-да, отасига юзланди:

– Биласизми? – деди у. – Одамлар ва манзараларни чизиш учун фақат сурат чизиш йўл-йўригини эмас, адабиётни ҳам пухта билиш керак.

– Тушунмадим, мен яхши маъвиза ўқишим учун ошхонага бориб, ойинг

тилни қандай дудлаётганини томоша қилишим керакми?

Винсент отасининг қиёсига эътиroz билдириб ўтирамади.

– Мен инсоннинг суюклари, мушаклари ва терисини ўрганмасдан туриб, унинг ташқи кўринишини аниқ чизолмайман. Инсоннинг ички дунёсини ўрганмасдан туриб, унинг юзини ҳам ҳаққоний тасвирлаб бўлмайди.

– Эҳ, Винсент, – чуқур ух тортди Теодор. – Сендан фақат назариячи чиқадими, деб қўрқаман.

Кунлар шу тахлит ўтаверди. Ёз бошланди. Энди ёмғир эмас, жазира маисиқ Винсентга арчазорларни кезишга имкон бермасди. У жуда кўп суратларни қайта ва қайта ишлади. Унинг мўйқалами остида картошка арчиётган аёл, узун таёкли чўпон, касалванд қари дехқон сувратлари яралди.

Винсент бу суратлар устида тинимсиз, туну кун меҳнат қилганди.

Шахар одамлари ҳамон Винсентдан ўзларини олиб қочишар, унга ётсираб қарашарди.

Дехқонлар эса, уни ёқтиришар ва ишонишарди. Винсент замин ва дехқон ўртасида қандайдир боғлиқлик борлигини сезар, буни ўз суратларида ифодалашга ҳаракат қиласди.

– Одам ва Ерни айириб турадиган аниқ чизиқлар керак эмас, – деди у кунларнинг бирида суратларини томоша қилаётган онасига. – Уларни ажратиб бўлмайди.

– Винсент, – деди у бир куни эрталаб ўғлига. – Бугун соат иккода вақт ажрата оласанми? Сен билан бир жойга меҳмонга борамиз.

– Ойи, мен вақтимни беҳуда сарф қилолмайман.

– Нега беҳуда бўларкан?

– Мен сурат чизишим керак. Меҳмонда нимаям қиласдим?

– У ерда эттенлик нуфузли хонимлар бўлишади.

Винсент эшикка кўз қирини ташлади. Кейин қийналиб бўлса-да, меҳмонга бора олмаслигининг сабабини тушунтира кетди:

– Сиз айтган аёлларда характерни қидириб топиш қийин.

– Тентаксан! Уларнинг феъл-автори жуда аъло даражада. Улар ҳакида бирон ёмон гап эшитмаганман.

– Тўғри, лекин уларда ўзига хослик етишмайди. Ҳаммаси бир-бирига тақлид қиласди. Ҳаёт уларни бир-бирига ўхшатиб қўйган. Сизга қандай тушунтирсан экан... Улар қийинчиликсиз ҳаёт кечирадилар, шунинг учун уларнинг чеҳраларида алоҳида ифодани тополмайсиз.

– Биламан, ўғлим, сен аллақандай мардикор ёки дехқонларни тасвирлашни ёқтирасан. Лекин бундан нима фойда? Уларнинг сариқ чақаси ҳам йўқ. Аммо шаҳарлик хонимлар ўз портрети учун яхшигина ҳақ тўлайдилар.

Винсент бир кўли билан онасини кучиб, иккинчиси билан унинг иягини кўтарди. Онанинг кўзларида меҳр ва мулоийимлик порлаб турарди. Бироқ нега бу кўзлар ўғлининг ички оламини кўрмокдан ожиз?

– Ойижоним, – деди у шивирлаб. – Илтимос, менга озгина бўлса ҳам ишонинг. Мен нима қилаётганимни яхши биламан. Кўрасиз, мен катта муваффақиятга эришаман. Ҳозирча бекорчи нарсаларга вақт сарфлаётгандек кўринарманд. Вақти келиб, ўз асарларим ортидан катта даромад кўраман.

Ўша куни Винсент боғбон Пит Кауфманни турли кўринишларда туриб беришга кўндириди. Тушдан кейин боғда уни кутажагини айтди. Винсент боққа чиққанида боғбон ювениб, тараниб, кўча кийимида уни кутиб турганди.

– Шошмай тур, мен уйдан курсичамни олиб чиқай.

– Сени бу қўринишда чизолмайман, – деди Винсентнинг ҳафсаласи пир бўлиб. – Мен сени эски коржомангда, ерни юмшатаётган пайтингдаги ҳақиқий боғбон ҳолатингда чизмоқчи эдим.

– Эски иштоним илма-тешик бўлиб кетган, белкурагим ҳам занг босиб ётибди, мени шу туришимда чизақол...

Винсентнинг далага боришдан, у ерда икки букилиб ер чопаётган дехқонларнинг суратини чизишдан бошқа чораси қолмаганди. Ёз тугаб борар, бироқ ҳали кўп нарсани ўргана олмаганидан афсусда эди. У яна бирор рассом билан ҳамкорлик қилиб, унинг устахонасида ишлаш ҳақида ўйлай бошлади. Ҳа, у ҳақиқий устозлар яратган суратларни кўришни, уларнинг иш жараёнини кузатишни истарди. Шунда у ўз хатоларини англай олади.

Тео ўз мактубларида уни Парижга чақирап, бироқ Винсент ўзини бунга тайёр деб билмасди. Унинг ишлари ҳали анча хом, кўримсиз ва дағал. Гаага эса анча яқин, пиёда юрса, бир неча соатда ета олади. У ерда дўсти Минхер Терстех, қариндоши Антон Мауве яшайди. Балки Гаагага кўчиб ўтгани маъқулдир? У Теодан шу ҳақда маслаҳат сўраганида, жавоб тариқасида унга йўлкира учун пул жўнатди.

Гаагага боришдан аввал Винсент Терстех ва Маувенинг муносабатини билмоқчи бўлди. Агар улар ёрдам беришни истамаса, Винсент бошқа шаҳарга кетади. У ўз асарлари ва кийимларини эҳтиёткорлик билан йўлхалтасига жойлаб, бир олам орзу-умидлар билан пойтахтга йўл олди.

4

Минхер Герман Гейсберт Терстех Гаага мусаввирлик мактабининг асосчиси ва бутун Голландияда суратлар савдоси билан шуғулланувчи энг йирик савдогар эди. Мамлакатнинг турли худудларидан сурат сотиб олмоқчи бўлғанлар ундан маслаҳат сўрар эдилар.

Терстех амакиси Винсент Ван Гогнинг ўрнини – Гупилнинг бошқарувчиси лавозимини эгаллаган пайтда, умидли ёш голланд мусаввирлари мамлакатнинг турли бурчакларига тарқалиб кетишганди. Антон Мауве ва Йосеф Амстердамда, Якоб ва Биллем Марислар вилоятларига кетишган, Йосеф Израэльс, Иоганнес Босбоом ва Бломмерс қўним билмай, шаҳарма-шаҳар кўчиб юришарди. Терстех эса уларга мактуб йўллаб, бирдамликка, кучларни бирлаштириб, санъат ривожи йўлида харакат қилишга чакиради.

Шу тариқа Терстехнинг таклифи билан рассомлар бирин-кетин Гаагада тўплана бошладилар. Гарчи ўша пайтда уларнинг асарларига унча эҳтиёж бўлмаса-да, Терстех уларни ўз ҳимоясига олиб, ёрдамини сира аямасди.

У Израэльс, Мауве ва Якоб Марис асарлари омма орасида шухрат қозонишидан олти йил аввал уларни сотиб олишга киришган эди.

Йиллар ўтди. Терстех сабр-тоқат билан Босбоом, Марис, Нейхейс асарларини сотиб олиб, уларни ўз дўкони орқасидаги хонага жамлаб бораради. Бу мусаввирлар то ўзлари кўзлаган чўққига чиққунга қадар уларни кўллаб-қувватлаш лозимлигини у яхши биларди.

Винсент Гаагага боришга чоғланган кезларда Терстех кутган муваффақият яқинлашган, Мауве, Нейхейс, Израэльс, Якоб ва Биллем Марислар, Босбоом ва Бломмерс асарлари Гупил орқали юқори нархларда сотилмоқда эди.

Терстех Винсентни аввалдан танир ва ёқтирап, Гупилнинг Лондондаги филиалига жойлашиши учун ўзи ҳам тавсиянома ёзиб берганди.

Гупил галереяси Гааганинг марказидаги Плаатс майдонидаги 20-үйда жойлашганди. Винсент Гупил биносидан сўнгги марта чиқиб кетганига ҳам саккиз йил бўлганди.

Саккиз йил илгари уни ҳамма ёқтирад, ҳамма у билан фахрланарди. У Винсент амакисининг севимли жияни эди-да! Вақти келиб, у адаш амакисининг ишларини давом эттирибгина қолмай, унинг вориси бўлишига ҳеч ким шубҳа қилмасди. У ҳозир ҳамманинг эътиборидаги бадавлат одам бўлиши мумкин эди. У айни пайтда Европадаги энг йирик сурат галереяларини ҳам ўз қўлига олган бўларди. Унга нима бўлди ўзи?

У бундай саволларга ортиқча вақт сарфламаслик учун қадамини тезлатди ва Плаатс майдонини кесиб ўтиб, Гупил биносига кирди. Винсент деворлардаги таниқли рассомлар ижодига мансуб асарларга ҳавас билан бокди: унинг асарлари ҳам мана шундай галереяларда қиммат нархларда сотилармикин? Қийин, жуда қийин!

Винсент Мауве тасвирлаган қўйлар галасига маҳлиё бўлиб қолди. Галерея хизматчилари паст овозда нимадир ҳақда ўзаро гаплашишар экан, бу йигитга нима кераклиги билан қизиқиб ҳам қўришмади. Терстех зинанинг энг паст поғонасига тушганида, ўзининг собиқ ходимини таниб қолди. У бир муддат йигитнинг жайдари кийимларига, қўлтиғига қисиб олган каттакон тугунга назар солди. Салоннинг оҳанжамали фонида унинг қўриниши ўта ғайриоддий эди.

– Хуш келибсан, Винсент. Сен бизнинг полотноларимиз билан қизиқиб қолган қўринасан.

Винсент дарҳол овоз келган томонга ўғирилди:

– Ҳа, улар нақ мўъжизанинг ўзи. Ўзингиз тузукмисиз, минхер Терстех? Үйдагилар сизга салом айтиб юборишганди.

Улар қўл сикиб қўришишди.

– Қўринишингиз жуда ажойиб, сиз ҳатто анча ёшарибсиз ҳам.

– Ҳа, йиллар менинг фойдамга ишляпти, – кулди Терстех. – Қани, Винсент, юр менинг хонамга.

Винсент унинг ортидан кенг зинапоялар бўйлаб кўтаришлар экан, кўзларини девордаги сувратлардан узолмасди. У энди ҳақиқий санъат асарлари билан юзлашмоқда эди. Терстех ўз хужрасининг эшигини очиб:

– Марҳамат, ўтири, Винсент! – деди.

Мезбоннинг таклифидан хушини тўплаб олган Винсент бўғчасини каерга қўйиши билмай каловланиб, у кўрсатган жойга ўтириди.

– Бир пайтлар менга бериб турган китобларингизни олиб келгандим, минхер Терстех – деда у “Кўмир парчаси билан ишлаш” китобини стол устига қўйди. – Бу китоб жуда кўп ишларимда катта ёрдам берди.

– Қани, менга чизган нусхаларингни кўрсат-чи? – деди Терстех.

Винсент жилдга солинган қоғозлар орасидан Боринажда чизилган суратларни олиб, Терстехга узатди. Кейин Эттенда чизилган расмларни ҳам ажратиб берди. Терстех суратларни бирма-бир сукут сақлаганча кўздан кечирарди. У айrim суратларга қараб, бош чайқаб қўяр, аммо чурқ этмасди. Шунда Винсент учинчи тўплам – Гаагага келишдан аввалроқ ишланган суратларни олиб, унга узатди. Терстех қизиқиб қолди.

– Чизиқлар аниқ, – деди у битта суратни кўздан кечираркан. – Сояларни тасвирлашинг ҳам менга ёқяпти. Пишиб қолган қўринасан.

– Үнча ёмон чиқмаганини ўзим ҳам сезяпман, – деди Винсент қизариб-бўзариб.

У Терстехга ҳамма суратларини кўрсатгач, унинг фикрини билишга қизиқаётган эди.

– Ҳа, Винсент, – деди Терстех узун, нозик бармоқлари билан столни чертаркан. – Сен анча-мунча илгарилаб ҳам кетибсан. Дастьлабки суратларингни кўриб, бироз қўрққандим. Анча меҳнат қилганинг кўриниб туриди.

– Фақат интиляпман, холосми? Бирор ўзига хослик кўринмаяптими?

Винсент бу саволни ўринсиз берганлигини билса-да, лекин ўзини тийиб туролмади.

– Менимча, ҳали бу ҳақда гапиришга бироз эрта, Винсент.

– Ҳаксиз, яна битта-иккита суратим бор. Қарши бўлмасангиз, уларни ҳам кўрсатсам.

– Бажонидил.

Винсент тугунидан кўмир қазиб олувчилар ва деҳқонлар тасвирланган суратларни олиб узатди. Терстех бу сафар уларни хотиржам кўздан кечирди. Винсент унга юрак ютганча қараб турарди. Ўзи гап бошламаса, бу сукунат узоқ давом этишини англагач:

– Наҳотки, мен ҳеч нарсага эришолмаган бўлсам, минхер Терстех? Қаранг, Брабантдаги чизмаларим Боринажда чизилган суратларга қараганда яхшироқ эмасми?

– Сен ҳақсан, – деди Терстех деразага кўз ташлаб. – Улар нисбатан яхшироқ бўлиши мумкин. Лекин зўр деб бўлмайди. Қаериdir ишонарсиз чиқкан, лекин нималигини тушунтиrolмайман. Анча вақт нусха кўчириб расм ишлашинг керак, чамамда. Оригинал суратлар ишлашингга ҳали эрта шекилли. Оддий нарсаларни ўзлаштиришингга тўғри келади. Натура билан эса кейинроқ ишларсан.

– Мен Гаагада қолиб, ўқисам, ишласам дегандим. Сизнингча, бундан бирор фойда чиқармикин?

– Гаага, албатта, мўъжизакор шаҳар. – Бу ерда яхши галереялар ҳам, мусавиirlар ҳам кўп. Очигини айтсам, унинг Антверпен, Париж ёки Брюсселдан нимаси афзал эканини айтольмайман, – деди у масъулиятдан ўзини соқит қилиб.

Винсент Терстехнинг қабулидан кайфиятсиз ҳолда чиқди.

5

Эртаси куни тонг отиши билан Винсент Эйлебомен кўчасига, Маувенинг уйига йўл олди. Маувенинг қайнонаси Карбентуслар оиласидан эди. Азалдан оилавий борди-келдилар бўлгани сабабли улар Винсентни жуда илиқ кутиб олишди.

Мауве елкаси кенг, миқтидан келган кимса эди. Унинг чап тарафга тараалган жингалак соchlарининг бир қисми қалин қошини тўсиб турарди.

Мауве куч-гайратга тўла инсон. Вақтини бекорга ўтказмас, мабодо, бирор ишдан толиқса, дарров бошқа иш билан шуғулланарди.

– Йет уйда йўқ, Винсент, – деди Мауве. – Балки устахонага борармиз? У ерда ўзимизни эркинроқ ҳис этамиз.

– Бўпти, кетдик, – деди Винсент. У чиндан ҳам Маувенинг устахонасини кўришни хоҳлаётган эди.

Устахона ям-яшил боф ўртасидаги ёғоч уйчадан иборат экан. Мауве ишлаётганида ҳеч ким унга халал бермасди. Винсент бўсағадан ҳатлаши биланоқ димоғига тамаки ҳиди урилди ва мольбертга ўрнатилган кўпгина суратларга кўзи тушди. Деворларга турли лавҳалар осилган бўлиб, бир бурчакка эски стол тақаб кўйилганди. Хуллас, ҳар томонда рассомчиликка оид бирор буюмни кўриш мумкин эди. Гарчи ҳамма нарса сочилиб ётган

бўлса-да, Винсентга бу хонадаги барча нарса тартиб билан тургандек туюлди.

Оилавий масалалар хусусида сухбат бир неча дақиқа чўзилди, холос. Сўнг ҳар иккиси учун қизиқарли бўлган масалага ўтишди. Мауве негадир анчадан бери рассомлар билан учрашишдан ўзини олиб қочадиган бўлиб қолганди. Бироқ, бу сухбат анча дилкаш ўтди.

Маувенинг аёли келгач, у Винсентни кечки овқатга таклиф этди. Овқатдан сўнг Винсент Маувенинг болаларини завқ билан кузатаркан, ўзининг ҳам ана шундай, ширингина оиласи бўлишини ич-ичидан истади. Унга ана шундай баҳтли кунлар насиб этармикин?

Кечки овқатдан сўнг улар яна устахонага қайтиб, тамаки чекишиди. Винсент ўз нусхаларини Маувега кўрсатди.

– Ёмон эмас, – деди Мауве унинг ишларини кузатиб. – Нусха сифатида яхши-ю, аммо улардан нима фойда?

– Тушунмадим?

– Сен фақат нусха кўчирияпсан, холос. Худди ёш боладек. Ҳақиқий меҳнатни сендан аввал қилиб бўлишган.

– Нусха олиш менга натурани ҳис этишни ўргатади, деб ўйлагандим.

– Бўлмаган гап! Сен ижодкор бўлмоқчи экансан, ҳаётга қара! Бекорчи нарсалар билан вақтингни ўтказма. Мустақил ишлаган суратларинг борми?

– Ҳа, бор!

Винсент тугунчасидан боринажлик кўмирчилар ва брабантлик дехқонлар тасвирангандан суратларни олиб, унга узатди. Мауве суратларни дикқат билан кўздан кечиришга тушди. Винсент айни дамда нафас олишга ҳам кўркиб турарди.

Мауве узоқ вақт суратларни томоша қилиб турди-да, беихтиёр мийигида қулиб кўйди. Кейин Винсентнинг ишчи тасвирилган суратини ўзининг ҳали якунига етмаган полотносининг ёнига кўйди.

– Қаерда адашганимни энди билдим, – деди у ҳаяжонланиб, кейин қўлига қалам олиб, ўзи чизган суратга қўшимча чизгилар киритди. – Ана энди тиланчи тирик одамга ўхшади.

Кейин, Винсентга яқинлашиб, унинг елкасига қўлини кўйди.

– Хафа бўлма, сен тўғри йўлдан кетяпсан. Суратларинг бироз жайдари, лекин уларда ҳақиқат учқунлари бор. Уларда мен ҳар доим излаган ҳаётйлик ва оҳанг бор. Сен энди мўйқалам ва бўёқларни ишга сол. Ҳали анча меҳнат қилишинг керак.

Винсент таваккал қилиш пайти келганини англаб етди.

– Мауве, мен Гаагага кўчуб келиб, шу ерда ижод қилмоқчиман. Сиз менга ёрдам берасизми? Менга сиздек инсоннинг ёрдами керак. Бугун сиздан анча нарса ўргандим. Ахир ҳаммага ҳам йўл кўрсатувчи устоз керак-ку?

Мауве бир муддат ҳали битмаган суратига тикилиб турди. Дафъатан юзидағи бояги табассум, самимият бирданига йўқолгандек бўлди.

– Мен банд одамман, – деди у. – Бошқаларга ёрдам беришим қийин. Рассом бироз худбин бўлиши, ҳар лаҳзанинг қадрига етиши лозим. Шу боис, сенга ёрдамим тегмайдими, деб кўркаман.

– Сиздан кўп нарса сўрамайман, – деди Винсент нафаси бўғзига тикилиб. – Фақат ҳар замонда устахонангизга келиб, сиздан маслаҳат олиб турсам, шу ерда бироз ишласам, сизнинг ижодингизни кузатсан бўлди. Сиз ҳам менинг машқларимни кузатиб, хатоларимни кўрсатсангиз...

– Бу сенга осон туюлиши мумкин, лекин шогирд олиш мен учун ҳазилакам иш эмас.

– Ростини айтяпман, сизга оғирлигим тушмайди.

Мауве узоқ ўйга толди. У чиндан шогирд олишни истамас, чунки ишлаётган пайтида ёнида бирорлар бўлишини ёқтириласди. Қолаверса, у ўз асарлари ҳақида гапиришга хуши йўқ, бошқаларнинг суратларини баҳолашга ҳам чоғи келмасди. Аммо минг қилса ҳам Винсент бегона эмас, қариндошлиги бор. Қолаверса, Винсентнинг амакиси Ван Гог Мавуге анча ёрдам берган. Асарларини Гупил орқали савдога қўйишган, шу сабабли довруғ қозонган.

– Майли, Винсент, – деди ниҳоят Мауве, – бир уриниб кўрайлики? Бир-биримизга ёрдамимиз тегармикин? Мен кузда Дрентга бориб келмоқчиман. Сен қишининг бошларида Гаагага келсанг бўлади.

– Менга ҳам маъқул. Бир муддат Брабантда қиласидиган ишларим бор эди.

– Унда келишдик.

Винсент уйига қайтаркан, ўзига устоз топганидан хурсанд эди. У энди таниқли рассом билан бирга ишлайди. Кейин ўзи ҳам бетакрор суратлар чиза бошлайди. Кимлигини барчага намоён этади.

Учинчи қисм

ГААГА

1

Мауве ҳануз Дрентеда эди. Винсент Эйлебоомен атрофидаги барча даҳаларни айлануб чиқиб, Рэйн вокзалининг орқа томонидан кичик бир жой топди. Устахонанинг пишир-куйдир қилса бўладиган жой ҳамда жанубга қараган катта деразаси бўлиб, кенгтина хона экан. Бурчакда пастаккина печка турарди. Бу уй Гааганинг чет кўчаларидан бири Схенквегда жойлашган бўлиб, ортида кенг яйловлар ястаниб ётарди.

Винсент пишиқ бир ошхона столи, иккита оддий стул ва адёл сотиб олди, унга ўраниб пол устида ётиб юрди. Бу харажатлар унинг чўнтагини қоқлаб қўйди, аммо Тео навбатдаги юз франкни жўнатадиган кун – ойнинг биринчи санасига яқин қолган эди. Январь ойининг аёзи сабабли очиқ ҳавода ишлаб бўлмасди, модель ёллашга эса Винсентда ортиқча пул йўқ эди. Шу боис Маувенинг ёнига келди.

Мауве тер тўкиб, катта бир сурат устида ишлар, соchlари тўзғиб, кўзларини беркитганди. У бу йил жуда катта иш бошлаб қўйганди – бу сурат Салон учун аталган бўлиб, Мауве унда Схевенинген қирғоғида отларнинг бир балиқчи қайифини сувдан тортиб олаётганини тасвирлашни ўйлаб қўйганди.

– Барibir келибсан-да, Винсент. Хўп, яхши, сендан рассом ясаймиз. Туришга жой топдингми?

– Ҳа, Схенквегда, Рейн вокзалининг ортидаги бир юз ўттиз саккизинчи уйга жойлашдим.

– Ҳа, бизга яқин экан. Пулинг етарлимиз?

– Унчалик кўп эмас. Бир стол ва икки дона стул сотиб олдим.

– Ва битта каравот, – қўшимча қилди Йет.

– Йўқ, полда ётиб юрибман.

Мауве бир нималар деб Йетга шипшиди, аёл чиқиб кетиб, бир муддатдан сўнг ҳамён кўтариб қайтди. Мауве ундан юз гульден чиқариб:

– Манавини ол, Винсент, кейин қайтарарсан, – деди у. – Ўзингга қаравот сотиб олгин. Кечаси яхши ҳордик олишинг керак. Ижара ҳақини тўладингми?

– Йўқ, ҳали.

– Ҳа, мана энди тўлаб қутулиб қўй. Ёруғлик масаласи қандай?

– Ёруғлик яхши, фақат хонада биттагина дераза бор, у ҳам бўлса жануб тарафга қараган.

– Бу яхши эмас, нимадир ўйлаб топиш керак. Моделга тушадиган қуёш нури ҳар ўн дақиқада ўзгариб туради. Албатта парда сотиб олишинг керак.

– Мауве, сиздан қарздор бўлишни истамайман. Мени ўқитишга рози бўлсангиз, шунинг ўзи етарли.

– Кўявер, Винсент.

– Тез орада суратларимни сотаман деб умид қиласман, ўшанда албатта қарзимни қайтараман.

– Терстех сенга ёрдам беради. У суратларни эндиғина чизишни ўрганаётган вактимдаёқ уларни сотиб ола бошлиганди. Аммо сен акварель ва мойбўёқ билан ишлашни бошлишинг керак. Қаламда чизилган суратларни сотиш бироз мушкул.

Ўзининг миқти гавдасига қарамай, Мауве чаққон ҳаракат қиласади.

– Винсент, – деди у, – мана, керакли анжомлар. Кел, сенга палитрани қандай ушлаб, мольберт қаршисида қай тарзда туришни ўргатаман.

У Винсентга бир неча техник усулларни кўрган Мауве ҳайратга тушди:

– Ажойиб! Сени зеҳни паст деб ўйлаган эдим, адашган эканман. Бу ерга ҳар тонг келиб акварель билан ишлашни ўрганишинг мумкин. Сени “Пульхри”га аъзо қилишларини сўраб кўраман. У ерда ҳафтасига бир неча марта модел чизиш имкониятига эга бўласан. Яна рассомлар билан танишасан. Чизганларингни сота бошлигач, клубнинг teng хуқуқли аъзосига айланасан.

– Ҳа, модел чизишни жуда истардим. Натурачи қиз ёллашга ҳаракат қиласман. Инсон гавдасини чизишни ўрганиб олсан, қолгани ўз-ўзидан бўлаверади.

– Тўғри, – маъқуллади Мауве. – Бизнинг ишимизда энг мушкули бу – инсон гавдасини тасвираш. Буни уddyалай олсанг, ўт-ўлан, жониворлар ва уфқни тасвираш осон кўчади. Айрим рассомлар инсон гавдасини тасвирашга ожизлик қилгани учун ҳам буни четлаб ўтадилар.

Винсент каравот ва парда сотиб олди, ижара ҳақини тўлади. Брабантда чизган суратларини хона деворларига осиб қўйди. Бу суратларни ҳеч ким сотиб олмаслигини Винсент билар, чунки энди ўз хатоларини аниқ кўра бошлиган эди. Бироқ бу чизмаларда қандайдир табиийлик бордек, ҳақиқий иштиёқ билан чизилгандек эди. Бу иштиёқнинг қандай пайдо бўлганини ва қаерга ғойиб бўлганини Винсентнинг ўзи ҳам билмасди. Бунинг ҳақиқий қийматини Де Бок билан дўстлашмагунча билмаганди.

Де Бок жуда дилбар, тарбияли, хушмуомала, ўзига тўқ йигит экан. У Англиядага таълим олганди. Винсент бу йигит билан Гупилда танишиб колди. Де Бок Винсентнинг фирт тескариси эди. Ҳаётга енгил қарап, ҳамма нарсани хотиржам ва бепарво қабул қиласман, жуда мулойим эди.

– Менинида бир пиёла чой ичмаймизми? – таклиф қилди у Винсентни.
– Сизга баъзи ишларимни кўрсатмоқчиман.

Де Бокнинг устахонаси Гаага зодагонларининг энг бадавлат даҳаси – Виллемс-паркда эди. Устахона деворлари оч тусдаги духоба билан қопланган. Иш столи, китоблар билан лиқ тўлган жавон ва шарқона гилам

хонага кўрк бағишилаб туарди. Винсент ғариб устахонасини эслаб, ўзини қашшоқ дарвешдай хис этди.

Де Бок самоварга ўт ёқиб, оқсоч аёлни печенъега жўнатди. Сўнг жавондан бир сурат олиб, уни мольбертга қўйди-да:

– Энг охирги чизган суратим, – деди.

Терстех уни қашф этиб, қадрлай бошлагандан бери Де Бокнинг ўзига ишончи ортганди. Сурати Винсентга ёқишига асло шубҳа қилмасди. Кўлига узун рус папиросини олди. (Айнан шу папиросга бўлган ишқибозлиги билан у бутун Гаагага танилган эди), Де Бок чекиб туриб, Винсентнинг юз ифодасини кузата бошлади.

Винсент суратни дикқат билан томоша қила бошлади.

– Табиатни тасвирилашда чакки эмас экансиз, Де Бок, – деди Винсент. – Унга қандай тароват беришни ҳам яхши билар экансиз.

– О, ташаккур, – мамнун бўлди Де Бок, бу баҳони мақтов ўрнида қабул қилас экан. – Қани, чойга марҳамат.

Винсент чойни қимматбаҳо гилам устига тўкиб юборишдан кўркиб, пиёлани иккала қўли билан тутиб олди. Де Бок самовар ёнига бориб, ўзига ҳам чой қўйди.

– Бу манзарада бир нарсагина менга ёқинқирамади.

– Сизга айнан нима ёқмади? – сўради Де Бок хотиржам.

– Одамларнинг гавдалари. Улар бироз нотабий чикқандек кўринаяпти.

– Биласизми, – тан олди Де Бок диванга қулай жойлашиб олиб, – инсон гавдасини қандай қилиб тўғри чизиш мумкинлиги ҳақида тез-тез ўйлайман. Бироқ ҳар ким ҳам бунинг уддасидан чиқа олмайди, шекилли. Ниҳоят, манзара – менинг жони дилим эканлигини тушуниб етдим. Нима дейсиз, гавда тузилишини ўрганишим шартмикан?

– Мен манзара устида ишлаётганимда, – жавоб қилди Винсент, – уларга одам гавдасидан нималарнидир олишга ҳаракат қиласман. Сиз мендан анча илгарилаб кетгансиз. Таниқли рассомсиз. Бироқ дўустона бир танқидий фикримни кўнглингизга олманг.

– Бундан мамнун бўламан.

– Айтмоқчи бўлганим, суратингизда эҳтирос етишмайди.

– Эҳтирос? – такрор сўради Де Бок Винсентга кўз қири билан қараб. – Айнан нимани назарда тутяпсиз?

– Буни тушунтириш осон эмас. Лекин сизнинг чизилаётган обьектга бўлган муносабатингиз бироз мужмал.

– Қулоқ солинг, биродари азиз, – Де Бок ўрнидан туриб суратларидан бирини дикқат билан кузата бошлади. – Мен кўрганларим ва хис этгандаримни чизаман, холос.

Де Бокнига бориб келгандан сўнг, Винсентга ўзининг устахонаси ниҳоятда ғариб кўриниб кетди. Аммо бу ерда ҳашаматнинг ўрнини боса оладиган нимадир бор эди.

Тео халича пул жўнатмади, аммо Винсентда Мауве берган пулдан озроғи қолганди. У пулларини натура учун сарфлаганди. Орадан кўп ўтмай Мауве Винсентнига ташриф буюрди.

– Бир қириб ўтай дедим, – деди у хонани кўздан кечирашиб экан. – Ҳа, устахонанг ёмон эмас. Албатта, дераза шимол тарафга қараганида зап иш бўларди, ҳа, майли, ҳечқиси йўқ. Энди одамлар сени ишёқмас, ҳавои ҳаваскор дейишмайди.

Мауве бир соат давомида Винсентга акварель бўёқ билан қандай ишлашни ва уларни қофоздан қандай ювиб ташлашни ўргатди. Винсентнинг буни уддасидан чиқиши қийин кечди.

– Хижолат бўлма, – унинг руҳини кўтарди Мауве. – Мўйқаламни тўғри тутишни ўрганиб олгунингча, кам деганда, ўндан ортиқ чизмани бузишга тўғри келади...

Ойнинг биринчи санаси аллақачон ўтиб кетган, аммо Тео ҳануз пул жўнатмаётганди. Нима бўлди экан? Ёки Тео ундан юз ўғирдими? Наҳот омад остонасида турган пайтида укаси ёрдамини аяса? Чўнтагини тит-килаб, Винсент бир дона марка топиб олди. Энди укасига мактуб битиб, азбаройи очдан ўлмаслик ва вақти-вақти билан натурачига тўлаб туриш учун ҳеч бўлмаганда бирозгина пул сўрайди.

Кўкраги остида симиллаб турган оғриқ унга Боринажни эсига соларди. Наҳот, у бир умр оч юришга маҳкум бўлса? Наҳот, у ҳеч қачон роҳат-фароғатда яшамаса?

Эртаси куни Винсент ғурурини енгиб, Терстех ёнига йўл олди. Гаагадаги рассомларнинг деярли ярмини ўз паноҳига олган бу инсондан ўн франк олишга муваффақ бўлар?

Терстех иш билан Парижга кетган экан. Винсент қаттиқ иситмалаб қолди, у энди қўлига қалам ҳам ушлай олмаётганди. Бехол ўрнига чўзилди. Кейинги кун у яна Плаатсга зўр-базўр етиб борди. Терстехни галереяда учратди. Терстех акангга ғамхўрлик қиласман деб Теога сўз берган эди. У Винсентга йигирма беш франк берди.

– Анчадан буён устахонангни кўриш ниятидаман, Винсент, – деди у. – Тез орада ташрифимни кут.

Винсент Терстехга аранг хушмуомалик билан жавоб қайтарди. Шу тобда бирон ерга бориб қорнини тўйдиришни истади. Гупил галереяси томон кетаётиб, Винсент: “Агар пул топа бошласам, ишим юришиб кетади”, деб ўйлади. Бироқ ҳозир чўнтагида пули бўлса-да, ўзини ҳар доимгидан ҳам бахтсиз ҳис этарди. Уни ёлғизлик қийнарди.

Овқат ошқозонидаги оғриқни босган бўлса-да, Винсентнинг қалби тубида ўрнашиб олган ёлғизлик туйғусини ўчириб ташлай олмаганди. Унинг севгисини рад этган Кэйга бўлган соғинчи қайта исён кўтарди. У ўзини ҳамма нарсадан маҳрумдек ҳис этиб, юраги эзилиб кетди. Турбийинди-да, Рэйн вокзали ёнида кўрган қаҳвахона томон йўл олди.

2

Қаҳвахонани бир жуфт керосин чирок ёритиб турарди. Залнинг ўрта қисми эса ним қоронғулик кўйнида. Девор бўйлаб ўриндиклар кўйилган. Деворлари кулрангга бўялган, оёқ ости бетондан иборат бу жой дам олиб, кўнгил ёзиладиган маскандан кўра кўпроқ ғариблар бошпанасига ўхшарди.

Винсент столларнинг бирига ўтириб, деворга суюнди. “Ишлаб турганингда, қани энди бир дўстинг, бир ҳамдаминг, ҳеч бўлмаганда сен билан об-ҳаво ҳакида гаплашса...” ўйлади у.

У шошмай вино хўплади. Қаҳвахонада одам сийрак эди. Рўпарасига қандайдир бир хунарманд келиб ўтирди. Бурчакда пештахтага яқин жойда бир жуфтлик ўтирибди, аёли жуда ёрқин рангли беўхшов кийимда. Кўшни столда яна бир аёл ёлғиз ўтиради.

Официант аёлдан дағаллик билан сўради:

- Яна бир финжон келтирайми?
- Пулим қолмади, – дея жавоб қилди аёл.
- Винсент аёл томон бурилиб қаради-да:
- Балки мен билан ичарсиз? – деб сўради.

Аёл Винсентга қараб:

– Албатта, – деди.

Официант унга вино келтириб бергач, йигирма сантимни олиб, узоқлашди. Винсент аёлни ёнига чорлаган эди.

– Раҳмат, сизга, – деди аёл.

Винсент унга дикқат билан разм солди. Аёл кўримсиз, сўлгин чехраси ҳаётда қийналганини кўрсатиб турарди. Озғинлиги ўзига ярашиб турарди. Винсент дикқатини унинг финжон тутиб турган кўлига қаратди – бу Кэйга ўхшаш оксуякларнинг эмас, балки умри давомида муттасил меҳнат қилган жафокаш аёлнинг кўллари эди. Фира-шира қаҳвахонада аёл Винсентга Шарден ва Ян Стенни эслатиб юборди. Кўзлари маъюс бокса-да, аёлда қандайдир жўшқинлик сезилди.

– Арзимайди, – жавоб қилди Винсент. – Менга ҳамроҳ бўлганингиз учун раҳмат.

– Исимм Христина, – деди аёл. – Сизники-чи?

– Винсент.

– Сиз шу ерда, Гаагада ишлайсизми?

– Ҳа.

– Нима иш қиласиз?

– Рассомман.

– О-ҳо! Ит ётиш, мирза туриш, денг. Мен эса кир юувучиман. Кучкуватим етганда ишлаб турман.

– Иш оғир бўлса қерак?

– Бўлмасам-чи! Ўн икки соатлаб ишлаймиз. Бунинг устига, қилган ишимизга ҳақ тўлашавермайди ҳам. Кун бўйи ишлаб келиб, болаларим очдан ўлмасликлари учун бирон бир эркакни излаб кетган кунларим ҳам бўлади.

– Нечта фарзандинг бор, Христина?

– Бешта. Яқинда яна қўпаямиз.

– Эринг ўлганми?

– Болаларимнинг ҳар бири турли отадан.

– Сенга осон эмас экан-да?

Аёл елкасини қисиб қўйди.

– Яна вино ичишни хоҳлайсанми?

– Жин ва пиво буюргин. – У сумкасини титкилаб, арzon сигарета қолдигини олиб, чека бошлади. – Унчалик бадавлатга ўхшамайсан, – деди у. – Суратларингни сотиб кун кўрасанми?

– Йўқ, мен сурат чизишни энди бошладим.

– Ёшинг нечада?

– Ўттизга кирдим.

– Лекин қирққа кирганга ўхшар экансан. Тириклилигинг қандай ўтади?

– Укам пул жўнатиб туради.

– Жин урсин, бу кир юувучи бўлишдан ҳам ёмонрок-ку!

– Қаерда яшайсан, Христина?

– Онамницида.

– Бундай юришингни онанг биладими?

Аёл хохолаб кулиб юборди.

– Худойим-е, албатта билади! Унинг ўзи мени қўчага чиқарди-ку. Ўзи ҳам бир умр шу иш билан шуғулланди. Мени ҳам, укамни ҳам қўчада туқкан.

Бир муддат иккаласи ҳам жим қолишиди.

– Ҳозир қаерга кетасан, Хриситина?

– Кун бўйи кир ювдим. Улар ярим франк тўлашлари керак эди, аммо шанбагача пул беришмас экан. Менга эса егулик учун икки франк керак. Бирон бир эркак кўрингунча шу ерда дам олгим келди.

– Майлими, сен билан борсам, Христина? Жуда ёлғизман.

– Албатта. Айни муддао. Бунинг устига сен жуда ёқимтой экансан.

– Сен ҳам менга ёқдинг, Христина. Ишонасанми, аёл зотидан бунаقا самимий сўзларни биринчи марта эшитишим.

– Қизиқ. Кўринишинг бинойидек. Бунинг устига жуда тарбияли экансан.

– Севги бобида омадим келмаган.

– Шундай дегин... Майлими, яна бир стакан жин исчам?

– Кўп исчам! Яхшиси, мана бу пулларни чўнталингга солиб қўй, мен бир амаллайман. Кам бўлсаям...

– Кўринишингга қараганда, бу пуллар мендан қўра сенга кўпроқ керакка ўхшайди. Кетавер, мен биронта бошқасини топиб, икки франк ишлаб оларман.

– Йўқ, олавер. Мен амаллайман. Танишимдан йигирма беш франк олган эдим.

– Ҳа, майли. Кетдик унда.

Тим қоронғу кўчада аёлнинг уйи томон худди эски дўстлардек суҳбатлашиб боришар эди.

3

Эрта тонгда Винсент Теодан мактуб билан бирга кутаётган юз франкини олди. Тео пулни илгарироқ жўнатишнинг иложи бўлмаганини ёзган эди. Винсент дарҳол кўчага югурди, томорқада ер чопаётган кекса аёлни кўриб, ундан эллик сантим эвазига натурага туриб беришни сўради. Аёл жон деб рози бўлди.

Винсент уни печка ёнига ўтқазиб, ён томонига чойнак қўйиб қўйди. У керакли рангни изларди. Аёлнинг чехраси ифодали ва таъсирчан эди. Винсент этюдни ўзи истагандек тасвиirlай бошлади. Ишни тезда тамомлади. У Христинадан жуда миннатдор бўлди, чунки унга куч бағишлиган эди.

Эшик тақиллади. Винсент эшикни очиб, минхер Терстехни ичкарига бошлади. У Винсентнинг ҳақиқий устахонаси борлигини, унинг тиришқоқлик билан ишлаётганини кўриб, дилдан қувониб кетди.

– Баракалла, Винсент, – деди у. – Сени иш устида кўриб хурсанд бўлдим. Рассомларимни иш устида кўришни жуда хуш кўраман.

– Келиб катта илтифот кўрсатдингиз, минхер Терстех.

– Арзимайди. Келганингдан буён устахонангни кўришни хоҳлаб юрардим.

Винсент каравот, стол-стул, печка ва мольбертга кўз югуртириди.

– Устахонам оддий.

– Муҳими, кўл қовуштириб ўтирмай меҳнат қилишинг керак, ўшанда кўп нарсага эришасан.

Терстех яшил тусда чизилган этюдга – оқ пешбанд тақиб олган кекса аёлга яхшилаб разм сола бошлади. У бир пайтлар Винсентни Плаатсда учратган вақтидагидек узоқ сукут сақламади. Бутун оғирлигини ҳассасига ташлаб, бир муддат турди-да, сўнг ҳассасини кўлига илди.

– Ҳа, сен, шубҳасиз, олдинга силжибсан. Маве сени акварелчи қилиб этиштираётгани яққол кўриниб туриби.

– Мен ҳақимда қайғураётганингиздан беҳад минннатдорман, минхер!

– Мен сенинг муваффакиятга эришишингни истайман, холос. Ишларингни сотиб ола бошлаганимда, ўзингга яхши устахона, тузукроқ кийим-бош оласан ва юқори табақа йигинларида қатнашиб турасан.

Улар кўл сикишгач, Терстех чиқиб кетди. Винсент яна ишга кўмилди. Кани эди озгина бўлса ҳам ўзи ишлаб пул топса! Унга бошқа ҳеч нарсанинг кераги йўқ эди. Ҳеч кимга қарам бўлмасди. Энг асосийси, шошилиб чизишга мажбур бўлмас эди, тинч ва хотиржам ишлаган бўларди.

Оқшом Винсент Де Бокдан пуштиранг қоғозга битилган мактубча олди.

“Қадрли Ван Гог!

Эртага эрталаб сизникига Артц натурачи қизларидан бирини олиб бораман, бирга чизамиз.

Де Б.”

Натурачи қиз ёшгина, сохибжамол экан, у бир сеанс учун ярим франк олди. Винсент бу тасодифий холдан ниҳоятда қувонди, чунки унинг бир ўзи бундай қиммат натурачини ёллай олмасди. Қиз иссиққина печка ёнида ечинди. Гаагада фақат профессионал натурачилар яланғоч туриб беришга рози бўлар эдилар. Винсент бунга бироз ғаши келди, у ўз феъл-авторига, ўз тусига эга қарияларни чизишни хоҳларди.

– Ўзим билан тамаки халтам ва хизматкорим тайёрлаб берган камтаргина нонуштани ҳам олволдим. – деди Де Бок. – Шундай экан, қорин ғамида уйдан чиқишига ҳожат қолмайди энди.

– Нима ҳам дердим, сизнинг тамакингиздан ҳам тотиб кўрамиз. Меники аzonлаб чекиши учун бироз ўткирлик қиласди.

– Мен тайёрман, – маълум қилди натурачи қиз. – Қандай ҳолатда туришим керак?

– Турган ҳолатдами ёки ўтирган ҳолатда, Де Бок?

– Келинг, дастлаб турган ҳолатда чизамиз.

Улар қиз толиққунга қадар қарийб бир ярим соатлар чизишиди.

– Энди ўтира қолсин, – деди Винсент. – Гавдага бироз енгилроқ бўлади.

Улар расм солиш тахталари узра эгилиб олганча тушладилар. Онда-сонда қуёш нури ёки тамаки ҳақида гапириб кўярдилар, холос. Сўнг Де Бок нонушта ўралган халтани очди, учовлон печка ёнига ўтириб яхна гўшт ва пишлок, нон билан тамадди қилдилар. Винсент ва Де Бок ўз суратларидан кўз узолмасдилар.

– Ғалати-а, тамадди қила бошлаганингда ўз ишингга холисона баҳо бера бошлайсан, – деди Де Бок.

– Қани, суратингиз қандай чиқибди, кўрсам бўладими?

– Марҳамат!

Де Бок қизнинг юзини жуда ўхшатиб чизган эди, аммо гавдасига келганда, Винсент унда ҳеч қандай ўзига хослик кўрмади. Бу шунчаки лол қоларли даражада гўзал қоматдан бошқа нарса эмас эди.

– Вой, худойим! – хитоб қилди Де Бок Винсентнинг чизганига қараб. – Юзнинг ўрнига нимани чиздингиз? Шуми сиз айтган ўша эҳтирос?

– Ахир биз портрет чизмадик-ку, – эътиroz билдириди Винсент. – Биз фақат инсон гавдаси суратини чиздик, холос .

– Юзнинг гавдага тегишли эмаслигини биринчи бор эшитиб турибман.

– Ўзингиз қорнини қандай чизганингизни кўринг, – деди Винсент ўз навбатида.

– Қандай экан?

– Худди қайнок ҳаво тўлдириб қўйилганга ўхшайди. Ичаклари борлиги сезилмаяпти.

– Нега энди сезилиши керак? Бечора қизнинг ичаклари қорнидан ташқарига чикиб ётганини мен пайқамабман-да.

Натурачи қиз бутербродни чайнашда давом этаркан, ҳамма рассомларни андак савдои деб ҳисобларди. Винсент ўзининг суратини Де Бокнинг сурати ёнига қўйди.

– Мана кўряпсизми? – деди у, – бу ерда қорин мукаммал чиққан. Унга қараб, бу ичаклардан қанчалар емак ўтганини айтиш мумкин.

– Аммо бунинг санъатга нима дахли бор? – ажабланди Де Бок. – Биз ахир ичак-чавоқлар мутахассиси эмасмиз-ку, тўғрими? Мен одамлар суратларимга боқиб, туманнинг дараҳтларни ўраб олганини, күёшнинг қизариб булутлар ортига беркинганини кўришларини истайман. Улар аллақандай ичак-чавоқларни кўришларини истамайман.

Винсент ҳар куни эрта тонгда натурачи излаб чиқиб кетарди. Бугун натурачи бир темирчининг ўғли бўлса, эртага Геестдаги руҳий қасаллар шифохонасидаги бир қария бўларди, индии эса торф ташувчи, бир куни ҳатто Паддемус деган яхудийлар даҳасидан бир момони невараси билан олиб келди. Винсент гарчи ҳар бир суни асраб, ой адогигача етказиши кераклигини билса-да, натурачиларни ёллашдан пулини аямасди.

Аммо бор кучини сарфлаб ишламаса, Гаагада яшаб, Мауве қўлида ўқишдан нима фойда? Емакка келсак, яхшилаб оёққа туриб олгандан кейин ҳам тўйиб овқатланаверади.

4

Бир куни оқшомда Христина Винсентнинг эшигини қоқди. У эгнига қора юбка, тўқ кўк тусда камзулча кийиб олганда, соchlарини қора шляпаси яшириб турарди. Кун давомида тоғора ёнида тик тургани учун ўлгудек толиққани билиниб турарди. Юзидаги ажинлар Винсентга янада кўпайгандек эди.

– Салом, Винсент, – деди у. – Бир кўриб ўттай дедим.

– Христина, сен мени йўқлаб келган илк аёлсан. Сени кўриб бошим осмонга етди! Кел, рўмолингни ечишга ёрдамлашай.

Христина исиниш учун печка ёнига ўтирди. Сўнг хонага диққат билан кўз югуртириди.

– Ёмон эмас экан. Бўй-бўшлигини ҳисобга олмагандা.

– Эндинга овқатланай деб турган эдим. Мен билан овқатланасанми, Христина?

– Нега мени Син деб чакирмаяпсан? Мени ҳамма шундай деб чақиради.

– Син бўлса Син-да.

– Ниманг бор кечки овқатга?

– Картошка, холос.

– Мен бугун икки франк ишлаб топдим. Бориб етганча мол гўшти олиб келаман.

– Менда ҳам пул бор. Укам жўнатган эди. Қанча берай?

– Эллик сантим етса керак.

Ҳаял ўтмай Христина қўлида ўроғлиқ нарса билан қайтиб келди. Винсент унинг қўлидан гўштни олиб овқатга уннай бошлади.

– Қани, жойингга ўтир-чи. Сен рўзгорни тушунармидинг. Бу аёлларнинг иши, – деди Христина.

Христина печка узра энгашганида унинг ёноқларида аланга шуъласи ўйнай бошлади. Энди у хушрўйгина кўрина бошлади. Картошкани арчиб,

гўшт билан бирга хурмачага солиб, оловга қўйганида у Висентга шу қадар табиий ва оддий кўриниб кетдики, асти қўясиз! Винсент девор ёнидаги стулга ўтириб Христинани кузата бошлади. Унга нисбатан қалбидаги меҳр уйғонди. Бу унинг уйи, ёнида эса меҳр ила емак тайёрлаётган аёл!.. Винсент Кэйни шундай ҳолатда тасаввур қилиб, бот-бот хаёл сурарди. Син унга кўз ташлади. Винсентнинг стулда ғалати ўтирганини кўриб беозор терраб қўйди:

– Ҳой, эси паст, тўғри ўтири. Нима, бўйним қайрилиб ўлай деяпсанми?

Винсент жилмайди. У бир том остида яшаган барча аёллар – онаси, сингиллари, холаю аммалари, холаваччалари, ҳаммаси доим бир гапни тақрорлашарди: “Винсент, стулда тўғри ўтири. Бўлмаса бўйнинг қийшайиб қолади”.

– Ҳўп бўлади, Син, – деди у. – Ақлли бўлиб ўтираман.

Син бурилган заҳоти у яна стулини деворга қийшайтириб тақаб олдида, ҳафсала билан трубкасини чека бошлади. Христина кечки овқатни столга қўйди. У гўштга қўшиб икки дона булка нон ҳам сотиб олганди. Овқатни мазза қилиб тановул қилишди.

– Гаров ўйнайман, сен бундай овқат тайёрлай олмасдинг, – деди Христина.

– Албатта, Син! Овқатни ўзим тайёрлаганимда нима еяётганимнинг фарқига ҳам бормайман.

Син чой устидан ўзининг қора сигарасини чекди. Икковлон дўустона сухбат қуришарди. Винсент унинг олдида Мауве ва ёки Де Бокнинг ёнидагига нисбатан ўзини жуда эркин ҳис этарди. Улар ўртасида аллақандай яқинлик бордай эди. Улар дилдан сухбатлашишарди.

– Нима қилмоқчисан? – сўради Син.

– Идиш-товоқларни ювмоқчиман.

– Ўтири. Сен идиш-товоқ юва олмайсан. Бу аёлларнинг иши.

Винсент стулини печка ёнига сурди, трубкасини тўлғазиб, мамнун киёфада чека бошлади. Син эса идишларни тоғорага солиб, ювишга тутинди. Винсент қоғоз олиб, Синнинг қўлларини чиза бошлади.

– Мана, битди, – деди Син охирги идишни ювиб бўлиб. – Энди андак жин билан пиво ичиш мумкин...

Винсент Синнинг суратини чизди. Иссиққина печь ёнида тиззаларини қучиб, стулда ўтирган Син қувончини беркитмасди. Иссиққина хона ва уни дилдан тушунган одам билан бўлган самимий сухбат аёлнинг руҳини анча кўтарган эди.

– Кирларни қачон ювиб битирасан? – сўради Винсент.

– Эртага. Ортиқ кучим ҳам қолмади.

– Ўзингни ёмон ҳис қиласыпсанми?

– Йўқ, аммо, жуда оз қолди. Қорнимдаги бу ярамас бола аллақачон кимирлай бошлаган.

– Үнда кейинги ҳафтадан бошлаб суратларим учун туриб беришни бошлар экансан-да?

– Нима қилиш керак ўзи? Фақат ўтириш керакми?

– Ҳа. Баъзан тик туриш, баъзан ечинишга ҳам тўғри келади.

– Жуда яхши-ку. Ишлайдиган сен, пулни эса мен топар эканман.

Христина деразадан ташқарига қаради. Ташқаридаги қор ёғмоқда эди.

...Эрталаб Христина қахва қайнатди, тўшакни йиғиштириб, устахонани тозалаб чиқди. Сўнг ишига – кир ювишга кетди. Шу пайт Винсентга устахонаси хувиллаб қолгандек туюлди.

Ўша куни Винсентнигига Терстех яна қадам ранжида қилди. Унинг кўзлари порлаб, яноқлари совуқдан қизариб кетган эди.

– Ишлар қалай кетяпти, Винсент?

– Жуда яхши, минхер Терстех. Менинига яна бир бор келганингиздан бошим кўкка етди.

– Менга бирор қизиқроқ нарса кўрсатмайсанми? Шунинг учун келгандим.

– Ҳа, бир нечта янги нарсалар чизганман. Ўтириңг, марҳамат.

Винсент унга уч-тўртта чоғроқ акварел суратларни кўрсатди. Терстех синчковлик билан суратларни кўриб чиқди, сўнг биринчи этюдни қўлига олиб, дикқат билан уни кўра бошлади.

– Дуруст, дуруст – деди у. – Акварел суратлар бундан-да яхшироқ чизилиши керак, булар эса бироз дағал, бироқ олдинга силжияпсан. Сен тезроқ мен сота оладиган бирор нима чизишинг керак.

– Яхши, минхер.

– Мустақил пул ишлаб топишни ўйлаш вақти келди, болам. Бироннинг хисобига яшаш яхши эмас.

Винсент суратларини қўлига олиб разм солди. Улар дағал чиқаётганини аввалдан сезган эди, аммо бошқа рассомлар каби у ҳам ўз асарларининг камчиликларини кўра олмас эди-да.

– Мен ҳам айнан шуни умид қиласяпман, минхер.

– Унда қаттиқроқ ишлагин. Шошилиш керак. Арзийдиган бирон асар яратганингда эди, жоним билан сотиб олардим.

– Миннатдорман, минхер.

– Нима бўлганда ҳам, руҳингни чўқтиримай, ишлашда давом этаётганингдан хурсандман. Тео сенга кўз-кулоқ бўлиб туришимни илтимос қилган. Арзигулик бирор нима чизишинг керак. Винсент, мен сенинг Платсда ўз ўрнингни топишингни истайман.

– Имкон қадар яхшироқ чизишга ҳаракат қиласаман. Аммо ҳамиша ҳам қўлим менга бўйсунавермайди. Булардан бири Маувега маъқул келди.

– Нима деди у?

– Мана энди акварел суратларга ўхшаяпти, деди.

Терстех кулиб юборди, жун шарфини бўйнига ўраб: “Ишла, Винсент, ишла, буюк асарлар мана шундай дунёга келади”, деди-да, устахонадан чиқди.

Винсент Кор амакисига Гаагага келиб жойлашганини хабар қилиб, мактуб ёзди ва уни меҳмонга таклиф қилди. Амакиси Амстердамда энг катта рассомчилик дўкони учун хом ашё ва суратлар сотиб олиш учун тез-тез Гаагага келиб туради. Якшанба куни Винсент аллақачон танишиб улгурган болаларни устахонасига меҳмонга чақирди. У сурат солаётганида болалар зерикиб қолмаслиги учун ширинлик сотиб олди, сурат таҳтасидан кўзини узмай, уларга эртак устига эртак айтиб берди. Эшикни қаттиқ тақиллагани ва ўткир, дўриллаган овоздан Винсент амакиси келганини фаҳмлади.

Корнелис Маринюс Ван Гог жаҳон миқёсидаги машхур одам эди, бадавлат бу одамнинг ишлари кундан-кунга гуллаб-яшнарди. Аммо шунга қарамай, унинг катта қора кўзларида ҳасрат яширинган эди.

Корнелис Маринюс ўзини ҳеч нарсага эътибор бермаётгандек қилиб кўрсатса-да, устахонадаги ҳар бир заррани эътибордан қочирмади.

Винсент болаларга қолган ширинликни тарқатиб бергач, уларни уй-

ларига жўнатиб юборди.

– Кор амаки, мен билан бир пиёла чой ичасизми? Ташқари ниҳоятда совуқ бўлса керак.

– Раҳмат, Винсент, ичаман, албатта.

Винсент унга чой узатди, амакисининг у-бу янгиликларни сўзлаб туриб, чойни тиззасида ажойиб тарзда тутишини кўриб ҳайратланди.

– Шундай қилиб, рассом бўлмоқчиман, дегин, Винсент, – деди Корнелис. – Ҳа, Ван Гогларнинг ўз рассоми бўлиш вақти келди. Хейн, Винсент ва мен, мана ўттиз йилки, бегоналардан суратлар сотиб оламиз. Энди эса пулнинг бир қисми оиласизда қоладиган бўлади.

– Уч амаким, яна укам сурат сотиш билан шуғулланишар экан, ишим юришиб кетар экан-да, – деди кулиб Винсент. – Пишлок, нон бор, Кор амаки? Балки очиккандирсиз?

Корнелис Маринюс бечора рассомнинг таомини рад қилиш уни қанчалар таҳқирлаши мумкинлигини яхши биларди.

– Раҳмат, жоним билан ейман. Бугун эрта туриб нонушта қилиб улгурмагандим.

Винсент тақсимчага бир нечта қора нон бўлакларини қўйди, сўнг қоғоз ичидан арzon пишлок бўлагини чиқарди. Корнелис Маринюс улардан базўр тотинди.

– Терстех менга Тео ҳар ой сенга юз франқдан жўнатиб турганини айтди.

– Ҳа, шундай.

– Тео ҳали ёш йигит, у пулларини йиғиши лозим. Сен ўз нонингни ўзинг ишлаб топишинг даркор.

Винсент амакисини печга яқин ўтиргизиб, хомаки чизмаларини, этюдларини чиқарди. Корнелис бошда жим томоша қилди, лекин торф бозори ёнидаги Паддемус тасвиrlанган кичикроқ суратга гал келганида ўзини тутиб турга олмади.

– Мана буниси зўр экан, – деди у. – Яна шаҳар қўринишларидан бир нечта сурат чиза оласанми?

– Албатта. Мен одатда уларни модел билан ишлашдан толиққанимда чизиб тураман. Бундай пейзажлардан яна бор менда. Мана, каранг!

Винсент жилдан турли хил ўлчамдаги қоғозларни чиқара бошлади.

– Мана бу – Ферстех... бу эса Геест. Манави балиқ бозори.

– Менга шунаقا шаҳар манзараларидан ўн иккита чизиб берга оласанми?

– Албатта, уларнинг баҳоси ҳақида келишиб олсанг дегандим.

– Яхши, қанча сўрайсан?

– Бу ўлчамдаги суратларимнинг нархи, хоҳ қаламда чизилган бўлсин, хоҳ бошқада, яъни икки ярим франқдан. Нима деб ўйлайсиз, қиммат айтмадимми?

Корнелис кулиб юборишига оз қолди, ахир булар арзимган пул эди-да!

– Албатта, қиммат эмас. Агар суратлар яхши чиқса, яна йигирмата Амстердам манзаралари чизилган сурат буюртма қиласман. Ўшандা нархни ўзим қўяман, сенга кўпроқ пул қолиши учун.

– Оҳ, Кор амаки, бу менинг илк буюртмам! Қанчалар баҳтиёр эканимни билсангиз эди!

– Ҳаммамиз сенга ёрдам беришни истаймиз, Винсент. Фақат юқори даражада чизишинг керак, ана ўшандা суратларингни ўзимиз сотиб оламиз. – Корнелис шляпаси ва қўлқопларини қўлига олди. – Теога хат ёзсанг, мендан салом айтгин.

Илк муваффақиятидан маст бўлган Винсент янги акварел суратини қўлтиқлаб, Эйлебоомен кўчасига югорди. Эшикни Йет очди. У хафа қўринарди.

– Ўрнингда бўлганимда устахонага кирмас эдим, Винсент, у ўзида эмас.

– Нима бўлди? Бетобми?

Йет хўрсинди.

– Ҳар доимги аҳволида.

– Ҳа, унда мени кўришни истамаса ҳам керак.

– Яхшиси, бошқа пайт кела қол, Винсент. Унга келганингни айтиб кўяман. Бироз тинчланиб олгач, ўзи сеникига боради.

– Айтишни унутиб қўймайсанми?

– Унутмайман.

Винсент уни узоқ кутди, аммо Мауве келмади. Унинг ўрнига Терстех икки бор келиб кетишга улгурди. Терстех ҳар гал бир жумлани такрорлаб кетарди:

– Ҳа, ҳа, бироз олдинга силжиганга ўхшайсан. Аммо бу ҳали етарли эмас. Мен ҳали ишларингни Плаатсда сота олмайман. Керагича тез ва қўп ишламаяпсан, деб қўрқаман, Винсент.

– Мухтарам минхер Терстех, мен соат бешдан туриб, тунги ўн бир-ўн иккига қадар ишлайпман. Тамадди қилиб олиш учунгина ишимни тўхтаман.

Терстех муаммо нимада эканлигига тушунмай, ҳайрон бўлиб бош чайқади ва яна суратга бокди.

– Сен шошилишинг керак, мана шуниси энг муҳими. Суратларингни сотишни бошлаб, ўзинг пул ишлашинг лозим.

Терстех бу гапни тўртинчи бор такрорлагач, Винсент ўзини мазах қилинаётгандек хис этди. Жин урсин, ҳеч ким ундан ҳеч нарса сотиб олмаса, қандай пул ишлаб топсин?

Бир куни Винсент кўчада Маувега дуч келиб қолди. Рассом бошини қуий эгиб, ўнг елкасини олдинга чиқариб, жадал қадамлар билан кетиб бораарди, қаерга кетаётганини ўзи ҳам билмасди, чоғи. Винсентни танимади ҳам.

– Анчадан бери кўришмаган эдик, қариндош Мауве.

– Банд эдим. – Маувенинг овози совуқ ва лоқайд эди.

– Тушунаман, янги сурат устида ишлайпсиз. Қандай кетяпти?

– Э-э... – У тушунарсиз тарзда кўл силтаб кўйди.

– Бирон кун устахонангизга борсам бўладими? Акварель суратларим билан бир жойда қотиб қолгандекман.

– Ҳозир эмас. Айтаяпман-ку сенга, мен бандман. Вақтимни беҳудага сарф қила олмайман.

– Унда сайр қилгани чиқкан пайтда меникига бир кириб ўта олмайсизми? Сиз айтган бир неча ўгитлар мени тўғри йўлга солган бўлармиди.

– Эҳтимол, ким билсин. Ҳозир бандман. Кетишим керак.

У шитоб билан юриб кетди. Винсент унинг ортидан қараб қолди.

Нима бўлди ўзи? Наҳотки у Маувени ранжитиб қўйган бўлса? Кўнгли қолдимикан?

Винсент бир неча кундан сўнг устахонасида Вейсенбрухни кўриб, фоятда ажабланди. Чунки бу одам нафақат ёш рассомларниги, ҳатто танилган рассомларниги ҳам, фақат уларнинг тит-питини чиқариб танқид қилиш учунгина келар эди-да.

– Қойил! – остоноада турибоқ қичқирди Вейсенбрух хонага кўз югурти-рар экан. – Нақ саройнинг ўзгинаси-я, ҳақиқий сарой! Тез орада бу ерда

кирол ва қироличаларнинг портретини чиза бошлайсиз, Винсент.

– Бу ер ёқмаётган бўлса, кетишингиз мумкин, – жеркиб берди Винсент.

– Нега рассомчиликка тупурмайсиз, Ван Гог? Ахир бу ит кунининг ўзи-ку.

– Мана сиз гуллаб-яшнаяпсиз-ку.

– Ҳа, аммо мен муваффакиятга эришдим-да. Сиз эса ҳеч қачон эриша олмайсиз.

– Эҳтимол. Аммо ҳали сиздан ҳам зўр чизадиган бўламан.

Вейсенбрух хохолаб кулиб юборди.

– Бунга эриша олмайсиз! Балки бутун Гаагадаги рассомлардан зўр бўлиб кетарсиз, аммо мендан эмас. Фақатгина суратларингизда ўз характерингизни акс эттира олсангизгина.

– Нима, сизнингча, буларда характер йўқ эканми? – сўради Винсент жилдини қўлига олаётib. – Ўтириб олиб, мана буларни кўринг-чи.

– Мен суратларни ўтирган ҳолда кўра олмайман.

Вейсенбрух акварель суратларни кўз ташлаб-ташламай четга сурди:

– Бу сизга хос эмас. Сиз ифодалашни истаётган нарса учун акварель – ниҳоятда жонсиз, сўлғин бир техника.

Вейсенбрух боринажликлар, брабантликлар ва Винсент Гаагага келгандан сўнг бот-бот чизиб турадиган кекса аёл ва қарияларнинг қаламда чизилган суратларини қизиқиши билан томоша қиларкан, фақат кулиб қўярди, холос. Винсент эса ҳозир устига таҳқир-у пичинглар дўлдай ёфишини кутиб жим турарди.

– Ниҳоятда ажойиб чизар экансиз, – деди Вейсенбрух, унинг қўзлари чақнарди. – Жон деб, мен ҳам шундай эскизлар чизган бўлардим.

Вейсенбрухдан бундай гап чиқишини кутмаган Винсентнинг оёқлари букилиб, ўқ теккандек стулга ўтириб қолди.

– Сизни, адашмасам, “Бешафқат Шамшир” деб аташарди, шекилли.

– Хали ҳам шундай аташади. Агар суратларингизни ёмон деб ҳисоблаганимда, буни рўйи рост айтган бўлардим.

– Терстехдан эса шу суратларни деб доим койиш эшитаман. Булар ўта дағал ва оғир деб айтди.

– Бемаънилик! Куч айнан шунда-да.

– Перода чизишни истаган эдим, Терстех менга тамоман акварелга ўтишим кераклигини айтди.

– Шунда у бу акварель суратларини сотар эканми? Йўқ, дўстим, агар сиз борлиқни перода чизилган суратдаги каби кўрсангиз, шу ҳолда чизинг. Ва энг асосийси, ҳеч кимга қулоқ солманг, ҳатто менга ҳам. Ўз ўйлингиздан кетинг.

– Шунақа қилишга тўғри келади, шекилли.

– Мауве сизни “туғма рассом” деб атаганида Терстех бунга қўшилмади Мауве эса сизни ҳимоя қила кетди. Ўзим гувоҳ бўлдим бунга. Агар яна шундай ҳол такрорланса, мен ҳам сиз томонда бўламан, ишларингиз менга маъқул келди.

– Мауве мени “туғма рассом” дедими?

– Буни миянгизга ўрнаштириб олманг. Яратганга шукр қилинг; ҳеч бўлмаса, бу дунёдан рассом бўлиб кўз юмасиз-ку.

– У ҳолда Мауве нега менга совуқ муносабатда бўлди?

– У то суратини чизиб битирмагунича ҳаммага шундай муносабатда бўлади. Эътибор берманг. Ўша схевенгенча полотносини тугатсин, яна аввалги ҳолига қайтади. Унгача сизга ёрдам керак бўлиб қолса, меникига боришингиз мумкин.

- Бир савол беришга ижозат берсангиз, Вейсенбрух.
- Марҳамат.
- Бу ерга сизни Мауве юбордими?
- Ҳа, Мауве юборди.
- Нега?
- Сизнинг ишларингиз ҳақида фикримни билишни хоҳлади.
- Аммо нега? Ҳамонки мени туғма рассом деб билар экан...
- Билмадим. Эҳтимол, Терстех унда шубҳа уйғотиб қўйғандир ўша кунги суҳбатда.

6

Христина Винсент қўмсаган меҳрни бера олди. У ҳар куни устахонага аzonда ташриф буюрар, ўзи билан тўқиши саватини ҳам олиб келарди. Христина деярли ҳар доим печка ёнида деразага термилиб ёки бўлмаса, туғилажак гўдаги учун нималардир тўқиганча жим ўтиради. У сурат учун яхши туриб бера олмаёди, Винсент ундан нимани истаётганини аранг тушуниб оларди, аммо бор кучи билан ҳаракат қиласарди. Кўп ўтмай уйига кетиши олдидан Винсент учун овқат пишириб бериш одат тусига кирди.

- Сен овора бўлма, Син, – деди Винсент.
- Бунинг ҳеч қандай овора жойи йўқ. Шунчаки мен сендан яхшироқ қиласман.
- Мен билан овқатланишга қолсанг керак?
- Ҳа. Болаларга онам қараб турибди. Сенинида қолиш менга жуда ёқади.

Винсент унга кунига бир франқдан тўлаб туради. Бу қимматга тушаётганини Винсент яхши тушунар, аммо аёл доимо ёнида бўлиши, уни кир ювишдек мashaқатли ишдан озод қилаётганидан ўзида йўқ мамнун эди. Винсент кундуз кунлари бирон ерга чиқиб келишга тўғри келиб қолса, аёлни оқшомлари ярим тунга қадар чизар эди, шундай кечалар Христина уникида тунаб қоларди. Эртасига сахарда уйғонгач, печка атрофида куймаланиб юрган меҳрибон бир аёлга қараб туриб, Винсент ҳозиргина тайёрланган қаҳва исини маст бўлиб хидлар эди.

Баъзида Христина уникида шунчаки, ҳеч қандай сабаб-у баҳоналарсиз тунаб қоларди.

- Мен бугун шу ерда тунаб қоламан, Винсент, – дер эди у. – Майлими?
- Албатта, Син. Қачон истасанг, қолишинг мумкин. Биласан-ку, бундан фақат мамнун бўламан.

Винсент ундан ҳеч нарсани илтимос қилмаса-да, Христина секинаста унинг кир-чирини ювадиган, йиртигини ямайдиган, харидга ўзи чиқадиган бўлди.

- Сиз эркаклар ўзларингизга қараб юра олмайсизлар, – дер эди у. – Ёнингизда албатта бир аёл бўлиши лозим.

Винсент Христинани ҳар куни чизавериб, унинг қоматини яхшилаб ўрганиб олди ва энди ҳакиқий, жиддий этюд яратишга қарор қиласди. Бундай фикрга келишига: “Наҳот, бу ёруғ дунёда бир аёл шунчалар ёлғиз ва умидсиз яшаса?” деган сўзлар сабабчи бўлди. Винсент кийимсиз Христинани печка ёнига қўйилган ёғоч ғўлалари устига ўтқазди. Этюдга ишлов бераётганида бу ғўлаларни атрофида ўт-ўланлар билан ўралган тўнкага айлантириди, бутун манзарани эса табиатдан кўчирди. Винсент бу суратни “Дард” деб номлади. Бу ҳаётнинг барча лаззатидан мосуво бир аёл эди.

Сурат устида ишлаш бир ҳафтага чўзилди, оқибатда Винсентнинг чўнгтаги бўшаб қолди. Биринчи мартгача ҳали ўн кун бор эди. Олдиндан сақлаб кўйилган қора нон икки-уч кунга етади. Винсент ишлари бироз орқага сурилса-да, натура билан ишлашни тўхтатиб туриши лозимлигини тушунди.

Бешинчи кун оқшом устахонага Христина тақиллатмасдан кириб келди. Винсент ухлаб ётарди. Христина Винсентнинг ажин босиб бўздек оқарган юзига, малла соқолига, қуруқшаб шишган лабларига қараб қолди. Сўнг пешонасига оҳиста кўлини кўйди. Винсент ёниб ётарди. Христина одатда озиқ-овқат турадиган токчани тимирскилаб чиқди. У ерда на бир ушоқ нон, на бир дона қаҳва дони бор эди. Христина секингина эшикни ёпиб, чиқиб кетди.

Бир соатлардан сўнг Винсент кўзини очиб, Христинани кўрди. У печка ёнида ўтириб, қошиқ билан ниманидир ковлаб ўтиради.

– Син, – шивирлади у.

Христина каравотга яқинлашиб, муздек кафтини унинг юзига кўйди, Винсентнинг ёноқлари олов бўлиб ёнарди.

– Ўуруингни четга кўя тур, – деди Син, – етар, мени бошқа алдама. Камбағаллигимиз бизнинг айбимиз эмас, ахир. Мен уйдан картошка билан ловия олиб келдим. Овқат тайёрладим.

Винсентнинг бош томонига ўтириб, унга овқат едирап экан:

– Пулинг ўзингга етмас экан, нега менга ҳар куни пул тўладинг? Оч юриб бўлмайди-ку, ахир, – деди.

Винсент Теодан пул кутиб, ҳафталаб очлик билан кураша оларди. Аммо тўсатдан қилинган бу яхшилик уни енгиб кўйди. Винсент Терстехнинг ёнига боришга қарор қилди. Христина унинг кўйлагини ювди, аммо дазмол бўлмагани учун уни дазмоллай олмади. Эрталаб Христина уни қаҳва билан сийлади. Винсент тўғри Плаатсга қараб яёв жўнади.

Гупиль фирмасининг хизматчилари бинони тозалаш билан машғул эдилар. Улар Винсентни ошкора қизикиш билан кузатишди. Ахир унинг бутун аймоғи бутун Европа санъати тақдирини ҳал қилса-ю, нега бу бундай жулдуровоқи бўлиб юрибди?

Терстех юқорида, ўзининг кабинетида экан. У нефрит дастали қофоз пичоқчаси билан эрталаб келган хатларни очарди.

– Дўконимизга бугун биринчи бўлиб сен қадам ранжида килдинг, Винсент, – деди у. – Хўш, нима хизмат?

Винсент қанчалар аҳволи танглигини сўзлаб берди.

– Юз франкни нима қилдинт?

– Сарфладим.

– Агар шу қадар исрофгарчиликка йўл қўйган бўлсанг, мени ёрдамидан умид ҳам қилма. Ҳар ой ўттиз кундан иборат. Бир кунда лозимидан ортиқ ишлатмаслигинг керак эди.

– Истрофгарчилик қилмадим. Деярли ҳамма пулим модель ёллашга кетди.

– Инсонларни чизма. Ана, сигирларни, қўйларни чиз. Уларга пул тўлашнинг ҳожати йўқ.

– Қандай қилиб мен қўй-сигирларни чизаман, минхер? Мен уларни хис қилмасам...

– Бундай суратларни барibir сота олмайсан. Акварель суратларни чиз, тамом-вассалом. – Мана, Де Бокни ол, бадавлат бўлса ҳам моделдан фойдаланмайди. Унинг полотноларининг ажойиб чиқишини инкор этмассан,

хар ҳолда. Винсент, сенинг чизганларинг ҳаваскорларники каби беўхшов. Бугун рассом эмаслигингга батамом ишонч ҳосил қилдим.

Тўсатдан Винсентнинг оёқлари чалишиб, беш кундан буён очлик азоби қийнаётганини сездирib қўйди. У оромқурсининг нақшин ёндорига бўшашибгина ўтириб қолди.

Терстех қордек оппоқ рўмолчасини олиб, оғиз-бурнини, соқолини артди.

– Сен рассом бўлиб туғилмагансан, сен ўз ўрнингни ҳаётдаги бошқа жабҳадан излашинг лозим. Рассомлар борасида мен ҳеч қачон адашмаганман.

– Биламан, – деди Винсент.

– Энг ёмони, сен рассомликни ниҳоятда кеч бошладинг. Агар болалик чоғингдан бу ишга киришганингда, балки ҳозир нимагадир эришган бўлардинг. Ҳозир ёшинг ўттизда. Ҳамонки сенда иқтидор йўқ экан, қандай қилиб муваффакиятдан умид қиляпсан? Бундан ҳам ёмони – Теодан хайр-эҳсон олиб, ўзингни қандай оқлайсан?

– Мауве менга: “Винсент, чизаётган пайтингда ҳақиқий рассом бўлиб қоласан-а”, деганди.

– Мауве қариндошинг, шунчаки сени аяди. Мен эса сенга дўст одамман, ундан кейин сенга Мауведан ҳам яхшироқ муносабатда бўламан. Кеч бўлмасдан рассомчиликни ташла, ҳаётинг беҳуда ўтиб кетганини тушумасингдан аввалроқ ташла. Қачондир бир куни ҳаётдаги ўрнинг қаерда эканлигини тушуниб етиб, муваффакиятга эришганингдан сўнг келиб менга раҳмат айтасан.

– Минхер Терстех, мана беш кундирки, нон учун бир сантимим ҳам йўқ. Агар гап фақат ўзим ҳақимда бўлганида эди, сиздан пул сўрамаган бўлар эдим. Менинг бир натурачим бор, камбағал, хаста бир аёл. Мен ундан карз бўлиб қолдим. У ўзи чор-ночор кун кўради. Ўтинаман сиздан, Теодан пул олгунимча, ўн гульден қарз бериб туринг. Қайтариб бераман.

Терстех ўрнидан туриб деразага боқди. Кўлда оқкушлар сузуб юрарди. Терстех Винсентнинг ҳаёлига нега айнан Гаагага келиб жойлашиш ўрнашиб қолганига ҳеч ақли етмасди, ахир унинг амакилари Амстердам, Роттердам, Брюссель, Париж каби азим шаҳарларда катта-катта рассомлик дўйконларини бошқаради-ку.

– Сенингча, мен ҳозир ўн гульден берсам, сенга яхшилик қилган бўламанми? – деди Терстех қўлларини ортига чалиштирган кўйи. – Менинчам, сенга пулни бермасам, кўпроқ яхшилик қилган бўламан.

Винсент Синнинг картошка ва ловияларни қандай олиб келганини яхши биларди. Аёл бундан кейин ҳам уни боқишига йўл қўйиб бера олмасди.

– Минхер Терстех, сиз, албатта, ҳақсиз. Мен рассом эмасман, иқтидорим йўқ экан. Менга пул бериб, номаъқул иш қилган бўласиз. Ўзим пул ишлаб топишни бошлишим ва ҳаётда ўз ўрнимни топишим керак. Аммо эски дўстлигимиз ҳаққи, ўтинаман, ўн гульден бериб туринг.

Терстех ҳамёнини чиқарди, ўн гульден олиб, бир сўз ҳам қотмай, Винсентга узатди.

– Миннатдорман, – деди Винсент. – Жуда олижканобсиз.

Бир ҳафта ўтиб, у Маувеникига боришга қарор қилди. Холаваччаси уни устахонага киритишга киритди-ю, аммо шошганича сурати устига

ёпинғич ташлади.

– Нима керак сенга? – сўради у гўё Винсент нега келганини билмагандек.

– Бир нечта акварель суратларимни кўрсатмоқчи эдим. Бир дақиқа вақтнингизни ажратсангиз дегандим.

Мауве мўйқаламларини ювиб тозалар, ҳаракатлари асабий ва бесаранжом эди. Уч кундан бери ётогига бориб ётмаганди. Ора-сира устахонасида тахта устида мизғиб олар, аммо бу уйқу тетиклик баҳш этмасди.

– Сени ҳамиша ўқитиш имконидан йироқман, Винсент. Баъзан ниҳоятда толиқаман, Худо ҳаққи, бошқа гал келсанг.

– Узр сўрайман, Мауве, – кечирим сўради Винсент эшикка яқинлашиб.

– Сизга халал бераман деб ўйламаган эдим. Яхшиси, эртага кечкурун кела қолай.

Мауве суратнинг устидан ёпинчиғни олди, у Винсентнинг гапларини эшифтади ҳам.

Эртаси куни оқшом Винсент Маувеларниги келганида у ерда Вейсенбрухга дуч келди. Мауве ўлгудек ҳориганидан деярли талвасага тушай деб қолган эди. Бироз овунишига ва дўстининг вақтини чоғ қилишга баҳона топилганидан Винсентга ҳамла қила кетди.

– Вейсенбрух! – хитоб қилди у. – Қаранг, унинг башараси қанақа! – деда у ўзининг санъатини кўрсата кетди, афтини шундай бужмайтиридики, юзини чуқур ажинлар қоплади, сўнг иягини олдинга чиқарган эди, Винсентнинг ўзи бўлди-қолди. Сўнг Мауве Вейсенбрухга яқинлашиб, унга кўзини қисиб қаради-да, Винсентга тақлидан тупукларини сачратиб, хириллаган овозда пойинтар-сойинтар гапира кетди.

– Вой, қойил-е! – қичкирди Вейсенбрух кулгудан ииқилгудай бўлиб. – Ван Гог, сизни одамлар худди шундай ҳолда кўришади...

Орадан бир неча дақиқа ўтгач Вейсенбрух кетди. Ортидан эшик ёпилган заҳоти, Мауве ўзини оромкурсига ташлади. Винсент жимгина бурчакда тик турарди. Ниҳоят, Мауве уни пайқади.

– Сен ҳали ҳам шу ердамисан? – ажабланди у.

– Мауве, – қизиққонлик билан сўз бошлади Винсент. – Сизга нима бўлди? Айтинг, сизга нима қилдим? Нега менга бундай муомалада бўляпсиз?

Мауве ҳорғин ўрнидан турди ва пешонасидаги бир тутам сочини четга суриб:

– Сендан норозиман, Винсент. Сен ўз кунингни ўзинг кўришинг керак. Қачонгача тўғри келган одамдан пул тиланиб, Ван Гоглар номига иснод келтирасан? – деди.

Винсент бир дам ўйга толди.

– Терстех билан кўришдингизми? – сўради у.

– Йўқ.

– Демак, энди мени ўқитмайсизми?

– Йўқ, ўқитмайман.

– Нима ҳам дердим, келинг, бир-биrimizning қўлимизни сиқайлик, ҳеч қандай хусуматсиз. Сизга бўлган миннатдорчилик туйгумни мендан ҳеч ким тортиб ололмайди.

Мауве бир сўз демай, узоқ жим қолди. Сўнг:

– Буни кўнглингга яқин олма, Винсент. Мен жуда толиқканман, бетоб бир одамман. Қўлимдан келганича сенга ёрдам беришга ҳаракат қиласман. Суратларингни ўзинг билан олиб келганмисан? – деб сўради.

– Олиб келганман. Аммо ҳозир бунга...

– Қани, кўрсат-чи.

У суратларга чарчоқдан қизариб кетган кўзларини тикди ва кескин сўзларкан:

– Чизганларинг жуда ёмон. Ажаб, нега буни илгари пайқамаган эканман-а, – деб қўйди.

– Сиз бир пайтлар менга, чизганингда ҳақиқий рассомга ўхшаб қоласан, деган эдингиз.

– Адашган эканман. Мен бу дағалликни куч деб ўйлабман. Агар сен ҳақиқатдан ҳам ўрганишни истасанг, ҳаммасини бошидан бошлишинг лозим. Ҳов анати ерда, бурчакда, кўмир чепак ёнида бир нечта гипс бор. Истасанг, ҳозироқ чизишинг мумкин.

Ҳайратланган Винсент бурчакка борди. Оппоқ бир гипс оёқ ёнига чўкди. Алламахалгача на ақлини йиға олди, на ҳаракат қила олди. Сўнг киссадан бир нечта расм қофозини чиқарди, аммо бир чизик ҳам тортишга мажоли колмаганди. У қайрилиб, мольберт ёнида турган Маувега қаради.

– Ишларингиз яхши кетяптими, Мауве?

Мауве ўзини диванга ташлади, қон қуйилган кўзлари ўша заҳотиёқ юмилди.

– Терстех бугун шу кунгача яратган ишларингнинг энг яхшиси деб айтди.

Бирон сониядан сўнг Винсент ўйчан:

– Демак, Терстех барибир келган экан-да! – деб қўйди.

Мауве хуррак ота бошлаганидан унинг сўзини эшифтади.

Вақт ўтиб, Винсент секин-аста тинчланди. Гипс оёқни чизишига тутиндиди. Чамаси уч соатлардан сўнг Мауве уйкудан уйғонганида Винсент етти дона суратни таҳт қилиб улгурган эди. Мауве бир дақика ҳам ухламагандек, худди мушукдек дивандан сақраб турди-да, Винсентнинг ёнига отилди.

– Қани, қани! – деди у. – Кўрсат-чи!

У етти суратнинг барини кўриб чиқди, барида бир сўзни такрорларди:

– Йўқ! Йўқ! Йўқ!

У суратларни йиртиб ташлаб, қоғоз парчаларини ерга сочиб юборди.

– Ҳаммасида ўша дағаллик, ўша юзакилик! Наҳотки сен бу гипс оёқларни қандай бўлса ўшандай чиза олмасанг? Наҳотки тўғри чизиқни топа олмасанг? Ҳаётингда ҳеч бўлмаса бир марта бўлса ҳам кўрганингдек аниқ чизгин!

– Сиз худди рассомчилик мактабидаги ўқитувчи каби гапирдингиз, Мауве.

– Агар мактабда ўрганганингда эди, бугун қандай чизишни билган бўйлар эдинг. Қайтадан чиз. Оёқ оёққа ўхшасин.

У боқقا чиқиб кетди, у ердан кечки овқат учун ошхонага ўтди, сўнг қайтиб, чироқ остида ишлай бошлади. Оқшом чўкиб, соатлар ўтиб бораради. Винсент оёқни чизаверди, чизаверди, қоғоздан-қоғозга ўтаверди. Ишлаган сайин қаршисидаги бу хунук гипс парчасига нафрати ортиб бораверди. Шимол томонга қараган дарчадан тонг бўзариди кўрганингдек Винсент бир талай сурат чизиб қўйган эди.

Мауве яқинлашиб, суратларни кўздан кечирди, ҳаммасини ғижимлаб ташлади.

– Ёмон, – деди у. – Нихоятда ёмон. Сен элементар қоидаларнинг барини бузяпсан. Биласанми, нима, бу оёқни олиб, уйингга бор. уни қайта-қайта чиз. Яхшилаб чизмагунингча, бу ерга келма.

– Сира ундаи қилмайман, жин урсин! – бақириб юборди Винсент.

У гипс оёқни кўмиричелакка улоқтириди. Гипс оёқ парча-парча бўлиб, сочилиб кетди.

– Бошқа менга гипс ҳақида сўз ҳам деманг, уларни эшишишни истамайман. Мен гипсларни бу ер юзида биронта ҳам жонли оёқ ёки қўл қолмагандан кейингина чизишим мумкин, аммо ундан аввал эмас!

– Нима ҳам дердим, сен шуни истасанг... – деди Мауве совуққина.

Чошгоҳда уйғонган Винсент устахонасида Христина билан унинг ўғли Германга кўзи тушди. Герман миттигина иякли, кўркув билан боқиб турадиган зангори кўзли рангпар бола эди. Унинг тинч ўтириши учун Христина унга қофоз ва қалам тутқазиб қўйган эди. Болакай Винсентнинг ёнига уялиб, бегонасираб яқинлашди. Винсент унга қаламни тўғри тутишни кўрсатиб, сигир расмини солишини ўргатди. Бола завқланиб кетди, тез орада Винсент иккаласи дўстлашиб ҳам олди. Христина столга озгина пишлоқ билан нон кўйди, учаласи нонушта қилишди.

– Бугун ўзимни унча яхши ҳис қилмаяпман, шунинг учун бугун ўрнимга ўғлим Германни чиза қол.

– Нима бўлди сенга, Син?

– Билмайман. Ичим бураб, оғрияпти.

– Докторга кўринишинг керак.

– Бепул шифохонага боргандан нима наф? У менга дори ёзиб беради, холос.

– Лейдендаги давлат шифохонасига бор.

– Шунаقا қилишим керакка ўхшайди.

– Поездда борса, унчалик узоқ эмас. Эртага бирга борамиз. Бу шифохонага бутун Голландиядан келишади.

Кун бўйи Христина тўшакдан турмади. Винсент болакайни чизди. Овқатдан олдин Германни кўтариб, Христинанинг онасиликига элтиб қўйди. Эртасига тонг сахар Христина билан Лейденга кетадиган поездга ўтиришди.

– Ўзингизни ёмон ҳис қилганингиздан ҳеч ажабланмаса ҳам бўлади, – деди доктор Христинани текшириб, унга бир нечта керакли саволларни бергандан сўнг. – Болангиз нотўғри жойлашиб қолган. Операция қилиш керак. Лекин бу пуллик.

– Мен пул топаман, доктор, – деди Винсент.

– Аёлни шанба куни эрталаб олиб келинг, операцияни ўзим қиласан. Бир гап, огоҳлантириб қўяй, агар бу хоним яна кўчада изғий бошласа, айтиб қўяй, олти ойга ҳам бормайди.

Бир неча кундан сўнг Винсентникига Терстех келди.

– Кўриб турибман, ҳали ҳам астойдил тирмашиб ётибсан.

– Ҳа, ишляяпман.

– Почта орқали жўнаттган ўн гульденни олдим. Ҳеч бўлмагандан, ёнимга келиб, миннатдорчилик билдириб қўйсанг бўларди.

– Йўл олис, минхер, ҳаво ҳам яхши эмас. Ҳўш, ишларимни сотиб оласизми ёки йўқми, буни шахсий тортишувларимизга ҳеч қандай алоқаси йўқ, деб ўйлайман, – деди у.

– Йўқ, албатта, йўқ. Агар сен сотса бўладиган бирон бир нафис асар яратадиган, мен мамнуният билан уни Плаатсда қўйган бўлардим.

– Минхер Терстех, оғир меҳнат, мажоз ва ҳис-туйғу асосида яратилган иш ҳеч кимнинг эътиборини тортмайди, фойда ҳам келтирмайди. Эҳтимол, кимнингдир дидига ёкиб, кўнглини олмоққа уринмаганим ҳам маъқулдир.

Терстех пальтосининг тугмаларини ҳам, қўлқопини ҳам ечмай, стулга чўкди. Иккала қўлини ҳассасининг думалоқ тутқичига қўйганча ўтиарди.

– Биласанми, Винсент, баъзан сен менга суратларингни сотишни истамаётгандек, бошқалар хисобига яшашни афзал кўрадиганингдек туюлиб кетади.

– Бир дона суратим сотилса ҳам ўзимни бахтли ҳис қилган бўлар эдим. Аммо ажойиб рассом – Вейсенбрух сиз сотишга яроқсиз деб ҳисоблаган чизмаларим борасида “Нихоятда ҳаққоний. Мен ҳам шундай эскизлар устида ишлашим мумкин эди”, деганида минг чандон бахтли бўлдим. Гарчи пулга эҳтиёжим бўлса-да, айниқса, ҳозир, мен учун муҳими – бирон жиддийроқ асар яратиши.

– Бундай гапни Де Бокка ўхшаган бадавлат кишилар айтса ярашади.

Терстех ҳассасини тиззасига қўйиб, стул суюнчиғига суюнди.

– Ота-онанг, Винсент, мендан сен учун қўлимдан келган барини қилишимни сўради. Сен бундай бениҳоя хунук, жулдур кийим кийиб олиб, ўзингни нобуд қилаяпсан. Янги уст-бош сотиб олиб, ташки кўринишингга эътиборли бўлмоғинг керак. Унутма, сен Ван Гогсан. Ундан кейин, ҳар доим ишчилар-у қандайдир қаланғи-қасанғилар билан куймаланиб юрмай, Гааганинг нуфузли кишилари билан алоқа ўрнатишга ҳаракат қилсанг яхши бўлар эди. Ўзингни шундай тутатуриб, яна қандай қилиб муваффақиятга эришишингдан умид қилаяпсан?

Винсент столдан сакраб тушиб, Терстехга яқинлашди. Фақат айни фурсатдагина, айнан шу ерда, устаҳонасида, бу одамнинг ўзига бўлган ихлосини қайта уйғотиши мумкинлигини Винсент тушунган эди. Винсент юмшоқ, дўустона оҳангда сўзлашга ҳаракат қилди:

– Минхер, менга кўмак қўлинни чўзиб меҳрибончилик кўрсатаяпсиз, мен ҳам имконим борича очиқ ва самимийлик билан жавоб бераяпман. Пулим бўлмаса, қандай қилиб дуруст кийинишим мумкин? Тўғри, сув бўйидаги кўчалар-у хилват жинкўчаларда, вокзалларда изғиб юриш бу – хузур эмас, аммо бу рассом учун керак! Дилбар хоним билан майдалаб чой ичиб ўтиргандан кўра, мудхиш ҳаробаларни чизиш афзал эмасми? Менинг ишим – бугун бутун кун давомида машғул бўлганим – Геестдаги ер қазувчиларни чизиш. У ерда менинг беўхшов юзим ҳам, тўзиган уст-бошим ҳам шароитга айнан тўғри келади, мен мароқ билан ишлайман. Аммо серҳашам кийиниб олсам, мен чизишни истаган ишчи одамлар мендан ҳайиқиб туришади, менга ишонмай қўйишади. Мен ўз суратларим билан жамоатга ҳар ким ҳам кўра олмайдиган, аммо қўришга арзийдиган нарсалар ҳам борлигини очиб бермоқчиман.

– Жуда қайсарсан, Винсент, сенга яхшилик тилаётган катталарга қулоқ ҳам солмайсан. Сен аллақачон омадсизликка кўнникдинг, олдинда ҳам сени айнан шу кутиб турибди. Ҳамиша шундай бўлиб қолади.

8

Бир неча кун ўтиб, қумтепалар бўйлаб кезиб юрган Винсент қўққисдан Маувега дуч келиб қолди. У ўқитувчиси билан ярашиб олишдан умид қилган бўлса-да, унинг умидлари пучга чиқди.

– Мауве, сиздан устаҳонада бўлган иш учун узр сўрайман. Бирон кун меникига ишларимни кўриб, сухбатлашишга кира оласизми?

Мауве уни кескин рад қилди.

– Мен сеникига бошқа ҳеч қачон бормайман.

– Наҳотки менга бўлган ишончинингзиз бутунлай йўқолган бўлса?

– Ҳа, йўқолди. Сен ахлоқсизсан.

– Агар менга қандай ахлоқсизлик қилганимни айтсангиз, уни тузатишга ҳаракат қиласадим.

– Нима қилишингнинг менга энди фарқи йўқ.

– Мен фақатгина ҳамма рассомлар қатори едим, ухладим, ишладим.

Бунда қандай ахлоқсизлик бўлиши мумкин?

– Сен ўзингни рассом ҳисоблаяпсанми? Қандай бемаънилик. Сен умрингда биронта ҳам сурат сотганинг йўқ-ку.

– Сурат сотиш рассом бўлиш деганими? Мен эса рассом деб – ҳамиша ниманидир ахтариб, аммо ҳеч қачон топа олмайдиган инсонни тушунибман. Унинг учун “биламан”, “топдим” деган сўзлар йўқ. Модомики, мен ўзимни рассом дея атар эканман, бу – “мен ҳануз изляяпман, интиляяпман ва бунинг учун бутун қалбимни бахшида қиламан”, деганимдир.

– Шунга қарамай, сен ахлоқсизсан.

– Сиз мендан шубҳа қилаяпсиз, кўриниб турибди. Мауве, очиқчасига айтинг, илтимос.

Мауве мольбертига ўғирилди ва полотно узра мўйқаламини юргиза кетди.

Ҳа, у адашмабди. Унинг бошига ҳалокат ёғилибди. Бутун Гаага Христина билан алоқасидан хабар топибди. Бу янгиликни биринчи бўлиб Де Бок етказган эди.

У Винсентнинг устахонасига шумлик билан илжайиб кириб келди. Бу пайт Христина Винсент учун суратга туриб бераётган эди.

– Ҳўш, хўш, Ван Гог, – деди у оғир қора пальтосини ташлаб ва узун папиросини чекатуриб. – Бутун Гаага ўзингизга маъшука топганингиз ҳақида сўзлаяпти. Буни Вейсенбрухдан, Мауведан, Терстехдан эшиитдим. Бутун Гаага сизга қарши куролланган.

– Мана гап қаерда экан, – жавоб қилди Винсент.

– Эҳтиёт бўлиш лозим, қария. Бу ким, натурачи қизми? Мен уларни ҳаммасини танийман деб ўйлаган эдим.

Винсент печка ёнида ишлаб ўтирган Христинага назар ташлади. Унинг тиззасига жун мато ташланган, нигоҳи ўзи тиккан қай бир нақшга қадалган эди, шу лаҳзада у қандайдир ёқимли ва содда кўриниб кетди. Тўсатдан Де Бок папиросини ерга отиб, ўрнидан дик этиб турди.

– Эй худо, – хитоб қилди у, – наҳотки бу сизнинг маъшуқангиз бўлса?

– Менинг маъшуқам йўқ,

– Унда ким бу?

– Менинг рафиқам!

Де Бок кўзлари олайиб кетди.

– Рафиқангиз!

– Ҳа. Мен унга уйланаяпман.

– Ё, Худойим!

Де Бок яна бир бор Христинага даҳшат ва нафрат аралаш қаради, сўнг пальтосини тўғри кийишга улгурмай устахонадан отилиб чиқиб кетди.

– Мен ҳақимда нимани сўзлашдинглар? – сўради Христина.

Винсент қўлларини кўксисда чалиштириб, унга бир сония қараб турди.

– Де Бокка менинг рафиқам бўлишингни айтдим.

Христина узоқ жим қолди, бармоқлари ҳануз иш билан банд эди. Оғзи ярим очилган, тили қуриб қолган лабларини тез-тез ялаб қўярди.

– Сен ростдан ҳам менга уйланмоқчимисан, Винсент? Нега?

– Агар сенга уйланмасам, унда сени умрбод тарк этишим керак бўлади. Мен суратларни ўз тажрибамдан келиб чиқиб тасвираш учун ҳам оилавий ҳаётнинг барча қувончи-ю қайғусини бошдан кечиришни истайман.

– Аммо менга уйлана олмайсан! Ахир болаларим бор! Уканг сенга пул жўнатмай кўяди.

– Христина, мен сени бир аёл ва она сифатида хурмат қиласман. Бўлажак фарзандинг ва Герман биз билан яшайди, қолганлари онанг билан қолади. Тео эса... ха, у менинг бошимни олиши аниқ. Бироқ унга бор ҳақиқатни ёзаман, умид қиласманки, у мени ташлаб кўймайди... Син, биз ҳар бир сантимни асроймиз, тўғрими? Кўркканим – баъзан шундай пайтлар бўладики, ҳеч вақосиз одамга айланиб қоласман. Сенга то Лейдендаги шифохонага ётгунингга қадар кўмак бераман, аммо қайтиб қелганингда ёнимда нон учун пулим бўладими, йўқми, бунисини билмайман. Бироқ энг сўнгги тишлам нонгача сен ва боланг билан баҳам кўраман.

Христина аста ерга сирғалиб тушди, Винсентнинг ёнига ўтириб, унинг бўйнидан кучди, елкасига бошини кўйди.

– Ёнингда қолсам бўлди, Винсент. Бошқа ҳеч нарса сўрамайман. Севаман сени, Винсент. Сен ҳаётимда менга яхши муносабатда бўлган ягона эркаксан. Ҳаётимда илк бор ўзимни баҳтиёр ҳис этаяпман, Винсент. Менга ҳеч нарсанинг кераги йўқ. Боримни сен билан баҳам кўрсам, баҳтли бўламан.

Винсент Христинанинг ҳар битта ажинини ўпиб, меҳр билан унинг кўримсизгина юзини сийпай бошлади. Нам кокилларини эркалаб силаб, соchlарини орқасига ёйиб юборди. Христина баҳтдан ял-ял ёнган яногини Винсентнинг соқолига босди.

– Сени севсалар қандай ажойиб-а. Майли, одамлар истасалар буни ахлоқизлик деб атай қолсинлар.

Улар бир-бирларини қаттиқ қучиб, қизиб турган печка ёнида исинганча полда ўтирап эдилар. Сокин осойишталикни почтаци бузди. У Винсентнинг кўлига Амстердамдан етиб келган мактубни тутқазди. Мактубда шундай жумлалар битилган эди:

“Винсент!

Мен ҳозиргина сенинг иснод келтирувчи хатти-ҳаракатларингдан хабар топдим. Марҳамат қилиб, менинг олти дона сурат ҳақидағи буюртмамни унутсанг. Сенинг ишларинг энди мени қизиқтирмайди.

К. М. Ван Гог”.

Энди Винсентнинг тақдири бутунлай Теонинг қўлида эди. Агар у укасига Христинага бўлган муносабатининг аслида қандай эканлигини изоҳлай олмаса, Тео ҳам унга юз франкни жўнатишдан воз кечиши мумкин. Винсент токи қўлида иши, ёнида Христина бор экан, устози Маувесиз ҳам, савдо-гар Терстехсиз ҳам, қадрдонлари-ю дўст-биродарлари, касбдошларисиз ҳам яшай олиши мумкин. Аммо ҳар ой келиб турадиган юз франксиз ҳеч қанақасига яшай олмайди!

Винсент укасига узундан-узун қизғин мактуб ёзди. Бор гапни изоҳлашга уриниб, Теодан вазиятни тушунишини, уни ёлғиз қолдирмаслигини сўраб ўтинди. Кунлар бирин-кетин ўтаверди. Винсент қандайдир кўнгилсиз воқеа рўй беришини кўнгли сезиб, азобланарди. У энди қарзини тўлай олмаслигидан кўрқиб рассомчилик ашёларини сотиб олишга ҳайиқиб қолган,

акварелда янги сурат бошлашга, бошланганларини ҳам давом эттиришга чўчиб қолганди.

Тео ўз эътиrozларини билдириб, хат ёзди. Акасига маслаҳатлар берди, хотининг сўнгидагарчи у Винсентнинг хатти-харакатидан норози эканлигини билдирса-да, аввалгидек унга ёрдам бериб туришини ёзган эди.

Май ойи бошланди. Доктор Христинани шифохонага ионда олишини маълум қилди. Винсент Христинанинг кўзи ёрганидан сўнг уникига кўчиб ўтиши маъқул, деган тўхтамга келди ва Схенквегда, устахонаси ёнидан бўш уй топишни ўйлаб кўйди. Христина бутун кун давомида уникида бўлар, буюмлари эса онасининг уйида қолган эди. У бутунлай соғайиб олгачгина улар расман оила қуришга келишиб олишди.

* * *

Денгиз қирғоққа урилганида оппоқ бўлиб кўпирар, бора-бора зумрад тус олар, кейин эса кўкиш рангга киради. Жимжимадор булатлар бўзарган осмонни қоплаганча сузуб юрар, у ер-бу ердангина балиқчиларга Голландияда ҳануз офтоб порлаб турганини эслатиб, мовий ранглар мўралаб туради. Схевенингенда шу денгиз ва шу қирғоққа қаттиқ боғланган меҳнаткаш халқ яшарди.

Винсент очиқ ҳавода озмунча акварель суратлар чизмади, дейсизми, шунда тушуниб етдики, акварель юзаки тасаввурни уйғотишга асқотаркан, холос. Аммо унда теранлик, зичлик, Винсент ифодалашни истаган услуг топилмас эди.

Тео йигирма олти ёшида суратлар тижоратида етарлича нуфузли тадбиркор бўлиб етишган эди. У фирмасининг иши бўйича талай ерларга саёҳат қилган, уни қобилиятли ёшлардан бири сифатида ҳамма жойда танишар эди. Гупиль фирмасининг Париждаги бўлнимини Буссо ва Валадон фирмаси (дунёда “Месъ” номи билан машхур) сотиб олди.

Оға-ини устахонада кўришганларида, Христина юқорида, ётоқхонада эди. Саломлашиб бўлибоқ Тео:

– Бу ерга иш юзасидан келдим, аммо очиғини айтаман, Гаагага келишимдан асосий мақсадим, бу аёл билан ҳаётингни боғлашингдан сени қайтаришдир. Ўзи қанақа аёл у? – деб сўради.

– Зюндертдаги кекса энагамиз – Леен Ферман ёдингдами?

– Ёдимда.

– Син айнан шундай аёл. Оддий одамлардан чиққан аёл, аммо унда қандайдир бир юксаклик кўрдим. Оддий бир инсонни севсанг, у ҳам сени севса, ҳаётинг қанчалар оғир бўлмасин, баҳт шунда эмасми? Кимгadir керак эканлигимни ҳис қилиш мени ҳаётга қайтарди. Бу туйфуни мен ахтармадим, ўзи мени топиб келди. Син рассом ҳаётидаги барча ғамташвиш-у ноқулайликларга бардош бера олади, жон-дили билан сурат чизишим учун туриб беради, Кэйга уйланганимдан кўра, бу аёл билан яшасам, эҳтимол, мендан зўр рассом чиқар.

Тео устахона бўйлаб юра бошлади, ниҳоят, нигоҳини бир суратдан узмай туриб сўради:

– Бир нарсани тушуна олмаяпман, қандай қилиб Кэйга бўлган ота-шин муҳаббатингдан сўнг бу аёлни севиб қолган бўлишинг мумкин?

– Уни бирданига севиб қолганим йўқ, Тео. Кэй мени рад қилган бўлса, бу менда барча инсоний ҳис-туйғулар ўлди дегани эмас-ку? Мана, келиб, ўзинг кўриб турибсан, умидсизликка тушганим йўқ, сиқилаётганим йўқ. Энди янги устахонам бор, оилас, ўз уйим бор. Бу ерда ҳаёт тўхтаб қолгани йўқ, аксинча давом этајпти, ишлашга ундаяпти.

– Биласан, Винсент, мен инсонларни табақаларга ажратиш каби бидъатларга аҳамият бермайман, аммо наҳот сен буни ақлдан деб ҳисобласанг...

– Йўқ, – Винсент унинг сўзини бўлди, – Агар қасбим мени халқнинг ич-ичигача тортиб кирса, агар ўзимни ерга яқинроқ тутсам, ҳаётнинг туб моҳиятини англаб, муҳтожлиг-у йўқчиликка қарамай тўсикларни енгиб ўтсан, мен ўзимни таҳқириланган, изза бўлган деб ўйламайман.

– Бу борада баҳслашмайман. Аммо нега энди уйланишга мажбурсан?

– Чунки бир-биримизга сўз бердик. Унга бир хушторимдай ёки бўлмаса, тасодифий бир аёлдек қарашингни истамайман. Бир-биримизга икки нарсани ваъда қилдик. Биринчиси – имкони бўлган заҳоти расман никоҳдан ўтиш, иккинчиси – эр-хотин каби ҳамма нарсада тенг бўлиш, бир-биримизга кўмаклашиб, ғамхўрлик қилиш.

– Аммо сен расман никоҳдан ўтишдан олдин бироз кутиб турсанг керак?

– Сен шуни истаётган бўлсанг, кутиб тураман. Ўзим юз эллик франк ишлаб топиб, сени кўмагингга эҳтиёж қолмагунича кутиб турамиз. Ўзим ишлаб пул топмагунимча, уйланмайман, деб сўз бераман сенга.

– Мана буниси маъкул иш.

– Тео, ана ўзи ҳам келаяпти. Ўтинаман, унга бир аёл, бир онадек муносабатда бўлгин!

Христина зинадан устахонага тушиб келди. Эгнида озода кора кўйлак, соchlари ҳафсала билан тарағлан, ёнокларидаги пушти ранг упа чўтирларини бироз ёпган эди. Ҳамма уй бекалари каби ёқимли эди. Христина ўзини хотиржам тутиб Тео билан қўл сиқишиб кўришди, бир пиёла чойга таклиф этиб, уни кечки овқатга қолишга кўндира бошлади. Сўнг оромқурсига бориб ўтириди.

Оқшом дастурхон бошида Тео билан Христина қизгин сухбат қуришди. Тео кетаётганда, зинада Винсентга ўтирилиб француз тилида сўзлади:

– Жуда ёқимли аёл экан, рости. Буни кутмаган эдим!

Эртасига эрталаб улар Вагенстраат бўйлаб кетиб боришар эди. Ҳеч бир-биirlарига ўҳшамас – ука чақмоқдек кийиниб олган, пойабзали ялтирад, кўйлаги оҳорланган, бўйинбоги бекам-кўст боғланган, дазмолланган костюм-шимда. Кора тусдаги бош кийими хиёл ёнга сурилган, каштан тусли соқоли текисланган, бир маромда қадам ташлаб борарди. Акаси эса тўзиган бошмоқларда, тор пальтосининг рангига мутлақо номуносиб ямоқ шимда, бўйинбогсиз, бошига беўхшов дехқонча шапкасини кўндириганча, кўлларини силкитиб, алпон-талпон одимлаб тинмай жавраб борарди.

* * *

Шу тариқа орадан бир неча ойлар ўтди. Бу вақт ичida Винсент Нюэненда яшаётган отасидан хат олди. Унда руҳоний Теодор Van Гог ўғлинининг зудлик билан Нюэненга етиб келишини сўраганди.

Бу орада Винсент ва Христина ўртасида муносабатлар негадир совуқлашди. Христинанинг яна сигарет ва ичкиликка берилиши, шунингдек, Винсентнинг доимий омадсизлиги, ҳануз бир чақага зор бўлиб юриши деярли ҳар куни жанжалларга сабаб бўла бошлаганди.

Ана шундай кунларнинг бирида Христинанинг ўзи масалани кўндаланг кўйди:

– Ҳаммаси учун сендан миннатдорман, Винсент. Аммо биз бир-биримиз учун яралмаганмиз. Сенинг ҳаётингда энди мен учун жой қолмади. Энди иккимиз ҳам ўз кунимизни кўришимиз керак.

Винсентга ҳам худди шу керак эди. У жон-жон деб қайғу, андух ва оғриқларга тўла бир неча йиллик умри кечган Гаага билан видолашиб, ота-онасининг хузурига ошиқди.

Тўртинчи қисм

НЮЭНЕН**1**

Руҳонийнинг Нюэнендаги уйи икки қаватли, оқ тошдан ишланган бўлиб, каттагина боғи ҳам бор эди. Руҳоний уйининг эшиги пештоқига 1764 сони ёзib қўйилганди. Кўча эшиқдан катта залга кирилар, Винсент укаси Тор билан иккинчи қаватда, меҳмонхонанинг тепасида туришарди. Эрталаб уйқудан туриши билан отасининг черкови узра кўтарилиб келаётган қуёш нурлари кўзларини қамаштиради.

Винсент ота-онасини севар, улар ҳам фарзандларини жондан ортиқ кўришарди. Учовлари тинч ва ҳамжиҳатликда яшашга келишиб олишганди. Винсент кўп овқатланар, кўп ухлар, кўпинча далаларни сайр қиласади. Кам гаплашар, асосан, сурат чизиш билан вақт ўтказар, китоб ўқимай қўйганди. Ўдагилар унга ўта эҳтиёткорона муносабатда бўла бошлашганди. У ҳам ўз навбатида яқинларига шу тариқа жавоб қайтарар, ўзаро келишувларни бузмасликка ҳаракат қиласади.

Винсент бу ерга фақат дам олиш учун, икки ҳафтага келганди. У ҳозир фақат бир нарсани, шу ерда қолиб, қишлоқ ҳаётини ўз полотноларида акс эттиришни истаб қолди.

У қачондир яна Брабантга қайтиб боришига ва ўша ерда умрбод яшашига ишонарди. Бироқ, у Нюэненда ота-онасининг истакларига биноан узоқ вақт тура олмасди.

– Остонада иккиланиб тургандан кўра, эшикни ёпиб кетган тузукроқ, дейишади, – деди бир куни у отасига. – Ота, гаплашиб олармиз?

– Винсент, мен ҳам шуни истайман. Кўряпман, ҳаракатларинг бехуда кетмаётганга ўхшайди.

– Яхши! Унда айтинг-чи, биз ахил-иноқ яшай оламиزم? Шу ерда қолишимни истайлизларми?

– Нега истамас эканмиз? Бу ер сенинг ҳам уйинг. Истаганингча қолишинг мумкин.

– Агар келишполмай қолсак-чи?

– Имкони борича бир-биrimизни тушуниб яшашга ҳаракат қиласади.

– Устахонани нима қиласади? Ахир уйда ишлашим учун шароит керак?

– Бу ёғини ўйлаб қўйганман, – деди отаси. – Боғимиздаги кирхона бўш ётибди. Ўша ерда эртадан кечгача ишлайвер, ҳеч ким сенга халақит бермайди.

Отаси айтган хужра ошхонанинг ёнгинасида эди. Унинг деразаси боғ томонга қараган, ери тупроқли бўлиб, қиши пайтлари деворларигача нам уриб турарди. Отаси қишида хужрани печь билан иситиш, ёғочдан пол қилиш мумкинлигини айтди.

– Агар дераза кичкиналиқ қилса, уста чақирамиз, кенгайтириб бера-ди, – деди Теодор.

– Йўқ, шу туриши маъқул, – деди Винсент. – Ёруғлик яхши тушиб тураркан.

Кирхонага печь қуриб ёқишишгач, деворлар ҳам қуриб қолди. Тахта қоқиб, полни ҳам эпақага келтиришиди.

Нюэненда яшовчи одамлар орасида Винсентни кўпроқ тўкувчилар қизиқтираарди. Улар кичкина, иккига ажратилган томсувоқ қулбаларда истиқомат қилишарди. Қулбанинг бир қисмида бутун оила аъзоларининг кундалик зарур ашёлари жойлаштирилган бўлса, иккинчи, кичкина хужрада тўкув дастгохи ўрин олганди.

Тўкувчилар эртаю кеч тер тўкиб, бир ҳафтада тўқиган матолари учун атиги ярим франк пул олардилар. Тайёр маҳсулотни буюртмачига топширгандан кейин ҳам буюртма дарров тушмас, баъзан ҳафталаб кутишга тўғри келарди. Факат Боринаждаги кўмирчилардан фарқли ўларок, тикувчилар ўта вазмин ва хокисор одамлар эди. Ўтган кунларига шукр қилиб яшардилар.

Винсент тезда улар билан чиқишиб кетди. Унга ана шундай содда, оққўнгил одамлар билан ишлаш ёқарди. Ўз суратларини чиздирадиган тикувчилар ҳеч қачон қуруқ қўл билан келишмасди. Ҳамиша бирор ширинлик, ҳеч бўлмаса, бир қути тамаки олиб келишарди.

Винсент кунларнинг бирида ўта қадимий тўкув дастгохини кўриб қолди. Унга 1730 йил деган битик ёзилганди. Деразадан ям-яшил ўтлоқ ва у ерда ўтирган жажжи болакай кўриниб турарди. Бу мўъжаз ва кўримсиз хонада Винсент аллақандай сокинлик ва хотиржамликни ҳис этди ҳамда уни ўз асарида тасвирилашга тутинди.

Шу тахлит у кўп вақтини дехқонлар ва тикувчилар даврасида ўтказадиган бўлди. Дехқонларнинг турмуш тарзи уни тамомила ўз комига тортиб олган, баъзида у ўзини ана шу ҳолатнинг ажралмас бир қисмига айлангандек сезарди.

У елкасига мольбертни илиб, ивиган суратларини қўлтиғига қистирганча кетиб бораркан, қулбаларнинг пардалари ортидан қизжуvonлар уни қизиқиб кузатаётганларини пайқамасди. Оила аъзолари унинг ишига аралашмас эдилар, факат синглиси Елизавета унга ёт назар билан қаарди. Акасининг телбавор юришлари унинг обрўсига соя солиб, совчи келмай кўйишидан хавфсиарди. Виллемина акасини ёқтирса-да, уни одамови деб ҳисобларди. Кейинги пайтларда у укаси Тор билан иноқлашиб қолганди.

Винсент оила даврасида, умумий стол атрофида эмас, бир чеккада тақсимчасини тиззасига қўйганча тамадди қиласарди, кейин навбатдаги сурат устида ишлашда давом этарди.

Винсент далаларда расм чиза бошлаганига бир ой бўлганида, дафъатан кимдир уни муттасил кузатиб юрганини сезиб қолди. У Нюэнен ахли ўзига нисбатан алланечук таажжуб ва қандайдир шубҳа билан қараётганларини яхши биларди. Бу галгиси эса, тамоман бошқача эди. У наинки орқасидан кузатиб, балки қадам-бақадам таъқиб этаётганини пайқади. Аввалига эътибор бермади, аммо ортидан кимдир кузатаётганини сезарди. Кунларнинг бирида у туйкус ортига ўгирилган эди, дарахт панасига ўзини олган қизнинг оқ юбкасини кўриб қолди. Бошқа сафар тўкувчининг қулбасидан чиқиб келаётганида, кимнингдир ёнидан чопқиллаб ўтганини сезди. Яна

бир куни ўрмонда ишлай туриб, ҳовуздан сув ичиб қайтган чоғида, мато устидаги бегона қўл излари диққатини тортди.

Бу номаълум шарпа аёл киши эканини англаш учун нақ икки ҳафта вақт кетди. Ўша куни у эски, ташландиқ машина панасида ўтириб, омоч билан ер ҳайдаётган дехқонлар суратини чизаётганди. Винсент ҳамма анжомларини йифиштириб, ўзини худди уйга кетаётгандек қилиб кўрсатди. Шу пайт бир аёл ундан шитоб ила ўзиб кетди ва отасининг уйи яқинидаги ҳовлилардан бирига кириб кетди.

– Ойи, чап томонимизда ким туради? – сўради Винсент кечки овқат пайтида.

– Бегеманлар оиласи. Уларни яхши танимайман. Бир аёл бешта қизи билан туради. Чамаси эри қазо қилган бўлса керак.

– Аёлнинг... эрга тегмаган қизи ҳам борми?

– Албатта, қизларидан бирортаси ҳам эрга тегмаган. Нима гап? Тинчликми?

– Шунчаки ўзим. Уларни ким бокади?

– Ҳеч ким. Улар ўзига тўқ одамлар.

– Қизларининг исмени билмайсизми?

– Билмайман, – деди онаси ўғлига синчковлик билан қараб қўяркан.

Винсент эрталаб яна ўша жойга борди. Яна дехқонлар тасвири билан банд бўлди. Коқ пешинда у яна кимдир шу атрофда пусиб юрганини ҳис этди. Кўз қири билан ташландиқ машина ортида ҳилпираб турган этакни ҳам кўрди.

– Бугун чизаётган суратим чала қолса ҳам, уни албатта тутаман, – дея ўзича минфиirlади Винсент.

У кўзига кўринган ва хотирасида муҳрланган манзарани тезлик билан мато сатҳига туширишга ҳаракат қиларди. Эски голланд сувратлари ҳам тезкорлик ила чизилгани боис Винсентни ҳайратга солар, чунки улар бир чизги устидан иккинчи бор қалам теккизмасликка уринишарди. Улар илк таассурот ва янги туғилган тасаввурни қочириб юбормаслик учун шу қадар чаққонлик билан ишлашган.

Иш билан бўлиб, Винсент қизни унугтаёди. Ярим соатлардан сўнг кўзи ўша тарафга тушганида, қизнинг дараҳт панасидан чиқиб, машина олдида турганини кўрди. У қизни тутиб олиб, ундан нима сабабдан таъқиб этиб юргани боисини сўрамоқчи ҳам бўлди. Аммо ишдан узила олмади. Бироз ўтиб яна ўша атрофга қаради. Мана ўша қиз, биринчи маротаба у ўзини яширишга уринмади.

Винсент шиддат билан ишга киришди. Ниҳоят қиз яқинлашиб келаётганини сезди. У мольбертни ёруғрок тарафга сурган чоғ қиз ўзи ва фургон машинаси орасидаги масофанинг коқ ўртасида турганини кўрди. Қиз худди афсун қилиниб, тушида ҳаракатланаётган одамга ўхшарди. У аллақандай номаълум кучга бўйсунган ҳолда тобора яқинлашиб келарди. Мана, Винсент ортидаги қизнинг олаётган нафасигача ҳис этди. У шартта ўгирилиб, унинг кўзларига қаттиқ тикилди. Бу нигоҳларда кўркүв, истиҳола ва аллақандай бошқариб бўлмас куч акс этарди. Винсент бир муддат унинг гап бошлишини кутиб турди. У жим турар эди.

– Мен Винсент Ван Гог, қўшнингизман, – деди у. – Танисангиз керак.

– Ҳа, – деди киз аранг ютиниб.

– Сиз опа-сингил Бегеманларданмисиз? Уларнинг қайси бирисиз?

Қиз олдинга мункиб кетди-ю, Винсентнинг енгига ёпишиб қаддини тиклаб олди. Сўнг лабларини ялаганча, аранг “Марго” деёлди, холос.

– Нега мени таъкиб қиляпсиз? Бир ҳафтадан бери сезиб юрибман.

Қиз кутиилмаганда бир “ох” тортди-ю, ерга йиқилиб тушди. Винсент дархол чўйкалааб, унинг бошини қўлига одди ва пешонасига тушган сочларини четга сурди. Қуёш қизарганча уфқа бош қўйган, дехқонлар ҳориб, уйга қайтмоқда эдилар. Далада уларнинг иккиси холи қолишганди. Йигит унга дикқат билан термилди. Қиз аллақачон ўттизни уриб қўйганди.

Винсентнинг сувдонида озроқ сув қолганди. У мўйқалам тозалайдиган латтани намлаб, қизнинг юзларини артди. Шу чоқ у кўзини очди.

– Анча тузумисиз, Марго? – сўради Винсент.

У яна бир неча лаҳза йигитнинг зангори, меҳрли қўзларига тикилиб қолди. Кейин яна бир “ох” тортди-ю, йигитнинг бўйнидан маҳкам қучиб, юзини унинг малларанг соқолига босди.

* * *

– Демак, сен менинг охирги хатимни олмагансан? – сўради Тео эртаси куни эрталаб Винсентдан нонушта пайтида.

– Йўқ, чамамда, олмадим, – деди Винсент. – Унда нима ёзгандинг?

– Гупилда лавозимимни оширишганини ёзгандим.

– Эҳ, Тео, нега кеча бу ҳақда менга бир оғиз ҳам гапирмадинг?

– Сен жуда хаяжонда эдинг, менга қулоқ осмасдинг. Менга Монмартр хиёбонидаги галереяни топширишиди.

– Бу жуда зўр-ку? Ўз галереянг бўларкан-да?

– Ўзимники бўлмайди, Винсент. Мен Гупил фирмаси манфаатларини химоя қиласман, холос. Лекин менга токчаларда турган импрессионистларнинг асарларини кўрсатишга рухсат беришди. Моне, Дега, Писсарро ва Мане. Галереяда уларнинг асарлари билан яқиндан танишишинг мумкин.

– Нега бунақа айёrona кулимсираяпсан?

– Шунчаки ўзим. Бирордан сўнг кетишимиз керак. Мен ҳар куни у ёққа яёв бораман. Қаҳва ичасанми?

– Раҳмат, яна ярим финжон! Тео, яна сен билан бирга нонушта қилаётганимдан хурсандман.

– Анчадан бери Парижга келишингни кутаётгандим. Июнь ойида мен Лепик кўчасига кўчиб ўтаман. У ерда учта хонамиз бўлади. Сен ҳам у ерда бемалол ишлашинг мумкин.

Винсент атрофга аланглади. Теонинг ҳовлисида бир туп ёнғоқ бўй чўзганди, кабинет ҳамда кичикроқ ошхонаси ҳам бор эди.

– Агар мольбертни мана бу ерга қўйсан, – деди Винсент, – манави ажойиб мебелни ташқарига чиқаришимизга тўғри келади.

– Рост, уйим ҳар хил қақир-қуқирларга тўлиб кетган. Майли, ҳозир кеч қоламиз, юр, Винсент, сени Хиёбондан олиб ўтаман. Мен у ерда сайр қилишни ёқтираман.

Тео қалин пальтосини кийиб, соқол-мўйловини тартибга келтириди. Кейин эса, эшик тарафга йўл олди. Икковлон кенг ва шинам, икки тарафи дўкондан иборат Лаваль кўчасига чиқиб олишиди.

– Анави, уйимизнинг учинчи қаватидан қараб турган чиройли хонимларни кўряпсанми? – сўради Тео.

Винсент бошини кўтариб, учта ганчдан ишланган бьюстларни кўрди. Унинг биттасига “Ҳайкалтарошлиқ”, иккинчисига “Архитектура”, учинчисига “Рангтасвир” деб ёзиб қўйилганди.

– Нега улар тасвирий санъатни бу сатанглар қиёфасида акс эттиришган?

– Бирор нима дейиш кийин, – деди Тео. – Лекин барibir сен жуда муносиб уйга тушдинг.

Кўп ўтмай улар Монмартр қўчасига етиб келишди. Кўча қуёшнинг заррин нурларига беланган эди. Аста-секин қўча одамларга тўла бошлади. Дўконларда ҳам савдо жонланмоқда эди. Винсент чукур хўрсишиб қўйди.

– Париж! – дея хитоб қилди у. – Орадан шунча йил ўтибди-я?

– Ҳа, Париж. Европанинг юраги. Маданият, тасвирий санъат бешиги.

Монмартр баланд тепалик ортида қолди ва Шатодэн майдони бўй кўрсатди. Ака-ука Нотр-Дам де Лорретт ибодатхонаси олдида туришарди. Винсент бино пештоқидаги битикларга имо қилди:

– Уларнинг ўзи манави битикларга ишонишармикин? Озодлик, тенглик, биродардик!

– Балки ишонишар? Яқинда менга Эмиль Золя шундай деганди: кутилаётган инқилоб қиролга эмас, капитализмга қарши бўлади.

– Золя! Қанчалар баҳтлисан, Тео, – сен Золяни ҳам биласан-а!

– Мени у билан Поль Сезанн таништирган. Биз ҳар ҳафта «Батинъоль» қаҳвахонасида учрашамиз. Кейинги сафар сени ҳам олиб бораман.

Ака-укалар шаҳдам одимлаб кетишиди.

– Балки, сен Кормон студиясига бориб ишларсан? – сўради Тео Винсентдан.

– Ким у Кормон?

– Ўзимизнинг ўқитувчиларга ўхшаган жуда билимдон одам. Академик. Агар унинг танқидий фикрларига қулоқ оссанг, у сени тинч қўяди.

– Бу қанчага тушади?

Тео Винсентнинг елкасига шапатилаб уриб қўйди:

– Мансабим ошганини айтдим-ку? Яқинда мен корчалонлардан бирига айланаман.

Ниҳоят, улар Монмартр қўчасидан каттакон хиёбонга чиқдилар. Ушбу хиёбон итальян мавзеларидан ўтиб, шаҳарнинг энг кўркам мавзеларидан бири Опера майдонига уланган эди. Гарчи ҳали кўчада қатнов сийрак бўлса-да, дўкондорлар аллақачон харидорларни қарши олишга шай туришарди. Теога топширилган галерея Монмартр қўчасидан бир мавзе нарида жойлашганди.

Тео салонга кириши ҳамоно маъмурлар унга тавозе билан бош эгишиди. Бир пайтлар Винсент ҳам маъмур бўлиб ишлаганида, Терстех ва Обахга ана шундай таъзим бажо келтирганини эслади. Деворларда Бугро, Эннер ва Деларошнинг суратлари осилганди. Салон ичкарисидаги пиллапоялар баланд токчаларга олиб чиқарди.

– Сен кўрмоқчи бўлган суратлар токчаларда турибди, – деди Тео. – Томоша қилиб бўлгач, тушиб фикрингни айтарсан?

– Нега бунақа сирли кулимсираяпсан, Тео?

– Кўришгунча, – у шундай дея ўз хужрасига кириб кетди.

* * *

«Наҳот жиннихонага тушиб қолган бўлсам?»

Винсент фаромуш бўлиб, токчага яқин турган курси тарафга юрди. Унга ўтириб, кўзларини артди. Ўн икки ёшдан бери у бир хилдаги суратларни биларди: уларда ранглар қуюқ ва тунд, матодаги ҳар бир шакл аниқ ва тугал туширилган, текис ва юпқа бўёқ қатламлари бир-бирига мингашиб турарди. Ҳозир кўраётганлари эса, аввалги суратларга умуман ўхшамасди. Уларда юпқа бўёқ қатламлари сезилмайди.

Винсент йўл-йўл, тивит кўйлакда тасвириланган эркак сурати олдида тўхтади. Эркак бакувват кўллари билан кичикроқ яхтани бошқариб

борарди. Ёнида эса қўлларини тиззаси устига қўйган аёли ўтирибди. Винсент рассомнинг фамилиясига эътибор қаратди.

— Яна Монеми? — деда ажабланди. — Аввалги дарё пейзажларига умуман ўхшамабди.

Кейин у имзога диққат билан кўз югуртириб адашганини пайқади. Бу рассомнинг фамилияси Моне эмас, Мане экан. Шунда бу рассомнинг бир пайтлар одамларнинг нафратига учраган “Ўтлоқ устидаги нонушта”, “Олимпия” каби суратларини эслади. Нимадир Маненинг суратлари унга Эмиль Золянинг асарларини эслатди. Ҳар икки ижодкорнинг асарларида ҳам ҳаёт ҳақиқати бор бўйича, ёрқин бўёқларда акс этарди.

Винсент Маненинг услубига диққат билан тикилди. Унда ҳамма шакллар, тасвиirlар худди аслидагидек акс этарди. У курсига ўтириб, суратларга яна бир кур кўз ташлаб чиқди. Шунда у тасвирий санъатда нима сабабдан бунчалик ўзгаришлар бўлаётганини пайқади. Бу рассомлар ўз асарларини ҳаво билан тўлдиришган! Тоза, ҳаётбахш, янги ҳаво билан! Шу боис уларга қараган одам тоза ҳаводан нафас олгандек енгил тортади. Ҳа, улар ўз асарларида ҳавони қашф этишган! У анъанавий рангтасвиirl ўз умрини яшаб бўлганини англали.

Винсент ўрнидан туриб, зинапоя тарафга юрди. Тео салонда эди. У акасининг юзидан бирор маъно укиш учун табассум ила унга синчков назар солди.

— Қалай, Винсент? — сўради у.

— Ох, Тео! — деда хўрсинди ака. Нимадир демоқчи бўлди, аммо ҳоли етмади. Яна у тепага, токчаларга назар солди. Кейин эса, галереядан чиқиб кетди.

Мана, у хиёбон бўйлаб кетиб борарди. Саккиз қиррали иморат ёнига бориб тўхтади. Кейин эса кўприкнинг ёнидан пастга, Сена соҳилига тушди.

Бир четга ўтириб, қўлларини сувга ботирди. Кейин кўприк орқали чап соҳилга ўтиб олди. Қабристондан ўтиб, чапга бурилди ва катта вокзалнинг қаршисидан чиқди. Сенадан ўтганини ҳам унутиб, полициясидан Лаваль кўчасига қандай ўтишни сўради.

— Лаваль кўчасига? — ажабланди полициячи. — Сиз шаҳарнинг бошқа томонидасиз, жаноб, Сиз Сенанинг нариги соҳилига ўтишингиз керак.

Винсент шаҳарни узоқ муддат бемақсад кезиб чиқди. Кенг, ораста хиёбонларни ҳам, тор ва ифлос жинкўчаларни ҳам, шаробхоналар қатор тизилган даҳаларни ҳам айланиб чиқди. Ниҳот, Ғалаба аркаси қад ростлаган тепалик қаршисидан чиқиб қолди.

Лаваль кўчасини у кечга яқин қидириб топди. Бу пайтда у қаттиқ чарчаганди. Кейин дарров ўз суратларини очиб, ерга ёя бошлиди. Сўнг ўзи чизган суратларга тикилиб қолди. Ё раб, бу суратлар бунча тунд ва кўримсиз бўлмаса? Уларда ҳаёт нафаси умуман сезилмайди. Худди ўзи билмаган ҳолда ўтган асрга бориб шу суратларни ишлаб қайтгандек...

Тео қайтиб келганда қоронғи тушиб қолган, Винсент пол устида паришонҳол ўтиради. Тео акасига жим термилиб қолди.

— Винсент, — деди у ниҳоят, — қалбингдан нима ўтаётганини сезиб турибман. Сен қаттиқ изтиробдасан, тўғрими? Биз рангтасвиirlдан бошқа муқаддас санаб келинган ҳамма нарсадан воз кечишимиз керак.

Винсент қизарган кўзларини укасига қадади:


— Тео, нега индамадинг? Нега шу пайтгача менга оғиз очмадинг? Нега мени бу ерга эртароқ олиб келмадинг? Сени деб мен нақ олти йилни бой бердим.

– Бой бердинг? Ҳечам-да! Сен ўз йўлингни топиб олдинг. Энди сен дунёда ягонасан. Бошқа Винсент Ван Гог йўқ. Ҳеч ким сендеқ чиза олмайди. Агар сен ўз услубингни тополмай келганингда, Париж сени аллақачон ютиб юборган бўларди.

– Энди нима қилишим керак? Манави ахлатни қара! – у ўзининг тунд полотносига имо қилди. – Бу ўлик суратларнинг кимга кераги бор?

– Сен импрессионистлардан ўрганишинг керак. Ранг ва колоритни улар чукур тушунишади. Факат шуни ўргансанг етади. Қолган бари жойида. Ҳеч қачон Париж сени ютиб юборишига йўл қўйма. Бу ерда сени импрессионистлар яхши танишади. Уларга сен ҳақингда кўп айтганман. Энди эса, мен билан юр. Сени бир жойга элтаман. «Брассери Юниверсель» ресторанига. У ерда мириқиб хурсандчилик қиласиз. Париж билан Винсент Ван Гог учрашган кутлуғ кунни бирга нишонлаймиз.

*Рус тилидан
Рустам ЖАББОРОВ ва
Мунира НОРОВА таржималари*



НЕМИСЗАБОН НОБЕЛЬ МУКОФОТИ СОВРИНДОРЛАРИ АСАРЛАРИДАН ИҚТИБОСЛАР

“Тил озодликнинг сўнгги масканидир”
Ҳайнрих Бёлль

“Биз китоблардан ҳар доим ўзимизни топамиз”
Томас Манн

“Фантазия – ҳақиқатнинг соҳибжамол қизи, аммо онасидан бироз шаддо дороқдир”
Карл Шнителлер

“Секин юрсанг ҳам, из қолдир”
Гюнтер Грасс

“Имкониятни юзага чиқарии учун имконсизлик қайта-қайта синааб кўрилмоғи лозим”
Херман Хессе

“Изтиробсиз даҳолик йўқдир”
Теодор Моммзен

Шавкат КАРИМОВ таржимаси



НЕМИС МУМТОЗ ШЕЪРИЯТИДАН НАМУНАЛАР

БАЛЛАДАЛАР

Немис адабиётида баллада жанри алоҳида ўрин тутади. Баллада (провансал шевасида *balada*, *ballar* – рақс тушмоқ, потинчада *ballo* – ўйноқилик) – бир неча жанрларни бирлаширган, ўрта асрларда авж олган кинояли, жиддий мавзуларни юморга йўғирган, гап-гаштакларда куйланадиган шеърий асар. Мумтоз немис балладалари халқона фольклордан келиб чиқкан, Фарангистондан Италияга, кейин Олмонияга кўчган. Бу халқ анъаналарини ҳатто немис маърифатпарварлари ва романтиклари Б. Бюргер, Шиллер, Гете, Уланд, Гейне давом эттирганлар. Балладанинг унсурлари сифатида эпикликни, сюжетга эгаликни, драматизм ва руҳий чуқурликни, ахлоқийликни, мусиқавийликни санаш мумкин.

СУВ ВА ШАРОБ ҲАҚИДА БАЛЛАДА

Яқинда эшиздим ниҳоят –
Шароб ва сув ҳақда ҳикоят,
Баҳс этибди эрта-кеч тинмай
Оқар сув ва оташин, ол май.

Гердайибди сувга ул шароб:
“Ҳамма юртда менман энг сероб!
Майхоналар лиқ тўла хум бор,
Ҳар кеч ичар мени дўсту ёр”.

Сув айтибди: “Жим бўл, эй шароб!
Мен билан сен тенгмас ҳеч қачон!
Кайикларнинг зўрин ташийман,
Мен туфайли ишлар тегирмон”.

Шароб айтди сувга ўша дам:
“Сўнг томчини ичгач, масрур он
Мадҳ айтади менга ҳар одам,
Хоҳ бойвачча ва хоҳ у чўпон”.

Сув айтибди: “Гердайма, шароб!
Мен бор уйда иш жуда сероб –
Кир юварлар мен билан мудом,
Пазандалар пиширар таом”.

Аммо май ҳам бўш келмас минбаъд:
“Мен жангларда ботирга мадад!
Лаблар шароб тотган у фурсат,
Баҳодирда жўшар жасорат”.

Сув сўзлабди: “Тинглагин фақат,
Ҳаммомларда сув-ку энг роҳат?!
Оташюрак жононлар мудом
Сувга тушиб, оларлар ором”.

Сувга яна гап отди шароб:
“Мени ичар бургомистр жаноб?!
Мен-ла яшар вақтин ҳар оқшом,
Бременда, қўлда майли жом”.

Сўзлабди сув: “Шошилма, шароб!
Хонадонлар ёнганда шу тоб,
Ким ёприлар оловга, айт, ким?!
Ёнғинларни ўчирган ўзим!”

Сувга жавоб берибди шароб:
“Табибларда мен мудом сероб!
Дориларнинг барин, эй ҳабиб,
Спирт билан қорийди табиб!”

Сув сўзлабди: “Майлига, бироқ
Кунсткамерада сенмас, мен – тотли,
Сув парилар чашмидан оқиб,
Элга ўзим улашгум шодлик” .

Шароб сувга мақтанар тинмай:
“Ҳар байрамда хумлар тўла май,
Шу одамлар қувонсинлар деб,
Отиламан фаввора бўлиб”.

Сув айтибди: “Шароб, менга бок,
Дарё, денгиз – сув тўла ҳар чоқ,
Улкан кемаларни судрайман,
Чексиз сувга тўладир уммон!”

Шароб сувга айтибди шу он:
“Ток, узумда ўзим намоён.
Нозик қўллар боғда кезишар
Ва шохлардан мени узишар”.

Сув сўзлабди: “Шароб, жавоб бер,
Ким узумни сугорган, ахир?
Боғлар сувсиз бўларди хароб,
Сен ҳам асло бўлмасдинг, шароб”.

Тан олибди шу онда шароб:
“Начора, мен сеники шу тоб,
Фақат менга тегма, ўтавер,
Ўз йўлингда секин кетавер”.

Сув айтибди: “Омон бўл, ошна!..”
Аммо шу он – майчи ҳам ташна –
Мўмай фойда шавқида жўшиб,
Сувни майга юборди қўшиб...

ХАЁТ ВА ЎЛИМ БАҲСИ ҲАҚИДА БАЛЛАДА

Ҳаёт қилди тавалло:

“Меникидир бу Дунё,
Қувончи, қўшиғи, гала-ғовури – мен.
Мен – кўқда офтобмен, ернинг нури – мен»
Ҳаёт шундай қилди тавалло:
“Меникидир асли – бу Дунё!»

Ўлим ҳам айтди шу дам:
“Йўқ, меники бу Олам.
Дунёни зулматга қўмаман абад.
Кўшиқлар ҳам тунда тинади албат”.
Ўлим шундай сўзлади у дам:
“Меникидир асли – бу Олам!”

Ҳаёт унга сўз айтар шу дам:
“Йўқ, меники асли – бу Олам!
Майли, сен мармардан қабр эт барпо,
Муҳаббатни қўмолмайсан тупроқка асло”,
Шундай Ҳаёт қилди тавалло:
“Меники, меники – бу Дунё!”

Яна Ўлим айтарди чакки:
“Йўқ, бу Дунё – меники!
Жанг бошларман, йўлларман ўлат.
Қабрга тушади бор инсоният”.
Ўлим шундоқ деди-да, илло:
“Ҳа, меники асли бу Дунё!”

Аммо Ҳаёт қилди тавалло:
“Йўқ, оқибат меники Дунё!
Қабристон ҳам шудгор қилинар, шундай;
Уруғ унар, далаларда шовуллар буғдой”
Ҳаёт шундоқ қилди тавалло:
“Меники, меники – бу Дунё!”

АКА-УКА ҲАҚИДА БАЛЛАДА

Шундоқ ҳам бўларкан, ҳақдир тарози,
Ака-ука ногоҳ ўлди бир вақтда,
Камбағал бўлгани – жаннатда ҳозир,
Бойроқ яшагани куяр дўзахда.

Бўғар бой акани оташ олови,
У чанқоқ назарин фалакка қадар,
Ана, юқорида, жаннат боғида
Қардоши – укаси оромда ётар.

“Ох, севимли, кўнгилчан укам,
Мен томонга қара, садо бер, садо.
Озгина ҳаловат юборгин менга,
Сув юбор, ташнаман, бўляпман адо”.

“Ох, акам, бечора, баҳтсиз, жон акам,
Сенинг оҳингни кўк тингларми бу он:
Сен ўз кучугингни гўшт-ла боқардинг,
Аммо гадога ҳам бермас эдинг нон”.

“Севимли, ягона, қалби пок укам,
Акангни ҳимоя айлагин, ёлвор:
Бу гуноҳларда хеч менинг айбим йўқ –
Барча кўргиликда бойлигим айбдор!

Дўзах оловида абад қуйгунча,
Шармандалик ичра ёнгунча бу он,
Мен учун дунёning бор тоғларини
Елкада кўтариб турмоқлик осон.

Агар бу тоғлардан битта тошчани
Бир қушча опкетса йилда бир бора,
Билардим, бу ҳукм бир кун ўзгарар
Мени ҳам Худойим авф этар, зора”.

“Омин, омин! Унда ҳам, бунда ҳам
Бошқарар барини Яратган эгам.
Тавба қил, айлагин тинмай тиловат –
Сени ҳам оловда қолдирмас абад...”

Мартин ОПИЦ

(1597 – 1639)

* * *

Хар ёнда хиёнат, аза, уқубат,
Қабоҳат остида қуриган илик.
Ёлғон авжидадир, гўрда – ҳақиқат,
Зулм ардоқдадир, қувғин – яхшилик,

ЖАҲОН АДАБИЁТИ

Содом ва Гоморра дунёсидир бу –
Мен нотавон қандоқ, зулм ўтган сайин,
Кулларни, қонларни, зулматни кўрмай,
Муҳаббат ҳақида қўшиқ куйлайн?!

Нозик гулбаданлар, қимтинган лаблар?!
Бу шеърлар ўлиkdir, бўм-бўшdir, ахир,
Озурда қалбларга кераксиз, тамом!

Эл дардини ёзгин! Пайт келди! Йўқса,
Сен – шоир эмассан. Сен – қофиябоз.
Сени энди мангудар тарк этсин илҳом!

Фридрих ЛОГАУ

(1604 – 1655)

ЖАСОРАТ

Бу даврда ким у – жасоратли инсон –
Қорани қора деб, деса оқни – оқ?!
Қотилларга мадҳ айтмаса ялтироқ,
Ростин айттолмаса, айтмаса ёлғон.

ОРЗУЛАР РЎЁБИ

Уйни орзу қилсам, макон истасам,
Барига етказди Ўлим – оқил сўз:
Мен урушда ўлдим, қабрга кирдим,
Бу уйда ўлим ҳам, ғам ҳам дахлсиз.

ҲОКИМИЯТ

Элни бошқармоққа чоғла юзингни,
Токи бошқаролсанг агар ўзингни.

ПУЛЛАР

Мудом пул истайди кекса ҳам, ёш ҳам:
Бири – жамласам дер, бири – сарфласам.

ЎЗИНГНИ ЕНГМОҚ

Ҳа, ўзинг-ла кураш – энг мураккаб жанг.
Асли ғолибдурсан – нафсингни енгсанг.

Андреас ГРИФИУС

(1616 – 1664)

БАРИ ЎТКИНЧИ

Қаёққа қарама – бари ўткинчи.
Сен уй қураяпсан?! Бекор бу жонлар.
Шаҳарлар бир куни шудгор бўлади,
У ерда қўй боқиб юрар чўпонлар.

Воҳ, сўлар энг алвон гул ҳам бегумон,
Шовқин ҳаёт сўнги сокин қабристон.
Мармар ҳам, темир ҳам охири тупроқ,
Бахтнинг кети фоже... Ҳамиша шундок!

Ўтади туш каби ғалаба, зафар:
Замоннинг кўзюмуқ ўйинларига
Қарши туролмайди нотавон инсон.

Дунё – чанг ва тупроқ, шамол сепган кул.
Хаммаси ўтади. Мен ҳам ўламан.
Қоришиб кетаман абадиятга.

Христиан ГОФМАНСВАЛДАУ

(1617 – 1679)

ЗАМИНДАГИ ҲАЁТ

Нимадир дунёниг сохта чехраси?
Нима бу – ялтироқ либосли ҳаёт?
Ердаги борликнинг бору йўқ йўли
Қисқа бир фурсатдир, ғамдир беадок.
Ҳаёт – зулмат ичра бир дамлик чақмоқ,
Ҳаёт – ўлат кезган жарда яшамоқ,
Уқубат қамалган қоронғу қамоқ.
Барчасин ўраган ҳашам ялтироқ,
Буюклик бўшлиғи ичра бўғилмоқ.
Қабрлар устида қўкарған майса –
Шу оний ҳаётни бокувчи тупроқ.
Аммо, руҳим, сен вужудга менгзама!
Тақдирдан нолима, бариси бекор.
Ялтироқ умиддан, сохта баҳтданмас,
Нажотни ҳақ йўлдан излагин, аборг!
Алдовчи саробдан қочгин, юргургин,
Нафснинг домидан кутул, албатта,
Шунда етадирсан орзуга аён,
Гўзаллик, боқийлик ери – жаннатга!

Ангелус СИЛЕЗИУС (1624 – 1677)

ФИКР ПАРЧАЛАРИ

Дунёда энг ажиб мўъжиза – одам:
Унда илохийлик, инсонийлик жам.

Нима қилай, ахир, бари-бари менда мужассам:
Лахза ва мангалик, кундуз ва кеча,
Эзгулик, ёвузлиқ, ҳаёт, ўлим ҳам?!

Фалакка қарайсан? Ёнма ўчингдан,
Худо тепангдамас, кўрар ичингдан.

Бой киши молим кам деб ёзғирап, боқ –
Ишонгин: кўзи оч — гадойдан қашшоқ.

*Рус тилидан
Карим БАХРИЕВ таржималари*

Ҳайнрих ҲАЙНЕ (1797 – 1856)

Бир пайтлар ҳалқимиз орасида номи Генрих Гейне деган русча талафғуз орқали машҳур бўлган буюк олмон шоири Ҳайнрих Ҳайненинг (1797–1856) Ойбек, Миртемир, Ҳайриддин Салоҳ таржимасидаги лирикаси шеърхонларимиз орасида шуҳрат қозонган. Зеро, Ҳайне лирик туркумлардан ташкил топган ўзига хос шеърий роман яратган шоир. Уни муаллиф “Қўшиқлар китоби” деб номлаган. Таникли шоиримиз Абдулла Шер ана шу буюк асарни аслиятдан таржима қилди. Қуйидга мазкур асарга оид “Ишқий қўшиқлар” туркумидан баъзи шеърларни эътиборингизга ҳавола этмоқдамиз.

ИШҚИЙ ҚЎШИҚЛАР

* * *

Изгирин қийнади бизни узоқ вақт,
Нихоят, гул сочиб келди чўғдек Май,
Ҳар ёнда тобора кулиб-яшнар баҳт,
Мен, лекин, ҳайронман қувнаб кулолмай.

Чечаклар шивирлар, қўнғироқлар жўр,
Кушчалар гапирап масалдагидай
Ва лекин тинглайман уларни базўр,
Кўнглимга сигади на кўқ, на тўргай.

ЖАҲОН АДАБИЁТИ

54

Одамлар жонимга тегди-ку бутун,
Қочаман ҳаттоқи дўстимдан, найтай,
Найтай мен, «хоним» деб атарлар бугун –
Бўлса ҳам маҳбубам аввалдагидай.

* * *

Мен то чўзиб юрарканман, қилмай рози дил,
Ёт ерларда оҳлар уриб, кезиб неча йил,
Кутабериш маҳбубамнинг жонига тегди
Ва ўзганинг кўкрагига бошини эгди,
Турмуш қурди янги ишқнинг бовари билан,
Бориб турган овсарларнинг овсари билан.

Менинг ёрим бирам нозик, бирам мулойим,
Хуш сурати кўз олдимдан кетмайди доим.
Ёноклари қизил гул-у, кўзи бинафша,
Йилдан-йилга лов-лов ёнар, қулф урар яшнаб.
Лекин, эвоҳ, шундай ёрни бой бердим мангу,
Бориб турган овсарлардан овсарлигим шу.

* * *

Бир қарағай туради танҳо
Зунг чўққида, бийдай Шимолда.
Қор-қировдан оқقا бурканиб,
Чайқалади мудраган ҳолда.

Тушларига кирап Кунчиқар,
Кунчиқарда ўсар бир хурмо, –
Бозиллаган чўғдек қояда
Армон билан яшар у танҳо.

* * *

Менинг улкан дардимдан, ҳайҳот,
Пайдо бўлур жажжи қўшиқлар;
Ёр қалбига улар ошиқар
Жаранг солиб, чиқариб қанот.

Сўнг қайтарлар кўзим ўнгиди
Яна дарҳол, аламли, титроқ.
Титрарлар-у, айтмаслар, бироқ,
Не гаплигин ёрим кўнглида.

* * *

Маҳбубамдан айро тушган кун
Мен кулгуни унудим бутун:
На қўполу на нозик ҳазил
Кулдиролмас мени энди, бил!

Маҳбубамдан айро тушган дам
Мен унудим ёш тўқмоқни ҳам;

Юрак тўла кўзёшу фарёд,
Йиғлолмайман мен эса, ҳайҳот!

* * *

Йўқланмаган арвоҳдек кечмиш
Бош кўтариб қабридан гоҳо,
Эслатади яшаганимни
Ёнгинангда бир пайлар, барно.

Тонг сахарлаб тентирдим ёлғиз
Кўчаларда ғамгин, саргардон.
Ўткинчилар тикиларди жим
Менинг синик рангимга ҳайрон.

Кулай эди, лекин тунлари,
Кўчаларда ойдин сукунат;
Мен кимсасиз бўм-бўшлиқ аро
Соям билан кезардим фақат.

Акси садо берарди бўғиқ
Кўпrik узра ҳар бир қадамим.
Булутларнинг орқасидан ой
Кузатарди мени тунд ва жим.

Мен тўхтардим уйинг олдида,
Тикилардим дўнглиқдан қотиб.
Деразангга талпингган юрак
Дод соларди ўзни йўқотиб.

Мен билардим, парданг ортидан –
Бош кўяркан юмшоқ парқувга –
Бир қаарардинг доим ойдинда
Ҳайкал бўлиб қотган қайғуга.

* * *

Бир бўз йигит севди ёш қизни,
Қиз кўнглида бошқа йигит бор;
Бошқа йигит ўзгасини дер,
Шу ўзга қиз унга бўлур ёр.

Аламидан аччиқма-аччиқ,
Ёш, мағрур қиз ким тўғри келса,
Шартта тегиб кетар-у, эвоҳ,
Тамом бўлар бўз йигит эса.

Бу ҳол ғоят эски, одатий
Ва абадий янги, турфадир.
Аммо кимки шу холга тушса,
Бир умрга қалбан мурдадир.

* * *

Ул қўшиқни яна тинглайман,
Уни ёrim куйларди, ҳайҳот;
Дарз кетгудек кўксим инграйман,
Ёввойи мунг боса бошлар бот.

Изтиробда мен телбанамо
Югураман ўрмонга дилхун,
Аламимни у ерда танҳо
Кўзёш қилиб тўкмоқлик учун.

* * *

Кўрдим қирол қизини тушда,
Кўзлари ёш, ранги қордай оқ.
Уни суюб тутдим оғушда,
Жўқизорда тун бўйи титроқ.

«Керак эмас отангнинг тахти,
Олмослару гавҳар керакмас.
Керак эмас тождорлик баҳти,
Менга фақат ўзинг бўлсанг, бас».

Менга деди қўлимни сиқиб;
«Иложим йўқ, қабр – маконим,
Фақат тунда келаман чиқиб,
Бир кўрай деб васлингни, жоним».

* * *

Суюклигим, бизлар ёнма-ён
Жажжи қайиқ ичра ўлтириб,
Сокин тунда сузамиз комрон,
Измимизни мавжларга бериб.

Элас-элас кўзга ташланар
Ойдиндаги оқпар ул маъво;
Туман ичра куйлар шарпалар,
Аста янграр майин бир садо.

Муҳаббатнинг дардига малҳам
Бу садолар яқинидир бизга;
Биз эса-чи, тўхтамай, пурғам
Йўл оламиз олис денгизга.

* * *

Мени қадим эртаклар аро
Имлаб оппоқ қўллари билан,

Қўшиқ айтар, чорлар бир барно
Тилсимларнинг сирли ютидан.

У ерларда ғаройиб гуллар
Товланади заррин ёғдуда,
Бир-бирига боқиб ловуллар,
Мавжланади ажиб туйғуда;

У ерларда дараҳтлар сўйлар,
Бир-бирига роз айтар бедор,
У ерларда ирмоқлар куйлар,
Ҳар биттаси тордек жарангдор;

У ерларда севги туғёни
Қўшиқларга оҳанг бахш этар,
У ерларда ҳислар исёни
Юрагингда гуриллаб кетар!

Оҳ, қанийди ул юртга кетсам,
Яшасайдим бир бор дил-дилдан,
Бир бор мени тарқ этсайди ғам,
Қанот қоқсам эркин күшдек шан!

Аммо ул юрт – ширин бир армон,
Тушларимда бўлару пайдо,
Кўпик каби, қуёш чиққан он,
Бир ярқ этиб, йитар доимо.

* * *

Мен сени севганман, севаман ҳамон!
Кунфаякун бўлиб бор олам агар,
Босиб қолса ҳамки мабодо осмон,
Ишқим олов бўлиб отилиб чиқар!

* * *

Товланганда нуқра каби ёз,
Айланаман сахарги боғда.
Шитирлашиб пичирлар гуллар,
Мен кезаман, лекин, фироқда.

Шитирлашиб пичирлар гуллар
Менга боқиб ҳамдард, басма-бас:
«Опамиздан, эй, дардманд ошиқ,
Хафа бўлмок инсофдан эмас!»

* * *

Улар менга алам ўтказди,
Қўзғадилар жаҳлимни баттар:
Қай бировлар суйгандан қилса,
Куйганидан қилди бировлар.

Улар заҳар қилди нонимни,
Сувимни ҳам қилдилар заҳар:
Қай бировлар суйгандан қилса,
Куйганидан қилди бировлар.

Лекин, ҳануз қалбимни ўртаб,
Азобларга қўйган ул жонон –
Ёмонлик ҳам қилмади менга,
Севмади ҳам мени ҳеч қачон.

* * *

Тенги йўқ ёз, жазира ма ёз
Юзгинангда ловуллар, жонон:
Тенги йўқ қиши, қақшатқич аёз
Қалбгинангда бугун хукмрон.

Дунё иши, лекин, ўзгариш,
Ўзгаргайсан сен ҳам бегумон:
Юзларингга бир кун тепчиб қиши,
Юрагингга кирап саратон.

* * *

Ошиқ-маъшуқ тушганда айро
Бир-бирига узатади қўл,
Кўз ёш тўкиб айтарлар видо,
Иккиси ҳам хўрсинар бир йўл.

Бизлар эса тўқмадик кўз ёш,
Оҳ чекмадик иккимиз дилхун.
Фақат кейин, маъюс чайқаб бош,
Якка-якка йиғладик нигун.

* * *

Оғуланмиш менинг куйларим, –
Айт, мумкинми ўзга ҳол, барно?
Гуллаб турган умримни, ахир,
Захарладинг қилмасдан парво.

Оғуланмиш менинг куйларим, –
Айт, мумкинми ўзга ҳол, барно?
Юрагимда кўпdir илонлар,
Сен ҳам борсан ўшалар аро.

* * *

Чиқиб олиб тоғ чўққисига
Бериламан йиғлоқ туйғуга:
“Нега энди қуш бўлмадим!» деб,
Ёш тўкаман ботиб қайғуга.

Нега энди қадирғочмасман, –
Мен сен томон учардим дархол.
Ва деразанг рўпарасига
Ин қуардим бешак, ойжамол.

Нега энди булбул эмасман, –
Мен учардим сен томон мамнун
Ва энг ёниқ қўшиқларимни
Сенга атаб куйлардим ҳар тун.

Нега энди чуғурчуқмасман, –
Мен қўнардим бориб кўксингга.
Чунки бемор чуғурчуқларни
Даволамоқ одатдир сенга!

* * *

Мен уйқуда аччиқ ёш тўқдим:
Ўлганмишсан тушимда, ҳайҳот!
Уйғондим-у, тун оғушида
Ёш қуйилди кўзимдан бот-бот.

Мен уйқуда аччиқ ёш тўқдим:
Кетганмишсан тушимда ташлаб.
Уйғондим-у, тун оғушида
Фарёд чекдим кўзимни ёшлаб.

Мен уйқуда аччиқ ёш тўқдим:
Биргамишмиз тушимда, барно.
Уйғондим-у, яна йиғладим,
Ҳанузгача кўз ёшим дарё.

* * *

Сени ҳар тун тушда кўраман,
Тикиласан менга меҳрибон,
Қувонч ёшим тирқираб кўздан,
Йиқиламан пойингга комрон.

Сен тикилиб мушфиқу мунглуғ,
Чайқатасан, оҳ тортиб, бошинг;
Кўзларингдан аста қуйилар
Томчи-томчи инжудек ёшинг.

Сирли сўзлар шивирлаб менга,
Сарв гултоҳ тутасан, эркам.
Кўз очсам, бас, ҳайҳот, сарв йўқ,
Эслолмайман сўзларингни хам.

* * *

Ташқарида зулмат ва сурон,
Ёмғир қуяр, увлайди шамол;

Паноҳ топмиш қайлардан бу пайт
Жажжигинам менинг, гулжамол?

У суялиб дарча рахига
Хонасида ўлтирап ёлғиз;
Тош қотганча, кўзларида ёш,
Тун қаърига тикилар ожиз.

* * *

Куз шамоли шохларни букар,
Тун совуғи намчилу из-из;
Мен ўрмонда қичайман отни,
Ёмғирпўшга бурканиб ёлғиз.

Лекин менинг ширин хаёлим
Отимдан-да учқурроқ бу кез;
Мени элтар қанотларида
Маҳбубамнинг гўшасига тез.

Итлар хурав, фонус тутганча,
Дарвозани очади малай;
Отни нуқиб, ошиб ўтаман
Мен остона-зинадан ўнғай.

Қалин гилам тўшалган хона
Иссиққина, ёруғу шинам.
Мени қучар қулочин ёзиб,
Интизорим, муштоқ маҳбубам.

Аммо шамол увиллар шу дам,
Бошин силкиб менга дер эман:
“Шу пайт қайга, эси йўқ отлик,
Бормоқчисан далли ўй билан?!”

* * *

Кўхна қўшиқ, аччик қўшиқлар,
Ёвуз таъбир қора рўёлар!
Мен уларни кафандар эдим
Лойиқ тобут топилса агар.

Кафандардим ненидир яна,
Нелигини билмайман бу дам:
Факат тобут бўлгуси улкан
Ҳайдельбергнинг бўчкасидан ҳам.

Яна шундок замбил керакки,
У мос бўлсин тобутга, якто.
Ошибка тушсин эн-бўйи унинг
Майндаги кўприкдан ҳатто.

Хар қайсиси муқаддас Кёлн
Авлиёси Христофордан
Паҳлавонроқ биродарларни –
Чорланг: келсин ўн икки улкан.

Тик қояга элтиб тобутни,
Ташласинлар денгизга илдам:
Тобутига яраша, дўстлар,
Улкан бўлсин, ахир, қабр ҳам!

Менга бундай каттакон тобут,
Биласизми, зарур не учун?
Мен севгиму дардимни унга
Битта қилиб жойлайман у кун.

*Олмон тилидан
Абдулла ШЕР таржималари*

Бертолъд BREXT
(1898 – 1956)

ЎЛИК АСКАР ҲАҚИДА АФСОНА

1

Тўрт йилга чўзилди жанг,
Тинчлик мўрт, сарсон, гаранг
Аскар қўлини силтаб,
Қулаб тушди дафъатан.

2

Хуружин қўймас уруш,
Қайсар кайзер-да хомуш.
Бемаҳал ўлди аскар,
Бошли бошсиз, фаромуш.

3

Гўрда тун салтанати,
Аскар ухлар, лаънати.
Қабристон томон келди
Шифокорлар ҳайъати.

4

Кимдир қабрни очди,
Ўлим уйқуси қочди.
Аскар кўзи лиқ тупроқ,
Ким мурдага сув сочди?

ЖАҲОН АДАБИЁТИ
62

5

Ташхис қўйди шифокор,
Аскар тилсиз, бемадор,
Жанг қилмоққа яроқли,
Факат суюнчиқ даркор.

6

Чиқди ўлик юзага,
Ранг берилди юзига,
Темир қалпоқ бўлмаса,
Бош тегарди юлдузга.

7

Томоғига қуйиб май,
Калла тушар пайдар-пай,
Икки ёнда жуфт сингил,
Бева йўл бошлар, хай-хай!

8

Аъло ўтди кўриқдан,
Фарқ қилмайди тириқдан,
Поп исириқ тутатар
Ис кетсин деб ўлиқдан.

9

Чалина бошлар бурғу,
Хилпираган байроқ-ку,
Икки тиргович суяр,
Аскар жанг учун чоқ-ку.

10

Санитарда бор-да эп,
Керак бўлса берар зеб.
Худодан тила нарлар
“Аскар хок бўлмасин” деб.

11

Муҳими байроқ тикми?
Ишонч ҳали тирикми?
Одамлар фарқлай олмас
Сафда юрган ўликни.

12

Фрак ичра оқ қўйлак,
Борар ерни тепарак.

ЖАҲОН АДАБИЁТИ
63

Ул немис зодагони
Элга бўлғуси ўрнак.

13

Чалар ҳарбий оркестр
Жанговар куйни бир-бир.
Аскарни олға сурар
Шамол эсганча фир-фир.

14

Куёnlарда мўл ғайрат,
Ит, мушук жўр-нақорат,
“Фаранги бўлиб яшаш
Мавжудотга ҳақорат.”

15

Аёл бор, кўзин сузар,
Аскар борар кент, гузар,
Тол эгилар, кулар ой,
“Ур-ра” садоси юзар.

16

Нағора тум-така-тум,
Поп, мушукда баланд ун.
Ўртада ўлик аскар
Маст маймундай борар гунг.

17

Аскар қишлоқ, ўрамдан
Ўтса, ҳеч ким кўрмаган,
Ҳамроҳи шовқин-сурон,
Кўк сесканди “уррадан”

18

Ўлик аскар юради,
Халойик ҳайқиради,
Голиб мардни эл тугул
На ой, юлдуз кўради.

19

Юлдуз сўнади чарчаб,
Нурлар ҳам парча-парча,
Ўлик аскар-чи яна
Ўлар қахрамонларча.

1918 йил

ҚҮШИҚЛАР

Кураж момо қўшиғи

Эй, кўмондон, жарлик келса айт,
Аскарларни асрамоқлик шарт,
Аробам зўр, янги пойафзал
Кийиб олсин пиёда аввал.

Бошинг узра ўқлар жаласи,
Баданингда бит, қандаласи,
Жон олғич шай хоҳлаган маҳал,
Ўлмоқ янги этик-ла афзал.

Насронийлар, эриди музлар,
Тун қабрида ухлар жонсизлар,
Гўрдан қалқинг ўлик-тириксиз,
Олға, буюк жангга кераксиз.

Қовурдоги шаробу майсиз,
Аскарни ҳеч жангчи демайсиз,
Қорнин тўйдир, кайфи тарақми?
Ўлдирмоққа шай бўлар халқни.

Аскарни бок, бўш қоп тик турмас,
Кайфи борни ҳатто жин урмас,
Томоғидан ўтмаса таом,
Ўз пашшасин қўримас нодон?

Насронийлар, эриди музлар,
Тун қабрида ухлар жонсизлар,
Гўрдан қалқинг, ўлик-тириксиз,
Олға, буюк жангга кераксиз.

* * *

Эҳ, бу жасоратинг кимга ҳам керак,
Қахрамонликларинг нархи бир кепак,
Худо ўзинг асра, ёрда йўқ юрак.

Найза тутган аскар борар шарқ-шарақ,
Шошқин дарё ичра зумда бўлар ғарқ,
Муздай оғушига сув ютар бефарқ,

Уйнинг томи узра чиқади юлдуз,
Аскар бевасида жуфт эмас, минг кўз,
Эр мардлиги ҳақда ҳеч ким айтмас сўз,

Дарёning тубида аскарнинг гўри,
Жангга юборганинг эсламас бири,
Аскар хотинининг ортади шўри.

* * *

Ким жангда қилмас шиддат,
Ўлжа тегмас оқибат,
Савдогарга фарқи йўқ,
Пишлоқ сотар ёки ўқ.
Кимдир устомон, айёр,
Билмас тақдирда не бор.
Ўзига ин, уй қуарар,
Оқибат гўри тайёр.
Ким ташлаб жанг майдонин,
Сарфлар ёлғиз имконин,
Билмаски топширади
Икки қўллаб ўз жонин...

* * *

Алла, алла, шитирлар сомон,
Бу дунёда борми бут инсон,
Йиғлар, кулар бошқа болалар,
Бўйга етган қизим гунг ҳамон.

Алла, алла дейман, ғам ейман,
Кўпdir нон, мўл, баъзан кам ейман.
Дейман болни болам яласин,
Она кўзи доим нам дейман.

Оч биқинга ўқ ебсан, қизим,
Соқовгинам, не дебсан, қизим.
Бу дунёда яшаш ўрнига,
Жанг қизиган юрт кебсан қизим.

Алла, алла дейман, алла-ё,
Кўз юмишга етди палла-ё,
Гўр тупроғи юмшоқ, бир майнин,
Гўрга бормай қайга борайин.

Польшада бир ўғлим жасади,
Иккинчисин кўп вакт йўқ хати,
Ўғил туғсам, бешиги мозор,
Салом, салом, жанг салтанати.

*Рус тилидан
Тўра МИРЗО таржималари*

Улла ХААН (1946)

КУЗНИНГ БОШЛАНИШИ

Сен менга атиргул совға қиласан, бутаси – ўзингга.
Боғингдаги ўзи узилиб тушган олмаларни тухфа қиласан,
аммо... дараҳтларни эмас, уйни эмас, фарзанд эмас.
Ва сенинг сўзларинг қушнинг чуғуридай енгил.

Мен сенга ёлвораман: мен билан узокроқ қол,
кейин йўқол.
Мана, қушлар ҳам шу –
маймунжоннинг пишган меваларини чўқилаб,
қайгадир олиб кетарлар...
сенга ўхшаб.

АДАШУВ

Йигит айтарди:
муҳаббат – бу енгилгина қор,
ҳамманинг бошига қўнар баравар,
Сўнг тезда эриб кетар.

Маҳбубаси унга дерди:
йўқ, ишқ – гулхан,
ҳамма уни топтайди,
ёнгин катталашиб кетмасин дея.

Улар жим қолишли.
Бир-бирига отилди
ва узок кўкка бокиб, ерда ётишли.

Йигит қордай эриди, қиз ҳиссиётнинг гулханида ёнди.
Ва, албатта, иккаласи ҳам
қабргача чўзиладиган абадий муҳаббатга ишонмасдилар.

*Rус тилидан
Карим БАҲРИЕВ таржимаси*



Йоҳанн Петер ЭККЕРМАН

ГЁТЕ БИЛАН ГУРУНГЛАР¹

*“Немис тилида ёзилган асарларнинг энг яхиси”.
Фридрих Ницше*

СЎЗБОШИ

Гёте билан бўлган гурунглар ва мулокотларнинг ушбу мажмуаси ўзим бошдан кечирган, мен учун муҳим ва қимматли воқеаларни қоғозга муҳрлашга бўлган табиий интилиши самараси ўлароқ дунёга келди.

Сирасини айтсанда, мен буюк инсон билан дастлаб танишганимда, кейинроқ у билан ўйлар давомида ёнма-ён яшаганимда, унинг панд-насиҳатларига ҳамиша муҳтож эдим, шу сабабли унинг сўзларини келажак авлод учун сақлаш мақсадида жон деб ёзиб бордим.

Аммо унинг тўйқиз йил давомида мен ҳузур қилиб тинглаган фикр-муллоҳазаларининг чуқур ва бой маъносини чақар, ҳамда улардан жуда оз қисмини ёзib олишга муваффақ бўлолганимни ўйларканман, ўзимни баайни гўдак баҳор ёмғирининг ҳузурбахш томчиларини кафтида тутиб қолмоқчи бўлганида улар унинг бармоқлари орасидан тушиб кетгандек ҳис этаман.

Ҳар қалай, китобларнинг ҳам ўз қисмати бўлади, деганларидек, бу сўзлар уларнинг яратилиши ҳамда кейинроқ дунё бўйлаб тарқалишига ҳам, шунингдек, ушбу асарнинг юзага келишига ҳам таалуқлидир. Кундалик ҳаёт ташвишлари ва турли бошқа юмушлар оқибатида гоҳо ойлаб бирон сатр ёзишининг иложи бўлмасди; лекин кейин саломатлик яхшилангач, тагин ёзишга иштиёқ өа интилиш пайдо бўларди.

Бу гапларни мен, борди-ю ўқуечи ёзувлардаги саналарни солиштиromoқчи бўлса, сезиларли камчиликлар учун узр сўраш мақсадида эслатиб ўтяпман. Мана шу бўшиликлар туфайли анча-мунча муҳим нарсалар, жумладан, Гётенинг турли жойдаги дўстлари ҳамда ҳозирги замоннинг у ёки бу ёзувчиси асарлари ҳақидаги фикрлари тушиб қолган, бошқа шуларга ўхаш муллоҳазалари ҳарқалай ёзиб олинган. Юқорида айтилганидек, китоблар ўз қисматлари билан бирга дунёга келадилар.

Аслини олганда, мен бу жилдларга йиғиб, ўз мулкимга айлантиришга эришган ҳамда ҳаётимнинг том маънодаги безаги, дейишга ҳақли бўлган ёзувларим учун Яратганга беадад шукроналар айтаман; шу билан бирга инсоният ҳам

¹ Журнал варианти.

бу битикларим учун мендан миннатдор бўлишига аниқ ишонаман.

Менимча, ўзида бебаҳо фикр-мулоҳазаларни жамлаган, ҳаёт, санъат ва илм борасидаги мазкур гурунглар нафақат кўплаб ҳодисаларга ойдинлик киритади, балки кундалик турмуш тасвирлари сифатида Гётенинг тимсолини, унинг хилма-хил асарларидан олган ўқувчи масавурини анча-мунча бойитади.

Шу билан бирга, мен Гётенинг ички оламини ҳар томонлама чизиб беришига муваффақ бўлдим, дея ишонаман. Бу фавқулодда инсон руҳиятини ҳақли равишда кўп қуррали олмосга қиёслаш мумкинки, уни қайси тарафга ўғирмагин, турли рангда товланаверади. У турлича вазиятларда, турли одамлар билан муносабатда бир хил бўлмади, шу боисдан, мақтандоқлик бўлмасину, шундай дейшишга ҳақлиман: у **менинг** Гётем.

Ишонаманки, Гётенинг руҳий-маънавий таъсирида ёки у билан шахсан яқин бўлган барча одамлар ушбу китобга баҳо беришида менинг имкон борича ҳақиқатга яқин бўлишига ҳаракат қилганимни билади.

Шундай қилиб, кўпдан бери ардоқлаб келганим ушбу китобнинг дунё юзини кўришига оқ йўл тиларканман, унинг китобхон қалбига қувонч олиб киришини ҳамда унда эзгуликлар уйғотиб, дунёқарашини кенгайтиришини истайман.

Ваймар, 1835 йилнинг 31 октябрини.

БИРИНЧИ ҚИСМ

1823

Ваймар, 1823 йилнинг 10 июни, сесанба

Бу ерга келганимга бир неча кун бўлди; фақат бугун Гёте хузурига келдим. У мени кучоқ очиб кутиб олди, Гётенинг менда қолдирган таас-суроти шу даражада эдики, мен бу кунни ҳаётимдаги энг баҳтли кун деб ҳисоблайман.

Кечакида келишга рухсат сўраб хат ёзганимда у бугун туш пайтиёқ келишимга рухсат берганди. Шундай қилиб, белгиланган вақтда келдим, хизматкор мени юқорига кузатиб чиқиш учун эшик олдида кутиб турарди.

Уйнинг ичкари қисми менда ўта ёқимли таассурот қолдирди; ҳар қандай дабдабадан холи, ҳамма нарса жуда оддий ва асл эди, зинапояларда турган антик ҳайкалларнинг нусхалари Гётенинг тасвирий санъатга ҳамда қадим юонон тарихига қизиқишидан далолат берарди. Пастки қаватда бир қанча аёллар уй юмушлари билан у ёқдан-бу ёққа елиб-югуришарди, От-тилиянинг келган ўғилларидан бири яқин келиб, менга самимий нигоҳ ила бокди.

Атрофга бироз назар ташлаб олгач, ғоятда сўзамол хизматкор ҳамроҳлигида иккинчи қаватга кўтарилидим. У остонасида самимий меҳмондўстликнинг рамзи “Хуш келибсиз” (“Salve”) деган ёзув бўлган хонанинг эшигини очди, мен ўша ёзув устидан ҳатлаб ичкарига кирдим. У мени шу хона орқали хийла каттароқ иккинчи хонага бошлаб ўтди ва мен ҳақимда хўжайинига хабар бергунicha шу ерда кутиб туришимни сўради. Хонанинг ҳавоси салқин ва оромбахш эди. Ерга гилам тўшалган, қизил канапе¹ ва шу рангдаги стуллар хона кўркига кўрк кўшар, бурчакда роял турар, деворларга турли катталикдаги расм ва картиналар осилганди.

Рўпарадаги очик эшикдан худди шундай картиналар илинган тағин бир хона кўриниб турар, хизматчи ўша орқали ўтиб, мен ҳақимда хабар қилди. Кўп куттирмай Гёте чиқиб келди: устида сюртуқ, оёғида туфли...

¹ К а н а п е – бosh томони хиёл кўтарилиган кичикроқ диван.

Қанчалар улуғвор қиёфа! Ҳайратдан лол бўлиб қолдим. Бироқ у дарҳол хушмуомалалик билан сўз қотиб, мендаги довдирашга барҳам берди. Диwanга ўтиридик. Мен уни кўриб турганим, унинг ёнгинасида ўтирганимдан шу қадар баҳтли эдимки, унга бирон оғиз сўз айттолмасдим. У дарҳол менинг қўлёzmам ҳақида сўз очди.

– Мен ҳозир гўё Сизнинг ёнингиздан келаётгандекман, – деди Гёте, – эрталабдан бери Сизнинг ишингизни ўқияпман, у ҳеч бир тавсияномага муҳтоj эмас, ўзи ўзига тавсиянома.

Кейин у тасвирнинг аниқлигини, фикрий изчиликни мақтади ва буларнинг бари яхши ўйланганини, пухта асосга қурилганини айтди.

– Мен уни тезроқ китоб ҳолида кўришни истайман, – давом этди у, – бугуноқ отлик почта билан Коттага хат юбораман, эртага қўлёzmани каретада жўнатаман.

Мен унга нигоҳим билан миннатдорчилик билдиридим.

Сўнг менинг бундан кейинги сафарим ҳақида сўзлашдик. Мақсадим, Райн вилоятига бориб, у ерда биронта тинч жойни топгач, янги бир нарса устида ишламоқчилигимни айтдим, сўнг Йенага бориб, ўша ерда жаноб Коттанинг жавобини кутмоқчилигимни билдиридим.

Гёте Йенада танишларим бор-йўқлигини сўради. Мен жаноб Кнебел¹ хузуридан паноҳ топиш ниятим борлигини билдиргандим, у мени яхши қабул қилишлари учун хат ёзиб беришини айтди.

– Ҳарҳолда яхши бўлди, – деди у. – Сиз Йенада бўлсангиз, бирбиrimизга яқин бўламиз, бориб-келиб турамиз, зарур бўлганда хат ёзishimiz ҳам мумкин.

Биз хотиржам, дўстона кайфиятда узоқ гаплашдик. Гётега туриб айтмоқчи бўлган сўзимни йўқотдим, унга қараб тўймасдим. Юзи буғдойранг, серажин, ҳар бир ажин маънога тўла. Унда шунчалар олий-жаноблик ва қатъият, шунчалар босиқлик ва улуғворлик ҳукмон эдики... У сокин, шошмасдан сўзлар, гўё улуғ роҳиб сўзлаётгандек туюларди менга. Назаримда у ўзгача бир олам эди, ҳар қандай мақтову танқидлардан юқори турарди. Унинг ёнида ўзимни эркин ҳис қилардим; шу лаҳзада мени ғаройиб хотиржамлик ўз оғушига олганди.

У ёзган хатим ҳақида тўхталиб, фикрим тўғри эканлигини уқтириди, яъни агар одам бир нарсани аниқ баён эта олса, у бошқа кўп нарсаларнинг ҳам уддасидан чика олади.

– Нималар бўлаётганига ўзим ҳам ҳайронман, – деди у кейин.

– Берлиндаги бир қатор олийжаноб дўстларимни яқинда эсладим-у, шунда Сиз ҳам ёдимга тушдингиз, – деди у, шу сўзларни айтаркан, мулойим жилмайиб. Сўнгра Ваймарда нималарни кўришим лозимлигини уқтириди ва менга ҳамроҳ бўлишни котиби жаноб Крейтердан илтимос қилишини айтди. Энг аввало театрга боришини эсдан чикармаслигимни тайинлади. Шундан сўнг қаерда тўхтаганимга қизиқди ва мени яна кўрмоқчи эканлигини, имкон бўлган заҳоти одам юборишини қўшиб қўйди.

Биз қуюқ хайрлашдик. Мен баҳтли эдим, негаки, унинг ҳар бир сўзидан хайриҳоҳлик ёғилиб турар ва унга маъқул бўлганимни ҳис этардим.

1823 йилнинг 11 июни, чоршанба

Бугун эрталаб Гётеникига таклифнома олдим, буни у ўз қўли билан ёзган эди. Унинг хузурида бир соатча бўлдим. Бугун у менга кечагига

1 Кнебел Карл Людвиг фон (1744–1834) – ёзувчи, Гётенинг яқин дўсти, Ваймар шаҳзодаси Константиннинг муаллими.

нисбатан хийла бошқача кўринди, у баайни ёш йигитчадек қатъиятли ва чаққон эди. У олдимга кўлларида иккита қалин китоб билан чиқиб келди.

– Афсус, – деди у, – бу ердан тез жўнаб кетяпсиз-да, иккаламиз бир-биrimizni яқиндан билиб олсан, яхши бўлармиди? Мен сиз билан тез-тез кўришиб, сухбатлашиб туришни истайман.

«Франкфурт илмий ахборотномаси»нинг 1772–73 йиллардаги мана бу икки жилдида менинг ўша даврда ёзган деярли барча кичик-кичик тақризларим босилган. Уларга имзо қўйилмаган; сиз менинг услубим ва фикрлаш тарзимни яхши биласиз, шу сабабли уларни бошқа тақризлар ичидан топа оласиз. Истагим, ёшлиқда ёзилган мана шу ишлар билан яқиндан танишсангиз ва улар ҳақидаги фикрингизни айтсангиз. Улар келгусидаги асарларим тўпламига киритишга арзийдими-йўқми, шуни билмоқчиман. Улар ёдимдан деярли чиқиб кетган, бу ҳақда бирон нарса дейишдан ожизман. Аммо сиз ёшлар, уларнинг сизлар учун қизиги борми-йўқми, ҳозирги кунда адабиёт учун улар нечоғлик фойдали эканлигини дарҳол пайқайсизлар. Мен уларнинг рўйхатини тузишни буюрдим, асли билан қиёслаш учун, кейин сизга бераман. Муфассал таҳлил қилингандан сўнг, у ер-бу ерини тузатиш ёки бирон фикр қўшиш керакми-йўқми, ўзи маълум бўлиб қолади.

Бу ишга жон-жон деб киришаман, дея жавоб қилдим. Ягона истагим – буни қўлимдан келганча унинг кўнглидагидек қилиб бажариш.

– Бироз шуғуллангач, ўзингизгаям маъқул бўлиб қолади, – жавоб берди у, – бу иш bemalol қўлингиздан келади, иш ўз-ўзидан юришиб кетади.

Кейин у саккиз кунлардан кейин Мариенбадга кетмоқчилигини маълум қилди, унгача менинг Ваймарда бўлиб туришимни, шу муддат ичida кўришиб, сухбатлашиб, бир-биrimizni яқиндан билиб олишимиз мумкинлигини айтди.

– Яна бир истагим, – қўшиб кўйди у, – Сиз Йенада бир неча кун ёки ҳафта эмас, балки бутун ёз бўйи, мен Мариенбаддан қайтгунимча яшаб турсангиз. Кеча мен у ёққа сиз учун турар жой ва бошқа масалалар борасида хат жўнатдим, у ердаги шароитингиз қулай ва кўнгилдагидек бўлса дейман. У ерда билимингизни ошириш учун кўпдан-кўп манбалар, ёрдамчи воситаларни топасиз, илмли, меҳмондўст давраларга дуч келасиз, гўзал табиатни-ку айтмасаям бўлади. Сиз у ерда янги нарса ёзишгаям имконият топасиз ва бўш вақтингиз ҳам бўлади, шу орада менинг топшириқларимни ҳам бажарасиз.

Бундай самимий таклифга эътиroz билдиrolмадим ва уни қувонч билан қабул қилдим. Кетаётганимда у менга янаям меҳрибонлик кўрсатди ҳамда эртадан кейин сухбатлашмоқ учун яна бирон соатга келишимни сўради.

1823 йилнинг 16 июни, душанба

Шу кунларда мен бир неча бор Гётеникида бўлдим. Бугун биз асосан ишлар ҳақида сўзлашдик. Унинг Франкфуртдаги тақризлари хусусида ҳам сўз очдим, уларни ўқиш-ўрганиш йилларининг акс-садоси деб айтгандим, бу гапим маъқул келди шекилли, ўша ёшлиқдаги битикларга қандай нуқтai назардан ёндошиш лозимлигини белгилаб берди.

Сўнгра у менга «Санъат ва мозий» журналининг дастлабки ўн бир сонини бериб, уларни “Франкфурт тақризлари” билан бирга иккинчи топшириқ сифатида Йенага олиб кетишимни айтди.

– Истардимки, – деди у, – бу журналларни яхшилаб ўрганиб чиқсангиз, нафақат буларнинг умумий мазмунига эътибор қилсангиз, балки қай бири маромига етмаган, шуниям белгилаб чиқсангиз.

Йена, 1823 йилнинг 15 сентябри, душанба

Гёте Мариенбаддан эсон-омон қайтиб келди, бироқ унинг бу ердаги боғ-үйидаги шароит унча кўнгилдагидек бўлмагани боис Йенада бир неча кун туришга қарор қилди. У шу қадар соғлом ва тетик эдики, соатлаб пиёда йўл босиши мумкин, уни бундай кўриш чинакам баҳт эди. Қувона-қувона кўришиб-сўрашиб олганимиздан кейин Гёте ишларим ҳақида сўз очди.

— Очигини айтсанам, — деди у, — Сиз шу қишини менинг ёнимда, Ваймарда ўтказсангиз дейман. — Сўнг дарҳол мақсадга кўчди: — Шеърият таҳлили ва танқиди масаласида сизга ҳеч бир эътиroz йўқ, бу сизнинг қонингизда бор. Бу сиздаги туғма истеъодд, унинг этагидан тутишингиз керак, келажакда у сизнинг бутун ҳаётингизни таъмин этади. Айнан шу соҳага тегишли бўлмаган яна кўп нарсалар борки, уларниям ўзлаштиришингиз керак бўлади. Лекин бу нарсаларга жуда кўп вақт ажратиб ўтирмаслик, уларни тезроқ ҳал қилиш лозим. Қиши бўйи Ваймарда яшаб, пасхагача шу қадар кўп нарсаларни билиб оласизки, бунга ўзингиз ҳам ҳайрон қоласиз. Кўлингизда энг яхши манбалар бўлади, бундай қўлланмаларнинг бари менда мавжуд. Ўшандা сиз оёғингиз остида мустаҳкам заминни ҳис этасиз, қониқиши ва ўзингизга ишонч пайдо бўлади.

Бу таклифдан беҳад қувондим ва тамоман унинг истак-иродасига бўйсунишимни айтдим.

— Шу ерга яқин жойдан бошпана топишнинг ўзим ғамини ейман — давом этди Гёте. — Бу қиши сизнинг ҳар бир дақиқангиз мазмунли ўтиши керак. Ваймарда кўп яхши нарсаларга дуч келасиз, катта шаҳарлардан зинхор фарқ қилмайдиган давраларда бўласиз. Шахсан меникига жуда кўп таникли кишилар ташриф буюришади. Аста-секин улар билан танишасиз, бундай мулокотлардан беҳад руҳий-маънавий озуқа оласиз.

Гёте бир қатор машхур номларни айтди ва ҳар бирининг алоҳида хизматларини қисқа-қисқа баён қилди.

— Бир қарич заминнинг, — сўзида давом этди у, — яна қаеридан шундай эзгу нарсаларни топасиз! Бундан ташқари пухта жамланган кутубхона, бошқа бирорта немис шаҳарларидағи театрларга ҳечам бўй бермайдиган театр ҳам бор. Яна қайтараман: ёнимизда қолинг, фақат бир қишигагина эмас, Ваймар сизнинг доимий турар жойингиз бўлиб қолсин. Бу ердан дунёнинг исталган бурчагига йўл ва дарвозалар бор. Ёзда саёҳат қиласиз, нимани кўришни истасангиз ўз вақтида кўраверасиз. Мен Ваймарда эллик йилдан бери яшайман, қаерларда бўлмадим дейсиз! Аммо ҳамиша Ваймарга соғинч билан қайтиб келаман.

Мен яна Гётенинг ёнида эканлигимдан, унинг сўзларини тинглаётганимдан баҳтли эдим, унга жон-дилим билан содиқлигимни ҳис этардим. Токи менинг ёнимда фақат сен бор экансан, бундан кейин ҳам бўлсанг, дея ўйладим мен, бошқа ҳамма ишлар битаверади. Менинг мавқеимни яхшилаш учун унга маъқул ҳамма ишларни қилишга тайёр эканлигини такрор ва такрор айтди-я.

Йена, 1823 йилнинг 18 сентябри, пайшанба

Кеча эрталаб Гётенинг Ваймарга жўнаб кетиши олдидан у билан яна бир соатча ўтириш баҳтига мұяссар бўлдим. У бутун ҳаётимга самарали таъсир кўрсатган, мен учун нақадар қимматли фикрларни айтди. Германиядаги барча ёш шоирлар буни билишлари лозим, бу сўзлар улар учун ҳам беҳад фойдалидир. У гапни, бу йил ёзда мен шеър ёздимми-йўқми, шундан бошлади. Мен бир нечта шеърлар ёзганимни, аммо улар устида унчалик илҳом билан ишламаганимни айтдим.

ЖАҲОН АДАБИЁТИ

– Катта ишларга уринишдан эҳтиёт бўлинг, – деди у шунда, – кўплаб зўр шоирларимиз, айни ўша истеъодли ва интилувчанлари ана шу касалга йўлиқишиган. Ўзим ҳам шундай эдим, бу билан кўп нарсани йўқотдим. Қанча ёзганларим бекор кетди! Қўлимдан келадиган нарсаларни ёзганим-да эди, асарларим юз жилдан ошиб кетарди.

Хозирги давр ўз ҳақ-хукуқларини ўртага кўяди; шоир қалбидаги кечган фикрлару хис-туйғулар ҳар куни қоғозга тушишини хоҳлайди ва шундай бўлиши керак. Агар сен каттароқ асарни мўлжаллаган бўлсанг, унда унинг ёнидан ҳеч нарса ўсиб чиқмайди, у сенинг барча фикрларингни ортга чекинтиради ва ўзинг ҳам хаётдаги барча хушёқар нарсалардан мосуву бўласан. Ирик нарсани маълум бир қолипга солиши, тартибга келтириш учун қанчалар ғайрат, руҳий куч-кувват сарфлашинг керак. Миянгдаги фикрларингни рисоладагидек ифода этиш учун тинч-хотиржам шартшароит зарур бўлади. Борди-ю сен муҳим жойида хатога йўл кўйсанг, ҳаммаси чиппакка чиқади; ўша каттадан-катта асарингнинг маълум ўринларида мавжуд материалдан керагича фойдалана билмасанг, унда асарингнинг у ёки бу жойида нуқсонлар юзага келади ва бунинг учун сени танқид қилишади. Ана ўшанда шоирнинг тер тўкиб қилган бутун меҳнати эвазига мукофот ва қувонч ўрнига тинкаси қуриб, ҳафсаласи пир бўлгани қолади. Аксинча, шоир кундаги туғилган фикрини кунда миясида пишишиб, янгилигида қоғозга тушираверса, ўшанда эзгу бир нарса яратган бўлади, қайсирид ёзгани яхши чиқмаса ҳам, ҳеч гап эмас.

Мисол учун кёнигсберглик Август Ҳагенни¹ олайлик – ажойиб истеъод эгаси; унинг “Олфрид ва Лизена”сини ўқигандирсиз? Шунақа жойлари борки, қойил қолмай илож йўқ; Болтиқ бўйидаги ҳаёт, у ернинг табиати ажойиб тасвирланган. Булар айрим ўринлар, холос, бутун асар эса ҳеч кимни тўлқинлантирумайди. Ахир буни ёзгунча озмунча куч-кувват, меҳнат сарфланганми! Ушани ёзгунча адойи-тамом бўлди хисоби. Энди у бир фожеа ёзибди.

Гёте жилмайиб қўйди-да, бир зум жим қолди. Шундан фойдаланиб мен сўз қотдим ва агар адашмасам, Сиз «Санъат ва мозийлик» журналида Ҳагенга, фақат майда сюжетлар устида ишлашни маслаҳат бергандингиз, дедим.

– Шундай дегандимку-я, – жавоб қилди Гёте, – лекин ким ҳам биз кексаларнинг айтганини қиласди? Ҳар бири нима қилишни ўзим яхшироқ биламан, деб ўйлади, шу йўлда кимдир нобуд бўлди, бошқаси йўл тополмай қўйналди. Аммо ҳозир адашишнинг пайти эмас, биз, кексалар, буни бошимиздан ўтказдик, агар сиз ёшлар яна шу йўлдан борсанглар, бизларнинг адашишу изланишларимиздан нима фойда? Бу ҳолда, олдинга силжиб бўлмайди! Хатоларимизни биз кексаларнинг юзига солиб бўлмайди, негаки, биз тайёр йўлдан бормадик; бироқ кейинроқ дунёга келганлардан талаб бошқача бўлди, уларнинг адашишга ҳақлари йўқ, кексаларнинг маслаҳатларига қулоқ тутиб, тўғри йўлдан боришлари лозим. Мақсадга томон қадам ташлашнинг ўзигина етарли эмас, ҳар бир ташланган қадамнинг ўзи мақсад бўлмоғи ва яна олдга қадам ташланмоғи керак.

Бу сўзларнинг мағзини чақиб кўринг, ўйланг, улардан қайсилари сизга асқотиши мумкин. Тўғрисини айтганда, менинг маслаҳатларим сизнинг ҳозирги ҳолатингизга тўғри келмайдиган босқичдан тезроқ чиқиб кетишингизга кўмак берса, дейман. Маълум муддатгача майда сюжетлар устида ишлаб юринг, Сизга манзур бўлаётган туйғуларни пешма-пеш

¹ Август Ҳаген (1797–1880) – шоир ва санъатшунос.

қоғозга туширинг, шу тариқа қандайдир эзгу ишни амалга оширасиз ва ҳар бир кунингиз сизга қувонч келтиради. Шеърларингизни дастлаб газета-журналларга беринг; бирорларнинг талабларига эмас, балки ўз қалбингиз овозига қулоқ тутинг.

Мен Гётега йил фасллари ҳақида достон ёзиш, унда турли табака ва-килларининг машғулотлари ва хурсандчиликларини тасвирилаш ниятида эканлигимни айтдим.

– Мана шуни айтдим-да, – деди бунга жавобан Гёте, – эҳтимол, кўп нарсалар кўлингиздан келар, аммо ҳали сиз етарлича билиб ололмаган, мағзини чақолмаган айрим жиҳатларда оқсаб қолишингиз мумкин. Масалан, балиқчини маромида тасвириларсиз-у, овчининг тасвири чиқмай қолар. Борди-ю бутун асарда нимадир яхши чиқмай қолса, бу, бутун асар муваффақиятсиз чиқди, дегани бўлади. Айрим ўринлар яхши бўлгани билан барибир, етук асар ёздим, деб айтолмайсиз. Кучингиз етадиган ўша алоҳида ўринларни тасавуурингизда мустақил бир ҳолатда жонлантиришга уриниб кўринг-да, ёзинг, ишонаманки, гўзал бир асар чиқади. Айникса, огоҳлантириб айтайки, *ўзингизнинг* чексиз хаёлларингиз кетидан эргашинг: бу ҳар бир нарсага нисбатан аниқ нуқтаи назарни талаб қиласди, ёшлиқда бундай нуқтаи назар ҳали пишиб етилмаган бўлади. Кейин: асардаги тимсоллар ўз дунёқарашлари билан шоирга боғлиқ бўлмаган бир тарзда ҳаёт кечира бошлайдилар ва ундаги кейинги ижоди учун керак бўладиган руҳий бойлигини ўзлаштирадилар. Ва ниҳоят: узук-юлуқ қисмларнинг маъносини жойига келтириб бир-бирига боғлаш, тартибга келтириш учун қанча вақт сарфланади, агар киши ўз ишини қойиллатиб бажарганида ҳам, ҳеч ким, “ўх-хў қойил иш бўлибди”, демайди. Тайёр сюжет бўлса иш хийла осон кўчади. Бу ерда факт ва характерлар тайёр, бадиий қолипга солинса кифоя. Бунда вақт ҳам, куч-куват ҳам кам сарфланади, чунки у тайёр материални маълум шаклга солади, холос. Яна бир гап: мен олдин ишланган сюжетларга мурожаат қилишни маслаҳат бераман.

Гётенинг сўзларидан ўзимни худди бир неча йилга илгарилагандек хис этдим, ҳақиқий ижодкор билан учрашиш нечоғлик баҳт эканлигини бутун қалбим билан яна бир бор англақ етдим. Бунинг фойдасини ҳеч нарса билан ўлчаб бўлмайди.

Ваймар, 1823 йилнинг 2 октябри, пайшанба

Кеча роҳатижон ҳавода Йенадан келдим. Менинг Ваймарга қайтганимни кутлаш тарзида келганим заҳотиёқ Гёте театрга юборди. Гётенинг уйи гавжум – Франкфуртдан фаранг элчиси граф Райнхард¹, Берлиндан прусс давлат маслаҳатчиси Шулц² уни зиёрат қилиш учун ташриф буюришган эди.

Бугун эртароқ Гётеникига келдим. У менинг қайтиб келганимдан хурсанд бўлди. Кетмоқчи бўлгандим, у маслаҳатчи Шулц билан таништириш мақсадида тўхтатди. Мени ёндаги хонага бошлаб кирди, у ерда жаноб Шулц санъат асарларини томоша қилиш билан банд эди, Гёте мени унга таништириди-да, икковимизни ёлғиз қолдириб чиқиб кетди.

– Сизнинг Ваймарда қолганингиз, – дарҳол сўзга киришди Шулц, – Гётенинг ҳозиргача нашр этилмаган асарларини таҳrir қилишда ёрдам бермоқчи бўлганингиз жуда яхши бўлипти. У менга, сиз билан ҳамкорликдан қандай манфаат кутаётганини, айрим бошлаб қўйган янги асарларини ниҳоясига етказиш ниятида эканлигини айтди.

¹ Райнхард Карл Фридрих (1761–1837) – граф, француз дипломати.

² Шулц Кристоф Людвиг Фридрих (1781–1834) – Пруссия давлат маслаҳатчиси.

Мен унга жавобан, немис адабиётига фойда келтиришдан ўзга мақсадим йўқлигини, *шу ерда* сермаҳсул фаолият кўрсатаман, деган умидда ўзим кўзлаган адабий режаларимни ҳозирча бир четга қўя туришни лозим топганимни айтдим.

— Сўзиз, — деди Шулиц, — Гётедек беназир инсон ва ижодкорнинг шахсий таъсири тенгсиздир. Мен ҳам ана шу буюк даҳонинг фикридан бир бор озиқланиш учун бу ерга келдим.

Шундан сўнг у ўтган йили ёзда ёзган китобимнинг нашри билан қизиқди. Мен, яқин кунларда дастлабки нусхаларини олишим мумкинлигини, агар у ўша муддатгача бу ерда қололмаса, Берлинга унинг номига бир нусхани жўнатишими айтдим. Шу билан биз самимий қўл қисишиб, хайрлашдик.

1823 йилнинг 14 октябри, сесанба

Бугун кечқурун илк дафъа Гётеника тантанали зиёфатда иштирок этдим. Мен биринчи бўлиб келдим ва биридан иккинчисига кириб бориладиган, эшиклари ланг очиқ чароғон хоналарни кўриб юрагим ҳаприқиб кетди. Сўнгги хоналардан бирида Гётени кўрдим, у ғоятда қувноқ кайфиятда мени қарши олди. Қора фрак ва кўкрагидаги нишон унга ғоят ярашган эди. Биз бир муддат ёлғиз колдик ва шифти накшдор хонага ўтдик, у ерда қизил диван тепасига осилган «Алдобранда тўйи» деб номланган картина диққатимни тортди. Устидаги яшил парда четга суриб қўйилган картина тўла ёритилган ҳолда қўз олдимда турар ва уни томоша қилиб, завқ олардим.

— Ҳа, — деди Гёте, — қадимги ижодкорларда нафакат буюк ғоялар бўлган, балки улар ғояларни рўёбга чиқаришни ҳам билишган. Биз, янги замон кишиларида ҳам улкан ғоялар бор, бироқ уларни ўзимиз хоҳлагандек ёркин ва тиниқ қилиб тасвирлаб беролмаймиз.

Шу пайт сарой аъёнларидан бир қанча жаноб ва хонимлар кириб келишди. Гётенинг ўғли ва келини фон Гёте хоним ҳам ташриф буюришди, улар билан мен илк бор танишдим. Хоналар борган сари тўлиб борар, ҳаммаёқда хуш кайфият ва қўтаринкилик ҳукм сурарди. Яна бир неча гўзал, ёш хорижий меҳмонлар ҳам келишди, улар билан Гёте фаранг тилида гаплашди.

Давра менга ёқди, ҳамма ўзини эмин-эркин тутар, ким тик турган, ким ўтирган, ким кулган, ким ҳазиллашган, хуллас, ким кимни хоҳласа, ўша билан сўзлашарди. Биз эса ёш Гёте икковимиз яқинда театрда қўйилган Ҳувалд нинг “Портрет” асари ҳақида сухбатлашдик. Спектакль хусусида фикримиз бир жойдан чиқди, ёш Гёте воқеаларни тўлиб-тошиб таҳлил қилишидан қувондим.

Гётенинг ўзи меҳмонларга ўта серилтифот бўлди. У gox униси, gox бунисининг ёнига борар, ўзи кам гапирав, кўпроқ меҳмонларнинг сўзлашига имкон берарди. Фон Гёте хоним унинг ёнига тез-тез келар, эркаланиб унга суйкалар, уни ўпарди. Яқинда мен унга, театр менга катта қувонч бағишлиётганини, спектаклларни ҳузур қилиб томоша қилаётганимни, аммо улар ҳақида чуқур мулоҳазага берилимаслигимни айтгандим. У буни маъқуллади ва бу айни дамдаги кайфиятимга мос эканлигини айтди.

Шоир фон Гёте хоним билан ёнимга яқинлашди.

— Бу менинг келиним, танишиб олгандирсизлар?

Биз танишиб олганлигимизни билдиридик.

— У ҳам худди сендек театр ишқибози, Оттилия, — давом этди у, биз эса

¹ Ҳувалд Эрнст (1778–1845) – драматург.

икковимизнинг касалимиз бир эканлигидан қувондик. – Менинг қизим биронтаям спектаклни қолдирмайди.

– Яхши спектакллар кўйилса, – жавоб бердим мен, – мазза қилиб кўраман, бироқ ёмонлари тоқатингни тоқ қилиб юборади.

– Шуниси борки, – жавоб қайтарди Гёте, – чиқиб кетиб бўлмайди, асар ёмон бўлсаям охиригача томоша қилишга мажбурсан. Бу бизга ёмон нарсага нисбатан нафрат кўзгатади ва яхши нарсани янада чукуроқ тушунишга ўргатади. Китоб ўқиш бошқа нарса, китоб ёқмаса, отиб юборасан-кўясан, театрда эса чидағ ўтиришинг керак.

Мен маъқулладим ва мўйсафид ҳар бир воқеага нисбатан бирон-бир маънодор гап айтишини кўнглимдан кечирдим.

Биз ажралиб бошқаларга қўшилиб кетдик, меҳмонлар бизнинг атрофимиизда, бошқа хоналарда шод-хуррам сухбатлашиб юришарди. Гёте хонимлар ёнига кетди, мен Ример ва Мейерларга қўшилдим, улар бизга Италия ҳақида гапириб беришли.

Бироздан сўнг маслаҳатчи Шмидт роял ёнига ўтириб Бетховеннинг бир неча пъесаларини тинглади. Гапга уста бир аёл Бетховен ҳаётидан қизиқ воқеаларни сўзлаб берди. Шу тариқа соат ҳам ўнга яқинлашди, бу кеча мен учун сўз билан ифода этиб бўлмайдиган даражада кўнгилли ўтди.

1823 йилнинг 21 октябри, сеанба

Кечқурун Гётеникида бўлдим. Биз «Пандора» драматик достони ҳақида гаплашдик. Мен, бу достонни тугалланган деса бўладими ёки унинг давоми борми, деб сўрадим. Давоми йўқ, деди у, негаки, биринчи қисм ғоятда ҷўзилиб кетганидан иккинчи қисмини ортиқ давом эттиришни лозим топмадим. Мана шу ёзилганини тугал бир асар деб ҳисобласа, шу билан қаноатланса бўлади.

Мен ушбу мураккаб достоннинг мағзини секин-аста, жуда қийинчилик билан чаққанимни, уни қайта-қайта ўқиганимдан ҳатто ёд бўлиб кетганини айтдим. Бунга жавобан Гёте кулимсираб:

– Ишонаман, у ерда ҳамма нарса гўё **тилсимланган, – деди.**

Мен унга, Шубартнинг¹ мана шу достон ҳақидаги фикрларига қўшилмаслигимни айтдим, унинг фикрича “Вертер”, “Фауст”, “Вилхелм Майстер”, “Хамроз диллар” асрларида алоҳида тилга олинган ходисаларнинг бари гўё бу достонда жамланган, оқибатда достон бехад оғир ва мураккаб бўлиб кетган эмиш.

– Шубарт, – деди Гёте, – кўпинча жуда чукур фикрлайди; ўз ишига ўта пишиқ, баҳо беришда нишонни тўғри олади.

Уланд ҳақида сўз очдик.

– Бадиий асрлар китобхонга зўр таъсир этганини кўрсам, – деди Гёте, – бу, албатта, бекорга эмас, деб ўйлайман, Уланд ҳам шу қадар оммалашиб кетган экан, демак, бунинг ҳам ўзига яраша сабаблари бўлса керак. Унинг “Шеърлар” и ҳақида мен ўзим аниқ бир фикр айтолмайман. Тўпламини яхши умидлар билан қўлимга олгандим, бошиданоқ заиф, зерикарли шеърларга дуч келдим-да, ҳафсалам пир бўлди. Кейин унинг балладаларини ўқишига тутиндим, шунда билдимки, у чинданам истеъдодли ва машхурлигиям бежиз эмас экан.

Шундан кейин мен Гётедан немис фожеаларида шеърий шаклга оид фикрини сўрадим.

– Германияда, – жавоб берди у, – аниқ бир ечимга келиш қийин. Ҳар

¹ Шубарт Карл Эрнст (1796–1861) – филолог, ёзувчи.

² Уланд Людвиг (1787–1862) – немис романтик шоири, адабиётшунос..

ким ўзи билганча, танлаган мавзусига қараб ўзича ёзаверади. Менимча, олти ҳижоли ямб энг муносиби эди-ю, аммо немис тили учун у хийла узунлик қиласи; сифатлашларнинг етишмаслиги боис биз одатда беш ҳижолиси билан қаноатланиб қўя қоламиз. Бу фикр инглизларга янайам кўпроқ тегишли.

Сўнг Гёте бир қанча мисга ўйилган гравюраларни кўрсатди-да, қадимги немис меъморчилиги хусусида сўзлади ва кейин ҳам шунга ўхшаш асарларни менга кўрсатиш истагида айтди.

1823 йилнинг 25 октябрини, шанба

Қош қорайгандан ярим соатча Гёте ҳузурида бўлдим. У иш столи ёнидаги оромкурсида ўтиради; мен уни ғоятда мамнун кайфиятда учратдим; у баайни самовий сокинлик бағрига шўнғиган, бир вақтлар бошдан кечирган лаззатбахш баҳт ҳақида, гўё ўша баҳт бор бўй-басти билан кўзи олдида қайтадан намоён бўлган одамдек ўтиради. У хизматкори Штаделманнга мен учун битта стул келтиришни буюрди.

Биз бу қиши менинг асосий машғулотим бўладиган театр ҳақида гаплашдик. Энг сўнгги кўрган спектаклим Раупахнинг¹ «Заминдаги тун»и эди. Шу ҳақда ўз фикрларимни айтдим: бу пьеса муаллиф хаёлида шаклланган ҳолатда саҳнага кўйилмаган, унда ҳаётийликдан кўра ғоя, драмадан кўра лирика кўпроқ етакчилик қиласи, беш кўриниш давомида чўзилган ипни икки ёки уч кўринишга сифдирса бўларди. Гёте ҳам ўз навбатида пьеса аристократия ва демократия атрофида айланган, холос, бу оммани ҳечам қизиқтирилмайди, деди.

Шундан кейин мен Котсебунинг² ўзим кўрган пьесалари, яъни «Кариндошлар» билан «Келишув»ни мақтадим. Унинг кундалик ҳаётга ёрқин назар билан қарашини, ҳаётнинг дикқаттортар кирраларини дадил, жуда ишонарли, ширадор тасвирлаганини таъкидладим. Гёте фикримга қўшилди:

– Йигирма йилдан бери саҳнадан тушмай, – деди у, – халқнинг эътиборини қозонаётган экан, демак, нимасидир бор. У ўз доирасида маҳкам туриб, имкониятларидан четга чиқмагандаги эди, анча яхши нарсалар ёзган бўларди.

Гёте тағин Котсебунинг бир неча дуруст пьесаларини, айниқса, «Икки Клингсберглар»ни тилга олди:

– Инкор қилиб бўлмайди, – у ҳаётни яхши биларди, унга очиқ кўз билан қарапди. Ҳозирги фожеанависларни, – дея давом этди у, фикрлашмайди, поэтик истеъдоддан маҳрум, деб бўлмайди; кўпчилигида енгил, жонли тасвирлаш салоҳияти етишмайди; улар ўз кучлари етмайдиган нарсага интилишади, шу боисдан мен уларни **жадал суръатли** истеъдодлар, дегим келади.

– Бу шоирларнинг, – дедим мен, – пьесани насрда ёза олишларига ишонмайман, менимча, бу уларнинг қобилиятини имтиҳон қилиш бўларди.

Гёте сўзимни маъқуллади ва: “Шеър асарга оҳангдорлик бағишлидай, айниқса, таъсирчанлигини оширади”, дея қўшиб кўйди.

Кейин қилинадиган ишлар хусусида бироз сўзлашдик. Унинг «Франкфурт ва Штутгарт орқали Швейцарияга саёҳат» асарини тилга олдиқ, бу асар уч дафтарда унинг ўзида сақланар, улардаги алоҳида ёзувларни ўқиб чиқиб, қандай қилса ҳаммасини яхлит бир асарга айлантириш мумкинлиги ҳақида ўз фикрларимни айтишим учун менга юбориш ниятида эди.

¹ Раупах Эрнест (1784–1825) – драматург.

² Котсебу Август фон (1761–1819) – немис ёзувчиси ва публицисти.

— Ўзингиз кўрасиз, — деди у, — улар айни дамдаги кайфиятга қараб ёзи-лаверган; на режа ҳақида, на бадиийлик ҳақида қайғуримаган, бир сўз билан айтганда, бу ёзувлар *челакдаги сувни тўкиб юборгандек* қофозга тушган.

Режасиз бажарилган ишни айнан характерловчи бу қиёслаш менга жуда ёқди.

1823 йилнинг 29 октябри, чоршанба

Бугун кечкурун Гётеникига бордим. Уни ғоятда кўтаринки, хуш кайфиятда учратдим, кўзлари шам нурининг аксидан чараклар, унинг бутун борлиғи қувноқ, куч-қувват ва ёшликка хос жўшқинлик билан тўлиб-тошган эди.

У мен билан хонада у ёқдан-бу ёққа юаркан, дарҳол кеча мен унга юборган шеърлардан сўз очди.

— Энди билдим, — сўз бошлади у, — нега сиз Йенада менга йил фасллари ҳақида шеър ёзмокчиман, деганингизни. Сиз табиат ҳодисаларини ўзига хос идрок ва ўткир нигоҳ билан кузата олар экансиз. Шеърлар ҳақида икки оғизгина гапирмоқчиман. Сиз ҳозир шундай нуқтада турибсизки, у ердан санъатнинг энг баланд ва энг оғир чўққисига, ўзлигингизни англашга йўл топишингиз лозим. Бунинг учун сиз ғоя чангалидан қутулишга ўзингизда етарли куч тўплашингиз керак; Сизда истеъодод бор, нималарга қодирлигингизни кўрсатдингиз, ана энди шундай қилиш *пайти келди*. Яқинда сиз Тифуртда бўлдингиз, мен сизга яна шундай вазифа топширмоқчиман. Эҳтимол, сиз яна уч-тўрт дафъя ўша ёққа бориб келарсиз, у ерни атрофлича ўрганиб, барча ҳолатларни яхлит бир ҳолга келтирмагунча Тифуртни кузатасиз, куч-қувватингизни аямасдан ҳаммасини яхшилаб ўрганинг ва шеърга солинг. Тифурт бунга арзиди. Бу ишни аллақачон бажарган бўлардим, аммо мен буни қилолмайман, негаки, у ердаги кўплаб ўзгаришларда ўзим иштирок этганман, кўп ишларнинг ичida бўлганман, майда-чуйда тафсилотлар менга ҳаддан ташқари таниш. Сиз у ерга бегона киши сифатида борасиз, назоратчидан ўтмиш ҳақида гапириб беришини сўрайсиз, ўзингиз эса кўзга яққол ташланадиган, энг характерли нарсаларнигина кўрасиз.

Мен унга худди айтилгандек қилишга ҳаракат қиласман, деб ваъда бердим-у, аммо вазифанинг мен учун енгил эмаслигиниям, менга бу соҳа хийла нотанишлигиниям яширмадим.

— Биласман, — деди Гёте, — бу оғир, бироқ хусусий нарсани англаб етиш ва тасвирлаш ҳам санъатнинг моҳиятини ташкил этади. Яна бир гап: токи биз умумий нарсани асос қилиб олар эканмиз, ҳар қандай киши ҳам бизга тақлид қилиши мумкин, аслида ҳеч ким бундай қилолмайди. Нега? Чунки буни бошқалар синааб кўрмаган. Лекин хусусий нарса ҳеч қандай акс-садо бермайди, деб қўрқмаслик керак. Ҳар бир характер қанчалик ўзига хос бўлмасин, ҳар бир тасвирланадиган нарса, оддий тошдан тортиб инсон-гача, қандайдир умумийликка эга; негаки, ҳамма нарса такрорланади. Дунёда факат *бир мартагина* яраладиган ҳеч нима йўқ.

— Индивидуал тасвирнинг мана шу босқичида, — сўзида давом этди Гёте, — *ижод* деб номланган мўъжиза бошланади.

Буни мен унчалик тушуниб етмадим, аммо савол беришдан тийиндим. Эҳтимол, ўйладим мен, хаёлий нарсанинг реал нарса билан бадиий яхлитланишини, биздан ташқарида мавжуд бўлган нарсанинг бизга туғма бўлган нарса билан қўшилишини кўзда тутаётгандир. Бутунлай бошқа нарса ҳақида сўз юритаётган бўлса ҳам ажаб эмас.

Гёте сўзида давом этарди:

– Кейин ҳар бир шеърингизнинг остига ёзган санангизни қўйинг. – Мен унга савол назари билан қарадим, наҳотки шунчалик мухим бўлса?

– Ўшанда, – қўшиб қўйди у, – улар руҳий кечинмаларингизнинг кундалиги бўлади. Бу кичкина нарса эмас. Мен йиллар давомида шундай килдим, бунинг нечоғлик аҳамиятли эканлигини биламан.

Шу орада театрга борадиган вақт бўлди, Гёте билан хайрлашдим.

– Шундай қилиб, Финляндияга кетмоқчисиз... – ҳазиломуз гап қотди ортимдан.

1824 йилнинг 27 январи, сесанба

Гёте мен билан ҳозир ўзи машғул бўлаётган таржимаи ҳолининг давоми ҳақида гаплашди. Унинг фикрича, ҳаётининг давоми «Шеърият ва ҳақиқат»да ёзилган ёшлик йиллариdek деталларга бой эмас экан.

– Кейинги йилларни, – деди Гёте, – худди йилномадек тасвираш им керак; бунда ҳаёт йўлимдан кўра кўпроқ ижодий фаолиятим қаламга олиниши лозим. Умуман олганда, шахс ҳаётининг энг кўзга кўринган даври – бу тараққиёт даври бўлади, менинг мисолимда бу “Шеърият ва ҳақиқат” нинг поёнига етган жиллариdir. Кейинроқ эса атрофдагилар билан келишмовчиликлар бошланади, бу нарса бирон қимматга эга бўлсагина бошқалар учун қизиқ бўлади. Ва ниҳоят, немис олимининг ҳаёти нима деган нарса? Борди-ю, ҳаётим мен учун бирон кўзга кўринарли нарса бўладиган бўлса, бу ҳақда одатда айтилмайди. Қани ўша, иштиёқ билан айтганингни тинглайдиган одамлар?

Ёшлик йилларимга назар ташлаб, мана энди қариган чоғимда, ўйга толаман: мен тенгиллар қанча қолди?.. Буни доимо ёзги курортлардаги ҳолатга қиёслагим келаверади. У ерга борганданоқ, яқин орада кетадиган одамлар билан танишиб, дўстлашиб оласан киши. Ажралиш оғир. Иккинчи авлодга кўникишга тўғри келади, улар билан ҳам хийла вақт бирга бўлиб, дилдан боғланиб қоласан. Булар ҳам кетишади-да, сен учинчиси билан қолишга мажбур бўласан, улар кетишингдан сал олдин келган бўлишади ва сени қизиқтиришмайди ҳам.

Ҳамиша одамлар мени баҳтдан ёлчиган дейишади. Тўғри, қисматимдан нолимайман, ҳаётимдан норози эмасман. Аслида бутун ҳаётим меҳнат ва интилишдан иборат, тўғрисини айтадиган бўлсан, етмиш беш йиллик ҳаётим давомида бирон ой йўқки, ўз ҳузур-ҳаловатимни ўйлаб яшаган бўлсан. Назаримда бутун умр битта тошни жойидан қўзғатишига уриндим-у, аммо сира қўзғатолмадим. Бу билан нима демоқчи эканлигими мемуарларим ойдинлаштириб беради. Менинг ижодий фаолиятимга, хоҳ ичдан бўлсин, хоҳ ташдан бўлсин, жуда катта талаблар қўйилди. Позитив тафаккурим ва ижодим – менинг ҳақиқий баҳтимдир. Аммо ижтимоий мавқеим унга қанчалар халақит берди, чегаралади, бўғди. Агар мен саройдаги амал ва вазифалардан ўзимни олиб қочиб, кўпроқ танҳоликда яшаганимда эди, янада баҳтлироқ ва ижодкор сифатида янада кўпроқ иш килган бўлардим. «Гетс» билан «Вертер» каби асарларим чикқандан сўнг қайси бир донишманднинг сўзлари менинг қисматимда амалга ошди, у шундай деган эди: «Агар сен инсоният учун бирор яхшилик қилган бўлсанг, буни иккинчи марта тақрорламаслигинг учун унинг ўзи ҳаракат қилади».

Шон-шуҳрат, жамиятдаги юксак мавқе – булар яхши. Аммо бутун шон-шуҳратим ва мартабамга қарамасдан доимо бошқаларнинг фикрига кулоқ тутиб, бирорнинг кўнглини оғритиб қўймасликка, албатта ҳаракат

қилдим. Агар бошқалар миямда нималар борлигини билмагани ҳолда менда уларнинг фикрини ўқий олиш қобилиятим бўлмаганида кўнгил бўшлигим ёмон оқибатларга олиб келиши мумкин эди.

1824 йилнинг 15 феврали, якишанба

Гёте бугун мени тушликкача файтунда айланиб келишга таклиф қилди. Келсам, нонушта қилаётган экан. Кўринишдан кайфияти зўр.

– Ҳалигина ёқимтой меҳмон келганди, – деди у мени шодон қаршиларкан, – ғоят умидли, вестфалиялик Мейер деган йигит. Унинг ёзган шеърлари келажаги борлигидан дарак беради. Ёши ўн саккизда бўлса-да, анча илгарилаб кетган. Менинг ёшим ўн саккизда эмаслигидан хурсандман, – деди Гёте кулимсираб. – Мен ўн саккизда эканимда Германия ҳам эндингина ўн саккизда эди. Ўша пайтда бирон нарса қилса бўларди; хозир эса талаблар жуда катта, ҳамма йўллар берк.

Германия деярли барча соҳаларда шу қадар илгарилаб кетдики, ҳаммасини илғаб олиш кийин, тағин биз юон ва лотин, инглиз ва француз бўлишимиз керак! Бунинг устига, шарқниям қўрсатадиган бераҳмлар ҳам топилади, бундай ахволда бечора йигит нима қилиши мумкин! Уни юпатиш мақсадида Юнонанинг улкан ҳайкалини қўрсатдим, токи бу унинг учун юоннларга суюниш ва улардан юпанч топишда рамз бўлсин, дедим. У ажойиб йигит. Агар гоҳ унга, гоҳ бунга уринишдан ўзини тийса, ундан бир нима чиқади. Лекин ўзим, мана шу ич-ичидан бузилган даврда ёш бўлмаганимга Тангрига шукроналар айтаман. Қандай ҳаёт кечиришниям билмаган бўлардим. Борди-ю, Америкага қочиб кетишини ҳаёл қилганимдаям, кечиккан бўлардим, у ерда ҳам аллақачон тонг ёришган бўларди.

1824 йилнинг 22 феврали, якишанба

Гёте ва ўғли билан тушлик қилдик, у Ҳайделбергдаги талабалик йилларида юз берган қизиқ воқеаларни сўзлаб берди. У дўстлари билан таътил пайтлари Райн бўйида дам олишгани, у ергаги бир қўли очиқ ошхона эгаси ҳақидаги ёрқин хотираларини эслади. Бир куни ўнта талаба уницида тунаб қолишган, у бўлса ўз “бизнес” идан бор-йўғи роҳатланиш учунгина буларни вино билан бепул меҳмон қилган экан.

Тушликдан сўнг Гёте бизга Италия, айникиса, шимолий Италия ва Лаго-Мажкора тасвири туширилган рангли суратларни қўрсатди. Сувда Борромей ороллари акс этиб турар, қирғоқда балиқчиларнинг қайиклари ва асбоб-анжомлари кўзга ташланарди. Бу “Вилгем Майстернинг жаҳонгашталик йиллари” да тасвирланган кўл, дея тушунтириди Гёте. Шимоли-фарб томонда, Монте-Роза йўналишида қуёш ботгандан кейинги ғира-ширалиқда кўк-қора рангда кўзга ташланаётган, кўлни чегаралаб турган кенг адирлар ястанган эди.

– Бундай тоғларнинг зим-зиё улуғворлиги, – дедим, – мендек текис жойларда туғилиб ўсган кишининг юрагига қўрқув солади, мен бундай дараларда саёҳат қилишни ҳечам истамаган бўлардим.

– Бу табиий, – деди Гёте, – одамнинг қаерда ва нима учун туғилгани ўзига муҳим-да, ахир. Агар одамни юксак мақсадлар мусофириликка етакламаса, у ўз уйида ҳаммадан баҳтли-да. Швейцария дастлаб менда шундай кучли таассурот қолдирдики, ҳаяжондан ўзимни йўқотиш дараҷасига бордим; аммо бир неча йиллар ўтгач, у ерга такроран борганимда, тоғларни соғ минералогик нуқтаи назардан кузатдим, уларни хотиржам идрок қилдим.

Шундан сўнг, биз бир француз галерейсидаги замонавий рассомлар асарлари асосида мисга ўйиб ишланган гравюралар мажмуасини томоша қилдик. Булар шу қадар бўш ишланган эдики, қирқта расмдан фақат тўртбештасигагина ижобий баҳо бердик, холос. Чунончи, биттасида муҳаббат мактубини айтиб ёздираётган киз; бошқасида уйини сотмоқчи бўлган, лекин ҳеч ким сотиб олишни истамаётган аёл; учинчисида балиқ ови; тўртинчисида Биби Марям сурати олдидағи мусиқачилар тасвирланган суратлар. Булардан ташқари, француз рассоми Пуссон услугуда чизилган табиат манзараси ҳам ёмон эмасди, бу ҳақда Гёте куйидагиларни айтди:

– Бундай рассомлар, Пуссон чизган табиат манзаралари ҳақида умумий тушунчани ўзларига сингдириб олишган-да, шунга мувофиқ ижод қилишганди. Уларнинг расмларини яхши ҳам, ёмон ҳам деб бўлмайди. Улар ёмон эмас, негаки, ҳаммасида моҳирона ўзлаштирилган намуна кўзга ташланиб туради. Яхши ҳам деёлмайсан, чунки уларда Пуссонга хос ўзига хослик етишмайди. Шоирлар ҳам худди шунга ўхшайди, уларнинг кўпчилиги, масалан, улуғ Шекспир услугубини ўзлаштиришга урингланда-рида, шубҳасиз, бунинг уддасидан чиқишилари гумон эди.

Охирида Раух томонидан Франкфурт учун ишланган Гёте ҳайкали моделини узоқ томоша қилиб, муҳокама этдик.

1824 йилнинг 24 феврали, сеашанба

Бугун соат бирда Гётеникода эдим. У менга “Санъат ва мозийлик” журнали бешинчи жилдининг биринчи дафтари учун мўлжаллаб айтиб туриб ёздирган қўллэzmани кўрсатди. У менинг «Мазлума»га ёзган тақризимга илова кўшган, унда француз трагедияси ва ўз лирик трилогияси ҳақида гапириб, бу билан ушбу мавзуларни бир-бирига улаган эди.

– Сиз тақриз ёзиш асносида, – деди Гёте, – Ҳиндистоннинг ўзига хосликлари билан танишиб олганингиз яхши бўлди, чунки биз ўрганган илмлардан охир-оқибат хотирамизда амалда қўллаганимиз қолади, холос.

Унинг фикрини маъқулладим ва буни мен университетда ўқиб юрганимда ўзим синаганимни, профессорларнинг маъruzalariдан фақат кейин амалда қўллаганинингина эсда сақлаб қолганимни айтдим; амалда керак бўлмаганларини эса, аксинча, тамоман унутиб юбордим. Хеерен бизга қадимги ва янги тарихдан маъruzalар ўқиган эди, улардан биронта сўз ҳам ёдимда йўқ. Бордию мен ҳозир, айтайлик, бирон драма ёзиш мақсадидами, тарихнинг бирор даврини ўрганмоқчи бўлсан, бундай илм бир умрга ёдимда қолган бўларди.

– Умуман, – деди Гёте, – университетларда жуда кўп нарсаларни, айниқса, жуда кўп кераксиз нарсаларни ўргатишади. Айрим профессорлар эса ўз фанларида талабаларга керак бўлганидан ҳам кўпроқ билим беришади. Йлгарилари кимё билан ботаникани фармокологияга қўшимча фан сифатида ўтилар, шифокорлар учун шу етарли бўларди. Энди бўлса кимё ҳам, ботаника ҳам мустақил муҳим фанларга айланганки, уларнинг ҳар бирини инсон умри давомида ўрганиади, шифокорларниям уларни ўрганишга мажбур қилишади! Бундан ҳеч бир фойда чикмайди, на унисини, на бунисини дуруст ўрганмай, охири ҳаммаси унутилади. Ақли бор одам фикрини чалғитадиган барча талабларни четга суриб қўяди-да, битта соҳа билан чегараланади ва ўша соҳани чукур эгаллайди.

Шундан сўнг Гёте менга Байроннинг “Кайн” (“Қобил”) пьесаси ҳақида ўзи ёзган қисқагина танқидий мақолани кўрсатди, уни мен катта қизиқиш билан ўқидим.

– Байрондек эркин фикрли киши, – деди Гёте, – қандай килиб черков

ақидаларининг пучлигини исботлаб, мана шу пьеса орқали ўзига мажбуран юклangan диний таълимотдан озод бўлишга урингани кўриниб турипти. Англия руҳонийлари, шубҳасиз, бунинг учун унга ташаккур билдиришмайди; агар у Инжилдаги ёнма-ён сюжетларни қайта ишлашда давом этса-ю, Содом ва Гоморранинг ҳалокатидек мавзуни четлаб ўтса, хайрон қолган бўлардим.

Шундай адабий кузатишлардан сўнг Гёте диққатимни нафис санъатга тортди-да, олдимга антик ўймакорлик услугибда безатилган тошни қўйди, бу ҳақда у менга бир кун олдин ҳаяжон билан гапирган эди. Мен тасвирдаги жозибали соддаликни кўриб ҳайратга тушдим: болага сув ичириш учун бир одам елкасидаги оғир идишни ерга қўймоқда. Аммо боланинг оғзи идишга етмайди, сув қўйила қолмайди; шунда у иккала қўлчалари билан идишга ёпишиб олиб, у одамнинг юзига боқиб, тағин бироз эгилишини сўрайди.

– Хўш, бу сизга ёқдими? – сўради Гёте, – биз, янги замон кишилари, албатта, бундай соф табиий, соф содда мотивнинг гўзаллигини хис этамиз, буни қандай қилиш ҳақида билиму малакамиз ҳам бор, бироқ қилмаймиз, ақл-идрок устунлик қиласи, ана шу соддалик жозибаси бизда етишмай колади.

Шундан сўнг берлинлик ўймакор уста Бранднинг медалини томоша қилдик, унда тош остидан отасининг қуролини топиб олган ёш Тезей тасвирланган эди. Гавданинг туриши анча дуруст ишланган бўлса-да, бироқ тошни силжитаётган пайтдаги мушакларнинг зўриқиши сезилмасди. Йигитнинг бир қўли билан тошни кўтариб, иккинчиси билан қуролни олаётгани ҳам ишонарли чиқмаган эди. Аслида у олдин тошни бир четга сурисиб қўйиб, кейин қуролни олса, табиий чиқкан бўларди.

– Энди эса, – деди Гёте. – мен Сизга тағин бир нақшдор тошни кўрсатаман, бу ерда ҳам худди ўша сюжет қадимги рассом томонидан ишланган.

У Штаделманнга бир кутини келтиришни буюрди, унда Гёте Италияга сафар қилган пайтида Римдан олиб келган антик давр нақшдор тошларининг бир неча юзтаси ётарди. Уларнинг ичиди мен қадимги юонон расоми ишлаган худди ўша сюжетни кўрдим – фарки қанчалар! Йигит бор гавдаси билан тошга ёпишган, бунга унинг кучи етади, чунки ўз ишини уддалаётгани кўриниб турарди, у тошни бир четга улоқтириб ташлаш даражасида кўтариб турарди. Еш қаҳрамон бутун гавдасининг кучини оғир юқ томон йўналтирган, фақат нигоҳлари пастга – тош остида ётган қуролга қаратилган эди.

Биз ушбу тасвирнинг ўта табиийлигидан завқландик.

– Мейернинг яхши бир гапи бор, – кулиб гап қўшди Гёте, – “ўйлаш бунчалар оғир бўлмаса эди!” – Энг ёмони шундаки, ўйлаш билан ўзингта кўмак беролмайсан, одам табиатан шундай бўлиши керакки, яхши фикрлар Яратганинг эркин зурриётларидек «Мана биз!» деб доимо хитоб қилсинлар ва рўпарангда турсинлар.

1824 йилнинг 25 феврали, чоришанба

Гёте бугун менга иккита гаройиб шеърни кўрсатди. Иккаласи ҳам ўз йўналишига кўра юксак ахлоқли, аммо айрим тасвирларда тийиксиз даражада табиий ва ҳаққоний бўлиб, одатда олий давраларда бундай шеърларни одобдан ташқари деб ҳисоблашади, шу боисдан Гёте уларни сир сақлар, чоп эттириш ҳақида ўйламасди ҳам.

– Агар ақл ва билим, – деди Гёте, – умум мулки бўлганида эди, шоирга

яшаш осонрок кўчарди; у ҳамиша ҳақиқатни айтган, ўзининг энг эзгу ҳис-туйгуларини ифода этишдан чўчиб ўтирган бўларди. Акс ҳолда у ҳамиша маълум бир босқичдан нари ўтмаслиги лозим. Шеърлари хилмахил одамларнинг қўлига бориб тушишини шоир эсида тутиши, очиқ-ошкора фикрлари билан кўплаб одамшаванда кишиларнинг кўнглини оғритиб қўйишдан эҳтиёт бўлишга мажбур. Бунинг устига вақт дегани ҳам ғалати нарса. У шафқат қилмайди, ўз хукмини ўтказади, одам нима қилмасин ва нима демасин, унга нисбатан ҳар бир асарда ўз муносабатини ўзгартиради. Чунончи, қадимги юоннлар айтиши мумкин бўлган нарсани **биз** энди айттолмаслигимиз керак, ёки бўлмаса, Шекспирнинг бақувват замондошлари дидига мос тушган гапга 1820 йилдаги инглизлар бардош беролмайди, шунинг учун бизнинг давримизда “Family-Shakespeare”¹ нашрига эҳтиёж туғилади.

– Кўп нарса шаклга ҳам боғлик, – қўшимча қилдим мен, – анави иккита шеърдан биттаси қадимги юон шеърияти оҳанги ва ўлчовига кўра китобхоннинг унча ғашига тегмайди. Айрим ўринлар, эҳтимол, анча-мунча қуюшқондан чиққандир, лекин, умуман олганда тасвир шу қадар улуғворликка ва фазилатга эгаки, гўё қадимги Юон шоирининг овозини эшитаётгандек, гўё енгилмас Юон қаҳрамонлари даврига ўтиб қолгандек бўламиз. Ариосто оҳанги ва услубидаги иккинчи шеър эса анча қалтис кетган. Унда муайян даврдаги саргузашт ҳеч бир ниқобсиз бизнинг бугунги воқелигимизга тўғри кириб боргани сабабли ундаги айрим дадилликлар бирмунча қўпол туюлади.

– Сиз ҳақсиз, – деди Гёте. – Ҳар бир поэтик шакл ўз сирли таъсир кучига эга. Агар менинг “Рим элегиялари” мазмунини Байроннинг “Дон Жуан”и оҳангги ва услубига кўчирилса, барча гапларим ярамас бир нарсага айланаб қолган бўлур эди.

Шу пайт француз газеталарини олиб келишди. Француздарнинг герцог Ангuleм қўмондонлигидаги Испанияга юришининг тугалланиши Гётеда катта қизиқиши уйғотди.

– Бурбонларнинг² бу юриши, шубҳасиз, мақтовга лойик, – деди Гёте, – шу йўл билан улар армияни қўлга киритиб, энди тахтни ҳам эгаллашади. Бу ҳам эгалланди. Аскар ўз қиролига содик ҳолда уйига қайтади, чунки у ўз ғалабаси ҳамда бир томонга бўйсуниш афзал эканлигига ишонч ҳосил қилган. Армия ўзининг қадимги шон-шуҳратини намоён қилди ва қудратли эканлигини ҳамда Наполеонсиз ҳам ғалаба қозонишига қодирлигини исботлади.

Гёте гап мавзусини тарихий воқеаларга бурди ва Етти йиллик уруш давридаги прусс армияси ҳақида гапира бошлади: “Буюк Фридрих” уларни доимий ғалабаларидан руҳлантириб, талтайтириб юборганидан кейинроқ ўзларига беҳад ишониб, тез-тез мағлубиятга учрайвергандар. У барча воқеаларни майда-чўйдасигача эслади, мен бўлсам, унинг беназир хотирасидан ҳайратга тушардим.

– Мен омадли одамман, – давом этди у, – бутун умрим бўйи давом этиб келаётган жаҳоншумул воқеалар даврида туғилганман. Етти йиллик урушнинг, Американинг Англиядан ажralиб чикиши, кейинроқ фаранг инқилобининг, ниҳоят, Наполеон ҳукмронлиги давридан қаҳрамоннинг ҳалокатигача ва кейинги қатор воқеаларнинг тирик гувоҳиман. Шунинг учун мен кейинроқ туғилиб, бундай буюк воқеаларни ўзлари тушунмайдиган китоблардан ўқиб-ўрганадиган одамларга нисбатан тамоман бошқача

¹Шекспирнинг «Оилавий ўқиши китоби» (инг.).

²Бурбонлар – француз қироллик суполоси (1589 – 1792й. ва 1815 – 1830 йй.).

фикр ва хulosага келганман.

Келгуси йиллар бизга нималар олиб келиши ҳали номаълум; ҳали-бери тинчлик-хотиржамликка эриша олмаймиз, деб қўрқаман. Одамзод ўзини чеклашни билмайди: амал эгалари ҳокимиятни суиистеъмол қилишдан ўзларини тийёлмайдилар. Инсониятни бекаму кўст қилиш имкони бўлганида эди, шарт-шароит ҳакида ўйласа бўларди; акс ҳолда у на у ёқлик бўлолмайди, на бу ёқлик. Бир қисми тўкин-сочинликда яшаган бир пайтда, иккинчи қисми азоб-уқубатда ҳаёт кечиради. Ёмонликнинг икки қаноти бўлган худбинлик ва ҳасад ҳамиша ҳаракатда бўлади, партияларнинг кураши ҳам узлуксиз давом этаверади.

Энг оқилона иш шуки, ҳар ким нимани ўрганган бўлса, ўша билан шуғуллансин, бошқаларни ҳам ўз вазифаларини бажаришларига халақит бермасин. Косиб ўз қолипи билан иш кўрсин, дехқон далада ишласин, ҳукмдор халқни бошқарсин. Бу ҳам бир хунар, буни ҳам ўрганиш керак, қўлидан келмайдиган ҳар қандай одам бунга уринмаслиги лозим.

Гёте тағин фаранг газеталари ҳакида сўз юритди:

– Либераллар гап сотишаверсин, агар ҳақ бўлишса, уларга жон деб қулоқ солишади. Ижрочи ҳокимиятни қўлида тутиб турган монархистларга гап сотиш ярашмайди, улар ҳаракат қилишлари лозим. Армияни урушга йўллашсин, бошларини танидан жудо қилишсин, осишин, бу уларга тўғри келади, аммо газеталарда баҳслашиб, ўз қилмишларини оқлашга уриниш – бу уларга ярашмайди. Қироллар йиғини бўлганда эди, гапиришса бўларди. Ўз ҳаётим ва фаолиятим давомида, ҳамиша монархист бўлиб келганман. Бошқалар истаганча сафсата сотишаверсин, мен нимани маъқул кўрсан, шуни қилганман. Ўз фаолиятим доирасини кўра олганман ва мақсадим нималигини аниқ билганман. Ёлғиз ўзим хатога йўл қўйган бўлсан, буни тузатолганман. Борди-ю кўпчилик мен билан биргаликда хато қилган бўлса, буни тузатиш имкони йўқ, чунки кўпни фикри бир хил бўлмайди.

Гёте беҳад зўр кайфиятда эди. У менга фон Шпигел хонимнинг альбомини қўрсатди, унга Гёте ажойиб шеър битган эди. Бунинг учун қолдирилган жой икки йилдан бери бўш ётарди, Гёте қачонлардир берган ваъдасининг устидан энди чиқолганидан шод эди. Фон Шпигел хонимга бағишлиланган шेърни ўқиб бўлгач, альбомни вараклашда давом этдим ва қатор машҳур номларга дуч келдим.

– Қизиқиб кетиб, – унинг шеъри ёнига бир неча сатр ёзиб қўймоқчи ҳам бўлгандим, – деди Гёте, бундай қилмаганимдан хурсандман, чунки фикрларимни тутиб туролмаганимдан неча мартараб яхши одамларни ўзимдан четлаштирганман, энг яхши ижод намуналаримнинг таъсирига путур етказганман.

– Ростини айтсан, – давом этди Гёте, – шундай пайт ҳам бўлган эдики, “Урания”дан бўлак ҳеч нарса куйланмас, ҳеч нарса ифодали ўқилмас эди. Қаёққа борма, стол устида “Урания”ни кўрардинг; ҳар қандай сухбатнинг мавзуси шу эди. Мен ўзимни абадиятга ишонч баҳтидан маҳрум қилмоқчи эмасман; аксинча, Лоренсо фон Медичининг сўзларини такрор айтишга тайёрман: нариги дунёдаги ҳаётга ишонмайдиган одам бунисида ҳам ўлиқдир. Лекин бундай ақлга сиғмайдиган тушунчалар кундалик баҳслар ва фикрни чалғитадиган гап сотишларга мавзу бўлмаслиги керак. Яна бир гап: ким нариги дунёдаги ҳаётга ишонса, жимгина хурсанд бўлиб юраверсин, аммо ўзича гердайишига ҳеч бир асос йўқ. Тедгенинг “Урания”си баҳонасида мен шуни пайқадимки, қора халқ ҳам худди асилзодаларга

ўхшаб ўзларини катта олабошладилар. Шундай бефаросат аёлларни ҳам учратдимки, улар Тидге билан биргаликда абадийликка ишонгандарни учун мағрурланишарди. Бу ҳам етмагандек, ўша бефаҳмлар ҳатто бу масалага муносабатимни билиш учун мени сўроққа тутишларига тоқат қилишимга тўғри келди. “Бу ҳаётимиз тугаса, кейингиси бизни баҳтли қиласеради, нуқул Худога ёлвораманки, у ерда менга бу дунёда абадиятга ишонгандардан ҳеч ким дуч келмасин, негаки ана шунда менинг азобларим бошланади! Художўй хонимлар мени ўраб олишиб: Биз ҳақ эканмизми? Шуни башорат қилмаганмидик? Айтганимиз бўлдими, деб сўроққа тутишади. Ундан кейин нариги дунёдаги ҳаётимда ҳам зерикишнинг чеки бўлмайди”, дея уларнинг жиғига тегаман.

– Абадийлик ғоялари билан шуғулланиш, – сўзида давом этди Гёте, – аслзода табақа вакиллари, айниқса, бекорчи хонимларнинг иши. Ер юзида бирон кўзга кўринарли иш қилиш ташвишида бўлган сергайрат одам эса, нариги дунё ҳақида ўйлашга ҳам вақт топмай қолади, шу билан бу дунёда фойда келтиришга уринади. Бундан ташқари, абадийлик ҳақидаги ўйлар бу дунёда баҳт масаласида омади юришмаганлар учун ҳам зарур; гаров боғлайманки, мана шу ёқимтой Тидгенинг ҳаёти кўнгилдагидек бўлганида эди, ҳаёллар ҳам шунга яраша бўларди.

1824 йилнинг 26 феврали, пайшанба

Гёте билан тушлик қилдик. Овқатланиб бўлгач, у Штаделманнга мисга ўйилган гравюралар солинган катта-катта жилдларни келтиришни буюрди. Жилдларнинг устини бироз чанг босган эди, яқин атрофда артиш учун юмшоқ латта бўлмаганидан Гёте аччиқланиб, хизматкорини койиди:

– Охирги марта сени огоҳлантираман, – деди у, – агар буғуноқ бориб, бизга тез-тез керак бўлиб турадиган юмшоқ латталарни сотиб олмасанг, эртага ўзим бораман, биласан-ку, мен сўзимдан қайтмайман.

Штаделманн кетди.

– Бир куни актёр Беккер билан ҳам худди шундай воқеа содир бўлган эди, – гапида давом этди Гёте менга юзланиб, – у «Валленштайн»даги отлиқ аскарлардан бирининг ролини ўйнашдан бош тортди. Мен: унга айтинглар, агар рози бўлмаса, бу ролни ўзим ўйнайман, дедим. Гапим таъсир килди. Актёрлар мени яхши билишарди, бундай пайтларда ҳазилни кўтармаслигим, сўзимдан қайтмай, ҳар қандай аҳмоқлик қилишим мумкинлигини яхши билишарди.

– Ростдан ҳам шу ролни ўйнармидингиз? – сўрадим мен.

– Ҳа, – деди Гёте, – ўйнардим, қандай ўйнашни жаноб Беккерга кўрсатиб қўярдим, негаки ролни ундан кўра яхшироқ билардим.

Кейин биз жилдларни очиб, гравюра ва расмларни томоша қилишга киришдик. Бундай пайтларда Гёте менга жуда эҳтиёткорлик билан муносабатда бўлади, у менинг нафис санъатни кузатиш ва идрок этишда хийла юқори пиллапояларга кўтарилишимни исташини сезиз тураман. У менга ўзига хос етуқ асарларни кўрсатади ва энг машҳур рассомларнинг ички дунёсига кириб боришим, фикрларини мулоҳаза қилишим учун уларнинг ғоялари ҳақида гапириб беради.

– Дид аталмиш нарса, – деди буғун, – мана шундай шаклланади. Дид ўртacha эмас, балки энг сара мухитда шаклланади. Шу боисдан мен Сизга энг яхшиларини намойиш қиляпман. Агар Сиз шуларни тушунишни ўргансангиз, бошқаларига меърида баҳо берадиган бўласиз. Мен Сизни ҳар бир жанрнинг энг яхши намуналари билан таништираман, уларнинг бирортасига бепарво қараманг, агар унда улкан истеъдод ўз чўққисига

етган бўлса, ҳар бири бизга ўзгача қувонч бағишлишини эсда тутинг. Масалан, француз рассомининг мана бу картинаси беҳад нафис, шунинг учун у ўз жанрининг намунаси ҳисобланади.

Гёте менга варақни узатди, мен уни ҳайрат ичидаги томоша қилдим. Ёзги саройнинг ланг очик дераза ва эшиклари боғ томонга қараган орастагина хонасида бир гурӯҳ ғоятда ёқимтой кишилар ўтиришипти. Ўттиз ёшлардаги гўзал аёл ҳозиргина куйлашдан тўхтаган бўлса керак, қўлида нота дафтарини ушлаб олган. Унинг ёнида, сал ичкарирокда, ўн беш ёшлардаги киз стол суюнчиғига суюниб ўтиради. Ён томонда, очик дераза олдида яна бир ёш хоним турипти, у қўлида арфа ушлаб олган, афтидан, ҳалиям торларни чертаётгандек туюлади. Шу аснода хонага бир йигит кириб келади, барча аёлларнинг назари унга қадалган. У мусиқали машғулотни билган, шекилли, гўё улардан бунинг учун узр сўраётгандек, салгина бош эгиб турипти, аёллар эса унга илтифот билан кулоқ тутиб туришарди.

— Менимча, — деди Гёте, — бу картина Калдероннинг¹ пъесалариdek дилтортар, мана, Сиз шу жанрдаги энг гўзал асарни кўрдингиз. Хўш, бу ҳақда фикрингиз қандай?

Шундай дея у менга ҳайвонлар тасвирини ишловчи машҳур рассом Рооснинг бир қанча гравюраларини узатди: нуқул қўйлар, турли қиёфа ва ҳолатдаги ҳайвонлар тасвири. Башараларидағи маъносиз ифода, пахмайган жунлари, ҳамма-ҳаммаси табиатда қандай бўлса, шундайлигича, ҳаққоний чизилган эди.

— Бу ҳайвонларга қараб қўрқиб кетаман, — деди Гёте, — уларнинг қиёфаларидағи, кўзларидағи маъносизлик, мудроқ босган ҳолатлари гўё менга ҳам ўтаётгандек туюлади. Назаримда, бунга қараб турган одам ҳайвонга айланиб қоладигандек бўлади, ҳатто рассом ҳам ҳайвонми, деган ўйга борасан, киши. Барibir, рассом бу жониворларнинг ички дунёсига шунчалик киролгани, феъл-авторини шу қадар ҳис этолгани, уларнинг моҳиятини сиртида шунчалик ҳаққоний намоён қилолгани ҳайратомуз ходиса, албатта. Агар улуғ истеъдод эгаси ўз салоҳиятига мос мавзуга содик қолса, нималарга қодир бўлиши ўз-ўзидан кўриниб турипти.

— Бу рассом, — дедим мен, — итларни, мушукларни, ёввойи ҳайвонларни ҳам худди шундай табиий чизган бўлса керак? Бошқаларнинг ички оламига кира олишдек юксак қобилиятига қараганда у одамларнинг ҳам афт-англорарию феъл-авторлариниям бера олгандир?

— Йўқ, — деди Гёте, — булар унинг диққат доирасига кирмайди, аксинча, у ювош, ўтхўр ҳайвонларни, яъни қўйлар, эчкилар, сигирлар ва шунга ўхшашларни чизишдан бир умр чарчамади. Бу ундаги истеъдоднинг ўз жабҳаси, у бундан хеч қачон айрилмади. Тўғри қилдиям! Бу жониворларнинг кундалик ҳаётига фамхўрлик қилиш ундаги туғма одат, у ҳайвонлар рухияти ҳақидаги билимларни ҳам ўзлаштирган, шу боисдан уларнинг бутун турқ-тароватини зийраклик билан ўзлаштирган эди. Бошқа жонзотларни, эҳтимол бунчалик мукаммал билмаса керак, уларни тасвир этишга на истак, на салоҳият этишди.

Гётенинг бу фикрларидан кейин жуда кўп шунга ўхшаш воқеалар мијамда қайтадан кўз очди. Масалан, яқинда у менга айтгандики, ҳақиқий шоирда ҳаёт ҳақида туғма билим бўлади, уни тасвирлаш учун тажриба, амалий кўнишка керак бўлмайди.

Мен «Гетс фон Берлихинген»ни, — деган эди у, — йигирма икки ёшли йигит пайтимда ёзганман, орадан ўн йил ўтгач, ўз тасвирларимнинг ҳаққонийлигидан ҳайратга тушганман. Маълумки, бунақа ҳодисаларни

¹ Калдерон дела Барка, дон Педро (1600 – 1681) – испан драматурги.

кўрмаганман ҳам, эшитмаганман ҳам, лекин инсон ички оламининг ранго-ранг қирралари ҳақидаги билимни антисипация¹ орқали эгаллаганман.

Умуман, мен ташқи дунёни билгунимга қадар ўз ички дунёми тас-вирилашдан завқ олардим. Воқеликни хаёлимда қандай тасаввур қилган бўлсам, кейинроқ у менинг нафратимни қўзғай бошлади ва уни тасвирилашга заррача ҳам қизиқишим қолмади. Ҳатто айтишим мумкин: борди-ю мен борлиқнинг моҳиятига етгунимга қадар уни тасвирилашдан тийилиб турганимда эди, тасвиirlарим карикатурунинг ўзи бўларди.

– Инсон феъл-авторига, – деган эди бошқа пайт Гёте, – ўзига хос қатъият, маълум маънода қайсалик хоски, шунинг таъсирида у ёки бу асосий хусусият гўё кўплаб иккинчи даражали хусусиятларни келтириб чиқаради. Бу тажрибадан маълум; бироқ айрим шахсларда бу билим туғма бўлиши мумкин. Менда туғма билим ва тажриба қўшилиб кетганми-йўқми, бунга бош қотириб ўтирамайман. Аммо бир нарса аён: агар бирор билан ўн беш дақиқа сўзлашсам, кейинги икки соат давомида унинг нима дейишини аниқ биламан. Чунончи, Байрон ҳақида гапириб, бутун борлиқ унга кундай равшан, воқеликни у антисипация орқали тасвирилайверади, деган эди.

Мен бунга жавобан, Байрон, айтайлик, ёқимсиз ҳайвон қиёфасини тасвирилашга муваффақ бўла олармиди, менимча, ундаги кучли индиви-дуаллик бундай мавзуларни иштиёқ билан қофозга туширишга монелик қилса керак, дея шубҳа билдиридим. Гёте буни маъқуллади ва антисипация шоир истеъодига мавзу мос келган жойгача етиб боради, деди. Иккокимиз шундай хulosага келдикки, антисипациянинг чегараланганлиги ёки кенг қамровилигига қараб, истеъод ҳам юксак ёки ўрта даражада бўлиши мумкин.

– Сиз жаноби олийларининг фикрича, – дедим мен, – борлиқни билиш ижодкордаги туғма қобилият экан, унда сиз, кўриниб турган воқеа-ҳодисалар ва нарсаларни эмас, балки ички оламни назарда тутяпсиз шекилли, мана шуларнинг барчасини ижодкор ҳаққоний тасвирилашга эришмоғи учун воқеликни ич-ичидан англаб етиши керак эмасми?

– Шубҳасиз, шундай, – жавоб берди Гёте, – муҳаббат, нафрат, умид, умидсизлик ва инсон қалбига хос кўплаб эҳтирос ва изтироблар – булар шоирга берилган туғма билимлар, буларни тасвирилаш шоирга қийин эмас, бироқ, суд жараёни ёки бўлмаса императорга тож кийгизиш маросими ҳақидаги билим туғма бўлолмайди, тасвир ҳақиқатга зид бўлмаслиги учун шоир уларни ё ўз тажрибаси асосида ўрганиши ёки бошқалардан ўзлаштириши керак. Масалан, «Фауст»да қаҳрамоннинг ҳаётдан ҳафсаласи пир бўлган ҳолатини, шунингдек, Гретхеннинг севги изтиробларини мен антисипация орқали намоён қилишга эришганман, олайлик, куйидаги:

*Қора туман ичра бўлиб асира
Маъюс нур таратар ярим ой хира,
(Э.Воҳидов таржимаси)*

мисраларини ёзиш учун табиатни кузатишимга тўғри келди.

– Лекин, – дедим мен, – «Фауст»да бирон сатр йўқки, унда бутун борлиқ ва ҳаётни ўрганишнинг аниқ-равшан излари акс этмаган бўлсин, буларнинг барисини сизга бирор ҳадя қилмагани, улар ўз тажрибангиз меваси эканлиги шундоққина кўриниб турипти.

¹ Антисипация – воқеа-ҳодисаларни олдиндан ҳис-туйғу орқали кўра-билиш.

– Бўлса бордир, – жавоб қайтарди Гёте, – аммо агар мен антисипация орқали бутун борлиқни ўзимга сингдирмаганимда эди, кўзим очик тургани ҳолда кўр бўлиб қолардим, бутун билим ва тажрибам ҳам ўлик ва бекорчи уриниш бўлиб қолаверарди. Нур бор, ранглар бизни ўраб турибди; бироқ ўз кўзимиизда нур ва ранглар бўлмаганида эди, унда биз уларни илғаёлмаган бўлардик.

1824 йилнинг 28 феврали, шанба

– Шундай жиддий одамлар ҳам борки, – деди Гёте, – улар бирор ишни йўл-йўлакай, кўл учидаги қиломайдилар, уларнинг табиати ҳар бир ишни маромига етказиб бажаришни тақозо қиласди. Бундай истеъодлар баъзида энсамизни қотиради, истаган нарсамизни ҳозирнинг ўзидаёқ улардан ололмаймиз, аммо олий мақсадга одам худди ўша йўл билан етишади-да.

Мен Рамберг ҳақида сўз очдим.

– Энди бу тамоман ўзига хос рассом, – деди Гёте, – бундай истеъоддигишини кувонтиради, у тенги йўқ импровизатор. Бир куни у Дрезденда мендан мавзу беринимни сўради. Мен унга мана бу мавзуни бердим: Агамемнон Троядан ватанига қайтиб, икки фидиракли аравадан тушади ва уйининг остонасига қадам кўйганида юрагини ваҳима босади. Бу фоятда қийин мавзу эканлигини инкор этиб бўлмайди, бошқа рассом бўлганида бунинг устида узоқ мулоҳаза юритган бўларди. Аммо мен фикримни айтиб улгурмасимданоқ, Рамберг чизишга тутинди, унинг мавзуни дархол аниқ-тиник ўзлаштирганидан ҳайратда қолдим, холос. Ростини айтсан, Рамбергнинг расмларидан бир нечаси қўлимда бўлишини истайман.

Шундан сўнг бошқа, ўз асарларига юзаки муносабатда бўладиган, охир-оқибат одатга қул бўлиб, санъатни гумдон қиладиган рассомлар ҳақида гурунглашдик.

– Одат, – деди Гёте, – сиртдан қараганда барқарор бир нарсага ўхшайди-ю, лекин ижодкорга ҳузур бағишламайди. Том маънодаги улкан истеъоддиги эгалари яратувчиликни олий баҳт деб биладилар. Роос чарчашиб нималигини билмай ўз кўй-эчкиларининг жунларини чизарди, мана шу чексиз харакатдан кўриниб турадики, у ижод пайтида энг беғубор ҳузурхаловатни ҳис этарди, уни тезроқ тугатишни хаёлига ҳам келтирмасди.

Ўртача қобилият эгаларига бундай санъат етишмайди; иш пайтида уларнинг кўз олдида тайёр асар орқасидан келишига ишонишадиган даромад туради, холос. Бу тахлит манфаатни кўзловчи мақсадлар билан хеч қачон буюк асар яратиб бўлмайди.

1824 йилнинг 22 марта, душанба

Тушликтан олдин Гёте билан унинг боғига бордик. Бу боғ Илм дарёсининг нариги қирғоғида, парк яқинида, тепаликнинг ғарбий ёнбағрида ястанган бўлиб, чинакам хушманзара жой. Шимоли-шарқий шамоллардан пана, жануб ва ғарбдан қелувчи илиқ ҳамда ёқимли ҳаво оқими яхши ўтиб турадиган бу гўша айниқса куз ва баҳор ойларида таърифга сифласди даражада гўзаллашиб кетади.

Ҳаво ёздагидек ёқимли эди; жануби-ғарб томондан майин шабада эсарди. Тиниқ осмоннинг баъзи-баъзи жойларида қора булат парчалари сузуб юрарди; хув тепада тарқалиб бораётган парсимон булатлар кўзга ташланади. Булатларни дикқат билан кузатгач, кўрдикки, пастда сузуб юрган тўда-тўда булатлар тарқалиб бораарди, Гёте шундан хуласа чиқариди, барометр кўтарилиган бўлса керак, деди.

У барометр миллиарининг тушиши ва кўтарилиши ҳақида кўп гапириди

ЖАҲОН АДАБИЁТИ

ва буни «намликтининг инкори ва тасдиғи» деб атади. Шу билан бирга у абадий қонунлар асосида ернинг нафас олиши ва нафас чиқариши ҳақида, борган сари намликтин ошиб бораверса, сув тошқини юз бериси мумкинлиги ҳақида ҳам гапирди. Бундан ташқари: ҳар бир жой ўз атмосферасига эга, аммо шунга қарамасдан, Оврупода барометр кўрсаткичлари ҳамиша бир хил. Табиат номутаносиб, шунчалик истисно ҳолатларга қарамасдан қонуниятни аниқлаш қийин кечади, деди.

У менга шу тахлит ҳаётини ўғитларини сингдиаркан, боғнинг қумлоқ ўйлагида у ёқдан-бу ёққа бориб келардик. Биз бир уйга яқинлашдик, Гёте хизматкорига уй эшигини очишни буюрди, кейинроқ уй ичини менга кўрсатмоқчи эди. Уйнинг оқланган сиртқи деворлари бўйлаб атиргул туплари чирманиб кетган, ҳатто томгача етган эди. Уйни айланиб чиқиб, ниҳоятда ҳайратга тушдимки, атиргул тупларининг бутоқларида ўтган ёздан бери сақланиб қолган хилма-хил күшларнинг инлари бўлиб, улар ҳозир япроқлар тўкилиб кетгани сабабли шундоққина кўриниб турарди, айниқса, бу ерда уруғхўр сайроки күшларнинг инлари кўп эди, улар ўз инларини ерга яқин жойга ҳам, юқорироққа ҳам кураверишарди.

Кейин Гёте мени уй ичига бошлаб кирди, ўтган йили ёзда бу ерга кириш насиб қилмаган эди, унинг деворларига карта ва гравюралар ҳамда Гётенинг бўйи баравар рангли портрети осиб кўйилган эди, уни Мейер икковлари Италия сафаридан қайтиб келишгандан сўнг ишлаган эдилар.

Гёте расмда қирчиллама ёшда, қуёшда қорайган, хийла бақувват кўринарди. Бироз сокин чехрасидаги ифода жуда жиддий, гўё рўпарангда келгусида қилинажак ишлар юки елкасини зилдек босиб турган одамни кўраётгандек бўласан киши.

Биз зинапоя орқали юқорига кўтарилдик; у ерда учта хона ва битта хужрача бўлиб, ҳаммаси жуда кичик ва айтарли ҳеч қандай қулайликлар йўқ эди. Гёте бу ерда илгарилари узоқ яшаб, хотиржам, мазза қилиб ижод қилганини эслади.

Хоналарнинг ҳавоси анча салқин эди; биз яна очиқ ҳавога чиқишига шошилдик. Тушки қуёш нурлари остида бош ўйлак бўйлаб юрарканмиз, сухбат мавзуи ҳозирги адабиётга бурилди, Шеллинг ҳақида, бошқалар қатори Платеннинг янги пъесалари ҳақида гаплашдик.

Боғнинг тепалик ёнбағридаги юқори кисми яланглик бўлиб, унда як-кам-дуқкам мевали дараҳтлар ўсиб ётарди. Йўлкалар юқорига илонизи бўлиб чиқиб, чўққини айланиб ўтади-да, тағин пастга тушиб кетади, бу менда атрофни юқоридан туриб томоша қилиш истагини туғдирди. Гёте ўша йўлкалар бўйлаб мендан олдинда тепага кўтарила бошлади, мен унинг бардамлигидан кувондим. Юқорида, бута тўсиқ ёнида мода товусни учратдик, у айтидан герцог боғидан бу ёққа ўтган бўлса керак. Гётенинг айтишича, у ёз кунлари товусларни чорлаб, уларга дон бериб, бу ерга ўргатаркан.

Илонизи йўлканинг бошқа тарафи бўйлаб тушиб келарканман, буталар билан ўралган, устига машхур шеърнинг қуидаги мисраси ўйиб ёзилган тошни кўриб қолдим:

Уйбу сокинликда ўз маъшуқасин эслади ошиқ.

Назаримда мен антик давр ёдгорлиги олдида тургандек эдим.

Бунинг ёнгинасида пастаккина эманлар, арчалар, қайнилар, қора қайнилар ўсиб ётган чакалакзор бор эди. Арчалар остидан йиртқич қүшнинг тўкилган патларини топиб олдим, буларни Гётега кўрсатган эдим, у бундай нарсалар бу ерларда тез-тез топилиб туришини айт-

¹ Шеллинг Фридрих фон (1775 – 1854) – немис файласуфи.

ди, ўйладимки, демак, ушбу арчалар бу ерларда кўплаб учрайдиган, бойўғлилар ин қўядиган севимли жой экан. Чакалакзорни айланиб ўтиб, биз яна уйнинг ёнидаги бош йўлкага – эманлар, арчалару қайин ва қора қайнинлар тўсиб, ярим доира хосил қилганди, бу ердаги юмалоқ стол атрофига қўйилган стулчаларга жойлашдик.

– Жазирاما ёз кунлари, – деди Гёте, – мен учун бу ердан яхши манзил бўлмайди. Мана шу дараҳтларни бундан қирқ йил аввал ўз қўлларим билан экканман, уларнинг бўй чўзишларини кўриб кувонганман, мана энди неча йиллардан бери уларнинг соясида хузур қилиб ўтираман. Бу эманлар, қора қайнинларнинг барглари орасидан ҳар қандай куйдирувчи қуёш нури ҳам ўтолмайди; иссик ёз кунлари тушликдан кейин шу ерга келиб ўтираман, ўтлоқ ва боғда шунаقا сукунат ҳукм сурадики, бундай пайтни қадимгилар «Пан ухлади» дейишган.

Шу пайт шаҳардан соат иккига занг урилгани эшистилди ва биз ортга қайтдик.

1924 йилнинг 9 декабри, пайшанба

Кечга томон Гётеникига бордим. У менга дўстона қўл узатди, саломлашаркан, Ваймар давлат архив раҳбари Шелгорн юбилейи муносабати билан ёзган шеъримни мақтади. Мен ўз навбатида унга инглизлар таклифини рад этиб, хат ёзиб юборганимни маълум қилдим.

– Худога шукур, – деди у, – мана энди бўш ва хотиржамсиз. Мен сизни яна бир нарсадан огоҳлантироғим лозим. Ҳали композиторлар келишадида, сиздан опера либреттосини ёзиб беришингизни илтимос қилишади; буни ҳам рад этинг ва ўз сўзингизда қатъий туринг, бу ҳам вақт сарфлашга арзимайдиган бефойда машғулот.

Шундан сўнг Гёте, Боннга, “Пария”нинг¹ муаллифига Нис фон Эзенбек орқали театр дастурини жўнатганини айтди, бу дастурдан шоир ўз пъесаси бу ерда қўйилаётганини билиб олди.

– Умр қисқа, – кўшиб қўйди у, – одамлар бир-бирларига яхшилик қилишга интилишлари керак.

Унинг қаршисида Берлин газеталари ётарди, у Петербургдаги даҳшатли сув тошқини ҳақида гапирди. Мана, ўзингиз ўқиб олинг, дея газетани узатди. Кейин Петербург жойлашган ернинг нокулайлигини айтди-да, кулиб Руссонинг: олов пуркаб турган вулқон яқинига шахар қуриб, зилзилани бартараф этолмайсан, деган гапларини эслади.

– Табиат ўз ўйлида давом этаверади, – деди у, – биз қоидадан ташқари деб ўйлаган нарса – аслида қоиданинг ўзи.

Суҳбат йўсими деярли барча соҳилларда кутурган бўронга, газеталарда ёзилаётган бошқа табиат ҳодисаларига бурилди. Мен Гётедан, булар ўртасида қандай боғлиқлик борлигини билиб бўладими, деб сўрадим.

– Буни ҳеч ким билмайди, – жавоб берди Гёте, – биз бундай сирли ҳодисалар ҳақида тасаввурга ҳам эга эмасмиз, қандай қилиб у ҳақда фикр билдирайлик.

Хизматкор бош меъмор Кудрэ ва профессор Ример ташриф буюришганини билдириди; улар кириб ўтиришди ва гурунг мавзуси яна Петербургдаги сув тошқини борасида давом этди, Кудрэ Петербургнинг жойлашиш ҳолати, Нева дарёсининг унга доимо хавф солиб туриши ва бошқа жиҳатлар тўғрисида муфассал маълумот берди.

¹ “Пария” – немис драматурги Михаил Бер (1800-1833) ёзган фожиавий асар.

1825

1825 йилнинг 10 январи, душанба

Инглизларга бўлган катта қизиқиши туфайли Гёте шахримизда меҳмон бўлиб турган инглизларни вақти-вақти билан унинг ҳузурига олиб келиб туришимни сўради. Бугун соат бешда у мени инглиз ҳарбий муҳандиси жаноб X¹. билан келишимни тайинлади, мен Гётега у хақда олдиндан кўп яхши гапларни айтдим. Биз белгиланган соатда ҳозир бўлдик, хизматкор бизни яхши иситилган хонага бошлаб кирди, одатда бу хонада Гёте тушдан кейин ва кечкурунлари ўтиришни хуш кўрарди. Стол устида учта шам ёниб турарди, аммо у ерда Гёте йўқ эди, девор ортидаги залдан унинг овози эштилди.

Жаноб X. хонани кўздан кечирди, расмлар ва деворга илинган тоғлар харитасидан ташқари у назарини бир қанча папкалар таҳлаб қўйилган токчаларга қаратди, мен унга бу папкаларда машҳур мусаввирларнинг ўз қўллари билан чизилган суратлар ва турли мактабларга мансуб расмларнинг гравюралари сақланишини, Гёте уларни бутун умри давомида тўплагани, вақти-вақти билан кўздан кечиришни яхши кўришини айтдим.

Бир оз кутганимиздан сўнг Гёте кириб келди ва биз билан илиқ саломлашибди.

– Сиз билан немисча гаплашаверсам бўлади, афтидан, – мурожаат қилди у жаноб X.га, – гаплашаётгандарингда сездимки, сиз немис тилини дурустгина ўрганиб олибсиз.

Жаноб X. у билан унча очилиб саломлашмади, Гёте бизни ўтиришга таклиф қилди. Меҳмон Гётеда яхши таассурот қолдирди шекилли, унинг бу кишига нисбатан беҳад иззат-икром кўрсатиши олий даражада намоён бўлди.

– Немис тилини ўрганиш учун бизнинг юртимизга келиб тўғри килгансиз, – деди у, – Сиз бу ерда тилни осон ва тез ўзлаштирибгина қолмай, уни юзага келтирган асосларни ҳам, бизнинг ер-сувимиз, иқлим, яшаш тарзимиз, урф-одатларимиз, ижтимоий ва сиёсий тузумимиз ҳақидаги билимларни ҳам ўзингиз билан Англияга олиб кетасиз.

– Ҳозирги пайтда Англияда немис тилига қизиқиш жуда катта, – деди жаноб X., – кундан-кунга ошиб бормоқда, ҳозир ўзига тўқ оиласдан чиқкан ҳар бир ёш инглиз немис тилини ўрганади.

– Биз немислар, – жавоб берди Гёте мулојимлик билан, – бу масалада сизлардан ярим асрга илгарилаб кетганмиз. Мен ўзим эллик йилдан бери инглиз тили ва адабиёти билан шуғулланаман, сизлардаги ёзувчиларни ҳам, ҳаёт тарзи ва ўзига хос тартибларни ҳам яхши биламан. Агар Англияга бориб қолсан, у ерда ўзимни бегонадек хис қилмайман.

Айтиб ўтганимдек, Сизнинг ёш ҳамюртларингиз бизнинг юртимизга келиб, тилимизни ўрганишаётгани яхши ҳодиса. Бунга сабаб бизнинг адабиётимиз шунга муносаб эканлигигина эмас, балки ҳозир немис тилини билган одам бошқа тилни билмаса ҳам бўлаверади, деган фикрни ҳеч ким рад этмаслиги ҳамдир. Француз тили ҳақида гапириб ўтирмайман, у сўзлашув тили, саёҳатларда керак бўлиб қолади, чунки уни ҳамма тушунади, кўплаб мамлакатларда у тилдан яхши тилмоч ўрнида фойдаланса бўлади. Юнон, лотин, итальян, испан тилларига келадиган бўлсан, бу тилларда яратилган энг яхши асарларни зўр немисча таржималарда ўқишимиз мумкин, демак, маълум бир сабаблар бўлмаса, бу тилларни чукур ўрганишга вақт сарфлаб ўтиришга ҳожат ҳам йўқ. Немисларнинг

¹ Жаноб X. – Хуттон сўзининг бош ҳарфи – инглиз муҳандиси.

табиатида ҳар қандай хорижий маданиятга ўзига хос тарзда ҳурмат билан қараш, унинг хилма-хил жиҳатларига мослашиш одати бор. Айни шу хусусият ҳамда тилимизнинг қулай имкониятлари таржималарнинг аниқ ва мукаммал бўлишини таъминлайди.

Яхши таржима кўп нарсаларга қодирлигини инкор этиб бўлмайди. Буюк Фридрих лотин тилини билмасди, аммо у севикли Цицеронини французча таржимада ўқиб, биз аслиятдан олганимиздан кам завқ-шавқ олмасди.

Гапни театр мавзусига айлантирган Гёте жаноб X.дан, театрга тез-тез бориб турасизми? – деб сўради.

– Мен театрга ҳар кеч бораман, – жавоб берди у, – бу тилни тушунишга жуда катта ёрдам беради.

– Жуда қизиқ-да, – жавоб берди Гёте, – эшитиш ва умуман, тушуниш қобилияти гапириш қобилиятига нисбатан илгарилаб кетган, одам бирор нарсани тез тушуниб олади-ю, аммо уни тўлиғича сўзда ифодалай олмайди.

– Бу фикрнинг тўғрилигига мен ҳар қуни амин бўламан, – жавоб қайтарди жаноб X., – теварак-атрофимиздаги одамларнинг гапларини, ўқиган нарсаларимни тўлиқ тушунаман, ҳатто бирор киши немисча гапирганда хатога йўл қўйганини ҳам сезаман. Бироқ гапирмоқчи бўлдимми, тамом, тилим тутилиб, айтмоқчи бўлган фикримни ифода этолмай қоламан. Саройдаги олди-қочди сухбатлар, хонимлар билан ҳазиллашиш, рақс тушиш пайтидаги мулоқотларда қийналмайман. Аммо бирорта мухим мавзуда фикр билдиримоқчи бўлсам, тилим айланмай, сўз тополмай қоламан.

– Хотиржам бўлинг, – жавоб берди Гёте, – бундай ўзига хос фикрларни баъзан ўз она тилимизда ифодалашга қийналиб қоламиз.

Сўнgra Гёте жаноб X.дан немис адабиётидан нималарни ўқиганини сўради.

– “Эгмонт”ни ўқидим, – жавоб берди у, – китоб менга шундай хузур бағишиладики, уни уч бора ўқиб чиқдим. Шунингдек, “Торквато Тассо”ни ҳам мазза қилиб ўқидим. Ҳозир “Фауст”ни ўқияпман, бу мен учун ҳали анча мураккаб деб ҳисоблайман.

Бу сўзлардан Гёте кулиб юборди.

– Гапнинг рости, – деди у, – ҳозирча “Фауст”ни ўқиши Сизга маслаҳат бермаган бўлардим. Бу одамни телба қиласиган нарса, у одатий тасаввурлар доирасига сифмайди. Модомики, Сиз мендан сўраб ҳам ўтирамай, уни ўқишига киришган экансиз, кўринг-чи, бундан нима чиқаркин? Фауст – фавқулодда шахс, камдан-кам одамлар унинг ички дунёсига кириб бора олади. Одамни бутун борлиги билан англашнинг тирик намунаси бўлган, бошдан-оёқ киноя билан йўғрилган Мефистофелни англаб етиш ҳам мушкул иш. Энди кўрамиз, улар қандай рангларда Сизга юз очаркин. “Тассо” эса, аксинча, одатдаги инсоний туйғуларга бирмунча яқинрок, унинг шаклан силлиқлиги ҳам тушунишни осонлаштиради.

– Шунга қарамай, – жавоб берди жаноб X., – Германияда “Тассо”ни ўқилиши қийин дейишади, мен уни ўқияпман десам, айримлар ҳайрон бўлишиди.

– “Тассо”ни тушунишдаги энг асосий нарса шуки, – деди Гёте, – уни ўқиётганда одам ўзининг энди ёш бола эмаслигини ҳис қилиши ва ўша даврага хос таомилларни инкор этмаслиги лозим. Яхши оиладан чиқкан, юксак ақл-заковатга эга бўлган йигит юқори табақага мансуб етук кишилар билан мулоқотда орттирган билимлари юзаки бўлса-да, “Тассо”ни қийин деб ҳисобламаслиги керак..

Гап мавзуси “Эгмонт”га кўчди, Гёте бу хусусда қуидагиларни айтди:
 – “Эгмонт”ни 1775 йилда, яъни бундан эллик йил бурун ёзганман. Мен тарихга содик қолганман, бинобарин, иложи борича ҳақиқатни ёзишга интилганман. Шундан сўнг орадан ўн йил ўтиб, Римда бўлган пайтимда газеталарда ўқидимки, унда тасвирланган инқилобий саҳналар Нидерландияда айнан такрорланган экан. Бундан шундай хulosага келдимки, дунё ҳамиша ўзгармай қолаверади, менинг ёзганларим ҳам аслида ҳаётй ҳақиқатдан ўзга нарса эмас.

Шу тахлит гурунг асносида театрга кетиш вақти ҳам бўлиб қолди, биз кўзғалдик, Гёте биз билан илиқ хайрлашди.

Уйга кетаётib мен жаноб X.дан Гёте унда қандай таассурот қолдирганини сўрадим.

– Ҳозиргача мен, – жавоб берди у, – битта одамда ўта мулойимлик билан бирга туфма мағрурликнинг мужассам бўлганини кўрмаганман. У қанчалик кўнгли бўш ёки такаббур бўлмасин, ҳар қандай ҳолатда ҳам буюkdir.

*Немис тилидан
Янглии ЭГАМОВА таржимаси*

Давоми бор





ЗАМОНАВИЙ НЕМИС ШЕРИЯТИДАН

Ханс Магнус ЭНЦЕНСБЕРГЕР

Ханс Магнус Энценсбергер Европанинг жаҳонга машҳур ёзувчила-ридан биридир. У насрнавис сифатида ҳам, шоир сифатида ҳам бир-дек танилган. Шунингдек, ноанъанавий усууллар тўғрисидаги адабий-танқидий мақолалари адабиёт ихлосманделарида қизиқиши уйғотган.

У 1929 йилда Германиянинг Кауфбойрен шаҳрида туғилган. Ҳозирги даврда Мюнхенда истиқомат қиласди. “Булутлар тарихи”, “Ребус”, “Вужуд остида” сингари кўплаб шеърий тўпламлари босилган. Унинг шеърлари ўзбек тилига илк бора 1997 йилларда ўғирилган. Робия Абдуллаева ва Бахром Рўзимуҳаммад таржимасида “Ёшлик” журналида босилган ўша шеърлар “Танишув” китобига (Тошкент, “Ўқитувчи” нашириёти, 2000 йил) киритилган.

ВУЖУД ОСТИДА

Бу зим-зиё коинот
вужуд остидаги коинотдир.
У хаёл сурмайди.
сен пинакка кетар экансан
оромингга ором қўшар у.
Ер ости маъбуди Ўзбекистонга хос нотинчлик,
ерда, кўқда содир бўлажак зилзилалар
улкан кимёвий оғатлар чизгилари
зоҳир бўлган идишга у ҳам алоқадор.

Туш кўраётганинг – чакалакзорлар
энг олис ўтмишларга хос.
кўзни алдайдиган ранглар.
ховури чиқаётган ҳаво.
оби ёвфон.
урчитилаётган текинтомоқлар.
антика тўда
йилт этиб ўтиб кетаверади,
кирилиб битар йилт этганида.
Цайтрасфер асбобида шундоқ тасвир,
сен эса не бўлаётганини билмайсан.
Тинчгина, сокингина нафас олиб ётибсан,
ҳеч нени кўрмайсан, ҳеч нени эшитмайсан.
нелар содир бўлаётир – ишинг йўқ.
Оператор эса

ичингга
резина ичак юбориб
кузатиб турибди
улкан экран оша
тан аъзоларининг
қий-чув шовқинларини.

1992

ЛЕВИАФАН¹

Бу тарвакайлаб кетган махлук
бўрни паққос туширди кўз олдимиизда.
оқ тишларини кўрсатиб тиржаймоқда у.
Агарда гапирмоқчи бўлса
тепадан пастга қараб гапиради
ўзининг тушуниксиз олмон тилида.
Биз аниқ биламизки,
у қатлиомда устаси фаранг,
ҳар жойда ҳозир нозир.
Очофат. Овқат берсанг еб тўймас сира,
одамови,
ёкимсиз.
Гоҳо гандираклаб йикилиб қолар,
сўнг ўрнидан туради аранг.
У бизсиз, хеш-акраболарисиз
ҳеч кас эмас.
У елимталоқдек бизга ёпишар,
бу абадий мижғов жонимизга теккан,
бу бефойда махлукқа
иши тушмас ҳеч кимнинг.

1992

Марица БОДРОЖИЧ

Марица Бодрожич жаҳонга довруқ таратган адаба, шоура, киносценарист.

1973 йилнинг 3 авгуустида Хорватияда таваллуд топган. 1983 йили Германияга кўчиб келган. Ўн ёшидан эътиборан Берлин шаҳрида истиқомат қилмоқда. “Тито ўлди” номли ҳикоялар тўплами (2000) орқали адабий жамоатчиликка танилди. “Ботиний лаҳзалар ўйинчиси” (2005) романни, “Битта патида ўзгармабди колибри нинг” (2007) шеърий китоби нашр этилган. “Хотиранинг қалб сурати” бадиий фильми томошабинлар олқишига сазовор бўлган. Ўнга яқин мукофотлар совриндори.

М.Бодрожичнинг туркум шеърлари “Гулистан”, “Жаҳон адабиёти” журнallарида, “Хуррият” газетасида, “Мерос юлдузлар жилоси” эссе-си “Жаҳон адабиёти” журналида босилган.

Немисзабон хорват адабаси шеърий туркуми “XX аср жаҳон шеърияти” антологиясига (Тошкент, 2011) киритилган.

¹ Левиафан – Тавротда номи келтирилган денгиз ҳайвони.
² Колибр – энг митти куш (тарж.).

ОТАМ МЕНИ ҚОР ҚИЗИМ ДЕРДИ

Боиси туғилган вақтимда
оғзимдан онамнинг кўксига
кор учқунлари сочилган экан.
Қишиш келса кўзгунинг ичига кириб
қайта чиққиси келмайдиган қорқиз эдим
Онамнинг юмшоққина бағрида
осуда ухлардимми ёки...
буларнинг бари хотирамда йўқ.,
Жигарранг чамбарли дўнг кўқрак,
бироқ аввалгига нисбатан ўта янги жой.
Хали “Мен” қиёмига етмаган
қайга қараманг менсизлик.,
барча-барчаси менсиз,
барчаси ҳамиша менсиз.
Ота-онам саёҳатга чиқишлиаридан сал олдин
мени бошқа исм билан атаган эканлар.
Бири Денгизга Яқин дейишса,
иккинчиси Ёруғ деб чақирган.
Айнан ўшандада
ёз соям узра узоқ чўзилган,
бироқ менга яқин келмай шувиллаганича
ўтгану кетган.
Отамнинг тушларида: Кор, Қор Аёл,
Миллионлаб ҳужайралар
ва вергул,
вергул ортида миллионлар –
ўзини батамом унутиш учун.
Мен Денгизга Яқин ва Ёруғ,
Ўзимни ҳақиқий ёзга атаб асрармоқда эдим.
Оқ учқунлар
оқ рангни суреб олиб
юз-кўзларга урилар эди.
Хатто қулоқлардан паға-паға бўлиб
кор ёғар эди.
Кулоқлардан ёғаётган қорни назорат килиб
бўлмасди. Бурундан муз тушар эди,
муздан бошқа ҳеч вақо йўқ эди.
У ерда менинг музим
чана учишга мўлжалланиб қотиб қолганди.
Кандай яхши ҳаммаёқ ях, ях, ях –
бўғик товушли қишиш,
учиб кетолмаган капитарларнинг совуқ ини,
ғўнгиллаб юрган эски асалари
ўз феълидан қочиб
тўппа-тўғри менга қараб учиб келмоқда.
Тош отдим – қулақ тушди.
Қўлимдаги ашё – мусиқа негизи.
Қишлоққа росмана ёз келди,
Ёздан туғилган кунимга атаб бир бўлак

тортиб олдим.
Онам шаҳарга келди,
эшик қўнғироғини чалди
ва бор вужуди билан
тўлдириб турди август ойини.
Чўнтагидан чак-чак
томарди
бўсағага,
на-да бўсағага, оёғим остига,
на-да оёғим ости, бутун ҳаётимга
муқаддас Биби Марям байрамининг дақиқалари.

Марио ВИРЦ

Марио Вирц 1956 йилда Марбург шаҳрида туғилган. Ҳозирги вақтда Берлинда истиқомат қилмоқда. Марио кўпроқ табиат гўзалликларини, митти жониворлар ҳаётини шеърда акс эттиради, бу шоирнинг севимли услубидир. М. Вирцнинг «Ҳафтада етти ҳаёт бор» (2003), "Ойпараст" (2003), «Бўрон арафасидаги сукунат» (2006) сингари шеърий китоблари адабий жамоатчилик тарафидан илиқ қаршиланган.

УЙҚУ

Уйқудаги киши қайиги
Тушга кирган оғочдан ясалган,
Шу боис тунги бўронда
Чирпирак бўлиб чўкиб кетди-ку.
Доду фифон ҳам
Тўлқин устида
Узоқ сақлай олмади қайиқни.
То денгиз
Шаҳд ила
Уйқудаги киши юрагига
Бориб қуйилмаганига қадар.

1992

ОЙПАРАСТ

Тушимда сояларим узра
Тез ва чаққон сақраб ўтаман.
Жавоб қайтараман мудроқлар нидосига,
Туннель охирида тўхтаб,
Паролни шивирлаб айтаман.
Тушимда ой нурида шалаббо бўлиб,
Дуч келганни ўзим билан олиб кетаман.
Даст суғуриб оламан юрагимни,
Шунда шаҳардаги барча соатларни
Заррин чанг қоплаган бўлади.

1993

МУЖДА

Унугтганларимнинг барчаси
 Қайтиб келар яна
 Ёруғ из соларак
 Тун хотирасига.
 Уларнинг номи янграп
 Овлоқдаги кулбамда.
 Бедор кимсага дахлдор
 Хукм каби хотирот.
 Кўланкаларнинг саслари
 Қарзга олинган Вақтнинг
 Дақиқаларин санаб биткаар.
 Олов ва оташ аро,
 Изсиз йўқолган ёз ва қиш
 Буларга илова тарзида
 Чинқираётган зим-зиёликлар аро
 Магзини чақади мұжданинг
 Ва берилиб тинглар
 Ташна юрак овозларини.

1998

ОИЛА

Барча ҳайрон
 Бу йил қалдирғочлар
 Уча солиб соchlаримга ин қурганига.
 Эҳтиёткорлик ила аста нафас оламан –
 Чунки қўлтиғим остида тўр тўқимоқда
 Ўргимчаклар.
 Чап елкам узра тин олиб турап
 Қанотлари сариқ митти қапалак.
 Халал бермаслик лозим буларга!
 Янги оиласдан ҳамма ҳайратда,
 Бахтимдан озуқа олмоқда, қаранг:
 Асаларилар
 Ва уларнинг қироличаси.

1998

Ҳерта МЮЛЛЕР

Ҳерта Мюллер «Инсон – баҳайбат қирғовул», «Тулки ўша даврлар-даям овчи эди» сингари ғаройиб романлари билан жаҳонга танилган немис адебаси. Ҳусусан, 2009 йилда Нобель мукофотига сазовор бўлганидан сўнг дунё миқёсида довруқ қозонди. Ҳерта Мюллер 1953 йилда Руминиянинг Ницкидорф қишлоғига туғилган. Ҳозирги даврда Берлин шаҳрида истиқомат қилади. «Соч тугунида бир хоним яшар», «Үлдирилган дўст», «Кумуш қўнғироқ сочли автомобил қаёққа бора-ди» номли шеърий тўпламлари машҳур.

* * *

Кўйлак остига қўмилиб мен,
Сичқонларнинг толесига эврилишим мумкин.
Ха, стол атрофида жимирляяпти жимлик,
Чолни қофоздан ясаб қўйишибди.
Катдаги каттакон очликми,
Тиззадан сачраяптими юраккача отқулок
Ёхуд булар тамомила ўзгача мавжудотмилар.
Яна сени ўзига тортар давлат иплари,
Бир соат чамаси уйма-уй юрмасдан,
Кумуш ва кўркувдан иборат калавани кўрасан.

1991

ОЛМА

Устахонасида
Порлоқ пўст
Картошқагул устахонасида
Киндик бурамаси
Пашша устахонасида
Хода ютган каби озғин тан мусикаси
Лаблар устахонасида қор
Паға-паға ватан соғинчини деб
Кўмирга қарши исён қилиб турибди

2010

Эй, кумуш қўнғироқ сочли автомобил қайга боради?
Чинниданмикан, чин ияқмикан ҳайдовчи ияги,
Деди: чивинлар кун ўтиб, қора кларнетга ҳамда орзудаги
Жўнгина қўшиққа эга бўлишар экан.
Тафовут шу. У соchlарини олдирди.
Қулоқларига ёпишмиш тола-тола соч.
Деди: кўча марҳум ишвагар хоним номида экан,
Бир куни қўркув ўша хонимга ўхшаб гумбур-гумбур қилди.
Палто киссасида турган гугурт қутиси эмасман,
Бир куни йўлда кетаётib йўқолиб қолдим.
Бир куни ломакон зиналарини кўрдим.

2003

Ўт-ўланлар маконида ўлдирилган дўст
Бепул тунаш ҳуқуқини қўлга киритди.
Кўча мушуги қорнида
Иссиқкина сутни олиб юрибди.
Бош суягига яшил мудҳиш чўғ учқунламоқда
Шамол ўзи ғувиллаб кираётган
Япроқлар сокинлигини билмайди
Тун ҳам билмас ўзи тиккан овозни
Кўтараётган кўйлакни
Бугун барвақтроқ оқшом чўқдими

2010

Вольф БИРМАНН

Вольф Бирманн 1936 йилда Гамбург шаҳрида таваллуд топган. Ҳозир ҳам шу шаҳарда яшайди. Унинг «Ердаги жаннат», «Ватан», «Ватан соғинчи» номли кўплаб шеърий тўпламлари эълон қилинган.

ВАТАН

Мен ором излаб бош оғриқларга дуч келаётган
одамман,
Қизгин ҳаётга ташна инсон сингари
Умрим қисқа бўлиб туюлаётири.
Ҳамма нарсага эга бўларак,
Ҳамма нарсани тарқатишни истамоқдаман.
Мен пировардида ўз ватанимда ўлмоқчиман.
Ўлсам бас,
Ортга қайтмасман ҳеч.

Туш кўриб бақирмоқчи эмасман,
Үйғонсанг, жиндеккина мизғисанг яна.
Аслида бир қултум чой ва бир бурда бутербурод
Инсоният муаммосини ечиши мумкин.
Абадий навқирон,
Озодлик жангигида

Чида чидаб бўлмас вокеликка.
Чунки ғалабада акс этар мағлубият,
Парво қилма. Сев. Севмоққа журъат эт.

Шу оқшом учун бир қадаҳ шароб ичаман,
Гўзал аёл, сен шу шароб сингари жимиirlайсан,
Кўш хўқизга айланайлик, кел,
Кел, биргаликда учиб кетайлик!
Агарда саламандрамнинг
Тишланган думи
Қайта ўсиб чикса, сенга шеър бағишлийман!

Мен ором излаб бош оғриқларга дуч келаётган
одамман,
Қизгин ҳаётга ташна инсон сингари
Умрим қисқа бўлиб туюлаётири.
Ҳамма нарсага эга бўларак,
Ҳамма нарсани тарқатишни истамоқдаман.
Мен пировардида ўз ватанимда ўлмоқчиман.
Ўлсам бас,
Ортга қайтмайман ҳеч.

2006

Немис тилидан
Мирзаали АКБАРОВ ва
Баҳром РЎЗИМУҲАММАД таржималари



Хусрав ШОҲОНИЙ

Зиёли оиласада туғилган Хусрав Шоҳоний асли машҳадлик бўлсада, умрининг охиригача Техронда яшаган. У асосан новеллист, ҳажвиячи ҳикоянавис сифатида шуҳрат қозонди. Хусрав Шоҳоний табиатан ҳалол ва адолатпеша бўлганидан ижодининг етакчи мавзусини турмуш иллатларини, турли тоифа кишилари ўртасидаги мунофиқлик, амалпарастлик, мансаб-мартабасини суисстеъмол қилишни қоралаш каби масалалар ташкил қиласди. “Боружалининг кўргуликлари”, “Ишратхона”, “Оғиз-бурун ўпишганлар”, “Тўфон” ва бошка ҳикоялари фикримиз далилларидир. Ёзувчи асарлари китобхонни ўйлантиради, фикрлашга ундейди. Ҳаётдаги ғайриинсоний, ғайришаръий хатти-ҳаракатларга, қусурларга қарши курашга ундейди. Шунинг учун ҳам Хусрав Шоҳоний ҳозирги Эрон насрода пешқадам ҳикоянавис сифатида эътироф этилади.

ТАНИШУВ ҲАНГОМАСИ

Хаётимда илк маротаба менинг ана шундай тантанавор маросимда иштирок этишимга тўғри келиб қолди. Бу воқеа янги ҳоким тайнинлашдан кўп ўтмай содир бўлди. Ўшанда мен қуидаги мазмунда битилган таклиф мактубчаси олдим: “Хурматли жаноб... Сиздан янги ҳоким Банинов ҳамда у кишининг рафиқалари билан танишув учун ҳокимлик қабулхонасига ташриф буюришингизни сўраймиз. Кийиниш услуги – ҳар кимнинг ўз таъбича”.

Мўъжазгина шаҳарчамизда масқунлар бир-бирининг хатидаги икирчикирларигача хабардор бўлгани учун мен қабулхонага қадам ранжида қиласар эканман, ўзимни мутлақо бегона ҳис этмадим. Мен ҳар томондан оқиб келаётган меҳмонларнинг кўпчилигини яхши билардим. Бу катта қабул тантанаси бўлиб, унга муассасаларнинг бошлиқларидан тортиб, мактаб муаллимларигача ва ҳатто бозорнинг савдогарларидан сотувчиларигача – турли соҳа кишилари таклиф этилганди.

Орадан кўп ўтмай, аввалги барча ҳокимларга ёрдамчилик қилган, агар адашмасам, умр бўйи шу лавозимда ишлаб келаётган ҳамда саккиз нафар бошлиқни кўрган жаноб Садоқатпеша овозини барадла қўйиб эълон қиласди:

– Хурматли хонимлар ва жаноблар! Ҳозир бизнинг янги ҳокимимиз жаноб Банинов ўз рафиқалари билан ташриф буюражаклар. Таниширувимиз қулав бўлсин учун меҳмонлардан бир сафга тизилишларини илтимос қиласмиш.

Бундай тантаналарга аллақачон кўнишиб кетган меҳмонлар дарҳол жамиятда мавқеларига ҳамда хизмат лавозимларига қараб жойларини эгалладилар. Табиийки, сизнинг содик қулингиз узундан-узоқ чўзилиб кетган сафнинг охирига илинди. Орадан кўп ўтмай жаноб Банинов

рафиқаси билан пайдо бўлди. Барча саф тортиб турганлар гўё шамолдан эгилган буғдой бошоқлариdek бирдан олдинга эгилиши. Худди сафда турганлар бир-бирига кўз илғамас мурватчалар ҳамда ошиқ-мошиклар билан бирлаштириб кўйилгандек. Сизнинг содик қулингиз ҳам истаса-истамаса уларга эргашишига тўғри келди ва улар билан биргаликда эгилганча қотиб тураверди. Жамоавий етти букилиш тантанаси тугаб, икки кўлни ёнга тушириб ғоз турар эканмиз, мен беихтиёр, хўш, очигини айтганда, бу жаноб нима учун аллада азиз ва нега энди биз унинг олдида бош эгишимиз керак, деган ўйга бордим.

Бундай қараганда, бу кимсанинг ўзгалардан ажралиб, кўз-кўз бўлиб турадиган ортиқча хислати кўзга ташланмасди, ўрта бўйли оддий одам эди.

Танишув тантанасига саф тортганларнинг бошида бўйнини чўзиб турган шаҳримизнинг дев келбатли бош имоми билан ёнма-ён тураркан, ҳоким тия ёнидаги бўталоққа ўхшаб кўринарди. Энди унинг рафиқасини айтмайсизми, Оллоҳ номи билан қасамёд қиласманки, шаҳримизнинг кўпчилик аёллари ва ҳатто танишув тантанасида иштирок этаётган аёллар ҳам унга қараганда анча кўҳли ва жозибалироқ эдилар.

Ҳоким рафиқаси билан биргаликда саф тортганлар яқинига келиб, бош имом қаршисида тўхтади. Таништирув тантаналари маросимларида бекиёс тажрибага эга бўлган ҳамда саф тортган барча меҳмонларнинг уруғ-аймоқларигача танийдиган жаноб Садоқатпеша ўз вазифасини ижро этишга кириши:

– Бу киши машҳур дин пешвоси, шаҳримизнинг атоқли олими Жаноб Ҳожат ол-фalon Авлодободий бўладилар. Ҳазратнинг эътиқодлари мустаҳкам бўлиб, масжидимизда имомлик қиладилар. У кишининг жонкуярлиги ва меҳрибонлиги туфайли ҳаммамиз тинч-осойишта ва хузур-халоватда яшаяпмиз.

“Ана, холос. Бундан чиқди, бизнинг бош имомимиз чиндан ҳам олийжаноб Садоқатпеша кўкка кўтариб таърифлаганидек, иззат-икромга лойиқ инсон экан-да”, деб ўйлаб қолдим мен.

– Сиз бу кишининг исми-шарифини нима дедингиз? – суриштириди ҳоким.

– Жаноби олийлари, Авлодободий, дедим.

– У ўзига шундай пурмаъно исм-шариф танлаган экан, демак унинг жужуклари сероб экан-да, – ҳазиллашиб кўйди ҳоким.

– Худди шундай, жаноби олийлари, – деб жавоб берди Садоқатпеша.– Сиз сезиб олганингиздек, руҳий раҳнамомизнинг оиласлари катта: иккита муқим никоҳдаги аёллари ҳамда тўртта шаръий никоҳлаб олган хотинлари бор. Шуни ҳам айтиб қўйишим лозимки, уларнинг барчаси оксусяк оиласлардан. Булардан ташқари Авлодободий жанобларининг ўн олти нафар ўғиллари, етти қизлари ҳамда кўплаб келинлари ва набиралари бор.

“Бундан чиқди, – деб ўйладим мен.–Бизнинг бош имомимиз инкубатор экан-да”.

– Елкангизга, – деди унга жилмайиб ҳоким, – оғир вазифалар юкланади. Сиз бу масалаларга жамоат олдида барча масъулиятни сезган ҳолда вижданан ёндашишингиз керак бўлади.

Бунга жавобан бизнинг бош имомимиз етти букилар экан, Оллоҳ томонидан буюрилган дин йўлидаги барча ишларни холис ва оғишмай бажаришга жаноб ҳокимни ишонтириди.

Кейинги одамга навбат келганида жаноб Садоқатпеша ҳамма эшитадиган қилиб деди:

– Бу киши жаноб Покфамил бўладилар, молия бошқармасининг хурматга сазовор бошлиғи. Ислам-шарифларининг ўзи яққол таъкидлаб турганидек, давлатнинг соғ ва бегараз хизматчиларидан бири ҳисобланадилар. Жаноб Покфамил бу соҳада кўп йилдан бўён тер тўкиб келадилар ва...

Мен бу исм-шарифни эшитгач, шаҳар аҳли даҳшатдан дир-дир титрайдиган, қийноққа соладиган жаллод эмасмикин, дея бўйнимни чўзид қарадим. Не кўз билан кўрайки, худди ўша – ўзлари! Қани, айтинг-чи, ахир буни қандай тушунмоқ керак? Номи қаттиқкўллик ва раҳм-шафқатсизлик тимсолига айланиб кетган бу қонхўр кимса бирдан исми-шарифига заррача доғ туширган покиза ва бегараз инсонга айланиб қолса-я?!

Шу тобда миямга қон қуилаётганини сездим. Бутун аъзойи баданим қизиб кетар, гоҳ қалтироқ тутарди. Жаноб ҳоким, барча гаплар ёлғон! Сизнинг шон-шарафининг билан қасамёд қиласманки, бу турқтароватнинг исми-шарифи Покфамил эмас, Нажасфамилдир. У замонамиз ярамасларининг ярамаси, муттаҳамларнинг муттаҳами, деб қичқириб юборишимга сал қолди. Хайриятки, шу заҳотиёқ ўзимни қўлга олиб ўйлай бошладим: “Сенинг нима ишинг бор-а? Яна бирон-бир ғалвага аралашиб қолиб, сенинг ишларингни ҳам ағдар-тўнтар қилишларини истаяпсанми? Эҳтимол сен янгишиб қолгандирсан, бу Покфамилнинг сен ўйлаётган ифлос турқтароватга ҳеч қандай алоқаси йўқ чиқар!”

Ҳоким Покфамил билан танишувни ниҳоясига етказиб, унинг қўлини қаттиқ қисиб қўйди-да, учинчи меҳмон рўпарасига борди.

– Бу киши жаноб Етимнавоз бўладилар, – Садоқатпешанинг қулоқни қоматга келтирувчи овозини эшитдим. – Шахримизнинг ҳалол-пок, ғамхўр савдогарларидан бири. Худди шу жаноб кўп йиллардан бўён шахримизнинг гуллаб-яшнаши учун жонбозлик қилмоқдалар. Ўзларига мерос бўлиб қолган кўп ерларни мактаб, шифохона ҳамда болалар боғчалари қуриш учун сахийлик билан давлатга бериб юборганлар. Етимнавоз жаноблари ҳар ҳафта бечораҳол ва қашшоқ кишиларни меҳмон қиладилар, уларга ўз мол-мулкларидан улашадилар.

Етимнавознинг исм-шарифи қулоғимга чалингунча мен Покфамил ҳакида эшитганларим таъсири остида бўлиб, ҳамон ўз-ўзимни юпатардим. “Ия, қанақасига! Наҳотки бу ўша – биз ҳожи мумсик деб атайдиган ва ўтакетган зикна, ҳаромхўр чайқовчи Ҳожи Етимнавоз бўлса? Қарасам, нақ ўшанинг ўзгинаси! Бу нима деган гап ахир? Нега энди Садоқатпеша деган кас кўзини бақрайтириб туриб ёлғон гапиради? Ҳожи Етимнавоз дегани ўзига мерос қолган ерини давлатга мактаб, шифохона ҳамда болалар ўйлари қуриш учун таг-туғи билан текинга бериб юборди, деган гапни қаёқдан олди? Ахир, унинг ер олди-сотдисида қалбаки хужжатлар тайёрлагани ҳақидаги “иши” ҳамон ёпилгани йўқ, тергов ишлари давом этмоқда-ку. Бошқа бир кимса эмас, нақ шу жанобнинг ўзи икки йил бурун шаҳар бошқаруви аъзоси бўлиб, адлия бўлими бошлигининг ёрдамида баҳтсиз бева-бечоралар ҳамда етим-есирларнинг уйларини ҳам қўшиб олиб, барча ишлаган ва ишламаган вақф ерларини ўзига ўтказиб, ўзлаштириб олган эди-ку. Ахир қандай қилиб, бу жиноятчи, таъбир жоиз бўлса, тўсатдан ҳақиқатгўй ва адолатли инсонга айланиб қолди?! Макка сафарига бориб келгани билан керилиб юрувчи ва тақводор мунофиқ чайқовчилик орқасидан ҳамда қарз берган ҳар бир тумани устига икки хисса фойда олиб, кун кўйрарди-ку. Ночор қолган кимсаларнинг қонини сўрувчи бу зулук қачондан бўён инсонпарвар ва саҳоватпеша қиёфасига кириб, муҳтожларнинг ҳожатбарорлиги билан шуғулланадиган бўлиб

қолипти! Наҳотки бу турқ-тароватнинг кимлигини Садоқатпеша билмаса?”

Мен яна бор овзда барча азиз-авлиёлар номи билан қасам ичаманки, Садоқатпеша ёлғон гапиряпти, деб юборишимга сал қолди. Бирок шу тобда ҳокимнинг Етимнавоздан буёғига ҳам Куръон кўрсатмаларига биноан иш юритишни давом эттиришини илтимос қилаётгани қулогимга чалиниб, тилим танглайимга ёпишиб қолди. Гўё симёғочга айланиб қолган эдим.

Шу тобда навбат кейинги меҳмонга келган эди ва Садоқатпешанинг товуши қўнғироқ товушидек миямда акс-садо берарди:

—Бу ҳазрат жаноб Синэпаҳи бўладилар. Шаҳримизнинг мақтаса арзугудек ёш спортчиларидан бири. Бу бизнинг фахримиз, мамлакатимизнинг шон-шуҳрати. Ўзининг бағрикенглиги билан бу инсон мамлакатимизда биринчи ўринлардан бирида туради. Сахийликда, қалби очиқлик, одамшавандалиқда тенги йўқ. У ўзининг ҳалол меҳнати эвазига топган даромадидан учта спорт клуби куриб ташлади.

“Ана холос! Ахир бунинг таникли каллакесар, пичоқбоз ва ўйлутўсарлигини бутун шаҳар билади-ку. Ахир, у учта фоҳишаҳонанинг эгаси-ку! Спорт клублари бу ерда нима қилиб юрибди? Худди шу Синэпаҳи дегани пичоқбозлиги ва қотиллиги учун Кешм, Харқ оролларига ҳамда Бандар-Аббосга тўрт марта сургун қилиниб, тўрт мартасида ҳам у ерлардан қочиб келган-ку. Бу безорининг тушига инсонпарварлик номига ҳам кирмаган бўлса керак. Ундаги сахийлик, бағрикенглик ва бошқа сифатлар қаёқдан пайдо бўлиб қолдийкин? Шаҳримиз аҳолиси қўчада уни қўриб қолгудек бўлса, оч бўрига йўлиқкан қўйлардек ҳар томонга тарқалиб кетишади-ку. Қандай қилиб бу йўлтўсар мамлакатимизнинг ғурури-ю, шон-шуҳратига айланиб қолди?!”.

Мен бор кучимни жамлаб, шижаат билан олдинга чиқиб: “Жаноби ҳоким! Сизнинг рафиқангиз номи билан қасамёд қиласманки, Садоқатпеша ҳалиям алдашда давом этмоқда! У кўз қўриб, қулоқ эшитмаган гапларни тўқиб ташляпти”, деб юбормаслик учун тишимни тишига босдим. Бироқ шу тобда жаноб ҳокимнинг рафиқаси табассум ила меҳри товланиб, ҳайратланган бир ҳолатда Синэпаҳининг қўлини қисаркан, ўзининг ташқи қўринишига ҳечам мос тушмайдиган эркаловчи ҳамда нозик товуш билан унга мурожаат қилиб, сўзланарди:

— Бизнинг ватанимиз, бизнинг ҳалқимиз сиз каби инсонларга муҳтож! Бизнинг миллатимиз сизга ўхшаш довруғи довон ошган спортчилар билан ғурурланмай иложи йўқ. Бизнинг замонамиз ёшлари жисмонан кучли ҳамда жаҳон спорт майдонларида байроғимизнинг шонли ҳилпирашига имкон туғдириб берган жамоатларгина ривожланишга ва оламшумул эътирофга сазовор бўлишига ҳақли. Мен ёшларимизнинг бақувватлиги, жисми пўлатдек мустаҳкамлиги ва соғломлигини ҳар кўрганимда ўзимда кониқиши ҳосил қиласман.

Назаримда бошимдан кимdir муздек сув қуйиб юборгандек бўлди. Афтим буришиб, мазам қочди ва аъзойи баданимдан совуқ тер чиқиб кетди.

Олтинчи ўринда турган одам билан танишувга навбат етди. Садоқатпеша аввалгиларилик ахборот йиғиш бошқармасининг штатдан ташқари хуфия ходими бўлмиш Пачевармалидэнинг кўқрагига ўнг қўли билан никтар экан, деди:

— Жаноб Пачевармалидэ атоқли адабиётшунос, олим ва нозиктаъб шоирлардан бири. У шон-шуҳратга эга бўлишига қарамасдан, хокисоргина

ҳаёт кечиради ва жамоа орасида кам кўринади ҳамда ўзини кўз-кўз қилишни ёқтирамайди.

Пачевармалидэ жанобларининг ажойиб ва қалбларни жунбушга солувчи шеърлари оғиздан оғизга ўтиб юради, унинг ўзи эса шахримиздаги барчанинг хурматини қозонган ва тан олинган. Ҳафта сайин унинг уйида адабиёт кечалари уюштирилади ва унда шаҳарнинг шоир ва ёзувчилари қатнашиб янги-янги асарларни қўйиб берадилар. Биз ҳозир Пачевармалидэ жанобларидан жаноб ҳоким ва унинг рафиқаларининг шахримизга шарафига бағишилаб маҳсус битилган қасидани ўқиб беришини илтимос қиласиз.

Жаноб ҳоким ва унинг рафиқаси Пачевармалидэга ўзининг шоирлик кобилиятини намойиш этиши учун розилик берганлигини ишора қилиб, назокат ила жилмайиб қўйди.

Ахборот йиғиш бошқармасининг штатсиз ходими ҳамда барча қонуний ва ғайриқонуний битимлар даллолининг шаҳар маркази ва ташқарисидаги уйлари шаҳарнинг турли муассасалари бошликлари учун ишратхона бўлиб, шулар орқали мўмайгина кўчмас мулк даромадига эга бўлган Пачевармалидэ бир қадам олдинга чиқиб, етти букилиб таъзим бажо этгач, баланд овозда хониш билан ҳоким ҳамда унинг рафиқаси шаънига бағишиланган қасидани ўқий кетди.

“Ана холос! Шунчалик ҳам сурбетлик бўладими, ахир! – ўйга толдим мен. – Шундай разил кимсанинг шеъриятга, умуман адабиётга қандай алоқаси бўлиши мумкин? Бу ярамасни шаҳарда ҳамма яхши биладику. У фирибгарлик ва ёлғончилик мактабини ўқиган кимса-ку. Ахир у ўтакетган фирибгар ва бузғунчи-ку. Хат-саводи йўқ гумроҳ-ку. У шу қадар саводсизки, ҳатто имзо чекишини ҳам удалай олмайди. Буни қарангки, ана шу ярамасни улкан адабиётчи ва шеъриятнинг билимдони сифатида намойиш этмоқдалар. Бизнинг шахримизда чиндан ҳам шундай ажойиб шоирлар борки, уларнинг шеърлари буюк Низомий ғазаллари билан бемалол рақобатлаша олади, бироқ улар мухтожликка маҳкум этилгандек зўр-базўр кун кечирмоқдалар. Бу муттаҳамни ҳоким ва унинг рафиқасига шоир сифатида таништириш фикри кимдан чиқдийкин?”

Хаёлларим танишувда иштирок этаётганларнинг карсаклари ва “Яшасин！”, “Яшасин！” дея қичқириқлардан бўлинib кетди. Ҳоким жаноблари ва унинг рафиқаси бу тўнканинг қофиябозлигини юксак баҳолашгач, кейинги меҳмон билан таниша бошлашди.

Қисқасини айтганда, жаноб Садоқатпеша ғишт терувчини – тоғ муҳандисига, гўрковни – археологга, бўёқчини – улуғ мусаввирга, фолбин ва башоратчини – мулла ва донишмандга, ҳачирбоқарни – моҳир чавандозга, хат ташувчини – ёзувчи ва адабиётшуносга, фирт каптарбозни – биолог олимга чиқариб қўярди.

Садоқатпеша бошқаларни қандай таништирган бўлса, мени ҳам худди шундай таништира бошлади:

– Бу жаноб – жўшқин ёшларимиздан бири, ватанпарвар, жасур, мустаҳкам иродали, серфикр, меҳрибон, итоаткор, сипо, ақлли, донишманд ва ҳоказо.

Бу ҳангомани давом эттиришга сабрим чидамай тоқатим тоқ бўлиб кетди. Агар бошқаларга нисбатан шундай ҳол рўй берганида бир амаллаб чидаса бўларди-ю, аммо худди шу алфозда менга баҳо беришар экан, ўзимни кўлга олишга курбим етмай қолди. Шаҳд билан бир қадам ташлаб, сафнинг олдига чиқдим-да, бор овозим билан дедим:

– Ҳоким жаноблари, сизнинг шуҳратингиз билан қасамёд қиласманки, бу одам фирт ёлғон гапирайти. Барча авлиёлар номига қасамки, бари бўлмаган гап! Мен, умуман, довюрак эмасман! Агар мен довюрак бўлганимда эди, сурбетлик билан неча йиллардан бери мана, ўн йилдирки, барчани боплаб лақиллатиб келаётган жаноб Садоқатпешшанинг ўрнида ўтирган бўлардим. Мен журъатли ҳам эмасман, йўқса, Синэпаҳига ўхшаб шаҳарда учта ишратхона очиб қўйиб, ойига ўн минг, ўн беш минг тумандан пул ишлаб ётган бўлардим! Мен донишманд ҳам эмасман, агар шундай бўлганимда, жаноб Етимнавознинг ўрнини эгаллаб, олтинга чўмилиб ётардим! Агар мен ақлли бўлиб, елкамдаги каллам ишлаганида эди, унда аллақачон анави Пачевармалидэга ўхшаб, ахборот йифиши бошқармасининг штатсиз ходими вазифасига ўтиб олардим ва худди ўшанга ўхшаб, ўз уйимни ишратхонага ва ахлоқсиз кимсалар, яъни шахримизнинг нуфузли отахонлари тўпланадиган масканга айлантириб қўярдим! Мен ватанпарвар ҳам эмасман, йўқса, мана шу ерларнинг жуда бўлмаганида ярми менини бўларди. Агар итоаткор ва сипо бўлганимда эди, барча мени асраб-авайларди, бошида кўтариб юради...

Мен шу топда яна нималар деб валдираганимни аниқ эслай олмайман! Фақат нима деб бақирмай, меҳмонлар менга ачиниш билан қарашарди ҳамда гапларимга қўшилганликларини билдириш маъносида бошларини чайқашарди.

Жаноби ҳоким ва унинг рафиқаси бўлса яккаш менга далда беришар ва давом эттиришимга ундашарди. Улар: “Жуда зўр! Довюраклигингга балли! Ана жасорат! Мана, ҳақиқий ватанпарвар! Мана, бегараз ва соғдил инсон! Мана, биз ҳақиқатни бетга айтишни кимдан ўрганишимиз керак! Яша, йигит, яшавор! Гапиравер, йигит, асло чўчима! Агар сен бўлмаганингда эди, бизлар ҳеч қачон ҳақиқат нималигини, қачон ва қаерда номаъкулчиликлар содир этилаётганини билмас эдик. Ахир биз бу ерга ишларингизни кўриб чикишга, қийинчиликлар, пишиб етилган масалалар билан танишишга, газакнинг олдини олишга келганимиз-да. Ахир биз барча одамларни била олмаймиз-ку. Гапиравер, ўғлим, гапира бер, юрагингда қандай дард бўлса тўкиб сол! Ҳечам қолдирма! Асло чўчима, биз ҳаммасини кўриб чиқамиз ва сенга ёрдам берамиз! Бизнинги ватанимиз шундай ёшлар билан ғурурланади, биз бундай ёшларга муҳтожмиз...”

Бу ҳангома қандай якун топганини билишни истайсизми? Марҳамат! Орадан бир ҳафта ўтгач, жаноб ҳоким ўзининг марказга юборган маҳфий ҳисботида шундай дебди: “Бу нусха (яъни, сизнинг содиқ қулингиз) – фитнакор, ғаламис ва бетгачопар экан. Буюринг, уни нима қилай?”

...Олинган жавоб мазмунини сизга баён қилиб ўтиришнинг хожати бўлмаса керак, деб ўйлайман.

ҚОВУШМАГАН ОДАМ

Ўзимни сизга қандай таништиришга ҳам ақлим етмай қолди... Айтайлик, мен қандай одам бўлсан шундайлигимча таништирайми, ё бўлмасам... Борди-ю бирдан сиз ҳам баъзи бирорвлар каби менинг кимлигимни билиб олсангиз, болохонадор қилиб сўкиб қолмайсизми? Келинг, нима бўлса бўлди, яхшиси сизга бор ҳақиқатни айтиб бера қолай.

Гап шундаки, мен тили билан дили қовушмаган бир инсонман. Тилимни тия олмаганимдан дақки еганим еган. Аммо бирон марта яхшилик кўрганим йўқ. Нега шундай бўлаверар экан, деб бошим қотгани-котган.

Ў, менинг лойим асли шундай қорилган, ё ота-онамнинг тарбияси шундай бўлган. Бир сўз билан айтсам, ё барча одамлар мендан айрича, ёки бўлмасам мен... Масалан, айтайлик, мени меҳмонга таклиф этишди. Шунда мен меҳмонга кетаётиб ўз-ўзимга сўз бераман: бу сафар тилимни шундай тияманки, ҳеч қандай ортиқча сўзлашига йўл қўймайман. Бошқа меҳмонлар нима ҳақида сўзласа, мен ҳам ўша мавзуда гапираман. Худди ўзгалардек ўз тилимга ўзим хўжайн бўламан. Қарабисизки, меҳмонда ўтирарканман, аввалига ўзимни-ўзим чунонам идора қиласманки... Бироқ орадан кўп ўтмай, тўсатдан аллақандай ички фалаён ич-этимни қемира бошлайди: “Нега энди “миқ” этмасдан ўтирибсан? Ҳа, ҳақиқатни айтишга юрагинг дов бермаяптими? Қандай қилиб, пойинтар-сойинтар сўзларни эшита туриб, оғзинг қулоғингга етиб бош иргаб маъқуллайсан?!” Ана шундан кейин десангиз ўз-ўзимни қўлга ололмай, тилимнинг бошбоғини чиқариб юбораман. Қарабисизки, тилим менга хукмрон бўлиб оғзимга келганини қайтармайди.

Меҳмондорчиликда мендан бошқа ҳам кўпчилик ўтирган бўлади, албатта. Бино йўлаги олдида энг сўнгги русумдаги автомобиль кутиб турган, афти бужур, тепакал жаноб шахснинг эркинлиги ҳақида, маънавий қадриятлар ҳамда қалбнинг покизалиги ҳақида томоқ йиртади:

– Ҳа, жаноблар... қасамёд қиласманки, дунёнинг ортиқча ташвишлари-ю вақтинчалик омад, гизиллаб ўтиб кетувчи ҳаётда биздек азизу мукаррам қилиб яратилган инсонларнинг бойлик ва унвон учун ҳукмдорлар олдида тилёғламалик қилишимиз, ўзимизни ерга уришимиз ва обрў-эътиборимизни бир пул қилишимиз асло арзимас бир ҳолдир. Ахир ноиблиқ, вазирлик ва бошқа амалдорлик мансаблари йўловчилар бот-бот алмасиб турадиган автобус ўриндиқларидан бошқа ҳеч нарса эмас. Ана шу дабдабалар инсоний ғууруни йўқотишга арзийдими? Виждонимни ўртага қўйиб қасамёд қиласманки, тубан инсонларни асло жиним суймайди. Исми хаёлимга келмай турган бир шоиримиз бу ҳақда шундай деган эди.

*Бир парча еру қўши хўқизга эга бўлиши,
Улардан бирин амир, бирин вазир деб билиши
Ибн Ямин-чун минг карра камдир, бешак,
Қайқубод, Кайхусравни алдаган безак.*

Ана шу баландпарвоз сўзлардан кейин барчанинг нигоҳи ваъзхонга ҳайрат или қадалиб қолди. Улар: “Воҳ, воҳ, воҳ! Қандай ақл соҳиби-я, қандай илғор, тараққийпарвар ва ноёб фикрлар-а!” деб юборишганини сезмай қолишиди.

Мен ҳам унинг баландпарвоз сўзларини эшитар эканман, сўрадим:

– Ҳурматли жаноб, мени маъзур тутасиз-у, сизнинг соҳангиз қандайлигини билсан бўладими?

– Мен Марказий сахродаги майда шағални йиригидан ажратиш вазирлигига вазир ёрдамчисиман.

Бирдан аъзои баданим қизиб кетиб, орқа миямга қон қуюла бошлади.

– Нега энди сизга шу лавозимни ишониб топширишган? – дея олдим ўзимни зўр-базўр босиб.

– Афтидан, менинг ишбилармонлигим, айрича қобилиятга эгалигимни инобатга олишган бўлишса керак.

– Унда сиз кунига неча марта жаноб вазирга етти букилишингизга тўғри келади, шуни айта оласизми? Турли баҳоналарни рўкач қилиб, кунига неча марта жаноб вазирнинг хонасига мўралайсиз-у, унинг оғзига тикилиб: “Эшитаман”, “Қандай юмуш буюрасиз, жаноби олийлари?” дея

шивирлайсиз?

– Бирон марта ҳам букилмайман. Ҳа, энди мўралаган бўлсам, бу менинг хизмат вазифам.

– Сизнинг ишчанлигингиз ва қобилияtingизга ишониб топширилган мансабни сақлаб қолиш учун кунига неча марта қоламан. – Қани, айт-чи, кунига жаноб вазир автомобилининг эшигини неча марта очасан-у, ёпасан? Вазирнинг ишончига кириш учун ўз қўл остингда бўлғанларни оёқ учида кўрсатиб, уларга заҳрингни сочасан ва улар шаънига қаттиқ-курум сўзлар айтасан? Кунга неча мароталаб ёлғон сўзлайсан-у, қанчалаб қалбаки хужжатларга имзо чекасан? Ҳе, сени қара-ю... лаганбардорсан, баҳти қаро ёлғончисан! Яна сен қулвачча қалбинг билан ғуур ҳақида, инсон шаън-шавкати ҳақида оғиз кўпиртирасан. Балки сен бизларни меров деб ўйлаётгандирсан?! Ҳозироқ нақ шу ернинг ўзида, барчанинг кўзи олдида тумшуғингга бир туширайки, ана ундан кейин эсинг жойига келиб қолар.

...Турган гапки, иш муштлашув билан якунланади. Охир-оқибат ё у меҳмондорчиликни ташлаб чиқиб кетади, ё бўлмаса, мени қўчага шармандаларча қувиб чиқариб юборишади. Қарабиски, мезбон мен билан бутунлай алоқани узиб ташлагани етмагандек, бошқаларни ҳам огоҳлантириб қўяди: "Илоё, шу каллаварам Шохоний дегани билан таниш бўлишдан сизни яратганинг ўзи асрасин!" (У, албатта, ноҳақ бўлади!).

Ёки бўлмаса, бошқа бир ҳодисани кўз олдингизга келтиринг. Мен ёзувчилар, шоирлар, э, борингки, ақл-заковат соҳиблари даврасида ўтирибман. Гап шеърхонликдан бошланди, дейлик. Шунда меҳмонлардан бири ашъор ўқиди.

Шоирлар эса асосан ё анъанапарастлар, ёхуд бўлмасам янгилик тарафдорларига бўлинешади. Бордюю шоир анъанапараст бўлса, тингловчиларнинг олқишилари ва дод-фарёдлари остида кўз ёшини шашқатор этиб, рақибининг тошбағирлигидан, маъшуқасининг бевафолигиу севгисини хор этганидан, унинг маккоралиги ҳамда бошқа мавзуларда ғазал ўқиб, нолаю афон чекади. Йифлайди, йифлатади.

Мен ҳам барча қатори ғазални тинглаб бўлгач, шеърхонга юзланаман:

– Жаноб, ўринсиз саволим учун мени маъзур тутасиз, ёшингиз нечада?

– Олтмиш саккизда.

– Оила қурганимисиз?

– Ҳа.

– Фарзандларингиз ҳам бўлса керак?

– Ҳа, албатта. Етти фарзандим, невараларим бор.

– Сизни ташлаб кетган маъшуқангиз неча ёшда эди?

У ғамга чўмиб, жавоб беради:

– Йигирма ёшларда эди.

– У сизни нега ташлаб кетди?

– Бунинг тагига ўзим ҳам етолмаяпман. Бевафо экан, мени ташлади-кетди, – дейди ғазалхон отахон ғамгин бир ҳолатда. – Ҳозир кечаю кундуз қуйганим-қуйган. Ғамида адо бўладиганга ўҳшайман энди.

Ана шундан кейин лампамой сепилган алангадек бирдан ловуллаб кетаман:

– Эсини еган виждонсиз чурук чол! Етмишни уриб кўйибсан-у, бир оёғинг гўрда бўла туриб, ёш қизга осилишни ким қўйибди сенга? Яна у нега ташлаб кетганига ақли етмасмиш буни. Сен – чириб кетган

жўқак кимгаям керак бўлардинг? Охир-оқибат бетамиз бетамизлигича қолаверар экан-да. Покдамонлик билан олийжанобликнинг фарқига боролмай қолибсан-ку... Яна кўз ёши тўкиб, маъшуқам ташлаб кетди, деб ҳиқиллайсан. Яхши қилиби, минг оғарин ўшангага. Сенга катта сабоқ бериб кетипти, эс-хушиングни йигиб ол энди. Аёлинг, етти фарзандинг, набираларинг бўла туриб, қизлар кетидан илакишиб юришни ким қўйибди сенга?!

Қарабсизки, яна жанжал бошланади. Тағин ё у кетиб қолади, ё мени ташқарига чиқариб ташлашади. Хонадон соҳиби бўлса барчага эшигтириб: “Шохоний деганингиз ким бўлибди ўзи? Бадииятдан умуман йироқда: на шеъриятни, на адабиётни англаб етади”, дейди.

Борди-ю, янгилик яратувчи шоир бўлса, на бошланиши, на ниҳояси, на қофиясию на туроғининг тайини бўлмаган шеърида Биафранинг оч-наҳор қолган одамлари ҳақида ғам чекади, Африканинг баҳтсиз болаларига ҳамдардлик билдириб, нола қиласди. Шеърларини тантанавор равишда ўқиган янгилик яратувчи назмкор турган гапки, барча қатори мендан ҳам ўзининг инсонпарварлик туйғулари ҳамда илғор фикрларга кўмилган ашъорлари учун ҳамду-санолар кутади. Мен эса мақтов ўрнига шартта ёқасидан оламану, сўроққа тутаман:

- Ўртоқжон, қани айт-чи, кечаги оқшомни қаерда ўтказдинг?
- Дўстлар билан майхонада бўлдим.
- Утган кунги тунда-чи?..
- Дўстлар даврасида майшатда эдим.
- Хўш, ундан олдин-чи?
- Лолазорда бўлдик.

Ана шундан кейин мен яна чегарадан чиқиб кетаман:

– Ифлос, виждонсиз! Лоақал бир кеча Биафранинг оч яшаётган одамлари-ю Африканинг баҳтсиз болалари учун майхонада шаробни уриб, бузукчилик қилмасдан уйингда ўтиранг бўлмасми?! Ўз маҳалланганда қанчалаб оч-наҳор юрганига бир назар ташласанг-чи... Нима, бизларни аҳмоқ деб ўйлајпсанми? Биафрада нима бўлаётгани билан сенинг неча пуллик ишинг бор? Родезияда рўй бераётган ҳодисаларга тупурмайсанми? Кара, Биафрадаги оч қолаётган болалар тақдири сени шунчалик ғамга ботирганки, иштаҳанг бўғилиб, жўжанинг юмшоқ гўшти ҳам томоғингдан ўтмаяпти. Қани, ичкиликбоз, суюқоёқ ковушингни тўғрилаб қўймасимдан бу ердан туёғингни шиқиллатиб қол-чи!

...Яна ғалва! Яна ё у мендан дарғазаб бўлганча жўнаб қолади, ё менга ҳаддингдан ошдинг энди, қани бир жуфтакни ростла-чи, дейишади. Ҳар сафар бир муаммо чиққани чиққан.

Биз ўтирган даврада бирор кимсанинг кўзлари шилпиқ бўлса-ю, бирор кимса унга кўзларингиз бирам чиройлики, нақ мовий нарғизнинг ўзгинаси-я, деб қолса борми, бирдан ўзим сезмаган ҳолда фифоним фалакка чиқиб кетади-да: “Уҳ, ўша шабкўрнинг кўзларини мовий нарғизга ўхшатган кимсанинг отаси гўрида тикка туриб кетсин-а!” деган сўзларни айтиб юбораман.

...Яқинда бир ошнам мени тутиб олиб, панд-насиҳат қила кетди:

– Қачонгача шундай яшаш мумкин ахир?! Ҳадеб одамларнинг жигига тега берасанми? Ҳамма сендан кўнгли совиб, узоқлашиб кетади-ку. Ҳеч ким сен билан дўстлашмай қўяди, ҳатто яқинига йўлатмасликка ҳаракат қиласди. Ўйлаб кўргин, ўзинг ҳам бир назар ташлаб қўй... Хулкингни ўзгартир энди. Бошқалар нима деса, сен ҳам қўшиладиган, сўзларини

қўллаб-қувватлайдиган бўл. Нега энди ҳамманинг фикрига қарши чиқавериб, дилини ранжитишинг, ўзингдан бездиришинг керак?!

– Мен ўзимни асло қўлга ололмаяпман, – дедим надомат ила. – Менинг тилим ўзимга душман бўлмоқда. Менга сираям бўйсунмаяпти. Кел, ўртоқжон, бирон-бир жўяли маслаҳатинг бўлса, айт.

– Мен сенга “Дўст орттириш қоидалари” деган бир китоб олиб келиб бераман. Уни синчилаб ўқиб чиққин-да, айтилган тавсияларига қатъий риоя қил. Шундан кейин қарабсанки, сен ҳам ўзгаларга ўхшаб қоласан-кўясан. Қаерга борсанг барча ёқтирган мўмин-қобил меҳмонга айланасан-қоласан. Бирор сен билан жанжаллашиб ҳам ўтирумайди, уйидан қувиб ҳам чиқармайди.

Бу гап менга маъқул тушди. У эртасига ёқ менга ваъда қилган китобини келтириб берди. Китобни мук тушиб ўқиб чиққач, шу нарсага ишонч ҳосил қилдимки, ҳақиқатдан унда битилган кўплаб фойдали маслаҳатларга амал қилгудек бўлсан, ўзимга душман орттириш эмас, талайгина дўстларга эга бўлишим мумкин экан. Масалан, бир ерида шундай дейилади:

“Меҳмондорчиликда ўтирар экансиз, шу тобда ҳатто хаёлингизни бирон-бир қизиқ воқеа банд қилган бўлса-да, сухбатдошингизнинг сўзларига жиддий қулоқ солишга ҳаракат қилинг. Үнинг шаънига ҳамду санолар ёғдиришдан ҳамда сўзларидан ҳайратга тушишдан асло ўзингизни тия кўрманг. Кийимининг ранги рўйидан, бўйинбогининг шаклидан оғизнинг қулоғингизга етсин. Борди-ю меҳмонлардан биронтаси оғаси, отаси ёхуд меҳмонда ўтирганлардан бирининг ахлоқий ва виждоний сифатларини мақтай бошласа, сиз ҳам унинг сўзларини тасдиқлаб, қўллаб-қувватлаб туришингиз керак. Мабодо ёнингизда ўтирган кимсанинг бурни катта ва танқайган бўлса, сиз унинг ёnlама кўринишини аслзодаларга хос деб кўкларга кўтаринг...” ва ҳоказо-ю хоказолар.

Қоидаларни ўқиб чиққанимдан кейин бир куни мени меҳмондорчиликка таклиф қилиб қолишиди. У ерда меҳмонга келганлардан бири билан танишириб кўйишиди. Қаранг, шундай воқеа рўй берса бўладими? Үнинг исми-шарифи менга жудаям таниш бўлиб, оғасини кўрган эдим.

Мулойимлик билан суриштира бошладим:

– Биродари азиз, марҳамат қилиб мени маъзур тутасиз-у, мабодо Ақбархон деган акангиз йўқмилар?

– Нега бўлмасин, бор-да...

Мен дарҳол фурсатни бой бермай, оғайнимнинг берган маслаҳатлари билан у берган китобдаги қоидалардан олган таассуротларимни эслаб, шоша-пиша сўзимни давом эттиридим:

– Қандай ажойиб акангиз бор-а! Биз Ақбархон билан кўп йиллардан буён дўстлашиб келамиз. Ҳа, ишонаверинг, Аскар оға, акангиз инсон эмас, нақ фариштанинг ўзгинаси. У ҳаддан ташқари покиза, саранжом-саришта, диёнатли йигит. Агар у билан жилла бўлмаса ҳафтада уч-тўрт марта учрашиб турмасак, ўзимизни қўярга жой тополмай қоламиз (Очиини айтсам, у билан бор-йўғи икки марта учрашганмизми- йўқми, билмайман). У қандай самимий, меҳмоннавоз, қўли очиқ инсон-а! Бир сўз билан айтсам, у чин дўстим.

Ия, бу нима деган гап! Аскар оға сўзларимни охиригача эшитмай туриб, бирдан бомбадек портлаб кетса-я!

– Ҳой, менга қара, сен жудаям риёкор, тилёғламачи, расво одам экансан-ку. Нега бунча бўлмағур гапларни вайсадинг-а?! Ў, ўша абраҳ акам сени хузуримга юбордими? Биз уни яна оиламизга қабул қилишимизни истаб

қолдими, айт?..

...Ўзимни қўярга жой тополмай қолдим. Мен юзага келган вазиятдан чиқиб кетиш учун эҳтиёткорлик билан чора излайман-у, Асқар оға бўлса атрофдагиларнинг унинг сўзларини маъқуллашлари ва қўллаб-қувватлашларидан дадилланиб, айюҳаннос солар ва ўз акаси ҳамда менинг устимдан мағзава ағдаришда давом этарди:

– Ҳали кўп йиллардан буён оstonamизга яқин йўлатмаётган бир безорини химоя қилмоқчимисан? Инсонларнинг энг ифлосини, энг тубанини кўкларга кўтариб мақтаяпсанми ҳали? Бизнинг оиласиз унинг исмини тилга олишдан ҳазар қилади. Мен ўтирган ерда у ярамасни химоя қилишга қандай журъат этдинг?! Номуссиз! Ёлғончи! Бахтиқаро лаганбардор! Аблаҳ!

– Кечиринг, жаноб,—хижолатпазлиқдан чиқмоқчи бўлди мен. – Аллоҳ кўриб турибди, мен сизни ҳечам ранжитиш ниятим йўқ эди. Гап шундаки, мен бир қадрдон дўстимнинг маслаҳатига кўра, “Дўст орттириш қоидалари” китобини ўқиб чиқиб, бугун биринчи марта ўша қоидаларни амалда синааб кўрмоқчи бўлувдим.

Асқар оға остидан илон чиққандек сапчиб туриб кетди. Муштларини тутган ҳолда юзлари анордек қип-қизарип шангиллади:

– Сенгаям, дўстинггаям, қоидалар китобини ёзгангаям... лаънатлар бўлсин! Ҳозироқ мушт тушириб қолмасимдан тезроқ бу ердан жўнаб қол! Қани, тезроқ...

Сездимки, ахвол оғир. Гарданимга бу шармандинг мушти тушиб қолмасидан, ўзимни эҳтиётлаган ҳолда меҳмонлар тўдаси орасидан сирғалиб чиқдим ва ҳайдаб қолмасларидан буруноқ жуфтакни ростлаб қолдим.

Эртасига китобни қўлтиққа урганча дўстим хузурига бордим:

– Ўртоқжон, ма, китобинг ўзингга буюрсин! Мен энди ҳечам янги дўстлар орттиromoқчи эмасман. Аввалги ҳолича қолаверганим маъқул экан. Одамлар қандай бўлса, шундай қолавераркан. Ё мен бошқачаман ёки одамлар бошқача. Бу китобингни ўзинг ўқи, унинг қоидаларига ўзинг амал қил. Мени шундан халос эт, дўстим, мен бунга муносиб эмас эканман.

– Нега энди? Нима бўлди?

– Шунчаки... Ҳеч нарса бўлгани йўқ...

ТОШҚИН ҚУРБОНЛАРИ

Шу йилги қиши аввалгиларга қараганда қаттиқ келиб, ҳаммадан кўра қашшоқ бечораларга оғир бўлди.

Ҳозир қайси кун эканлигини аниқ айта олмайман, аммо Бахман ойида росаям жала қуиб юборди ва унинг кетидан шаҳарни даҳшатли сув босди. Кишлокада жойлашган тўрт минг уйдан асосан, қашшоқлар истиқомат қиласидиган маҳаллалардан икки юзга яқин хонадон бутунлай вайрон бўлди ёхуд шикастланди, уч мингга яқин одам бошпанасиз қолди ва ўн беш ёки йигирма киши курбон бўлди ва бедарак йўқолди.

Бу фожиали ҳодисадан хабардор бўлган кўплаб марказий газеталарнинг маҳсус мухбирлари фалокат рўй берган жойнинг ўзидан Техронга маълумотлар ва ахборотларни юбориш учун шаҳарга ёпирилиб келишди. Қарангки, газеталарда ёритилаётган маълумотлар билан бизнинг билгандаримиз орасида от билан туюча фарқ бор. Газеталарда ёзилишича, шаҳардаги бутун бошли икки мингта бино вайрон бўлиб, ўттиз-қирқ минг

киши бошпанадан айрилганди, чўкиб кетгандар ва бедарак йўқолгандар сони эса салкам бир юз эллик, ҳатто икки юз нафарни ташкил этарди.

Ўз-ўзидан равшанки, шаҳримиз оқсоқоллари биздан ақллироқ ва тажрибалироқ бўлишиб, расмий маълумотлар тўплашганди. Уларнинг маълумотлари ҳар томонлама асосланган эканлиги ва рўй берган фалокат оқибатлари жиддий ўрганиб чиқилганлиги хеч кимда шубҳа туғдирмади.

Тошқиннинг эртасига ёки уй-жойдан ҳамда озиқ-овқатдан маҳрум бўлган оёқяланг ва йиртиқ-ямоқ кийимли одамлар ёрдам сўраб, ҳокимлик биноси ёнида тўпланишди. Бечоралар бундан ортиқ нима ҳам қилишлари мумкин эди? Ахир бизларнинг бирдан-бир паноҳгоҳимиз жаноб ҳоким, жаноб муниципалитет раиси, унинг ўринбосарлари эдилар-да.

Яратганинг ўзи марҳаматига олгур жаноб ҳокимимиз талофат кўрганлар тўпланишиб, уни кутаётгандардан ҳабар топган заҳотиёқ ҳокимиятнинг катта эшиги олдига стол ва курси қўйишларига фармон берди ҳамда ўзи мотамсаро қиёфада енгига мотам тасмаси тақиб, курсига чиқди. Унинг икки томонида шаҳримизда эълон қилинган умум мотам белгиси сифатида қора тасма таққан жаноб муниципалитет раиси ва жаноб ўринбосарлари саф тортди.

Турли идоралар – почталар, молия, сув таъминотлари, ҳалқ таълими раҳбарлари эса ҳамдардлик билдириш мақсадида муниципалитет раиси ҳамда унинг ўринбосарлари ортида туришди. Бироқ, афтидан, уларга қора тасма етмаган бўлса керак, улар жабрланганларга қандай қилиб бўлса-да, ўз ҳамдардликларини ифода этиш мақсадида ўзларининг оппоқ кўйлакларига қоп-қора капалак нусхаларни тақиб олишганди.

Ҳоким жаноблари таъзим бажо этаркан, бағрикенг аҳоли томонидан гулдурос қарсаклар авжига чиқиб кетди. Ахир биз ўша куни биринчи маротаба ҳокимимизнинг таъзим қилганини кўришга мушарраф бўлган эдик-да. Бу таъзимга ана шундай гулдурос қарсаклар жавоб бўлиши керак эди.

Ҳоким жаноблари сўз бошлишдан бурун лойга беланганидан доғ-дуғ бўлиб кетган шимининг чўнтағидан рўмолча олди-да, сезилар-сезилмас ҳиқиллаб, кўз ёшларини артиб қўйди. Қаранг-а, ҳокимимизнинг ўзи йиғлаб юборибдимики, унда биз нима қилишимиз керак бўларди. Турган гап биз ҳам ҳўнграй бошладик. Ҳар томондан ҳўнграб йиғлашлари ва оху нолалар эшитила бошланди.

...Менинг оға-иниларим... ва опаю сингилжонларим, – деди ҳоким томогига тиқилиб бўғиб келаётган ўқрикни зўр-базўр босиб,— мен бошингизга тушган кулфатдан ўзимни йўқотиб қўйдим...менинг қадрдонларим... ботирларим... жасурларим... барча... сабр-тоқатли.. ҳамюртларим...

Унинг ёнида турган муниципалитет раиси биқинига туртиб шивирлади: “Бизларни ҳам қўшиб ўтинг... ҳалиги, биз ҳам қайғудамиз!”

– Фақат мен эмас, – дея сўзини давом эттири ҳоким, – манави жаноблар –муниципалитет раисиу унинг хурматли ўринбосарлари ҳам ич-ичларидан қайғуга чўмганлар.

Шу топда муниципалитет раиси орқасида турган ҳалқ таълими бўлимининг мудири ҳам ҳоким жанобларини туртиб шивирлади: “Биз ҳам қайғуда эканимизни айтиб ўтинг... Қаранг, биз қанчали қайғуга чўқканмиз...”.

Ҳоким ҳиқиллаганча сўзини давом эттиради:

– Фақат бизларгина, мен, муниципалитет раиси ва унинг

ўринбосарларигина содир бўлган воқеадан қайфуда эмасмиз... халқ таълими, молия, ер тузиш... ва... ҳамда ва... бўлимлари бошлиқлари ҳам фам-андуҳдалар (ҳоким жаноблари ўта таъсирчан одам эдилар).

– Мен тун бўйи мижжа қоқмадим, – сўзини давом эттириди ҳоким, – шаҳардаги вайрон бўлган маҳаллаларни айланиб чиқдим. Мана, кўриб қўйинглар.

У шундай деб оёгини кўтарди ва уни оломон томон чўзиб, шимининг почасига ёпишган лойларни кўрсатди. Бунга жавобан гулдурос қарсаклар яна авжига чиқиб кетди (Шаҳримиз ҳалқи ўта мулоим табиатли эмасми, шундай бўлгач, ҳоким жаноблари оёқларини бизга биринчи марта кўрсатар экан, албатта, биз бунга бефарқ қараб тура олмас эдик-да).

– Фақат мен эмас, – дея сўзини чўзиб кетди ҳоким, – бошқа муассасаларимизнинг хурматли бошлиқлари ҳам тонг отгунча мижжа қоқмадилар...

(Сезилдики, ҳоким жанобларини ўз вақтида нуқиб қўйишган). Энг охирги аниқланган маълумотларга қараганда, кечаги тошқинда тўрт минг киши бошпанасиз қолган, шунингдек, тахминан уч юз одамни том босган ва сув оқизиб кетган!

Ҳамкаслари ҳамдардлик билдириб турган ҳоким жанобларининг оху ноласи, жабрдийдаларнинг фалакка чиқаётган фифони-ю бақириб-чақириклидан ақлга сигмайдиган шовқин-сурон кўтарилаарди.

– Биз қасамёд қилиб сизларни ишонтирамизки, – дея сўзини якунларди ҳоким жаноблари, – бир ой ичиди аввалги истиқомат қилган уйларингизга қараганда ҳашамдорроқ уйлар қуриб берамиз. Бугуннинг ўзидаёқ самолётларда бизга ёрдам кела бошлади ва ҳар бир жабрдийда ўзига етарли нарсаларни ва озиқ-овқатни олади.

Ҳоким жанобларининг қисқа бўлса-да, кишига умидворлик баҳш этувчи нутқи ниҳоясига етди ва биз уни узундан-узоқ дуолар қилишиб, совукдан дилдираганча тарқала бошладик. Ҳамма йўл-йўлакай ҳоким жанобларининг ажойиб нутқини ҳаяжонли бир тарзда миннатдорчилик билан муҳокама этиб борарди, фақат бизни вафот этганлар ва бошпанасиз қолганларнинг ҳайратга соларли даражадаги сони бошимизни қотиради. Ахир шаҳримизнинг аҳолиси ҳеч қачон қирқ минг кишига етмаган эдида. Шундай бўлгач, қандай қилиб қирқ минг киши бошпанасиз қолсин... Уч-тўрт минг хонадон вайрон бўлди деган маълумотга келганда эса, шаҳримизда ҳеч қачон шунча уй бўлмаган...

Аммо бу рақамлар нақ ҳоким жанобларининг ўзи томонидан айтилган экан, ўз-ўзидан маълумки, у бу рақамларни шифтга қараб тўқимайди.

Худди ўша куни тушдан кейин шакар, чой, гуруч, одеяллар, ун, буғдой, палаткалар юклangan самолётлар турналар галасидек шаҳримизга келиб қўна бошлади. Ҳокимлик ҳамда муниципалитет қошидаги омборлар тўлиб-тошиб кетди. Модомики, озиқ-овқатлар ва иссиқ кийим-кечаклару бошқа молларни кўчада қолдириб бўлмас экан, жўнатилган молларнинг бир қисми ҳоким жанобларининг хужрасига ва бир қисми муниципалитет раиси ва унинг ўринбосарлари хужраларига жойлаштирилди. Ким нима деса деяверсину шундай қилинса, ишончли ҳолда яхши сақланарди.

Эртасига марказий газеталар ва журналларнинг биринчи сахифаларини бизнинг шаҳримизда рўй берган фалокат ҳакидаги суратлар ҳамда хабарлар эгаллаб турарди. Маълум бўлишича, иш биз тахмин қилганимизга қараганда анчагина жиддий ва тошқин биз тасаввур қилганимиздан даҳшатли бўлганди (Газеталардаги маълумотларга биноан шаҳримизда

олти-етти минг хонадон вайрон бўлиб, етти юз-саккиз юз киши ҳалок бўлганди!) Маълумки, газеталар ҳеч қачон ёлғон ёзмас экан, чиндан ҳам шундай бўлибди-да!

Куёш тоғ ортига беркиниши биланоқ шундай изғирин бошландики, биз бошпанасиз ва оч-наҳор бечоралар ҳаммом ва нонвойхонанинг нам ва сирпанчиқ томига чиқиб, итдек қалтираган ҳолда оз бўлса-да, исиниш мақсадида бир-биirimizning пинжимизга кириб кетдик. Биз хуштаъвое ва интизомли одамлар эмасмизми, марказдан жўнатилган адёл тантанали равищда, тартиб ўрнатилган ҳолда тарқалиши кераклигини тушунардик. Ахир бу ҳазилакам гап эмас-да! Орамиздаги айрим ҳовлиқмалар ҳоким хузурига бориб адёл сўрамоқчи бўлғанларида, бошқалар уларни бу йўлдан қайтаришда жонбозлик кўрсатишиди, ҳар қандай ишда тартиб ва сабр-тоқат бўлиши кераклигини исботлашга уринишарди.

Ўша куни тундаёқ хорижий радиостанциялар ўз эшиттиришларида шахримиздаги вайрон бўлган уйлар сонини ўн-ўн икки мингтага етказишидни ва бошпанасиз қолганлар сони эса бир юз йигирма-бир юз ўттиз мингтага сакраб кетди ҳамда ҳалок бўлганлар сони уч-тўрт минг кишини ташкил этди! Ана, холос! Тошқингача биз қандай улкан шаҳарда истиқомат қилаётганимизни тасаввур ҳам қила олмаган эканмиз. Ўзингиз ўйлаб кўринг: ўн икки минг уй вайрон бўлган жойда, тошқин уч-тўрт минг қурбонни оқизиб кетган тақдирда кам деганда ўттиз-қирқ минг хонадон мавжуд бўлиб, тўрт юз-беш юз минг жон истиқомат қилиши керак эди-да! Ўтган йилги аҳолини рўйхатга олинишида шахримизда бор-йўғи тўрт минг одам истиқомат қилишини билган бўлсак-да, радиода айтилган хабарни ҳақиқат дея тан олишдан бошқа илож қолмаганди. Ахир бу маълумотларни радио эшиттириб турибди-ку. У ҳеч қачон янгишмайди ва ҳеч қачон алдамайди. Афтидан радио муҳбирларининг маълумотлари аниқроқ бўлиб, биз ўзимиз айбдор эдик, чунки шу маҳалгача бизлар қандай улкан шаҳарда яшаётганимизни билмаганмиз. Хорижий агентликларнинг хабарларидан кейиноқ бизнинг шаҳарчамизга хорижий ёрдам оқиб кела бошлади. Венесуэланинг Қизил хоч ташкилоти беш юз минг тонна буғдой ҳамда тuya жунидан тўқилган тўрт минг дона адёлни аяб ўтиради; Норвегиянинг Қизил хоч жамияти эса, қирқ минг тонна шакар, ўн икки минг дона адёл ва ўн беш минг дона банкада ширин сут жўнатди; Гватемаланинг Қизил хочи бўлса, беш юз минг туман нақд пул, ўн икки минг тонна ун ва беш юз палаткани қурбон қилди; англиялик нудистлар жамияти бир минг икки юзта шолча, икки юз элликта палатка, беш юз қоп қанд юборди; Халқаро жониворларга хайриҳоҳлик жамияти нақд миллион доллар пул билан олий навли ўн минг тонна ун, саккиз минг дона аёлларнинг жун рўмоли, катта миқдорда эркаклару аёлларнинг кийим-бошлари, пойафзаллари ҳамда шляпалари ва бошқаларни ҳиммат килиб юборди...

Ахир бизнинг шахримизда ўн икки мингта уй-жой вайрон бўлиб, бир юз йигирма минг киши бошпанасиз қолган ва уч-тўрт минг одам ҳалок бўлганди-да! Бу ҳазилакам гапми, ахир? Наҳотки, бу кўмаклар барчага етарли бўлса?

Ҳоким жаноблари, муниципалитет раиси ҳамда унинг ўринbosарларининг омборлари ва хужралари тўлиб-тошиб кетганди. Озиқ-овқат ва молларни яна қаерларга жойлаштириш мумкин? Ўз-ўзидан маълумки, буларни ишончли сақлаш жойлари молия, ҳалқ таълими, ер билан шуғулланиш ва адлия бўлимлари бошлиқларининг омборлари хисобланарди.

Оллоҳ улардан марҳаматини дариф тутмасин! Агар улар бўлмаганида барча қўмак ҳавога учиб кетарди. Ахир биз, тошқин жабрдийдалари шунча бойликини қаерда ҳам сақлай олардик, дейсиз!

Тошқиндан кейинги тун ғам-ташвиш билан ўтди. Эртасига эрталаб каллаи сахарданоқ безгак тутаётгандек қалтираётган халқ тағин ҳокимлик биноси олдига тўпланди. Аммо бу сафар табуретканинг қораси кўринмайди. Ҳоким жаноблари тошқин қурбонларига ёрдам кўрсатувчи комиссия мажлисини ўтказаётган бўлгани учун жабрдийдалар билан дийдорлашиш жаноб муниципалитет раисига топширилган эди.

Муниципалитет раиси столга чиқиб олди. У бугун кечагига қараганда анча қувноқ эди. Худо марҳаматига олгурнинг ўзини тутишини қаранг-а! Ахир бизга раҳм-шафқати келиб, юрак-бағри қонга тўлиб турган бўлса ҳамки, бизда ҳушёрлик уйғотиш ва келажакка ишонтириш учун табассум килишига тўғри келди! Қарабсизки, бизлар ҳам ҳушёр тортдик.

Муниципалитет раиси ҳоким жанобларининг шахсан ўзлари каршимизга чиқа олмагани учун кечирим сўради. Гап шундаки, дея тушунтирди у, ҳоким жаноблари тун бўйи шахримизга етган зиённи ҳисоблаш чиқиши билан овора бўлиди. Тошқин жабрдийдаларига адёл ва озик-овқатлар тарқатиш масаласи тез орада ҳал этиларкан. Фақат сабр-тоқатли бўлиб, энг муҳими хотиржамликни ва тартибни сақлаш керак эди. Шу билан у муҳтасаргина нутқига яқун ясади. Шу тунда совукқа дош беролмай бир неча киши жон таслим қилди. Эртасига ҳоким жаноблари билан муниципалитет раиси комиссия ишлари билан машғул бўлишар экан, тўплангандар қаршисида муниципалитет девонхонаси бошлиғи – жиккаккина серғайрат киши сўзга чиқди. (бу сафар столнинг ҳам, табуретканинг ҳам қораси кўринмади). Девонхона бошлиғи ҳам тез орада комиссия ўз ишини якунлаши ва ана ўшанда қимматли ҳамشاҳарларимизга зарур қўмак берилиши ҳақида қуюқ ваъдалар қилди.

Халқ яна тарқаб кетди ва эртасига ёқ яна ҳокимлик биноси олдида тўпланди. Бу сафар бизнинг кўз олдимизда муниципалитетнинг бош фарроши намоён бўлди.

– Сизларнинг ҳадеб бу ерда пайдо бўлаверишларингиз, – деди у – жаноб комиссия аъзолари ишининг бир меъёрда боришига халақит бермоқда. Жаноб муниципалитет раиси ўз ўринбосарларига, ўринбосарлари эса ўз навбатида бўлим бошлиғига, бўлим бошлиғи бўлса менга ҳадеб бундай сабр-тоқатсизлик қила беришга барҳам беришни айтиб қўйишни буюрдилар. Вакти-соати келиб сизларга тегишли ёрдам кўрсатилади!

Биз яна қўлимизни бурнимизга тикиб қайтдик. Шахримизнинг ахолиси ўта кетган ишонувчан, соддадил ва умидвор халқ.

Орадан ўн кун ўтиб кетган бўлса-да, жабрдийдалар икки юз-уч юз адёлдан (яъни, ҳар ўн икки кишига биттадан) бўлак ҳеч қандай ёрдам олганлари йўқ.

Нихоят ажойиб тонгларнинг бирида тоқатимиз тоқ бўлди ва яна ҳокимлик биноси олдида саф тортдик ҳамда ҳоким жанобларининг ўзлари чиқишиларини талаб қилдик.

Орада бўлиб ўтган узоқ, кераксиз тортишувлардан кейин ахири саноқли аъёнлар кузатувида ҳоким намоён бўлди. Бу сафар унинг енгидага ҳеч қандай қора тасма кўринмаганди, биз бундан қувониб кетдик: демак, ҳамма иш ўз жойига тушиди, мотам якунига етган.

Халойиқ ҳокимни гулдурос қарсаклар ва “ура” садолари остида кутиб олди. Бақириқ-чақириқлар тинчигач, ҳоким жаноблари зинага кўтарилди-

да, оломонга қараб сўради:

– Бу ерга нега тўпландинглар?

– Ҳоким жаноблари, ўзингиз биласизки, – дадиллик билан сўз бошладилар олдинги қаторда турғанлар, – сув тошқини бизни бошпанасиз қолдирди. Биз ваъда қилинган кўмакни олгани келдик.

Ҳоким жаноблари қип-қизил, гўштдор бўйини қашиб туриб, хайратомуз деди:

– Наҳотки шу маҳалгача ёрдамни олмаган бўлсангиз?

– Йўқ, ўн кишига бир дона адёлдан бошқа ҳеч вақо олмадик...

Ҳоким жаноблари ғазабдан қизариб кетди ва бирдан ғайритабиий овозда бакириб қолди:

– Аблаҳлар! Сизнингча, биз қанча адёл беришимиз керак эди? Виждонсизлар, тамагирлар, озгина бўлса ҳам уялинглар!

Шаҳар посбонларининг бошлиғи Абдулқодир бир неча ўнлаб девқомат посбонлари ёрдамида ҳалқни ҳайдаб солди. Кимки озгина қаршилик кўрсатгудек бўлса, қўлларини орқага қайтариб, жамоат тартибини бузганлиқда айблаб, олис туманларга бадарға қилинди.

Эртасига қуёш мўралаб чиқди, ҳаво илиб кетди, ҳаяжонлар сўнди. Абдулқодирнинг буралган мўйловидан ҳамда посбонларининг таёқларидан кўрқиб, юрак олдирганларнинг биронтаси ҳокимлик биносининг яқинига йўллашга журъат қилолмади.

Орадан бир неча кун ўтгандан кейин биз марказий матбуот кўплаб саҳоватпеша жамиятлар ҳамда турли ташкилотлар, ер юзининг деярли барча жойидан шаҳrimизнинг тошқиндан жабр кўрганларига талайгина кўмак берилгани ҳақида хабар ўқиб қолдик. Қарангки, ҳар бир жабрланган кимсага биттадан брезент палатка, тўрттадан тия жунидан тўқилган адёл, беш қопдан икки марта тегирмондан ўтказилган ун, юз килограммдан канд ҳамда эллик мингдан юз минг риёлгача нақд пул берилибди. Бундан ташқари, тошқиндан жабрланганларга ёрдам кўрсатиш комиссияси томонидан олти минг беш қаватли, кенг пешайвонли, ваннали, борингки, барча қуликлар мавжуд бўлган хонадонлар қурилиши лойиҳалаштирилибди. Ва ниҳоят, тошқин содир этилганидан ўн беш кун ўтгач, ҳоким жаноблари бошлиқ номи зикр этилган комиссиянинг жонбозлиги туфайли шундай хонадонлардан икки мингтаси қуриб битказилибди ва кейинги ҳафтадан аҳолига тантанавор топшириларкан. Қолган тўрт минг хонадоннинг қурилиши эса жадал суръатлар билан олиб борилаётгани ва яқин кунларда қуриб битказилиши айтилганди.

Тошқин қурбонлари ўзларининг беҳисоб телеграммаларида ташкилотлар бошлиqlарига, комиссия аъзоларига беғараз ёрдам берганлари ҳамда хушёрлик билан кўрсатган муносабатлари учун чин дилдан миннатдорчилик билдирганди.

Рус тилидан
Мурод ПАРИХЎЖАЕВ таржимаси



Николай Алексеевич НЕКРАСОВ

ШАҲАРДАН ТАШҚАРИДА

“Қизиқ, бизни қувонтиар олис жилға жилдираши,
Хатто кекса шу эманнынг сирли-сирли шилдираши.
Эритади кўнглимизни ҳазин-ҳазин куйлаб, қурғур,
Бу бекорчи ўсмирлардек оқшом палла тинмай булбул.
Олис кўкнинг бу гумбази тўлиб юлдузлару сир-ла,
Наздимизда нурли қўлин бизга чўзар меҳр бирла.

Тўлин ойдан мароқланиб олисларга тикилган дам
Биз сезамиз кўнглимизда бир хўрсиник, ғалати ғам.
Шундоқ ғамки, баҳтдан тотли, қайдан келар бундай туйғу,
Хўш, нимадан бунча шодмиз, ахир гўдак эмасмиз-ку?
Оғир меҳнат қувончларга рағбатимиз кўнгиллардан –
Қуволмади, наҳот, буткул... яна биздек йўқсилларга
Ким қўйибди табиатдан ҳузурланиб бу яйрашни,
Ўзи қисқа эркимизни бундай бенаф сарфлашни?”

– Эй, бўлди, бас қилинглар-ей, ростин айтсан, дардим олди –
Қишлоқ, барча ғам-гуссани кўнглимиздан ҳайдаб солди,
Эсадан чиқди, рухни эзар охири йўқ оғир меҳнат,
Жонга теккан камбағаллик ва узлуксиз азоб, заҳмат...
Ҳа, ёзилди кўнгил жиндек... ҳа, яхшиси, келинг, шу кун
Мадҳ этайлик кисматимиз қашшоқ қилиб яратган-чун.
Кўрмасак-да фаровонлик ҳамда эркнинг неъматин биз,
Табиатнинг дафинасин ғоятда тез ҳис этамиз.
Бу бойликни Ер юзининг тўқ, зўрлари кўролмайди,
Камбағалу йўқсиллардан уни тортиб ололмайди.

* * *

Билмам, қандоқ ўзгаларнинг фикрати,
Менга ёқар Ернинг турли неъмати.

Шу азиз Ер, шу офтобда яйрайман,
Хоҳиш, ишонч, ҳисга тўлиб яшайман.

Кулок дингдир ҳамда чанқоқ бу кўзим,
Тўёлмасман бу ҳаётга ҳеч ўзим.

Унда доим нени қўмсаб йиғлайман?
Ҳеч нафи йўқ дард-ла дилни тиғлайман.

Нима учун изламай баҳт-барорим
Катта йўлдан юриб қўплар қатори?..

ЭЛЕГИЯ

1

Майли, бизга десинлар; одатлар боқий эмас,
“Жафокаш ҳалқ” мавзуси эскирди бу кунда, бас,
Шеърият ҳам гар уни унутса, бўлмас ёмон...
Йўқ, ишонманг, сиз ёшлар, у эскирмас ҳеч қачон.
Эскитолса, эҳ, қани, уни ўтган бу йиллар,
Дунё ривож топарди!.. Афсуски, ҳамон эллар
Қашшоқликда судралар, даррага тобе бари,
Такир ўтлокда юрган ориқ пода сингари.
Қарғаб улар қисматин илҳом хизматда ҳар чоғ,
Ер юзида йўқ ўзга бундоқ пухта иттифок.
Халқнинг ночор ҳолидан киборларга урар дам,
Улар айшу ишратда яйраб, базм қурар дам.
Мақсади – ҳалққа буриш зўрлар диққатин мудом,
Шундоқ улуғ хизматга ҳамиша шайдир илҳом.

2

Мен барча ижодимни ўз ҳалқимга бахш этдим,
Улгурмасдан у таниб, эҳтимол, ўлиб кетгум.
Хизмат қилдим астойдил, шундан кўнглим тинчdir сал,
Майли, зиён бермасин жангда ёвга ҳар аскар.
Лекин жангга кириш шарт, жанг тақдирни ҳал қилар,
Мен гаройиб кун кўрдим, Россияда йўқмиш қул!
Тўқдим қувонч ёшларин, кўнглим бўшаб, денг бирам.
“Хомхаёлни қилгил бас, лақма бўлма сен кўп ҳам! –
Илҳом менга шундоқ дер, – Фурсатидир, олға, қалқ!
Озод бўлишга бўлди, баҳтлимикан, илло ҳалқ?

3

Ўроқчилар куйларми яйраб ўрим кезида,
Чол юарми қўш ҳайдаб аста омоч изидан.
Чопиб-ўйнаб юарми ошиб ўтлок, далалар,
Ота нонуштасидан қорни тўйган болалар?..
Ялтиарми чалғилар, ўроқлар шайми ишга,

Мен жавоб қидираман хаёлимни жунбушга –
Келтирган сўроқларга:” Сўнгги йиллар, сўнгги пайт
Жиндак енгил тортдингми, дала иши, қани айт.

Узоқ қуллик ўрнига келган озодлик ахир
Келтирдими ўзгариш ё енгиллик бирор-бир...
Турмушда, қўшиқларда бирор янгилик борми,
Ё қўшиқлар ҳали ҳам ғуссали, азадорми?..

4

Оқшом тушиб боради, орзу жўшгай бу дамлар,
Экинзору ўтлоқда қатор-қатор ғарамлар,
Кезинаман ўй суріб ғира-шира паллада,
Ўз-ўзидан яралар қўшиқ бу он каллада.
Кечдаги ўй ҳар ҳолда чикқан бугун рўёбга,
Мен суқланиб қарайман, қўзим қувнаб атрофга,
Орзуларим тимсолин бунда кўрган бўламан,
Қишлоқни, меҳнаткашни суюб, дуо қиласман.
Халқимни эзганларга йўллайман тавқи лаънат,
Уни кўллаганларга тилайман кучу қудрат.
Янграр шунда қўшиғим! Уни тинглар қир, ўтлоқ,
Унга жавоб беради акс садо-ла олис тоғ,
Ўрмон ҳам жавоб бергай, мени тинглар табиат...
Аммо У... жононни куйлайман ушбу фурсат,
Фақат унга тегишли шоир қилган бу хитоб,
Фақат ўша эшитмас ҳам бермас менга жавоб.

* * *

Уруш даҳшатига келса-да ваҳмим,
Ҳар янги қурбонни эшитганим дам, –
Дўсти, хотинига лек келмас раҳмим,
Раҳмим келмас ҳатто ўшал мардга ҳам.

Сабаби, аёллар кўнишиб кетар,
Дўст-чи, дўст унугтгай яқин дўстни ҳам.
Аммоқи, қайдадир мунис жон яшар,
Ўша то ўлгунча тутадир мотам.
Бизнинг бу ғаламис, разил ҳаётда
Турли тубанликка дуч келиб юриб,
Бир марта ҳайратда қолганим ёдда
Самимий тўқилган кўзёшни кўриб –
Ҳа, у кўзёшийди мажруҳ онанинг...
Оналар унутмас асло болани,
Қонли жанггоҳларда бўлса-да увол...
Қандоқ кўтармасин, ахир мажнунтол
Ўзининг эгилган шохи-новдасин...

* * *

Соат олтиларда мен қуни кеча
Сомон бозорига кирсам, кеч томон,
Бир деҳқон хотинни қийнаганича

ЖАҲОН АДАБИЁТИ

Жаноб дарра билан уради ёмон.
Ҳеч уни чиқмасди аёлнинг, бироқ
Дарра “шиғ-шиғ”ига қулоқ тўларди...
Илҳом парисига дедим ўша чоғ:
“Бу аёл туғишган синглинг бўлади”.

РОМЧИ АЁЛ

Бизга яқин бир қишлоқда ромчи аёл бор,
Дам уради сув, ароққа, не бўлса дучор.

Аллақандай гиёҳ билан фол кўради у,
Бу ярамас солар дилга ҳамиша қўрку.

Башорати нуқул кулфат, яхши гапи кам,
Йиғла деса, йиғлаворса керак денгиз ҳам.

Тангри бизга кўп меҳрибон, рус халқи бироқ
Йиғлашни денг ёқтиромайди, куйлайди кўпроқ.

Бир бақироқ йигитга дер бир кун жодугар, –
Итхонага бопсан, тўрам олсалар агар.

Қарасалар, бир ой ўтгач ҳаммаси бўлиб,
Ўрмонда у ит совитиб юрар, бўкириб.

Степанга дебди бирда: “Кўп кериласан –
Кўк отинг-ла, лекин ундан тез айриласан!

Айрилмасанг, бало бўлар бошингга бу от!..”
Степанни чўчитдилар рекрутлик-ла бот.

Отни сотди, пора бериб аранг қутулди,
Бу фоллардан бутун атроғ кўп ҳайрон бўлди.

“Шошма, мен ҳам бориб кўрай бир ўшанга, вей...
Деб ўйлабди кекса дехқон, содда Пантелей.

Кимга нени у олдиндан қилса башорат,
Шу ҳодиса бўп турибди, жуда аломат.

Ё ичиди шайтони бор, айтиб ўтирап?!
У манзилга етиб келиб, бир четда турар.

Кутар, ромчи хузурида бор экан қизча,
Кўрган сари кўргинг келар, юzlари кулча.

Ёнбошида йигит ҳам бор, турқидан – қарол.
Қизга ромчи дер: “У билан боғланма зинҳор!

1 Мажбурий ҳарбий хизмат (тарж.).

Ўзгачадир пешонангга ёзилгани ул –
Жиндак азоб, кейин озод бўласан буткул.”

Бу муждадан қарол ҳанг-манг. Ромчи унга дер:
– Ҳой йигитча, баҳтинг кулмас, гапга қулоқ бер,

– Айтавер!..
– Ҳа, айтуврайми... Сени шу қишида
– Жазолашар, сўнг қўясан ружу ичишга

Соч-соқолинг ўсиб уйда ётасан, магар
Атрофингда базм қуарар шайтонваччалар.

Сени хўрлаб судрашади жаҳаннам тишга,
Сен улардан юзтасасин шиша идишга.

Қамайсану чўп тиқасан оғзи – тешикка!..”
Пантелей-чи, шу дам урап ўзни эшикка.

– Нима бўлди, ҳой оқсоқол, тўхта фол кўрай.
– Кераги йўқ, – тўнғиллар чол, – бир ўйлаб қўяй...

Биздан не ҳам топар эдинг, ёшларга кўр фол,
Мен ҳозирча сабр қилгум...эй, шайтон аёл.

Сен топағон бўлсанг агар, бизга айт-чи бот:
Ахир қачон тўралардан бўламиз озод?

ВИДОЛАШУВ

Ажралишдик ярим йўлдаёқ,
Жудоликми буёғи, ҳайҳот!
Биз ўйладик, кечар енгилроқ.
Сўнгги разил “кечир” у “наҳот?..”

Йиғлашга ҳам ҳолим йўқ, инон,
Хат ёзиб тур... ёзиб турсанг бас.
Хатинг менга азиз, муқаддас –
Гуллар каби қабрдан чиққан,
Юрагимнинг қонли қабридан...

АХЛОҚЛИ КИШИ

I

Мен бир умр ахлоққа мувофиқ яшаб
Қилмаганман бировга ёмонлик сира.
Хотиним-чи, юзига вуал¹ ни ташлаб,
Кечда кетди ўйнашин уйига қараб,
Тун оғдириб, миршаб-ла бостириб бордим,

¹ В у а л – юзга тутиладиган тўр.

Фош қилдим, у ташланди, мен оғир бўлдим.
Хотин эса, ётволди шу кундан бошлаб,
Сўнг номусдан бўлди ер, ғамнок, дилхира...
Мен бир умр ахлоққа мувофиқ яшаб
Қилмаганман бирорвга ёмонлик сира.

II

Қайтармади карз олиб вақтида ошнам,
Эслатсам ҳам олмади гапни қулоққа,
Бу мушкулни қонунга оширдим мен ҳам,
Қонун тикиб қўйди денг уни қамоққа.
Ўлиб қолди у ерда, бермай бир чака,
Гарчи ҳақим бўлса-да, бўлмадим хафа.
Қарзидан-ку, кечвордим шу кун бир сира
Ҳам эсладим уни кўп дийдамни ёшлаб.
Мен бир умр ахлоққа мувофиқ яшаб,
Қилмаганман бирорвга ёмонлик сира.

III

Ошпазликка топширдим дехқон болани,
Яхши ошпаз бўлди у, бу қанақа баҳт!
Бироқ тез-тез тарқ этиб у ошхонани,
Кўча-кўйда дайдишни қилволди одат.
Билсам, бачки ишларга қилибди ружу –
Китоб ўқиб, ақлини чархлар эмиш у.
Пўписаю койишдан ахир чарчаб, шу –
Оталарча бир-икки урдим, шу сабаб
Ўзин ташлаб дарёга ўлди... юзқора.
Мен бир умр ахлоққа мувофиқ яшаб,
Қилмаганман бирорвга ёмонлик сира.

IV

Ёлғиз қизим бўларди, домласин севиб,
Келишибди у билан қочишга, қаранг,
Қарғайман, деб чўчитдим бу ишни сезиб,
Бўйин эгди, сўнг уни кўндириб аранг,
Бердим кекса бир бойга ... турмушийди соз,
Илло Маша толиқиб юрди-да бироз,
Ўлди силдан йил бўлмай ... ёш ҳам бокира.
Кетди доғда қолдириб, кўзимиз ёшлаб...
Мен бир умр ахлоққа мувофиқ яшаб,
Қилмаганман бирорвга ёмонлик сира.

КЕЧИР

Кечир, унут тушкун кунларни,
Ҳасрат, ғусса, дилгир унларни.
Унут кўзёш, изтиробларни,
Рашқ аталмиш ул азобларни.

Ишқ қүёши лек бошимизга
Чиқкан дамлар нур сочиб бизга.
Иккимиз ҳам хушвақт, баҳтиёр –
Бўлган кунни унутма зинхор.

* * *

(ЛЕРМОНТОВГА ЎХШАТМА)

Ўсдим олис овлоқда, яrim ваҳший қишлоқда,
Кишилар ичидаги жоҳилу бебош.
Тақдир менга ғоят зўр химмат қилди у чоғда –
Бир тўп итбоқарга бўлиб қолдим бош.
Қайнар эди теграмда гирдоб – ғийбат, уятдан –
Йўқчилик ҳирслари хўп туғён урар,
Кўнглимга-чи, у хунук ва беъмани ҳаётдан
Ўтириб борарди ёмон қуйқалар.
Бу гапларга етгунча ақлу фаросатим, ман –
Бир гўдак, нимаям қила олардим.
Иллат эса, кун сари заҳарли нафас билан
Бутун вужудимни эгаллади жим.
Шу эканда ҳаёт деб, ҳовликиб, фикр қилмай
Шўнғидим ва лойқа оқимда оқдим.
Гулдек ҳур ёшлигимни гоҳ билиб, гоҳи билмай,
Фаҳшнинг бехаё ўтида ёқдим.
Йиллар ўтди... у таниш даврадан уздим оёқ,
Эски ошналарни қилиб дарғазаб,
Ҳамон-ҳамон эсласам, бенаф бўлса-да, бироқ,
У бебош ёшликни қўяман қарғаб.
Қаранг, бирдан танимга қайтди куч ҳам мадор,
Уларни қайтарган эмас ҳасратим,
Мудҳиш жимлик ва совуқлик ўрнин қайта бор
Олди ёшлигимнинг забти, файрати.
Яна йўлга шайландим, бу жонимни ўртаган
Дард билан, бирорта мўлжалсиз у дам,
Ўйлар эдим, бу юрак бемаврид ўлдирилган,
Қайта тирилмагай энди сира ҳам.
Аммо сени учратиб, туйдим дилда ҳаяжон,
Тирилди кўксимда юрак шу фурсат.
Аввалги изтиробу дардлар изини шу он
Ўчириб ташлади дилдан муҳаббат.
Яна орзу-умидлар, хоҳишлар менга йўлдош,
Мени севмасант ҳам майлига, зарра.
Лекин тушун, бу таниш укубат ҳамда қўз ёш
Менга ёлғизликдан афзал минг карра.

СУДХЎР

Ёшим тўртга етгач, отам –
Берди маслаҳат:
Бу дунёнинг бори бекор,
Бойлик йиф фақат.

Отамнинг бу доно сўзи
 Менга кор қилди,
 Тонгда туриб чўнтағидан
 Беш тийин шилдим.
 Ана шундан бошланди бу
 Пул йиғиш дарди,
 Лайча каби бой, тўрага
 Хўп суйканардим.
 Ялар эдим қўл, оёгин
 Тап тортмай хеч ҳам.
 Шундай қилиб етти ёшда
 Бўлдим муттаҳам.
 Рости, элда шундок дерлар,
 Лек ўшандা ҳам,
 Томорқада бўлар эди
 Кўмилган ақчам.
 Бор дейдилар ҳавас туйғу –
 Билмайман недур,
 Ҳаёт – мен-чун пул ундириш
 Санъати эрур.
 Қоним эрта совитганми
 Ҳасислик беҳад –
 Тез англадим йўқ гаплигин
 Номус, муҳаббат.
 Билдим, дунё бир қўлмагу
 Дўст-ёр – фирибгар.
 Чўнтағингга тушиш учун
 Пинжингга кирап.
 Билдим, бадкор ор-номусдан
 Наф олмайсан, бас,
 Ақчаси йўқ экан разил,
 Қалби йўқ эмас.
 Зиқналикка шу алпозда
 Кўнига бордим,
 Ва отамни ол, деб ҳар шом
 Рабга ёлбордим.
 Яхши эди, кўп меҳрибон
 Ҳам сахий у зот,
 Чорбоғдаги уйда ўлди
 Куни битгач бот.
 Оғир бўлди... мен мурдага
 Ўзни ташладим,
 Бор киссасин йиғлаб туриб
 Кавлай бошладим.
 Кейин сотдим пулга арзир
 Бўлса не бисот,
 Сўнг пулларни ишга солдим
 Қилиб эҳтиёт.
 Бой бўлишга жаҳд айладим
 Шолғом, пиёз еб,
 На қўл, на бел, на юз қолди

Бой бўламан, деб
Патин юлиб, сўнг жўнатдим
Кўлга тушса ким,
Сочидан ҳам кал бўлгунча
Фоиз ундиридим.
Соч ўстирсин хоҳлаганча
Дея қўлладим,
Тушган пулни сартарошга
Ҳар йил пулладим.
Шундан, ҳозир, ёш ўтса-да
Унча-мунчам бор.
Майли, улус деяверсин
Муттаҳам, айёр.
Айёр эмиш! Йўқ, авломан!
Бу гаплар – аён:
Пулни сочиб бир зиёфат
Берсамми, шу он
Бу “айёр”нинг пинжига, денг,
Кираплар чаққон,
Кимдир менга авлод чиқар,
Ким – дўст, ким – ошна,
Ва энг ҳалол, энг яхши – мен!..
Шундоқмасми, а???

*Рус тилидан
Раззок АБДУРАШИД таржималари*

ФИДОКОРЛИКНИНГ ГЎЗАЛ НАМУНАСИ

*Николай Алексеевич Некрасов ўз ҳаёти ва ижодини Ватани, ҳалқига баҳ-
шида этган буюк рус шоири эди. У қисқа, аммо ибратли умр кечирди.*

Некрасов 1821 йилда туғилди, болалиги Ярославл губерниясида Грешино-
во қишлоғида ўтди. У дастлаб, Ярославл гимназиясида, сўнг Петербург уни-
верситетида ўқиди. Аммо иқтисодий таңглиқ университетни эрта (1841 й.)
ташлашга мажбур қилди. Шу ўили унга бошқа билимгоҳ – Петербург Адабий
тўғаракларининг эшиги очилди. Бу тўғаракларда беш йил адабий сабоқ олди.

Бу йилларда у Белинский, Чернишевский, Доброполов каби демократ зи-
ёлилар билан яқиндан танишиди, уларнинг ҳалқпарвар ғояларидан баҳраманд
бўлди, шу кишилар таъсирнида шахс ва шоир сифатида шаклланди. Бу таъ-
сирларнинг натижаси ўлароқ 1846 йилда “Петербург тўплами” деган кито-
бини нашр эттириб, кўпчиликнинг назарига тушди.

Шоир ана шу ҳалқпарвар зиёлилар каби мазлум ҳалққа сидқидилдан хиз-
мат қилишга бел боғлади ва умрининг сўнгига қадар шу аҳдига содик қолди.

1856 йили нашр эттиган “Шеърлар” китоби унга катта шухрат келтирди.
Ундаги “Шоир ва граждан”, “Ватан”, “Маҳкамма эшиги олдидағи ўйлар”, “Йўлда”,
“Замонавий қасида”, “Мозорингни қўлдим зиёрат ...”, “Унумилган қишлоқ” каби
бир қатор асарларни ўша давр зиёлилари юксак баҳоладилар. “Шоир ва граж-
дан” шеъри бу китобга кириш сўз сифатида берилган бўлиб, унинг йўналиши
ва характеристерини белгиларди. Белинский бу китобдаги шеърларни мақтади,
айниқса, крепостнойликни хаспўшловчи либералларга қарши баҳс тарзида
ёзилган “Замонавий қасида” шеърининг долзарб мавзуда битилганлигини
алоҳида таъкидлади.

Белинский Некрасовнинг бу йиллардаги ижодига ўзгача мөхр ва эътибор билан қарайди. Писаревнинг эсласича, у “Ватан” шеърини қўлэзма ҳолида ўқиб, жуда қойил қолади, уни ёдлаб олгач, Москвага – дўстларига ҳам юборади.

“Йўлда” шеърини шоирнинг ўзидан эшишганда эса, кўзида ёш билан қутлаб: “Биласизми, Сиз шоирсиз, ҳақиқий шоир!” деган. Бир мақолосида эса “Амалдор”, “Йўлда”, “Ватан”, “Замонавий қасида” каби асарларни “рус шеъриятининг дурдоналари” деб атаган.

Некрасовнинг асарларига Чернишевский, Добролюбов, Писарев каби бошқа тараққийпарвар зиёлилар ҳам юқори баҳо берганлар. Бундай мақтоз ва эътирофларни кутмаган Некрасов чет элдаги дўсти Тургеневга, “Китобим хусусида мўъжизалар ёзишимоқда, бош айланиб кетиши ҳеч гап эмас... Қулоқ эшишмаган машхурлик! Бундай обрўни Гогол ҳам кўрмаган” деб ёзади.

Дарҳақиқат, Некрасов бу йилларда Россиянинг энг машҳур шоирига айланади. Бу Ватан ва ҳалққа қилган ҳалол, фидоий хизматининг мукофоти эди. Шу хизматига яраша у эътибор ва обрў топди. Обрў бўлгандаям чакана эмас, ўз таъбири билан айтганда, ҳатто “Гогол кўрмаган обрў”га эришди.

Аммо бу китоб, қолаверса, бу машхурлик мустабид ва либерал матбуот вакилларига ёқмади. Улар шоирни ҳаётдаги камчиликларни бўрттириб кўрсатишда айблашибди, ҳар хил тийбат ва тұхматлар билан камситишига уринишиди, ҳужумлар уюштиришибди.

Бу гапларни эшиштагач, у чет элдан Анненковга, “Ёш бола эмасман, нима қилаётганимни яхши биламан. Бундан зўрроқ ҳужумларни ҳам кўрганмиз,” деб ёзади.

Некрасов оғир ҳасталикдан сўнг 1877 йилнинг декабрида вафот қиласди. Дафн маросимига, замондошларининг ёзишларича, ниҳоятда кўп одам ийғилади. Асарлари хусусидаги баҳс ҳатто очиқ қабр устида ҳам давом этган. Фёдор Достоевский ўз сўзида, “Марҳум иқтидор жиҳатдан Пушкиндан кам эмас эди” деганида, ийғилган ёшлар, “Ортиқ! Ортиқ эди!” деб қичқирганлар.

Некрасов нафақат буюк шоир, у иқтидорли драматург, жанговар публицист, санъатшунос, журналист, адаб ҳам эди.

Айниқса унинг журналистик фаолияти эътиборга лойиқ. У 1847–1866 йилларда “Современник”, 1868–1877 йилларда эса, “Отечественные записки” журналларига бош мұхаррир бўлди. Бу фаолиятида ҳам у “халқ мавзуси”га китта эътибор беради, ўз атрофига энг яхши ижодий кучларни тўплайди, ҳар иккى журнални энг ўтқир ижтимоий ва сиёсий минбарга айлантиради.

Некрасов асарлари жуда кўп тилларга таржима қилинган. “Россияда ким яхши яшайди”, “Ватан”, “Темир йўл”, “Маҳкамама эшиги олдидағилар”, “Мозорингни қилдим зиёрат”, “Волгада”, “Бобо” каби асарлари барча шеър мухлисларининг, шу жумладан, ўзбек китобхонларининг ҳам севимли асарларига айланиб кетган. Масалан, 1958 йилда шоирнинг “Танланган асарлар” китобининг ўзбек тилида нашр этилиши ҳам бу фикримизни тасдиқлайди. Мазкур китобга кирган асарларни ўзбек тилига Миртемир, Зулфия, Мамарасул Бобоев, Рамз Бобоён, Тураб Тўла, Насрулло Охундий каби шоирлар таржима қилган эдилар. Бу асарларнинг ҳамон севилиб ўқилиши улар ҳозирда ҳам ўз аҳамиятини йўқотмаганини кўрсатади. Зоро, шоир бор ижодий заковватини мазлум ҳалқнинг эрк ва баҳт учун курашига багишлади, бу кураш эса Ер куррасида ҳамон тугагани ўйқ. Шу жиҳатдан қараганда, Некрасов асарлари бугунги кунда ҳам ибрат намунаси бўлиб қола беради. Энг мұхими, бугунги эрkin турмуш ва мустақилликнинг моҳиятини теран англаш ва қадрлашга хизмат қиласди.

Таржимон



ЗИГРИД КЛЕЙНМИХЕЛ: “ЯНА ВА ЯНА НАВО-

Зигрид Клейнмихел Германияда ўзбек адабиёти хусусида немис тилида нашр этилган антологиялар, энциклопедиялар учун қатор мақолалар ёзган, махсус илмий тадқиқотлар олиб борган забардаст адабиётшунос олимлардан биридир.

— Муҳтарама Зигрид хоним, Сизнинг номингиз Ўзбекистон адабий-илмий муҳитида анча машҳур. Ўзбек адабиётини Германияда ўрганувчилар, таргибаташвиқ қитувчилар, ўзбек адабиёти тўғрисида хорижсда китоблар ёзган олимлар хусусида гап кетса, албатта, Сизни эсга оламиз. Бу ҳолат талабалар аудиториясида ҳам, газета ва журналларда ёзиладиган кўплаб мақолаларда ҳам тилга олинади. Ёши ўзбек олимлари сизни яқиндан таниса, илмий ишларингизнинг асосий ўналишиларини билиб олишиша, айни муддао бўлар эди.

— Мен университетни тугатгандан кейин аввал эски усмонли тили билан шуғулланганман. 1975 йилдан бошлаб Ўрта Осиё туркий халқлар адабиёти ҳақида илмий тадқиқотлар олиб бориб, шу асосда бир қанча мақолалар ёздим.

1986 йилда ўзбек адабиётида драма ва наср (1910-1934 йиллар) тўғрисидаги китобим тайёр бўлди. Афсуски, у фақат 1993 йилда нашр қилинди. Бу китобни ёзиш осон кечмади. Чунки у пайтда манбалар деярли йўқ эди, уларни Тошкент, Москва, Ленинграддан топиш мумкин эди. Китобдан нусха олишнинг имкони бўлмасди. Бунинг учун керакли адабиётларни кўлда кўчириб чиқиши талаб қилинади.

Араб алифбосида ёзилган манбаларни (1929 йилгача) транскрипция қилган эдим, чунки мен араб ҳарфларини сизлар каби равон ёза олмайман, лотин (1939 йилгача) ва кирилл алифбосида босилган китобларни ҳам шундайлигича кўлда кўчириб чиқдим.

Ўша даврда ГДР Фанлар Академиясининг Адабиёт тарихи институтида ишлаганман. Шу сабаб туркий халқлар адабиётига тегишли мақолаларим асосан йигирманчи аср адабиёти муаммолари билан чекланган эди (Масалан, Мухтор Аvezov, Абиш Кекилбоев, Улжас Сулаймонов, Чингиз Айтматов ҳақида мақолалар ёзганман).

— Сиз учун аввал замонавий ўзбек адабиётини ўзлаштириши осон кечган бўлса керак. Чунки манбалар тили бўйича маълум бир тажриба, малакага эришилганидан кейин ўзбек мумтоз адабиётига диққат қаратган кўринасиз. Ўзингиз бу фикрга қандай қарайсиз?

— 1990 йилга келиб, аввал бошлаган тадқиқотларимизни давом эттира олмаслигимизни мен ҳам, рус адабиёти билан шуғулланадиган ҳамкасбларим ҳам тушундик. Ҳар ким ўз имконияти ва қизиқишлирига қараб йўл излади. Мен ўша пайтгача фақат XX аср ўзбек адабиёти билан шуғулланган эдим, лекин ўзбек

мумтоз адабиёти ҳақида маҳсус тадқиқотлар олиб бориш түғрисида баъзан ўйлардим. Ҳумбольд университетига у кунларда ғарбий Берлиндан икки-уч талаба келди. Улар мендан "Сизда ўзбек адабиёти бўйича қандай лекциялар, семинарлар бор", дея сўрашди. Мен буларга жавобан ўша университетдаги ҳамкасларимга мурожаат қилиб, "Келаси семестр ҳафтада бир-икки бора талабаларга дарс берсан бўладими?", деб сўрадим. Ижобий жавоб олганидан кейин, таҳсилни Алишер Навоийнинг "Ҳайрат-ул аброр" достонидан бошладим. "Алишер Навоий кулишга доир" мақолам ана шу дарсларнинг натижаси эди. Гарчанд кейинчалик ҳам, кўпроқ замонавий ўзбек адабиёти билан қизиқсан бўлсам-да, барибир яна ва яна Алишер Навоий ижодига мурожаат қиласвераман. Шуни ҳам айтиб ўтиш керак, мен ўзимни навоийшуносман деб ҳеч ўйламайман; навоийшунос эмасман ва келажакда ҳам бўла олмайман. Илмий мақолаларимнинг сони ҳам беш-олтигадан ошмайди (Зигрид хоним шу ўринда камтарлик қилди. Олим "Навоий бенаво", "Навоий ва Аҳмад Пошо", "Алишер Навоий ва усмонли шоирлар", шунингдек, "Навоий ижодида Хизр" ва бошқа жиддий мақолалар ёзган – Б.К.).

Замонавий адабиётдан мумтоз адабиёт тадқиқотчисига айланышим хусусида яна муҳим гапим бор эди... Ленинградда мумтоз туркология соҳаси бўйича ўқиганман. Ўша даргоҳда замонавий туркча (Туркия туркчаси), усмонли, чигатойча (эски ўзбек тили)дан, шулар қатори бир оз форсча ва арабча ўргандим. Менга замонавий ўзбек тилидан кўра мумтоз-чигатойчани тушуниш осонроқдир.

– Зигрид хоним, ўзбек ҳалқ оғзаки ижодига доир "Хоразмда –

халпа, Фарғонада – отин ойи" китобингизни ёзиши жараёни қандай кечган? Бу асарни ёзиши гояси қачон пайдо бўлди?

– 1991 йилда ГДР Фанлар Академияси институтларининг кўпчилиги ёпилди. Аммо айrim лойиҳалар билан ишлаш имконияти бор эди. Менинг лойиҳам халпалар ҳақида эди. Йўқ, бу китоб, сиз айтгандай, ўзбек ҳалқ оғзаки ижоди тадқиқи эмас. Мен Хоразмда тасодифан бир халпа билан танишган эдим. У ва унга ўхшаш аёлларнинг ишларини вақт ўтиши билан тушуна бошладим. Маърака ва бошқа йиғилишларда халпалар қандай матнларни ўқииди? Доимо уларнинг кўлида арабий ёзувдаги китоблар бўлади. Улар қандай китоблар эканига қизиқдим. Тадқиқот гояси шу зайлда майдонга келди. Дарвоқе, китобнинг номига қарасангиз, тагсарлавҳада "Zur Geschichte des Lesens in Usbekistan im 20. Jachrhundert" ("XX асрда Ўзбекистонда ўқиш тарихи ҳақида") деб ёзилган. Йигирманчи асрда Ўзбекистонда мавжуд адабий муҳит билан бир қаторда бошқа ўзига хос адабиёт ҳам борлигини тушундим. Такрор айтаман, бу ҳалқ оғзаки ижоди эмас, фольклор эмас. Материал топиш анча қийин эди. Фотоаппарат билан халпаларнинг баъзи матнларини расмга туширдик. Бу ишда Ингеборг Балдауф жуда катта ёрдам берди. Хоразмдан кейин Фарғона водийсига бориш имконияти ҳам юзага келди. У ерда отинойилар билан гаплашиб кўп маълумотларга эга бўлдим.

Ўзбекистонда шундай ўқиш тури тарихи ҳақида олимлар илмий тадқиқотлар яратишса яхши бўларди, менимча. Олдинлари навоийхонлик, фузулийхонлик, бедилхонлик бор эди (Фитратга каранг). Бу ҳам маҳсус ўрганишга азирли бир мавзу.

— Муайян бир адабий мұхит, маълум бир миллат адабиётiga четдан туриб қарашида қандай ўзига хос имкониятлар бор?

— Менимча, бир киши бошқа бир адабий мұхитта четдан қараса, ўз билими, дунёқараши ва тажрибаси асосида ёндошади. Албатта, хорижлик мутахассис нигоҳи маҳаллий олим фикридан бир мунча фарқланади. Лекин бир нарсаны ҳам айтиш керак. Мен асарларимни ўзбеклар учун эмас, европаликлар учун ёзаман. Агар ўзбек олимі ўқиб: “Ха, бу немис олимаси ушбу асарга бошқа томондан қарабди, биз билмаган айрим жиҳатларни күрибди”, деб айтса, ёзғанларим уларга маъкул келса, албатта, мен ҳам хурсанд бўламан. Бўлмаса, мен тасаввур қилганимдек ишларимни давом эттираман.

— Сизнинг илмий ижодингиз, асарларингиз рўйхати билан бир талаба “Зигрид Клейнмихел – ўзбек адабиёти тадқиқотчиси” мавзусида мўъжаз тадқиқот ёзганда, бир озгина танишганман. Ўша ишдан сизнинг ижодий биографиянгиз, ҳам қисқача асарларингиз таҳлили куттилган эди. Аммо тадқиқотдан кўнгил тўлмади. Назаримда, бугунги сұхбат ўша бўйлиқни тўлдирса, ажаб эмас.

— Менимча, ёш тадқиқотчиларга бундай мавзулар берилмаса яхшироқ бўлади. Яхши мавзулар кўп, кўчаларда ётади, уйларда туради, кутубхоналарда эгасини интизор кутади, кутади... Тасаввуримда, менинг ёзғанларимни германистлар ўқыйди. Лекин улар ўзбек адабиётини чукур билмайди. Ўзбек адабиётини биладиганлар эса, немис тилидаги илмий асарларни ўқиб, тушунишга қийналишади.

— Агар Сиз ёзган асарлар:

1. Халқ оғзаки ижодига оид

ишлар, 2. Ўзбек мумтоз адабиёти ҳақидаги мақолалар, 3. Қиёсий адабиётшунослик бўйича ёзилган ишлар, 4. Ўзбек жадид адабиёти, 5. Замонавий ўзбек адабиётiga тааллуқли илмий ишлар тарзида таснифланса, тўғри бўладими? Шунга ўзингиз нима дейсиз? Бу таснифнинг қайси қисмидан кўнглингиз тўлади? Ўзингизни кўпроқ қайси давр мутахассиси санайсиз?

— Бу классификация менинг тасаввуримдан анча узок. Халқ оғзаки ижодига доир ҳеч нарса ёзмаганман. XX асрнинг 70–80-йиллари Хумбольд университетидаги дарсларимда “Алпомиш”, “Эдигей” каби достонлар ҳақида гапирганман. Мен факат достонларга эмас, достон ҳақидаги баҳсларга ҳам қизиқканман. Ўрта Осиё халқларининг йигирманчи аср маданиятини тушуниш учун буларни ҳам билиш керак, деб ўйлаган эдим. Лекин мен бу соҳа бўйича ҳеч қандай илмий иш ёзмадим. Факат фольклоршунос олимларнинг китобларига тақриз ёзганман, холос. Ўзбек мумтоз адабиёти ҳақидаги... Факат Алишер Навоий ижоди ҳақида мақолалар ёздим. Қиёсий адабиётшунослик бўйича ҳам шуғулланмадим. Мен назариётчи олим эмасман. Сиз Навоий билан Аҳмад Пошо ҳақидаги ишимни назарда тутаётган бўлсангиз, бу соғ филологик иш. Туркияда неча асрлар давомида Аҳмад Пошо Алишер Навоий ғазалларига назира ёзганини эътироф қилишган, аммо бу ғазаллар йўқолган, деб тахмин қилинарди. Мен Аҳмад Пошо ғазалларини ўқиб, эҳтимол улар орасида мазкур назиралар бормикин, дея изландим ва баъзиларини топдим. Тадқиқотлар натижасида шу нарса аниқландик, мазкур назиралар Алишер Навоий асарлари тили билан бир хил бўлиши мумкин, деган фикрлар нотўғри бўлиб қолди,

лекин Аҳмад Пошонинг чигатойча ғазаллари йўқ экан. Аҳмад Пошо Алишер Навоийнинг чигатойча, яъни туркий тил (хозирги истилоҳ бўйича “эски ўзбек тили”) билан ёзилган ғазалларига назира йўлида эски усмонли тилида ёзилган ғазаллари билан жавоб берибди... Бу масалалар хақида Афтондил Эркинов билан қизиқарли сұхбатлар қилган эдик. Ўзбек жадид адабиёти. Ҳа, узоқ давр босилмай ётган “Шарқона ёзиш анъанасининг ривожланиши. 1910-1934 йиллар ўзбек драмаси ва насрий асарлар тадқиқи” китобим ўша давр хусусида. Замонавий ўзбек адабиётига тааллукли мақолалар. Ҳа, бунга қўшиламан. Аммо менинг мавлуд ва наът шеърлар хақидаги 2009 йилда нашр қилинган китобимни қаерга қўясиз?

Бу китоб XIX аср адабиётидаги бир-икки адабий матнга, унинг келиб чиқишига, шунга ўхшаш матнларнинг ўзаро муносабати ҳамда таъсирига бағишлиланган мухим тадқиқотдир. Бу асарни халпалар хақида ёзган китобимнинг давоми дейиш мумкин.

— Сизнинг Абдулла Қодирий романлари хусусидаги фикрларингиздан хабардорман. Бир ўринда “Ўткан кунлар” романни ечими реалистик, “Мехробдан чаён” романни ечимида эса романтик пафос устуворлигини таъкидлаганингиз эсимда. Яхши кузатиллар бу. Энди шу адаб ижоди юзасидан бирорта кўнглингизга туғиб юрган гапларингиз бўлса, марҳамат.

— Кечирасиз, Абдулла Қодирий тўғрисида янги бирор гап айта олмайман. Юқорида сиз эслагандек, 1993 йили босилиб чиққан китобимда ва тўқсонинчи йилларда чиққан бир мақоламда фикрлар айтилган. Бундан кейин унинг ижоди билан махсус шуғуллана олмадим.

— Мен 1998 йил “Flachbau”-да “Жинлар базми” бўйича Ҳумболъд университети тала-

балари билан олиб борган семинар машғулотингизда қатнашган эдим. Машғулот маъқул келгани учун ҳалигача эслаб юраман.

— Қодирийнинг шу хикояси менга жуда ёқади. Бу хикоядан машғулотларим давомида бир-икки бора махсус фойдаланганман. Узр, тўғри, бундан ташқари, Қодирий ижодини айрим замонавий адибларнинг асарлари билан солиштирғанман. Бироқ булар махсус мақола тарзида нашр қилинган эмас.

— Мустақиллик йилларида ижодкорларимиз бадиий тафаккурида рўй берган ўзгаришлар, табиийки, собық Иттифоқ миқёсидаги адабиётшунослар ижодида ҳам кузатилмоқда. Бу ўзгаришлар хориждаги ўзбек адабиёти тадқиқотчиларига, хусусан, сизнинг ижодингизга ҳам таъсир қилдими?

— Юқорида айтганимдек, мен назариячи эмасман. 1910-1934 йиллар адабиёти бўйича илмий изланишлар олиб бораётганимда ҳам ўзбек адабиётшунослари қандай ёзганига қизиқсан эмасман. Уларга қандай муносабат билдирилганидан хабарим йўқ. Менинг учун энг мухими 1910-1934 йилларда ёзилган асарлар бўлди. Ҳозир ҳам назарий масалаларга қизиқмайман. Албатта, шундай қилсан, мен ёш ўзбек олимлари учун ўрнак бўла олмасман. Тадқиқот методларини билиш керак ва ҳар киши ўз мавзуига лойиқ методни танлаши лозим. Сиз адабиётшунослик методларини талабаларга ўргатасиз. Бундан хабарим бор.

Ҳа, бир иловам бор экан. Саксонинчи йилларда икки-уч кишининг илмий асарларига кўзим тушди. Улар орасида Баҳодир Саримсоқовнинг китоблари бор эди. Бу олим мавзуларни мустақил танлайди, мустақил ёzádi, деб ўйлаган эдим. Шундан кейин ўзи билан танишдим, оиласи билан

ЖАҲОН АДАБИЁТИ

ҳам танишдим. У киши ҳақидаги тасаввурларим, фикрларим түғри чиқди. Бу киши дунёдан тез ўтганидан афсусдаман.

– *Негадир баъзан чет эл олимларининг фикрларига охирги бир ҳақиқатдек қараашади. Шахсан, мен буни баҳсли деб биламан. Лев Шестов деган рус файласуфи ўша тушунчанинг нисбий эканига ургу бериб, мазмунан: "Дунёда қанча одам бўлса, улардан ҳар бирининг ўз ҳақиқати бор", дейди. Шу фикрга қандай қарайсиз?*

– Бу масалага мен ҳам Сиз каби қарайман. Л.Шестов жуда маъкул гапни айтган экан.

– *Алишер Навоийдек улкан шоирлари бўлган ўзбек адабиётидан дунёдаги боиқа миллиат ўқувчилари ҳам баҳраманд бўлишилари керак эмасми? Сизнингча, ўзбек адабиётини ким дунёга танитади? Ва шунга қўшимча кичкина бир саволим бор: кейинги давр ўзбек адабиёти ва адабиётшунослигини кузатишга имкон топаяпсизми?*

– Бир адабиётни ёки бир адабиётнинг баъзи мафкурачи шоирларини, ёзувчиларини тарғибот қилиш собиқ Иттифоқ вақтининг фикри эди. Бу фикр, умуман олганда, ёмон эмас. Лекин бу иш олимларнинг иши бўла олмайди. Бу нашриётларнинг иши, таржимонларнинг иши. Баъзи олимлар таржимон ҳам бўлса, яхши. Лекин бу шарт эмас, менимча. Ўқитувчиларимдан бири бўлган Сергей Иванов Алишер Навоийнинг шеърларини русларга танит-

ди, ўлкамда шундай яхши олим, таржимон ва шоир бўлган бошқа киши йўқ. Алишер Навоийнинг шеърларини дунёга танитиш, менимча, жуда қийин экан. Мен ўзимга шундай мақсадни кўйган эмасман. Мен унинг шеърларини баъзан ўқийман, уларнинг орасида мен учун кизикарли бўлган бир нарсани топсан, ёзаман. Хоҳлаган одам ўқиши мумкин...

Хозирги ўзбек адабиётини ўқийман, лекин оз. Лондонда чиқкан ўзбекча бир китобни ўқидим. Абдулҳамид Исмоилнинг “Муртад” деб номланган китобини. Узбеклар бу китобдаги асарларидан баъзиларини, менимча, келажакда Абдулла Қодирий китоблари каби мамнуният ва хурсандлик билан ўқиди.

Ўзбек адабиётшунослигига келганда, китоб ва журналларни мунтазам кузатиш имкониятим йўқ. Лекин 2012 йилнинг февраль ойида Истанбулда Алишер Навоийга бағишлиб ўтказилган бир конференцияда ўзбек олимлари ҳам иштирок этди. Мен Ҳамидулла Болтабоев билан танишдим. Унинг китобларини жуда яхши кўраман. Иброҳим Ҳаққул билан ҳам танишдим. Бу олим китобларини кўп йиллардан бери биламан, хозир ҳам ўқийман.

– *Зигрид хоним, қимматли вақtingизни аямай, саволларимга жавоб берганингиз учун раҳмат! Саломат бўлинг!*

Баҳодир КАРИМ сұхбатлашиди



НЕМИС ФАЛСАФИЙ ТАФАККУРИ

Фалсафа тарихини ёзиш осон иш эмас. Фалсафа умумисоний ҳодисадир. Муайян миллат доирасидагина шаклланган соф миллий фалсафа бўлмайди. Унинг у ёки бу миллатга мансублиги, бошқача айтганда фалсафани миллий фалсафаларга таснифлаш хийла шартли бўлиб, фалсафа тарихини ўрганишни муайян тизимга солиш учун хизмат қиласди. Биз бу ўринда немис фалсафаси деганда мазкур ҳалқ тилида ижод қилган файласуфларнинг қарашлари йигиндисини тушунамиз. Европада фалсафа XVI асрдан бошлаб уч йўналишда ривожлана бошлади. Булар инглиз, француз ва немис фалсафалари эди. Италия бу борада ўз етакчилик мавқеини бой бериб улгурди. Испан ва голландлар ҳам мазкур уч йўналишдан бирининг таъсирида қолди. Англияда эмпиристик (тажрибавий билимларга ургу бериш. Бекон, Локк, Беркли, Ҳюм мазкур ёндашувнинг класиклари эди) ёндашувлар етакчилик қилган бўлса, Францияда эса аввал бошда рационал скептицизм (Декарт, Бейл) сўнгра рационал дорматизм (акл орқали мутлақ ҳақиқатни билиш мумкин деб ҳисоблаш. Аксар француз маърифатпарварлари шу тоифага мансуб эди) олдинги ўринга чиқиб олди. Немис фалсафаси эса юқоридаги икки йўналишнинг, айтиш мумкинки, омихтасидир.

XVII-XVIII асрларда Европа фалсафий тафаккурида рўй берган ўзгаришлар маълум даражада маърифатчилик ҳодисаси манзарасида кечди. Бироқ маърифатчилик тилга олинган уч йўналиш миқёсида ўзига хос эди. Инглиз ва шотланд маърифатпарварлари қарашлари мuloҳазакорлик ва танқидийлик (улар ҳаттоқи аклий мuloҳазаларнинг ўзини ҳам танқид қилишган) ҳосиласи бўлса, французларда аклга таяниб, барча эски қарашларни тезлиқда инкор қилиш, полемика кучли намоён бўлган. Немис файласуфлари бир томондан инглизлар каби сермулоҳаза ва танқидий, иккинчи томондан французлар каби рационалист эди.

Хўш, бунга қандай эришилган? Аввал бошда Германияда рационалистик (Лейбниц, Вольф) ва эмпиристик (томазийчилар) таълимотлар шаклланди.

Ўша даврда рационализмнинг ашаддий химоячиси Готфрид Вильгельм Лейбниц (1646-1716) эди. Унинг таълимоти асосини ташкил этувчи бosh foя шуки, биз яшаб турган, мавжуд бўлган ва мавжуд бўладиган дунёлар эҳтимолан бўлиши мумкин бўлган оламларнинг энг мукаммалидир. Яратган дунёни энг мукаммал шаклда яратган. Дунё мана бундай бўлганда яхшироқ бўларди қабилидаги ўй-ҳаёлларимиз борлиқ ҳақидаги чекланган тасаввуримиз маҳсулидир. Агарда биз Худодек ҳар бир нарсадан боҳабар бўлганимизда эди, борлиқ мукаммал экани, уни ўзгаришишга хожат йўқлигига амин бўлардик (Вольтернинг “Кандид” сатираси (1759) Лейбницнинг айни шу мuloҳазаларига жавобан ёзилган эди). Агарда Лейбницнинг бу фаталистик гоясидан келиб чиқсан, Хиросимада атом бомбаси портламаганда ҳозирги воқелик чандон ёмонроқ бўларди. Буни янада содлаштиrsак, неки содир бўлса, ҳаммасининг ўз ҳикмати бор. Мантиқнинг етарли асос қонуни ҳам аслида Лейбницнинг ана шу метафизик мuloҳазаларининг пировард ҳосиласидир. Неки юз берса, унинг бир асоси бор. Асосиз, шунчаки тасодифий ҳеч нарса бўлмайди. Лейбницнинг бу фалсафаси мавжуд сиёсий тузумларни оқлашга ҳам хизмат қиласди.

Эмпиррист Кристиан Томазий (1655-1728) хукуқшунос ва фалсафа профессори эди. У хурофот, диний қатағонлар, қийноқлар ва умуман тоқатсизликнинг ҳар қандай кўринишига қарши соғлом ақлни ҳимоя қилди. Томазий биринчи бўлиб ўша даврда немис университетларида урф бўлган лотин ва француз тилида эмас, немис тилида маъruzalар ўқиган. У эмпиррист сифатида тугма ғоялар, инсонда азалдан берилган билимлар мавжудлигини инкор қиласарди. Унинг айни масаладаги ғоявий ракиби Кристиан Вольф (1679-1754) эса билим сезгилардан аввал ҳам берилиши мумкинлигига эътибор қаратади. Дейлик,adolat тушунчалиси эмпириск тушунча бўлмаса-да, у ҳақда соатлаб маъруза ўқиш мумкин. У бизнинг ахлоқий принципларимиз пойдевори ҳисобланади. Эмпиррист учунadolat ноҳиссий (сезгилар орқали билинмайдиган), демакки, нообъективдир. Биз мана буadolat, буниси эсаadolatsизлик деб ўз-ўзимизча “ҳукм” чиқаришимиз мумкин. Агарда бу “ҳукм” оммалашса, у гёёки бизнинг иродамидан мустакил, объектив ҳодисадек туюла бошлади. Рационалист буни ўзгармас тугма ғоядек қабул қиласди. Адолатни асослаш масаласи рационализмнинг нозик томони бўлса-да, унда эмпиризмга қарши кучли қурол бор. Бу – математикадир. Ҳеч бир математик тушунчани кўз билан кўриб, қулоқ билан эшитиб, кўл билан ушлаб бўлмайди. Бироқ улар ҳар қандай ҳиссий ҳодисанинг асосидир. Уларнинг мавжудлиги билимнинг сезгилардан аввал ҳам мавжуд бўла олишига далолат қиласди. Германияда эмпиристлар ва рационалистлар ўртасидаги баҳс инсониятнинг буюк файласуфларидан бири Иммануэль Кант (1728-1804) фалсафасини дунёга келтириди. Априори (бизнинг мисолимизда математик тушунчалар, умуман олганда сезгилар орқали билинмайдиган) тушунчалар қандай вужудга келган? Уларнинг ўзаро ва апостериори (ҳиссий тушунчалар, дейлик, дараҳт) тушунчалар билан муносабати қандай бўлади? Априорилар мазмунан қисмларга ажраши мумкинми? Жумладан, 4нинг мазмунида 1,2,3 борми ёки йўқ? Бор бўлса унинг бу хусусияти синтетик апостериори тушунчаларларнидан (мазмунан қисмларга ажralувчи ҳиссий тушунчалар, дейлик, эшиқ, дераза, девор, том, уй тушунчасининг мазмунини ташкил қиласди) қандай фарқ қиласди. Априори ва апостериори тушунчалар табиатидаги ўхшашлик эмпиризм ва рационализм ўртасидаги баҳсни якунлаш ва уларни ўзаро синтезлашга хизмат қилмасмикан? Кант инсон зоти нимани била олади-ю нимани била олмаслигини аниқлашда ақлнинг ўзини тадқиқ қилиш муҳим деб ҳисоблаган. Унинг фалсафаси анчайин академик фалсафа бўлиб, оммабоп тилда изоҳлаб бериш хийла мушкул масала. Шу тахлит Кант Германияда фалсафий тадқиқотлар йўналишини инсондан ташқаридаги нарсаларни ўрганишдан инсон тафаккурининг ишлаш механизми, илмий билиш табиатини ўрганишга қаратди. Унинг фалсафаси кўтарган масалалар бугунги кунда ҳам баҳсларга сабаб бўлаётган муҳим академик фалсафий масалалар сирасига киради. Унинг таъсири романтиклардан (Руссо, Гёте) тортиб, немис идеалист файласуфлари (Фихте, Шеллинг, Ҳегел) қарашларида яққол намоён бўлган. Бу ўринда Кант таңқидий фалсафасининг шаклланиши маълум даражада инглиз, шотланд (Кант ота томондан шотланд эди) ва француз файласуфлари асарлари таъсирида бўлганини ҳам таъкидлаш жоиз. Бунда айникса Дэвид Ҳюмнинг тадқиқотлари Жон Локкнинг эсселари, соғлом фикр фалсафаси (Common Sense Philosophy) намоёндалари (Битие, Освальд, Рид) асарлари муҳим ўрин тутади.

XIX асрда эътибор билиш назариясидан умуман инсон борлиги моҳиятига қаратилди. Бунда танқидийлик қадриятлар, тил, ижтимоий мухит ва маданиятни тадқиқ этишга тадбиқ қилина бошланди. Георг Вилгельм Фридрих Ҳегел (1770-1831) немис идеалистик фалсафаси тарихининг ёрқин сиймоларидандир. Унинг воқеликни тарихийлик ва идеалистик мавқедан изоҳлаши марксизмнинг вужудга келишида дебоча бўлди, десак муболага бўлмас. У ишлаб чиқсан абсолютистик фалсафий “андоза” онг ва материя, билишнинг субъекти ва обьекти, санъат, дин ва фалсафанинг бир бутун, яхлит ривожланиши асосида ётган қонуниятларни ту-

шунтириш билан бевосита боғлиқ. (Ҳегел ўз фалсафасини энг мукаммал мутлақ фалсафа деб хисоблаб, борликнинг бетўхтов ўзгариши ва ривожланиши ҳақидаги ўз фикрига ўзи қарши борган). Замонасининг маданияти, фалсафаси ва умуман жамияти Ҳегел назарида зиддият ва қарама-қаршиликларга тўла эди. Жумладан, билишнинг субъекти ва обьекти, онг ва материя, эркинлик ва зарурият, билим ва эътиқод, маърифатчилик ва романтиклик айни турдаги ўзаро қарама-қарши қутблар эди. Ҳегел уларнинг бирини иккинчисининг фойдасига инкор қилмади. Аксинча, уларни синтезлашга уриниб кўрди. (Бу каби зиддиятлар бугун ҳам борлигини ҳисобга олсак, бундан шундай холоса чиқади: бугунги инсон Ҳегелни тушунмайди ёки у ҳеч нимани ҳал эта олмаган.) Бу йўлда у барча томонларни ягона, бир бутун тизимга бирлаштириб, гўёки уни “мутлақ фоя” деб атади. Унга кўра, бу тизим ички зиддиятлар асосида мантиқан изчил ривожланиб борувчи руҳий бутунлиқдир. Ҳегел фалсафаси тушунчаларни мавҳумлаштиришининг юксак кўринишидир.

Ҳегел ҳар жиҳатдан абсолютист эди. Шу мъянода у шахс манфаатидан жамият манфаатини, жамият манфаатидан эса абсолют монарх манфаатини устун қўяди. Унга кўра, якка шахснинг ҳаёти у ёқда турсин, бутун бошли давлатнинг пайдо ва ўйқ бўлиши “Мутлақ рух” га нисбатан олганда ҳеч нарса.

Ҳегелнинг фалсафий тафаккур тараққиётiga ўтказган таъсири бекиёсdir. XIX аср ўрталаригача Европа фалсафасида ҳегелчилар гегемонлик килди десак муболага бўлмайди. Къеркегор, Фейербах, Маркс ва Энгельс баъзи ўринларда уни танқид қилишса-да, у ишлаб чиқсан ўйин қоидаларига мувофиқ ҳаракат қилишди. Бироқ бу абсолютистик гегемонияга қарши турувчилар ҳам оз эмасди. Пруссияда аср ўрталарида бу таълимот расман танқид қилиниб, ҳатто таъкиланган ҳам.

Ҳегелдан сўнг немис фалсафаси икки тармок бўйлаб ривожланишда давом этди. Бир томонда иррационал (билишда интуиция, ирова ёки илоҳий пайромлар аҳамиятини бўртгириш) идеалистик оқим (ҳегелчилар, Шопенхауэр, Ницше, экзистенциалистлар), иккинчи томонда асосан неокантчилар марбург (Коген, Наторп, Кассирер, Штаммлер) ва гейдельберг (баъзи ўринларда Баден мактаби ҳам дейилади. Виндельбанд, Риккерт) мактаблари вакиллари эди.

Аслида бу икки тоифа вакилларининг ҳар бири Кант фалсафасидан мълум даражада “қарздор” эди. Улардаги яна бир муштарак жиҳат шундаки, улар қадриятлар, ахлоқий меъёрларнинг келиб чиқиш ва моҳиятини тадқиқ этишган. Германияда неокантчилик 1860 йилларда спекулятив идеалистик метафизика (таъкидлаганимиз биринчи тармок) ва хусусий фанларнинг (физика, химия, биология) фундаментал асосланишидаги камчиликларга қарши реакция сифатида пайдо бўлди. Қолаверса Ҳегел фалсафасидаги мавҳумлик, унинг табиии фанлар ривожланиши билан пайдо бўлаётган фалсафий-назарий масалаларни ҳал этишда ожиз қолаётгани И. Кант нуфузининг қайта тикланишига олиб келди. Шунданими неокантчилар орасида хусусий фанлар муаммолари билан қизиқадиганлар етарли эди. Айниқса бунда биолог-физиолог ва физиклар (Иоганн Мюллер, Макс Ферворн, Герман Гельмгольц) фаоллик кўрсатди.

XIX аср охири ва XX аср бошларида инсон ақлининг фалсафий функциясига бўлган янгича ёндашувлар пайдо бўлди. Бу ёндашувлар бир томондан тажрибавий билимлар (Max), иккинчи томондан формал мантиқ (Фреге) атрофида вужудга келди. Бу икки тенденция бошда неокантчилик, сўнгра Вена мактаби (Карнап, Хан, Нейрат), Берлин мактаби (Рейхенбах) доирасида кейинроқ Л. Виттгенштейн ва К. Поппер асарларида ривожлантирилди.

Шу ўринда таълимоти марксизмга муқобил варианти сифатида тақдим қилинадиган социолог ва файласуф Макс Вебернинг (1864-1920) номини тилга олмай илож ўйқ. Унинг жамият тараққиётiga таъсири ўтказувчи омилларнинг тенг кучлилиги тамоили Маркснинг иқтисодий ишлаб чиқаришга алоҳида урғу берувчи қарашидан фарқланади. Вебер ижтимоий тараққиётда нафакат моддий

ишлиб чиқариш, балки айни дамда маънавий омиллар, хусусан диний эътиқод ва қизиқишлиарнинг ҳам таъсири бекиёс эканини таъкидлайди. Шунингдек, унинг бюрократия ва ҳокимият қонунийлиги, ижтимоий фанларнинг табииати ҳақидаги мулоҳазалари умуминсоний тафаккур тараккиётида ўзига хос ўринга эга.

Вебернинг изланишларига қарамай, немис зиёли қатлами орасида Маркснинг таъсири кучли эди. Маданий ва ижтимоий-сиёсий воқеликни таҳлил қилишини бош максадга айлантирган Франкфурт мактаби вакиллари (Адорно, Ҳоркхаймер, Маркузе, Хабермас) марксистик асосда замонавий жамиятлар асосларини танқид қила бошладилар. Мазкур мактаб Франкфурт-майн социал тадқиқотлар институтида вужудга келди. Улар замонавий капиталистик жамиятда пайдо бўлган оммавий маданият ва кишилар онгни ахборот воситалари ёрдамида манипуляция қилиш орқали замонавий “миф”ларнинг яратилиши жараёнини танқидий нуктаи назардан ўрганишга киришдилар.

Мазкур мактаблар вакиллари хукуматга нацистлар келгач, таъқиб қилинди, аксари мамлакатни ташлаб чиқишига мажбур бўлди. Уларнинг баъзилари иккинчи жаҳон урушидан сўнг ватанларига қайтди. Натижа эса, немис ва англо-америка файласуфлари ҳамкорлигининг янада кучайиши, нуктаи назарларнинг омихталашиши бўлди. Бунда айникса Юрген Хабермас (1929 й. туғилган) жонбозлик кўрсатди. (2009 йили Британиянинг “Проспект” журнали ўтказган сўров на-тижасига кўра, Хабермас замонамизнинг таъсири энг кучли 100 киши ичидаги 22 ўринни эгаллаган.)

Немис фалсафаси жаҳон фалсафаси тарихида ўзининг нисбатан академиклиги, назарийлиги билан ажralиб туради. Кант ва Ҳегелни фалсафий муаммолар билан яқиндан таниш бўлмаганларга дабдурустдан тушунтириб бериш осон иш эмас. Немис профессионал файласуфлари орасида бугунги кунда ҳам фалсафани академик соҳа экани, уни оммабоп тилда ифодалаш мумкинмаслиги, кўпчилик фалсафий деб сифатлайдиган мулоҳазалар чинакам фалсафага қилинган шунчаки тақлид эканини таъкидлайдиганлар етарли. Бироқ фалсафа ҳақиқатни билишга бўлган шунчаки қизиқишдан бошланганини ҳам эътибордан четда қолдириб бўлмайди. Кант маърифатпарварликнинг шиори деб атаган “Sapere aude!” (Ўз ақлингни ишлатишда шижаотли бўл) ибораси бугун ҳар бир фалсафа ихлосмандининг шиори бўлиб қолмокда. Германияда дебат клублари ва фалсафа кафелари аъзоларининг сони ўсишдан тўхтагани йўқ. Радио ва телеканалларнинг фалсафий мавзуларга бағищланган дастурлари оммалашиб, фалсафани “танланганлар” машғулоти деб биладиганлар учун ҳам минбарга айланиб улгурган. Фалсафий журналларнинг ҳам бозори чаққон. 2011 йили таъсис этилган Hohe Luft журналининг адади ҳозирда 70 мингни ташкил килади. У билан tengdoش Philosophe Magazin журнали эса 100 минг нусхада нашр қилинмоқда. Айтидан немис халқи келажақда ҳам фалсафий тафаккур ва академик фалсафада дунёда етакчилик қиласидиган кўринади.

Хуршид ЙЎЛДОШЕВ



Шавкат КАРИМОВ

ҲОЗИРГИ НЕМИС НАСРИ: АНЪАНА ВА ЯНГИЛАНИШЛАР

Немис адабиёти жаҳонда ҳақли равишда пешқадам ўринлардан бирини эгаллайди. Бир аср мобайнида немис тилида ижод қиласидан адиллардан ўн икки нафари “Нобел” мукофотига муносиб кўрилгани ҳам фикримизнинг далилидир.

Биз ушбу мақолада ҳозирда немис адабиётида асарлари севиб ўқилаётган, кўплаб баҳс-мунозара, эътирофга сабаб бўлаётган айrim ёзувчиларнинг ижодий фаолиятига назар ташладик.

Халкнинг озодлик кураши, унинг идеаллари билан чамбарчас боғланган мазкур адабий асарлар жаҳон халқлари маданияти ривожига муносиб ҳисса кўшди. Й. Г. Хердер, Г. Э. Лессинг, Виланд, Готшед, Й. В. Гёте, Ф. Шиллер, Х. Ҳайне, Х. Ҳессе, Б. Брехт (бу рўйхатни узоқ давом эттириш мумкин) каби бир катор забардаст ёзувчилар немис миллатининг фахри ва ғурури ҳисобланади.

Немис ёзувчилари ўз ижодлари билан инсоният маънавий камолотига, уларни юксак ахлоқий мезонлар воситасида тарбиялашга алоҳида эътибор қаратмоқдалар. XXI аср немис адабиётига разм солсак, унда демократик, гуманистик анъаналар изчил равишда давом эттирилаётганлигини қузатиш мумкин.

Ҳозирги кунда олмон ёзувчилари томонидан ёзилаётган барча яхши асарларда ҳаёт воқеликларини реалистик ва романтик тамойиллари асосида тасвирлаш анъанага айланганини кўп йиллик адабий тажрибалар кўрсатиб турибди. Реализм ва романтизм – жаҳон, шу жумладан, немис адабиёти тарихининг энг яшовчан йўналишларидан ҳисобланади.

Ҳаёт сабоқлари шундан далолат бермоқдаки, ҳозирги кунда омад асосан немис мумтоз адабиётининг гуманистик, реалистик анъаналари йўлида ижод қиласидан ёзувчиларига кулиб боқмоқда. Чунки бундай ижодкорлар ўз истеъодларини инсониятнинг юксак ғояларини куйлашдек эзгу ишга баҳшида қилмоқдалар.

Ўз асарлари билан жуда кўп мухлислар орттирган шундай ёзувчилардан бири Криста Вольф XX аср иккинчи ярмида яшаб ижод қилган муаллифлардан биридир. У ўзининг “Бўлинган само” асарида шакл ва мазмун муштараклигига – равон тил ва табиий мазмунга эришган. Мазкур асарда немис замини ва миллатининг бўлиниши муаммосини сезиларли тарзда жонлантирган. “Бўлинган само” бўлинган мамлакат рамзи сифатида ифодаланган: ёш ошиқ-маъшуқлар бу айрилиқ қурбони бўлдилар. Икки ёш Рита Зайдел ва Манфред Херхурт ғарбу-шарқ

бўлиниши оқибатида висолга эришиш имконидан маҳрумлар. Ёш олим Манфред мартаба илинжида ғарбга (Ғарбий Германи яга) йўл олади, ёш ўқитувчи Рита шарқда қолади. Кутилмагандан бунёд этилган Берлин девори бу айрилиқнинг абадийлигига сабаб бўлади.

Криста Волфнинг Германиядаги мавжуд демократик тартиб-қоидаларга танқидий муносабати кейинги асарларида ҳам, жумладан, “Криста ҳақида ўйлар”да гавдалантирилган. Бунда адид давлат томонидан олиб борилган қатағон жараёнларини қаламга олади. Бу билан адид ўзининг касбий маҳорати, ахлоқий, инсоний фазилатларини намоён қиласди.

Улрих Пленцдорф кейинги навқирон авлод вакили сифатида ўзининг “Ёш Вертернинг янги изтироблари” асари билан китобхонлар эътиборига тушди. Бу китоб кейинчалик саҳна асари сифатида муваффақият қозонди. Улрих Пленцдорф Эдгар Виблау образи орқали аввал пионер, кейин озод немис ёшлари ташкилотининг фаол қиёфасини моҳирона тасвирлайди. Эдгар вазият тақозосига кўра, одамови бўлиб, ўзини жамиятдан айро туради, асар интиҳосида эса фожиали ҳодиса туфайли ҳаётдан кўз юмади.

Нобель мукофоти совриндори Ҳайнрих Бёлл машҳур насрнавис, драматург ва айни пайтда нуктадон сухандон бўлган. Ҳайнрих Бёлль ҳикояларининг бош мавзуси – уруш фожиаси ва у келтирган беҳисоб вайроналиклар, табиат ва атроф-муҳитнинг заарланиши, одамларнинг руҳан ва маънан эзилиши, озиқ-овқатларнинг танқислиги каби ҳолатлар бўлиб, адид уларни ўз кўзи билан кўрган ва реал тасвирларда акс эттирган.

Швед қироллик Академияси 1999 йилда Гюнтер Грасс ижодини Нобел мукофотига муносиб кўрар экан, немис ижодкорининг бир умрлик меҳнатини эътироф этган ҳолда, мукофотнинг “сабабчиси” муаллифнинг “Тунука ноғора” романи эканлигини қайд этиб, “тўқ қора бўёқлардаги ҳикояларда тарихнинг унтилган қиёфаси ифодаланган” лигини алоҳида уқтирган.

Сал кам ярим аср муқаддам чоп этилган “Тунука тоғора” романидаги Г. Грасс немисларнинг ўзлари яратган энг яқин тарихни – урушдан кейинги йиллардаги иқтисодий мўъжиза – немис ҳалқи характеридаги нима биландир доим банд бўлиш хислатларини рўйи-рост, таъсирли тил билан ифодалаган. Адиднинг кейинги китоблари ҳам машҳур бўлиб, қўлма-қўл бўлганлигининг бош сабаби, биринчидан, уларда олмон жамиятини ўзининг ҳаққоний бадиий ифодасини топганлиги бўлса, иккинчидан, муаллифнинг ўзи асар қаҳрамонлари сингари интеллектуал, ўз нуқтаи назарига содик, баҳс-мунозарага мойил маърифатпарвар бўлганлиги билан изоҳланади.

Кўп сонли романлар, қиссалар, эсселар, ажойиб шеърлар муаллифи Ҳерта Мюллер асли Руминия, Венгрия ва Хорватия сарҳадлари туташган ҳудуддаги фақат немислар истиқомат қиласидиган Банат қишлоғида таваллуд топган. Бу қишлоқда 1945 йилдан сўнг сўзлашдан кўра сукут сақлашни афзал кўрган олмонлар истиқомат қилишган.

Швед қироллик Академияси Ҳерта Мюллери адабиёт бўйича Нобель мукофотига муносиб кўрар экан, “Ҳамма нарсадан бебахра кишилар ҳаётининг насрдаги ифодаси ва бадиияти” учун тақдирланаётганини бежиз таъкидламаган. Болалиги социализм даврига тўғри келган Ҳерта Мюллер онгига кўркув ҳисси сингиб кетган эди. Айни ўша ҳиссиёт унга хаёт учун кураш рағбатини, кувватини берди.

Ҳерта Мюллер “Пастқамлик” номли 14 миниатюра – маҳсус қиссадан иборат асари қўллэзмасини 1979 йилда ниҳоясига етказади. Асарнинг

“қайчиланган” ва “тахрир қилинган” нусхаси уч йилдан сўнг – 1982 йилда Бухарестда нашр этилди. Унда умидсиз, унутилган Ницкидорф қишлоғининг сюрреалистик ҳаёти бола нигоҳи орқали кузатилади. Асар нашридан кўнгли тўлмаган адиба китобнинг асл нусхасини маҳфий равишда Германияга юборади ва уни 1984 йили “Ротбушферлаг” нашриётида чоп этади. Мазкур асар жамоатчилик ва танқидчилик томонидан илиқ кутиб олинади. Асар нашр этилгандан сўнг ёзувчи Руминиядан чиқиб кетишга мажбур бўлади ва китоблари нашр этилиши таъкидланган адиблар рўйхатига тушади.

Ҳ. Мюллернинг илк насрый асарида Банат қишлоғи аҳолисининг анъанавий қадриятлари, катта сиёсий қатағонлар кетаётган жамиятда кичик жамоанинг турмуш тарзи ўз ифодасини топган. Совуқ ва қора рангларда битилган “Пастқамлик” романида бола нигоҳи билан кузатилган, узлатга юз тутган Банат қишлоғи аҳолисининг фожиали ҳаёти акс эттирилган.

Адиба ўз асарларида сиёсий диктатуранинг фожевий мавзусини, одамлар эрксизлигининг аянчли оқибатларини қаламга олади.

Ҳ. Мюллер Германияга кўчиб ўтганига чорак асрдан ошган бўлса ҳам, хозиргача доимо ижодининг асосий йўналиши ҳисобланган мавзу – диктатура мавзусига тез-тез мурожаат этмоқда.

Муаллиф асарларида асосан тарихий хотирани тарғиб этади “... чунки хотира хушахлоқлик гаровидир, уни унтиш эса уруш янглиғ даҳшатли ва кечирилмас жиноятдир”, – дея уқтиради. Ҳ. Мюллернинг асарларида бу мавзу марказий, бош ва асосий мазмунни ташкил этади. Унинг қаҳрамонлари ўз умидсизликлари туфайли доимо китобхонда ҳадик ва ҳамдардлик уйғотадилар, лекин муаллиф уларни идеаллаштирилди.

Ҳ. Мюллер атайнемисзабон “травматологик адабиёт” анъаналарини – яъни, инсон қалби ҳамиша катта жароҳатларга дучор этилишини санъаткорлик билан ифодалайди.

Ҳерта Мюллер Германияда яшар экан, нафақат асарлари, балки ижтимоий ҳаётдаги фаол иштироки билан ҳам муҳлислар эътиборида. Адиба бир қатор университетларда ижодий маъruzalар ўқииди, 1995 йилдан бошлаб Дармштатдаги Герман тиллари ва шеърияти Академиясининг аъзоси, 2005 йилдан эса Берлин Эркин университети профессори унвонига сазовор бўлган. Унинг асарлари дунёнинг йигирмадан ортиқ тилларига, шу жумладан хитой, турк, инглиз, швед, поляк тилларига ўтирилган.

Германияда чиқадиган адабий нашрлар мутахассисларининг таъкидлашича, немисзабон адиблар орасида ҳеч ким Патрик Зюскиндчалик машхур ва манзур бўлмаган. Гарчи унинг “Ифор” романи бундан чорак аср олдин дунё юзини кўрган бўлишига қарамасдан, хозиргача дунё адабиётининг бестселлерлари рўйхатида биринчи ўнликдан мустаҳкам жой олиб турибди. Адабиётшунослар фикрича “Ифор” романи ўз вақтида Европа адабиётини тубдан ўзгартирган М. Прустнинг “Сван йўналишида”, Ж. Жойснинг “Улисс” асарлари билан бир қатордан жой олишга муносибdir.

Муаллиф мазкур асарда инсондаги ҳид билишнинг ҳиссиёт, маълум туйғуни англатишга хизмат қиласидиган беш хислатнинг бири сифатида ҳаётимизда нечоғли муҳим аҳамият касб этишини кўрсатишга интилган.

П. Зюскинд романини ўз она тилидаги таржимаси орқали мутолаа қилган хорижий муҳлис асардан таъсирланиб, шундай ёзади: “П. Зюскинднинг немислигини билиб ҳайратга тушдим. У шунақа француза

роман ёзибдики, ажабланмай иложинг йўқ. Йўқ, воқеалар Францияда бўлганилиги учун эмас, асарнинг руҳи французча. Асадан шунчалик нозик французча туйғу уфуриб турибди”.

Хўш, бундай мақтов ва баҳоларга муносиб кўрилган асар, ўзи нима ҳакида?

Патрик Зюскинд мазкур асарда ўзаро бир-бири билан боғланмайдиган хаёлот олами ва реализмни омухта қилишнинг удасидан чиқкан.

Асар билан танишар эканмиз, кўз ўнгимизда инсон бажариши мушкул бўлган ишларни уddaлаш имконига эга бўлган шахс сифатида қаҳрамон Гренуй гавдаланади. Жан Батист Гренуй бетакрор шахс, аммо уни ёвуз ёки жирканч маҳлуқ деб таърифлайдилар. Бироқ бу ташбеҳларнинг барчасини ҳам асосли деб бўлмайди. Тўғри, табият уни жозибадор ҳусн билан сийламади, ташқаридан караб уни рисоладагидек одам деб аташ ҳам қийин. Аммо унинг фавқулодда ҳид билиш қобилиятининг устунлиги ва шу қобилият сабабли турли бало- қазолардан омон қолиши – тегирмондан бутун чиқиши Яратганинг унга берган ноёб инъомидир.

Жан Батист Гренуй учун фақат бир дунё – ифорлар олами мавжуд ва ўзгалар яшайдиган дунё унинг учун иккиласми аҳамият касб этади.

Бу ўринда бош қаҳрамон вояга етган мухитни ҳам унутмаслик лозим: у балиқ тозалайдиган пештахта остида дунёга келган, кичиклигига суйиш-суйилиш, меҳр туйғуси нималигини билмаган, ширин сўзга зор шароитда ўсган, ундан ҳамма нафратланиб, кўпчилик эса қўркиб яшаган. Бундай образларга одатий мезонлар билан ёндашиб бўлмайди.

Асар қаҳрамони одамлар ҳиссиётларини бошқарадиган, уларнинг ихлосини қозонадиган мўъжизакор атирини кашф қилиш йўлида ҳамма нарсага тайёр. Бундай атирини у тузогига илинган гўзал ва бокира қизлар терисидан олади. У бундай ҳид соҳибаларини бир неча чақирим узоқдан, ўзининг ғайритабиий ҳид билиш қобилияти орқали топади. У оммани ўзига эргаштирас экан, уларни нон билан эмас, ўткир ҳид билан жалб килади.

Роман фожиали якун топади. Гренуй устига мўъжизакор атирини қуйиб юборади ва уни одамлар шафқатсизларча бурдалаб еб ташлашади.

П. Зюскинднинг романни жаҳон адабиётида урф бўлган анъанавий мезонлар қонуниятига мос тушмайди. Унда фикрлар мутаносиблиги минимал даражада. Асарга триллер сифатида қаралса, муаллиф эътирофига кўра ҳам, унинг қўшимча номи – бир қотил тарихи – диққат марказида туради. П. Зюскинд кейинги пайтларда кўпроқ драматург сифатида ўз иқтидорини намойиш этмоқда. Унинг асарлари Берлин, Мюнхен, Ҳамбург, Лейпциг каби шаҳарлар театрлари саҳнасидан тушмай келаётганлиги эътиборга лойиқdir.

Қолаверса, Роберт Шнайдер, Даниел Келманн, Женни Эрпенбек, Тамара Бах сингари ижодкорлар қаламига мансуб асарлар ҳам нафакат немис ўқувчилари, балки кўплаб хорижий мамлакатлар китобхонларини ўзига жалб этмоқда. Ҳаёт воқелиги, ҳозирги кунда инсониятни ўйлантираётган, ташвишлантираётган ҳамда унга қанот баҳш этадиган муаммолар немис муаллифларининг турли жанрдаги асарларида ўз аксини топмоқда.

**Иброҳим ҒАФУРОВ,
Хуршид Дўстмуҳаммад**



ТАРЖИМА МУҲАББАТИ ВА ОҲАНРАБОСИ

Хуршид Дўстмуҳаммад: – “Шу кунгача файласуфлар ҳамма нарсани ажратиб келдилар, ҳамма нарсадан ажралиш қидирдилар. Ягона Худо ўнлаб динларга ажралди. Булар инсоният тарихида ҳеч тўхтамаган қон тўкишлар билан борди. Одамзот синфлар, тоифалар, чегараларга ажралди ва булар ҳам тинимсиз қон тўкишларда давом этди...”

Иброҳим ака, бу сўзларни Сизнинг матбуотда чоп этилган сухбатингиздан олдим. Ҳақиқатан ҳам инсоният тарихини бирлашишлар ва парчаланишлар тарихидан иборат десак хато бўлмас. Одамлар, ҳалқларни бирлаштириш учун не-не

яратувчилик ишлари қилинган бўлса, парчалаш мақсадида ҳам шунча бузгунчиликлар ўйлаб топилган. Инсониятни бирлаштириш йўлида энг таъсиран воситалардан бири адабиёт, санъат, маданият эканлиги ҳеч кимга сир эмас. Бу борада, айниқса, таржимачиликнинг аҳамияти ҳақида истаганча гапириш мумкин, шундай эмасми? Қолаверса, ҳозирги глобаллашув даврида дунё ҳалқларининг бирлашиш имкониятлари ҳар қачонгидан ҳам ортиб кетди. Интеграция шу қадар авжига чиқдики, ҳеч бир муносабату мулоқот жараёнини адабий таржимасиз тасаввур қилиб бўлмай қолди. Одамлар, ҳалқлар бир-бирларини яхширок, тўла-тўқисроқ билишлари учун эса бадиий асарлар мухим аҳамият касб этади. Шундай шароитда бадиий таржиманинг аҳамияти ва вазифасига доир қарашларингиз билан ўртоқлашсангиз?

Иброҳим Ғафуров: – Таржима соғ маънода алоқа воситаси. У ер юзидағи турли маданиятларни яқинлаштиради, миллий маданиятларни тўхтовсиз ўзаро тажриба ва қашфиётлар билан бойитиб боради. Маданият – маданиятлардан узилиб қолса, ҳалокатга учрайди. Инсоният тарихидан бунга мисоллар анчагина топилади. Йўқолиб кетган маданиятларнинг барчаси бошқалардан ажралиб қолганди.

Таржима алоқа воситаси бўлиш билан бирга у ажойиб-гаройиб равишда инсоният учун ривожланиш омилидир. Мисол учун, Россияда XIX асрнинг аввалиридан олди, бутун дунё адабиётларини шитоб билан таржима килишга киришдилар. Бунда Россия Европадан улги олди. Гоголь, Пушкин, Достоевский, Толстой, Тургенев, Чехов, Горький сингари жуда кўп буюқдан-буюқ намояндадарнинг майдонга чиқишида бадиий, илмий таржималар етакчи роль ўйнади. Таъсири ниҳоятда барака бўлди ва у ҳозиргача самарали давом этиб келмоқда. XX асрнинг 30-йилларидан Ўзбекистонда таржимачиликда динамик, инқилобий силжиш рўй берди. Бутун янги миллий маданият, унинг улкан намояндадарни, чунончи, Қодирий, Чўлпон, Беҳбудий, Айний, Ҳамза, Ойбек, Ғафур Гулом, Уйғун, Ҳамид Олимжон, Шайхзода, Усмон Носир, Абдулла Қаҳхор, Миртемир, Зулфия, Миркарим Осим, Мирзакалон Исмоилий ва улардан кейин изма-из адабиёт майдонига кириб келган намояндадар, Эркин Воҳидов ва Абдулла Ориповгача – ижодий

шаклланиш ва дунё адабиёти сари бўй чўзишларида илмий, бадиий таржималарнинг ўрни бекиёс катта ва самарали бўлди. Адабиётимизда олдин кузатилмаган турфа шакллар, турли жанрлар, ранг-баранг ёрқин поэтик тасвир ифода воситалари улар ижодини фоятда жозибали килди. Булар ижоди орқали ўзбек адабиётига Данте, Шекспир, Байрон, Саъдий, Хоғиз, Гёте, Пушкин, Толстой, Достоевский... нигоҳи тушди. Абдулла Қахҳор хатто “Чеховнинг кўзойнагини тақиб” олди. Есенинча, Маяковскийча оҳанглар момакалдириқдек янгради.

Бизнинг беғубор болалик оламларимизга кириб келган Геклберри Финн, Том Сойер, Том тоғанинг кулбаси, Робинзон Крузо, Гулливер, Мултатули, Денгиз заҳматкашлари, Мартин Иден, Денгиз бўрилари, Минг бир кеча, Манас, Йўлбарс терисини ёпинган пахлавон, Калила ва Димналар мурғак юракларимизни саргузашт, олижаноблик, жўмардлик, валломатлик, мубталолик нурлари билан тўлдирган. Бизни шакллантирган ҳодисалар ичиди шулар ва яна шулар каби бошқа кўп нарсалар бор, сира хотирамиздан ўчмайди. Талабаларим қошига кирганда булардан сўз очаман... кўзлари пирпираган, тиллар лол, сезаманки, бу каби воқеалар уларга нотаниш, таъсиридан четда қолган... Юрагим увишади.

Худо ўз Пайғамбарига илохий мурожаатларидан бирида: “Алам нашрах лака садрок” – деб хитоб қиласди: “Биз кўкрагингни очмадикми!” Яъни мурғак кўксингга бепоён олам ҳақиқатларини олиб кириб сени маърифатли қилмадикми! Шу бепоён фикрга, иктибосан олсақ, таржималар қадимда ҳам, ҳозир ҳам инсон кўксини маърифат, илм-фан, дид-фаросат, фасоҳат оламларига очади. *Нашр сўзи таржима* сўзи билан туташиб туради. Бир-биридан айрилмайди. Биргаликда гўзаллик маърифатини яратади. Хёте “Элегия” деган бир шеърида хўб айтади (маъноси:)

*Дўстларим, хайрлашайлик.
Замин тўқайлари, ваъший қоялар ичра мен ёлгиз қолдим.
Лекин, сиз борингиз улкан дунёга дадил –
Кучсин сизни – улуғвор ва дараҳион борлик.
Ўрганингиз барини – бу осмон, ер, сувлар,
Ўтинг қаватма-қават, бўғинма-бўгин
То етгайсиз табиат қаъларига...*

Таржимада ҳам шу буюк инсоний чорлов моҳияти мужассам: у билиш, таниш, кадр-киммат топиш руҳини олиб киради. Шу маънода таржима – маданиятлар кислороди...

Х.Д.: – Ўткир ака Ҳошимов “Бир нарсага ишонаман: Иброҳим ака ўзини ҳайратлантирган, ларзага солмаган асар ҳақида ҳеч нима ёзган эмас” деган эди. Мен бу таърифни кўпроқ таржима асарларингизга нисбат берган бўлур эдим. Республикамиз адабий жамоатчилиги, кенг китобхонлар оммаси Сизни фоятда нозик дидли зиёли инсон, зукко олим, адаб ва таржимон сифатида ҳурмат килишади ва жаҳон адабиётининг энг сара намуналарини танлаганингизни эътироф этишади. Сиз таржима учун асар танлашда нималарга эътибор берасиз? Қандай мақсадлардан келиб чиқасиз? Руҳий холатингиз, кайфиятингиздан келиб чиқасизми ёки бошқа омиллар таъсири кўрсатадими? Дейлик, “Азизим”, “Жиноят ва жазо”, “Чол ва денгиз” асарлари таржимасига киришган пайт-ларингизни биргалиқда ёдга олайлик?

И.Ф.: – Сиз таржима учун асар танлаш ҳақида савол қўйиб бу соҳанинг жуда нозик масаласини тилга олдингиз. Таржима жараёнлари назариясида таржимага асар танлаш, ҳудди таржимага тайёргарлик кўриш каби – масалаларнинг масаласи. Таржиманинг муваффақиятли чиқиши, ўқувчилар уни қизиқиб жон-дилдан қабул қилиши, кутиб олиши, муносабат билдириши, ҳаётида ҳаракатга киритиши, миллий мулк ва ҳазинага айланишида асос ҳудди шу танлаш ҳодисасидан бошланади. Танлаш ҳақида гап кетганда, “Тафаккур” журналининг бош муҳаррири Эркин Аъзамнинг бир сирини очай. Эркин Аъзам журналда жаҳон адабиётининг сара намуналарини ёритиб боради. У таржимага асар танлашга қаттиқ талабчанлик билан қарайди. Узоқ қидириб асар танлайди. Буни ўзи якка ҳал қилмай мутахассислар билан маслаҳатлашади. Уларнинг фикрини сўрайди

ва инобатга олади. У таржимага асарни журнал йўналиши, руҳи, ўқувчилар доираси, улар савияси, дунёкарашини ҳисобга олиб танлайди. Асар журналхонларга қандай таъсир кўрсатиши, қандай фикрлар ва хиссиётлар уйғотишини чамалайди. Шунинг учун ойлаб жаҳон ҳикояларини ўқиди. Бу катта адабий меҳнат. Бу меҳнатнинг акс садоси ҳам катта ва узоқ давом этади. Илгари Асқад Мухтор, Ҳамид Ғулом, Рамз Бобоҷон, Озод Шарағиддинов, Одил Ёқубов таржимага асар танлаш – нимани таржима қилишга катта аҳамият берардилар, унга жиддий ижодий иш деб қараб ҳеч қачон эътибордан соқит қилмасдилар.

Узоқ йиллар бадиий таржима билан шуғулланиб, университетда талабалар билан машғулотлар ўтказиб, таржима лабораториясига ранг-баранг материаллар асосида кириб, бу соҳада таржима жараёнлари деб аталағидан назарий соҳага чуқур кириш, унга теран илмий асосда қарашибениҳоят катта аҳамиятга эга эканлигига тўла ишонч ҳосил қилдим. Таржима жараёни – тилларни бир-бирига қиёсан мукаммал ўрганиш, тиллар мұхити ва стихиясига эгалик қилиш, муайян таржимага сидқидилдан тайёргарлик кўриш – турли илмий адабиётлар, маълумотномалар, ранг-баранг луғатлар билан ишлаш, мамлакатлар, уларнинг маданиятлари, адабиётларини яхши билиш – бунда олтин малака ва кўникма ҳосил қилиш – таржима жараёнида ҳозиргача назариётчилар ҳам, амалиётчилар ҳам айтарли эътибор бермаган, ҳисобга олмаган – изчиллик ва муттасиллик мавжудлигини кўрсатади. Барчасига изчил, муттасил, яъни узлуксиз риоя қилингандагина, орадаги жараён ҳалқаларидан биронтаси ҳам эътиборсиз қолиб кетмагандагина жараён юксак маърифатли тус олади, таржима муваффақиятлар гаровига айланади.

Бирон асарни чала-чулпа ўқиб, муалиф, миллий адабиёт мұхитини, унинг миллий заминда ўқувчилар томонидан қандай қабул қилингани, қандай фикрлар билдирилиб келинаётгани, бу асар башқа ҳалқлар адабиётига қандай таъсир кўрсатгани, бошқа миллий адабиётлар билан алоқаларини муттасиллик ва узлуксизликда ўрганмай туриб, ҳар қандай истеъдод бўлганда ҳам, бу таржимадан муваффакият кутиш қийин. Таржимага жуда осон иш, ҳатто тўртингчи синф ўқувчиси ҳам таржима қиласеради, деб ўта жўн қараш – таржимани тушунмаслик, англамасликдан бошқа нарса эмас. Аслият матни устида қунт ва сабот билан иш олиб бормай туриб, асарнинг ўзига яраша иборалари, фразеологизмлари, образли ифодаларига даҳлдор маҳсус луғатлар ва изоҳлар тузмай туриб, кораламалар килмай туриб, таржимага киришиб бўлмайди. Ҳар қадамда қоқиласиз ва ҳар қадамда нотўғри таржима қиласиз. Бу жараёнга илмий-ижодий ёндошиб, аслиятнинг бадиий услугига йўл топасиз, зарур ритмика, жумлаларнинг оҳангларини англай бошлайсиз. Муттасиллик ва узлуксизлик, изчиллик – таржима жараёнида жуда улуғ амалий аҳамиятга эга фор! У таржима маърифати ва маданиятида биринчи ўринда туради.

Таржимага асар танлагандা, бу асар ўзбек миллий маданияти учун қандай янгилик бўлади, деган принципдан келиб чиқаман. Менинг таржималарим ҳаммаси янгиликка ташна юрагимнинг инқилоби. Юрагимга шу инқилоб ҳаракат бағишлади. Эртами, кечми, ўқувчилар юракларига ҳам бу маърифий инқилоб албатта кириб боради.

Х.Д.: – Алишер Навоийга бағишланган тадқиқотларингиздан бирида, “Унда ҳамма нарсага курдатли ҳиссий муносабат ҳоким” деган топилмангиз бор. “Пафос – санъатнинг чинакам салтанатидир” деган сўзингиз топилмага янада аниқлик киритгандек. Буёгини айтадиган бўлсам, Сизнинг барча ижод намуналарингизда, жумладан таржималарингизда факат ўзингизга хос бўлган кўтаринки ҳиссий муносабат, яъни пафосни илғаб олиш қийин эмас. Энди Сиз таржимон сифатида мурожаат қилган адиларни эслайлик: Тургенев, Мопассан, Хемингуэй, Фолкнер, Достоевский, Маркес, Айтматов, Жойс... Буларнинг ҳар бири ўзгача ҳиссий муносабат, бўлакча пафос мужассам топган услуг соҳиблари! Савол туғилади: ИброҳимFaфуров – таржимон ҳиссий муносабатлари билан номлари келтирилган сўз даҳоларининг ҳиссий муносабатлари ўртасидаги “тил топишиш” жараёни қандай кечган? Ва у таржиманинг сифатига таъсир кўрсатмаганми?

И.Ғ.: – Мен буни мұхаббат жараёни деб атаган бўлардим. Эркин Воҳидов “Есенин акамдай бўлиб қолди”, дейди. Шунинг учун унинг таржималарида сехрли кондошлиқ, жондошлиқ уфуриб туради. Ҳамид Олимжон, Усмон Носир, Чўлпон ҳам аслият билан шундай туғишганликни ҳис қилдилар. Туғишганлик мұхаббатигина таржималарни

ширадор, мағиздор ва аслиятга ўта яқин қилади. Мұхаббатни мен *интуиция* деб биламан. Бадий таржимада шу *муҳаббат интуицияси* уни аслият даражасига кўтаради.

Х.Д.: – Ижодий лабораториянгизга ғойибона назар ташлаб юриб, баъзи тахминлар кўнгилдан кечади. Улардан бирини айтишга рухсат берсангиз. Иброҳим ака, Сиз кўнгилга тугилган ижодий режани хаёлан пишитиб юрасиз, ўзингизни шайлайсиз, ва ниҳоят руҳингизда керакли кўтаринки хиссий муносабат шаклланган лаҳзаларда Озод Шара-фиддинов айтган Сиздаги ички бакувват фуур қад ростлайди, шундан сўнг қўлингизга қалам оласиз ва шиддат билан ишга киришасиз. Тахминимиз қанчалик асосли?

И.Ғ.: – Навоийнинг “Мантиқ ут-тайр”ни эллик йилдан ортиқ юрагида кўтариб юргани ва “Насойим...”ни йигирма йилдан ортиқ таржимасига тайёргарлик кўргани ҳайратга солади. Навоийнинг ўзи бунга қойил гувоҳлик бермаса, инсоният маданияти тарихидаги бундай ноёб ва нодир воқеага ишониб бўлмасди. Араб, форс, қадимги туркий тилларни мукаммал билган даҳо истеъдоднинг ўз таланти миқёсига маҳлиё бўлмай умр бўйи ва йигирма йил таржимага тайёргарлик кўргани ва шундан кейингина умр поёнида ишга киришгани кишига чексиз илҳом ва қилаётган ишингга ишонч бағишлади.

Х.Д.: – Мансураларингиздан бирида шундай мисралар ўқигандим:

*ўзим ҳам шундай, аниқ биламан:
яшайман иқтибослар орасида
мингларча, миллионларча иқтибос!*

Бири-биридан доно-мутафаккир адібларнинг асарларини таржима килиш жараёнида озмунча теша тегмаган ҳикматлар, жумлалар, ўхшатишу тимсоллар учрайдими! Уларни йигиб қўймайсизми? Таржима ҷоғида таржимон асар воқеалари ичида, асар қаҳрамонлари орасида яшайди, асл нусха муаллифининг бадий дунёси кенгликларида нафас олади, ана шунда беҳисоб ғоялар, мавзулар туғилиши ҳам табиий. Тўғри, улар шахсан Сизнинг ижодий меҳнат ҷоғида топган маънавий бисотингиз, лекин улар китобхонларнинг, ҳалқнинг маънавий мулкига айлантирилса чандон гўзal иш килинган бўлмайдими?

И.Ғ.: – Ҳозирги ва келаси замон ўқувчилари яратилаётган бадий санъат асарларини, жумладан, юксак бадий савияда маҳорат билан яратилган таржима асарларни маҳзан – ўлмас ҳазина каби қабул қилишлари ва ҳазинага қарагандай қараашларини накадар истардим. Жойсда, Нитшеда, “Панчатантра” да руҳоний оламларнинг сирлари, қашфиётлари устма-уст қалашиб ётибди. Улардан наҳот баҳра олмай ўтамиз?

Х.Д.: – Замонавий ўзбек насрининг барча ютуқларини эътироф этган ҳолда, миллий адабиётимизнинг энг сара намуналарини Сиз таржима килган асарлар қиёсида таҳлил қилиб кўрайлик. “Азизим”, “Жиноят ва жазо”, “Телба”, “Чол ва денгиз”, “Алвидо, қурол”, “Бузрукнинг кузи”, “Улисс”... марҳамат, Иброҳим ака, ушбу рўйхатнинг давомига ўзимиздан бирорта асарни жаҳон адабиёти уммонига қўшиб юбора оламизми? Эҳтимол, масалани бу тарзда қўйилишини маслаҳат бермассиз, шундай бўлса-да, кези келганда ўзимни кўп кийнайдиган бир саволни ўргата ташласам. Назаримда, ҳар бир таржимангиз замирида “Дунёда мана шундай асарлар ҳам бор”, “Романи мана бунақасига ёзиш кепрак”, “Манавиндан бир ибрат олиб қўйсанглар-чи, азизлар!” деганга ўхшаш маънодор пинҳон таънами, дашномми ётгандек туюлади. Башарти шундай бўлган тақдирда ҳам уни тўғри қабул қилмоқ керак. Ахир жаҳон адабиёти дурданаларининг ҳар бири улкан ижод мактаби вазифасини ўтайди, бадийлик мезонлари биз маъкул кўриб юрган миқёслардан анча юкорида эканлигини бот-бот эслатиб туради. Мен бадий тафаккур кенглиги, чуқурлиги ва ижодий маҳорат миқёсларини белгилаб берадиган бу сингари мўъжизакор қалам аҳллари қандай шароитларда, қандай ички-ташқи таъсиrlар остида түғилган, вояга етган ва “ҳосил” берганлиги ҳақидаги мулоҳазаларингизга “Жаҳон адабиёти” муштариylари ҳам қизиқишлиягига аминман.

И.Ғ.: – Бу савол-мулоҳаза эҳтимол, лабиринтга олиб киради-ю, аммо ундан олиб чиқмайди. Қиёслар учун миқёслар зарур. Ҳар ким ўз қўшиғини айтади. Ҳозир ўзбек адабиёти аста-секинлик билан жаҳон адабиёти жараёнлари билан туташиб бораётir.

Эътиборга лойик экспериментлар бораётгани (ахир ҳали биз уларнинг ҳаммасини ҳам ўқиб ёки нашр қилиб улгуратганимиз йўқ) жараён ўз қонуниятлари асосида кетаётганигини кўрсатади. Кўкрак очиқ бўлса, бас.

Х.Д. – Бир пайтлар ўзаро сұхбат асносида Жойснинг “Улисс” таржимасига кириши ниятингиз борлигини айтганингизда, таажжубланган, бу асарни ўзбекчага ўғириш мумкинлигига кўзим етмаганини яширгаган эдим. Кўз кўркок – кўл ботир деганларидек, ўзбек адабиёти “Улисс” таржима қилинган адабиётлар сафига қўшилди. Бошқача айтганда, ўзбек жойсианасига асос солинди. Жаҳон адабиётидаги энг мураккаб асар таржимасини ҳақиқий маънода маънавий жасорат десак муболага бўлмас. Ж.Жойс, “Улисс саргузаштлари” ва унинг таржимасига бағищланган бир қатор маколалар эълон қилинди. Мунозарали мулоҳазалар билдирилди. Бу жуда табиий ҳол, зеро, “Улисс” энг кўп баҳс-мунозараларга мавзу бўлган асар. У юзасидан ким қандай фикр айтиш-айтмаслиги ҳар кимнинг ихтиёри, лекин биз ва адабиётимиз учун энг фойдали жойи – мубоҳасалар асносида бадиий асарни тушуниш, уқиши малакаси сайқал топади, таҳлил-тақриз қилиш маданияти янада шаклланади. Иброҳим ака, “Улисс”нинг яна қайси ҳикматларини қўшимча қилган бўлур эдингиз?

И.Ф.: – Жойснинг руҳий (психик) ва поэтик (бадиий) қашфиётлари магнити туганмас. Уни ўқиган одам ҳеч зерикмайди. Ҳар ўқигандан, яна янгидан-янги нарсалар очилаверади. Одамнинг бунчалар поёнсиз узлуксиз қашфиётларни қабул қилиши осонмас. Тасаввур қобилиятимиз дастлаб бу фусунсоз издиҳомга ўрганмаганлик боисидан дош беролмайди. Биз Достоевский асарларидаги шундай туганмас, поёнсиз инсон мубталоликларига дош беролмаймиз. Бу мубталолик интиҳога бораётгандан бир хиссий, ақлий инқилоб рўй беради. Энг юксак тоғларнинг энг юксак тоза ҳаволари кўксингизга урилади ва мубтало дардларга малҳам қўяди. Достоевский жумлаларига мен погона-погона осилиб бораман, погоналарга оёқ қўймайман, уларга том маънода икки қўлим ва миямнинг куввати билан осиламан, осилиб бир погонадан иккинчи погонага ўтаман, ажаб бир ҳолатки, бунда адибнинг ўзи тўхтовсиз мадад бераётгандай, кўлтиқлаб навбатдаги погонага кўтарилишга мадад бераётгандай бўлади. “Кўрқма. Ёзавер. Мен ўзбекчада шундай ёзган бўлардим”, деб умда қилаётгандай туюлади. Бу хис мени ҳеч тарк этмайди.

Х.Д.: – Мустақиллик йилларида, айниқса, муҳтарам Юртбошимиз ташаббуси билан “Жаҳон адабиёти” журнали таъсис этилгач, мамлакатимизда таржимачилик анча жонланди. Ёзувчilar уюшмасида маҳсус кенгаф фаолият юритмоқда, ёш таржимонларни етиширишга эътибор ортди. Бир сўз билан айтганда, амалиёт жонланди-ю, бу жараённинг назарий асослари, йўналишлари, истиқболларини ўрганиш, тадқик этиш бирмунча сусайгандек. Атоқли амалиётчи таржимонлар орасида биринчи бўлиб Сиз таржима назариясига бағищланган асар яратдингиз. “Таржимонлик мутахассислигига кириш” деб номланган ўкув кўлланмасининг мундарижаси анчагина бой. Унда бадиий таржиманинг мұхим масалалари кўриб чиқилган. Алишер Навоий, Абдулла Қодирий, Чўлпон, Абдулла Қаҳхор, Эркин Воҳидов таржималари таҳлилига бағищланган фасллар таржима санъатига ошно бўлиш истагидаги талабалар, қолаверса мутахассис ва таржимашуослар учун айниқса қимматли. Таржимон маҳорати, услугига доир саҳифалар эса ҳам назарий, ҳам амалий фаолиятда дастуриламал вазифасини ўташи мукаррар. Иброҳим ака, Ўзбекистон давлат жаҳон тиллари университети таржимашуослик факультети талабаларига сабоқ бермоқдасиз. Сиздан устоз ва мураббий сифатида таҳсил олмоқдалар. Талаба ёшларимизнинг таржима ишига, таржима илмига бўлган қизиқишлари, муносабатлари хусусида икки оғиз сўзлаб берсангиз.

И.Ф.: – Талабаларимнинг жараён эгаси бўлишларини, комил мутахассис даражасига етишлари ва олтин малака ҳосил қилишларини истайман. Менинг истакларим уларнинг ҳам истакларига жўр бўлслайди дейман.

Х.Д.: – Хабарим бор, жаҳон адабиётида кечаётган хозирги жараёнларни мунтазам кузатиб борасиз. Айни пайтда қайси асарлар ўзбек китобхонларига тортиқ этилиши зарурроқ ва мухимроқ деб ҳисоблайсиз?

И.Ф.: – Оҳ! Қилинадиган ишларнинг поёни йўқ. Ҳали нимани таржима қилиб ул-

гурнибмиз! Танлаш, саралаш, нима кераклигини чукур англаш тамойилларини ишлаб чиқайлик аввал! Америка, Россия, Европа, Хитой, Япония нималарни қандай таржима қиляпти? Қаранг, Озод Шарафиддиновнинг таржималари жамланган “Жаҳон адаблари адабиёт ҳакида” деган юксак эътиборли мақмуя нашр этилди. Унда Ҳерман Ҳессенинг “Жаҳон адабиёти кутубхонаси”, Жон Голсупорсининг “Адабиёт ва ҳаёт”, Ирвинг Стоуннинг “Биографик қисса ҳакида” деган катта ақл ва билим билан ёзилган эссе мақолалари бор. Устоз хўбам бу асарларни сиз ва биз учун таржима қилиб қолдириб кетган! Машъаладай порлаб турибди! Нега шулардан улги олмайлик. Нега бошқа мамлакатлар таржима журналларининг тажрибалари заминида фикр алмашмайлик. Ҳозирги замон адабиётларини таржима қилишда ҳам ижодий принциплар ва йилларни камраб оладиган режалар тузмайлик. Нега?

Хёте “Ғарбу Шарқ девони” да ўз қаҳрамони Зулайҳо тилидан: “Мұхаббатдан мұхаббат бўлди пайдо”, дейди. Умуминсоний аҳамиятга эга таржима ишига шу гўзал сўзни татбиқ қиласак бўлармикин? Ахир у ҳам, ҳақиқатан, мұхаббатдан мұхаббат яратади-ку.



ЭҲТИРОФ

Яқиндагина журналинизнинг жонқуяр муалифи, атоқли таржимон, зуқко мұнаққид, ҳассос публицист ва закий устоз Иброҳим Faфуров етмииш беш ёшини қарши олдилар. Олим эллик йилдан ортиқ илмий-ижодий фаолияти давомида ўзбек адабиётининг долзарб муаммоларига бағишланган ўндан ортиқ китоблар, кўплаб адабий-танқидий мақолалар, таржима санъати ва таржимонлик маҳоратига доир дарслик ва ўқув қўлланмалари яратиш билан бир қаторда, мана ўн беш йилдирки, “Жаҳон адабиёти” журнали мухлисларига дунёнинг энг машҳур ёзувчиларининг ҳазми оғир, тили, услуги, қурилмаси мураккаб бўлган ўнлаб асарларини юксак маҳорат билан она тилимизга таржисма қилиб, тақдим этиб келмоқдалар.

XX аср гарб фалсафаси, поэтик тафаккури, турли адабий оқим ва йўналишилар мөҳияти, даҳо адаблар битикиларида акс этган турфа фикрларни чукур англаб, инсон руҳияти ва қалбидаги чўнг ҳақиқатлар, пинҳон сирлар, онг остида кечеётган мавзум жараёнлару исмисиз туйғуларга ўзбекча ном топиб, умуминсон ботинида кечеётган оғригу изтиробларни шууридан ўтказиб, ўз қалбida “қайта ишлаб” қилинган бу таржисалар, ҳалқимиз, айниқса, ёш авлоднинг маънавий камолотида бекиёс роль ўйнамоқда. Айниқса, Г. Г. Маркеснинг “Бузрукнинг кузи”, Ф. Ницшенинг “Зардуши тавалоси”, Ж. Жойснинг “Улисс” романларининг ўзбек тилига таржисма қилинши кейинги ўн йилликда ўзбек таржисимачилигидаги алоҳида ҳодиса сифатида эҳтироф этса арзиди.

Ҳалқимизда “хирмонингизга барака” деган файзли иборага жавоб ўлароқ, “умрингизга барака” эҳтироми бор. И. Faфуров мазмунли умр кечириши билан бирга ижодда ҳам баракали ҳосил кўтариб келмоқдалар. Илло, ҳалқ маънавияти ва тафаккури ривожи учун қилинган ҳар қандай меҳнат самарасиз кетмайди, бу меҳнат макон ва замон чигиридан ўтиб, ҳар бир авлодга янгидан-янги гоя, фикр, фалсафани түхфа этиб, муносиб баҳосини топиб бораверади.

Биз ҳам ушибу фурсатдан фойдаланган ҳолда, устозни табаррук ёшлари билан муборакбод этиб, оиласларига тинчлик, ижодларига барака тилаймиз.

ТАҲРИРИЯТ



ОГАҲИЙНИНГ ТАРЖИМА МАКТАБИ

Бадий таржима ҳар бир миллий адабиётнинг ажралмас қисмидир. Ўзбек адабиёти тариҳида ҳам бадий таржима борасида катта тажриба тўпланганд. Атоқли таржима намояндларининг соҳадаги хизматлари бекиёс. Бу санъат қанчалик

кўп мутаржим ва таржима асарларни қамраб олмасин, аксар ҳолларда таржима мактаби шаклида эмас, хусусий иш кўринишида ривожланиб келди. Факат соҳанинг мумтоз намояндлари пайдо бўлган замон ва макондагина уларнинг атрофида таржима мактаблари шаклланди. Қадимги Юнон, Боғод, Балония, Бобил, Дамашқ таржима марказлари худди шундай йирик мутаржимлар атрофида шаклланди. Ўзбек мумтоз адабиётининг йирик вакили Муҳаммадизо Огаҳий ҳам ўз даврида шоирлик ва тарихнависликда юксак маҳоратини намойиш этиш баробарида Хоразм таржима мактабига асос солиш билан адабий меросимиз қимматини янада оширган ижодкордир.

Ҳақиқатан, кўхна Хоразм шоирларининг ўзбек бадий таржимачилигига кўшган ҳиссалари катта эътирофга лойик. Сайфи Саройи, Кутб, Ҳайдар Хоразмий, Нурмуҳаммад Андалиб каби шоирлар ўз фаолиятини якка тартибда олиб борган эди. Уларнинг анъаналарини Шермуҳаммад Мунис XIX аср бошида давом эттириб, Муҳаммад Мирхондинг етти жилдан иборат “Равзатус-сафо” асари таржимасига киришди ва бу таржима кейинчалик мавжуд анъананинг мактаб сифатида шаклланишига туртки бўлди. Муниснинг “биродарзода ва дастпарварда”си бўлган Огаҳий ўз фаолияти билан мавжуд анъанани, яъни хусусий ижод доирасини кенгайтириб, таржима мактабини вужудга келтирди ва уни баланд чўққиларга кўтарди. Илмий адабиётларда Огаҳийнинг таржимонликдаги юксак маҳорати қўп бора эътироф этилган. Хусусан, профессор Н. Комилов томонидан олиб борилган тадқиқотларда Огаҳийнинг таржимонлик маҳорати ва унинг Хоразм бадий таржима мактаби шаклланишидаги хизматлари ҳамда бу мактабнинг ўзига хос бир қатор хусусиятлари белгилаб берилди. Бу таржима маркази ва Огаҳийнинг фаолияти ҳақида Е. Э. Бертельс, Ҳ. Орасли, В. Абдуллаев, Ф. Каримов, С. Долимов, Р. Мажидий, А. Носиров, Ж. Шарипов каби олимлар ҳам изланишлар олиб бордилар. Лекин бу тадқиқот ва изланишларда, асосан, таржимоннинг ўғирма асарлари мундарижаси, илмий тавсифи, уларнинг мавзуси, фояси, мазмун-моҳияти ҳақида фикр юритилади. Бу эса таржима мактабининг шаклланиш асослари ва унинг етакчи тамойиллари ҳақидаги муҳим жиҳатни тўла аниқлаш имконини бермайди. Шунинг учун мазкур муаммога диққат қаратишни лозим деб ҳисоблаймиз.

Биринчидан, XIX асрда Хоразмда амалга оширилган таржима асарлари миқдор кўлами жиҳатидан ҳам, бадиий савиясининг мукаммаллиги нуқтаи назаридан ҳам барча муҳит ва давр таржимачилиги учун ибрат вазифасини бажаради. Бунинг сабаби бу ерда катта таржима уюшмасининг вужудга келгани билангина изоҳланиши мумкин. Бу масъулиятли вазифани ташкил қилиш Огаҳий зиммасига тушган эди.

Албатта, бу иш жуда тез ва осонлик билан амалга ошмади. 1829 йилда Мунис вафотидан кейин хонликдаги тарихнавислик вазифаси Огаҳийга топширилди. Бу даврда Хива саройида унга тенг келадиган ижодкор йўқ эди.

Тўғри, бу даврда Огаҳийга нисбатан ёши улуғ бўлган Рожий тахаллуси билан шеърлар ёзган Муҳаммадюсуф, Мунший тахаллуси билан ижод этган Муҳаммадназар исмли истеъододли шоирлар анча-мунча шухрат ортирган, халқ ва уламолар эътирофига сазовор бўлган эди. Уларнинг таржимага ҳам лаёқатлари юкори бўлган. Лекин уларнинг таржимага жиддий киришмагани бу фаолият Хивада тизимли йўлга қўйилмаганини кўрсатади. Огаҳий Муниснинг таржимонлик анъанасини давом эттиришга киришиб, Хоразмда адабиёт ривожининг таъминланиши учун жуда кўп асарлар таржимасига эҳтиёж борлигини англаб етади. Лекин бу иш бир-икки таржимоннинг қўлидан келмаслигини ҳисобга олиб, биринчи галда Рожий ва Муншийларни ўз атрофига тортди ва уларга “Равзату-сафо”нинг 5-6-дафтарлари таржимасини топшириди. Гарчи манбаларда бу топшириқ уларга хон (Муҳаммад Аминхон) томонидан буюрилгани зикр этилса-да, таржима услуби кузатилгандা, асл ҳолат бу ерда бошқа бир ташаббускор ва нозир-мутасадди бўлганидан далолат беради. Бу шахс Огаҳий бўлгани шубҳасиз.

Маълумки, бу асарнинг биринчи дафтари ва иккинчи дафтарининг “Чаҳор ёри изом воқеоти”гача бўлган қисми, яъни, боши Мунис томонидан таржима қилинган. Мазкур таржима 1828 йилгача амалга оширилган.

Хонликда 1849 йилгача, яъни, Оллоқулихон ва Раҳимқулихон ҳукмронлик қилган йигирма йилдан ортиқ вақт мобайнида мазкур ишларни давом эттириш имкони бўлмади. Бу орада Огаҳий ўз салоҳияти, меҳнати ва маҳорати билан катта мавқега эришган ва ўрни келганда, хонга таклифларини кирита оладиган даражадаги мартабага етган эди. Мамлакат маънавий ҳаёти ривожига таъсир кўрсатувчи омиллар ҳақида тақлиф киритиш унинг ижтимоий ҳаётдаги энг катта бурчи, вазифаси эди.

Жумладан, керакли асарларни таржима қилиш дастури ҳам Огаҳий томонидангина хонга киритилиши мумкин эди. Маълум дастурсиз юзлаб асарларнинг таржима қилиниши мушкулдир. Шунинг учун ҳам Огаҳий ўн тўққизта асарни таржима қилди. Бу нафақат ўзбек, балки жаҳон адабиётида ҳам камдан-кам кузатиладиган ҳодисадир. Шу маънода Огаҳийни мумтоз ўзбек бадиий таржимасининг султони сифатида қадрлашга ҳақлимиз.

Иккинчидан, Огаҳий асос солган таржима мактабида ўзбекчалаштирилган асарлар мавзу жиҳатидан факат тарихий, ахлоқий-дидактик ва адабий асарларни ташкил қиласди. Огаҳий таржима қилган асарларнинг таснифидаёқ бунга амин бўлиш мумкин. Улар қуйидагича:

I. Тарихий асарлар:

Муҳаммад ибн Ховандшоҳ Мирхондинг “Равзату-с-сафо” асаридан иккинчи ва учинчи жиллар. Муҳаммад Маҳдий Астрободийнинг “Тарихи жаҳонкушойи Нодирий”, Муҳаммад Муқим Ҳиротийнинг “Табақоти Акбаршоҳий”, Носирийнинг “Равзат-ус сафо”, Муҳаммадюсуф

Муншийнинг “Тазкираи Муқимхоний” асарлари.

Мазкур асарларда Ўрта ва Яқин Шарқ халқларининг, жумладан, ўзбек халқининг тарихи ҳам ёритилгани ҳам алоҳида характерланади. “Огаҳий уларни таржима қилиш орқали ўз халқининг тарихини она тилида тиклаган эди”, дейди Н. Комилов ўз тадқиқотларида.

II. Ахлоқий-дидактик асарлар:

Хусайн бин Али Кошифийнинг “Ахлоқи Мухсиний”, Кайковуснинг “Қобуснома”, Саъдийнинг “Гулистон”, Жомийнинг “Баҳористон”, Муҳаммад Вориснинг “Зубдату-л-ҳикоёт”, Имомиддин Ғиждувонийнинг “Мифтоҳу-т-толибин” асарлари. Шунингдек, усмонли турк тилидан қилинган Муҳаммад Маҳдий ибн Аҳмаднинг «Далойилу-л-хайрот шарҳи» китоби.

Бу асарлар Огаҳийнинг фалсафий, шунингдек, ахлоқий-эстетик қарашларини акс эттиришга ҳам хизмат қиласди.

III. Адабий-бадиий асарлар.

Низомийнинг “Ҳафт пайкар”, Хусрав Дехлавийнинг “Ҳашт беҳишт”, Абдураҳмон Жомийнинг “Саламон ва Ибсол” ҳамда “Юсуф ва Зулайҳо”, Бадриддин Ҳилолийнинг “Шоҳу гадо” ва Зайниддин Восифийнинг “Бадоеъу-л-вақоء” асарлари.

Огаҳийнинг таржимонлик фаолиятига бағишлиланган тадқиқотлар, асосан, мана шу учинчи гурух ва иккинчи гурухдан жой олган “Гулистон” асари устида олиб борилган. Бошқалари ҳақида йўл-йўлакай фикрлар билдирилган, холос. Ҳолбуки, бу таржималарнинг ҳар бирига эътибор қаратилгандагина шоирнинг таржимонлик истеъдоди борасида муҳим хуласаларга келиш мумкин.

Шуни ҳам қайд этиш лозимки, мазкур даврда қилинган таржималарнинг ҳаммасини ҳам Огаҳий дастури асосида амалга оширилган, деб бўлмайди. Чунки жуда кўп фикҳ, илми нужум, ҳандаса ва бошқа соҳаларга доир китоблар таржимаси ҳам борки, Огаҳий муҳитига уларнинг умуман алоқаси йўқ. Баъзан сарой амалдорлари орасида ўқиладиган “Лаззату-н-нисо” каби майший мавзудаги китоблар ҳам таржима қилинган, лекин буларда ҳам Огаҳийнинг иштироки бўлмаган. Аксинча, худди шу асарнинг таржимаси Мунис томонидан қатъяян рад қилингани тўғрисида маълумотлар бор.

Демак, учинчидан, Огаҳий таржима мактаби қатъий тамойилларга эга бўлган. XIX асрда Огаҳийгача амалга оширилган камсонли бадиий таржималарда жиддий камчиликлар кўзга ташланади. Масалан, Мулло Муҳаммадниёз Урганжий “Анвори Сұҳайлий” асари (“Калила ва Димна”нинг Кошифий томонидан қайта ишланган варианти)ни ўзбекчалаштиришда худди шундай номукаммалликларга йўл қўяди. Хусусан, у аксарият жумлаларни ўзбек тилида ҳам форсий қурилмалар асосида тузади.

Профессор Н.Комилов Огаҳийдан олдин Диловархўжа томонидан қилинган “Бадоеъу-л-вақоء”нинг таржимасида ҳам бундай номукаммалликларга йўл қўйилганига талай мисоллар келтиради, Огаҳий таржимасининг афзалликлари кўрсатилади.

Огаҳий ва унинг атрофидаги таржимонлар услубида бундай нуқсонларга деярли йўл қўйилмайди. Мухтасар қилиб айтиш мумкинки, Огаҳийдан бошланган Хоразм таржима мактаби таржимада куйидаги тамойилларга

асосланган:

1. Таржима учун халқ орасида энг кўп эътироф топган бадий ва ахлоқий-дидактик асарларни танлаш.
2. Тарихий асарларни туркий халқлар ўтмишига алоқадорлиги ва ундан сабоқ олишга хизмат қилиши даражасига қараб саралаш.
3. Таржимада Навоий ва Бобур асарларида фойдаланилган эски ўзбек тилига хос грамматик ва имло қоидаларига қатъий амал қилиш.
4. Асар мазмуни илмли зиёлилар ва оддий саводхонларга бирдай тушунарли бўлиши учун асар руҳига мос таҳлил ва талқин қилиш.
5. Таржимада асар мазмуни, ғояси, поэтикаси ва муаллиф услубини сақлаган ҳолда унга Хоразм адабий мұхитига хос пафос, ифода тарзини киритиш. Жумладан, тарихий асарларни ҳам сажъ ва бошқа тасвир воситалари билан бойитиш ҳам Оғаҳий томонидан яратилган мумтоз таржима мактабининг асосий қоидаларидан эди.

Оғаҳийнинг таржимонлик фаолияти ана шу тамойилларга тўла асосланади. Унинг атрофида фаолият олиб борган саксонга яқин таржимон бу тамойилларга амал қилишга қўлларидан келганча ҳаракат қилдилар.

Оғаҳийдан кейин бу таржима мактаби ишини Мухаммадраҳимхон Феруз ўз назорати остига олиб, давом эттириди. Фикрларимизга хулоса қилиб, шуну айтиш мумкинки, бу таржима мактаби форсий ва туркий адабиётларнинг ўзаро жипс алоқаси ва таъсирини таъминлаши билан бир қаторда бу санъатнинг маълум қоида ва тамойилларга асосланиши лозимлигини ҳам амалда намойиш этди.

*Нафас ШОДМОНОВ,
филология фанлари доктори*



Акмал САИДОВ

ТИНЧЛИК ЭЛЧИСИ

1

Yшбу мақола менинг Чингиз Айтматов асарларидан хабардорлигим, шунингдек, кўп йиллар давомида Тошкент ва Москва, Париж ва Брюссель шахарларида шахсан ёзувчининг ўзи билан қилган сұхбатларим асосида юзага келган мулоҳазаларимдан иборат.

Келинг, авваламбор, Чингиз Айтматов қаламига мансуб адабиёт оламида ва ижтимоий-сиёсий ҳаётда вокеа бўлган бир неча асарларининг номларини эслайлик: “Жамила” (1958), “Сарвқомат дилбарим” (1961), “Биринчи муаллим” (1962), “Алвидо, Гулсари” (1966), “Момо ер”, “Оқ кема” (1970), “Асрға татигулик кун” (1980), “Қиёмат” (1986), “Кассандра тамғаси” (1996), “Бир Баҳоий билан учрашув” (Чингиз Айтматовнинг Файзуллоҳ Номдор билан сұхбати (1998), “Тоғлар қулаганда”, (Мангу қайлиқ) (2006). Ч.Айтматовнинг ҳар битта асари жаҳон миқёсида вокеа бўлар эди. Китобхонлар унинг асарларини адолат, ҳақиқатни кутгандек, узок қилинган мулоҳазаларнинг натижаси, кўзни очувчи янгилик, дил розидек кутар эдилар.

Ч.Айтматовнинг асарлари ҳозирги замон зиёлилари учун, инглиз тилида «must read» деб номланувчи (албатта ўқилиши лозим бўлган) ва интеллектуал асарлар сирасини ташкил этади. У ижтимоий-сиёсий масалалар, шунингдек, замоннинг глобал муаммолари ҳақида, зиёлилар тушунадиган забонда ёзар эди, чунки собиқ СССР даврида бу масалалар қаттиқ назорат қилинар, маълумот ёпиқлиги сабабли, уларни ўзгача бир йўсинда тақдим этиб ҳам бўлмасди.

Ч.Айтматовнинг қисса ва романларини жинси, ёши, миллати, ижтимоий келиб чиқиши ва ҳатто бадиий дидидан қатъи назар, деярли ҳамма иштиёқ билан берилиб ўқирди. Асарларидаги қалбни жунбушга келтирадиган лиризм ҳаммани ўзига жалб этар, ҳаммани бирлаштираси.

2

Ч.Айтматов 1928 йилда Қирғизистонда Талас вилоятининг Шакар кишлоғида биринчилардан бўлган қирғиз коммунисти оиласида таваллуд топди.

Унинг отаси, партияниң раҳбар лавозимларида ишлаган Тўракул Айтматов 1937 йилда қатағон қилиниб, 1938 йилда отишга ҳукм этилади. Чингизнинг ҳақиқий бешафқат ҳаёт билан рўбарў келиши ана ўша йилга тўғри келди. Унинг меҳнат фаолияти 9 ёшида бошланди, 14 ёшида овул кенгашида котиб бўлиб ишлайди (бу Иккинчи жаҳон уруши йилларига тўғри келгани

учун, катта ёшдаги эркакларнинг ҳаммаси фронтда эди).

Саккизинчи синфни тугатиб, у Жамбул зоотехникумига ўқишига киради, уни айло баҳолар билан тугатгач, 1948 йилда Фрунзе (хозирги Бишкек)даги кишлоқ хўжалик институтига кириш имтиҳонларисиз қабул қилинади ва олий даргоҳни 1953 йилда тугатади. Талабалик йилларида у кичик хабарлар, мақола, очерклар ёзиб, уларни кирғиз тилидаги газеталарда чоп этиб юради. Институтни тугатгач, уч йил мобайнида чорвачилик илмий-текшириш институтида ишлайди, айни пайтда ёзиш ва ҳикояларини чоп эттиришдан ҳам тўхтамайди. 1952 йилда рус тилида унинг “Газетчик Дзюдо” ҳикояси чоп этилади.

У 1956 йилда СССР Ёзувчилар уюшмаси ҳузуридаги Олий адабиёт курсларида ўқиши учун Москвага келади ва уни 1958 йилда тугатади. Адабиёт курсини тугатиш арафасида унинг қирғиз тилидан русчага таржима қилинган “Юзма-юз” ҳикояси “Октябрь” журналида чоп этилади. Шу йилнинг ўзида ҳикоялари ҳамда унинг номини дунёга машҳур қилган “Жамила” қиссаси “Новый мир” журналида эълон қилинади. Унинг кеининчалик “Тоф ва дашт қиссалари” тўпламига кирган “Жамила” қиссаси қирғиз аёлининг шахсий бахт ва ижтимоий фаолиятга эгалик хуқуқи ҳақида эди. Асар тез орада дунёning бошқа кўпгина тилларига таржима этилди.

“Тоф ва дашт қиссалари” тўпламига кирган “Сарвқомат дилбарим” (1961), “Биринчи муаллим” (1962) қиссалари оддий қишлоқ аҳли ҳаётида кечаетган муракқаб руҳий ва ижтимоий қарама-қаршиликлар, турмуш билан боғлиқ манфаатлар тўқнашуви хақидадир. 1965 йилгача Ч.Айтматов асосан қирғиз тилида ёзган.

Қирғизистонга қайтгач, у “Литературный Кыргызстан” газетасининг муҳаррири, “Правда” газетасининг Қирғизистондаги маҳсус мухбири бўлиб ишлади (1960 –1965). 1960-1986 йилларда Ч.Айтматов Қирғизистон кинематографистлари уюшмасига раислик қилди. У “Биринчи муаллим” (1965), “Йўрганинг чопиши” (1968), “Мен Тиён Шонман” (1972), “Мухабbat садоси” (1974), “Оқ кема” (1975), “Денгиз бўйлаб чопаётган олапар” (1990) фильмларининг сценарийсини ёзган.

Ёзувчининг доимий дикқат марказида инсон билан жамият ўртасидаги муносабат масалалари турарди. Айтматовнинг қаҳрамонлари давримизнинг маънавий кучли, мурувватли, фаол кишиларидир. У жаҳонга новатор ёзувчи, психологик портрет устаси сифатида танилди.

1988-1990 йилларда Ч.Айтматов “Иностранный литература” журналиниң бош муҳаррири лавозимида хизмат қилди, 1986-1990 йилларда СССРнинг биринчи Президенти ва КПСС МК нинг бош котиби М.С.Горбачёвнинг Давлат маслаҳатчиси бўлиб ишлади. Ва унинг тавсиясига биноан 1990 йилда Люксембургдаги собиқ Совет Иттифоқининг элчиси этиб тайинланди.

Ч.Айтматов 18 йил давомида дипломат лавозимида ҳам муносиб ютуқларга эришди. У 1990-1993 йилларда Люксембургда Россиянинг, Бенилюкс давлатларида Совет Иттифоқининг элчиси бўлиб хизмат қилди. 2008 йилнинг март ойига қадар, ўн беш йил давомида Бельгия, Люксембург, Нидерландия, Францияда Қирғизистон элчиси, шунингдек ЮНЕСКО, Европа Иттифоқи ва НАТО вакили бўлиб хизмат қилди. Адабий фаолиятини ҳам сира тўхтатмади. Хусусан, унинг “Кассандра тамғаси” романи 1994 йилда, сўнгги “Тоғлар кулаганда” (Мангу қайлиқ) романи 2006 йилда чоп қилинди.

Ч.Айтматовнинг адаби, элчи, жамоат арбоби сифатида салоҳияти ва хизматлари бутун дунёда тан олинди: у – Социалистик Мехнат Қаҳрамони (1978), Қирғизистон Республикаси Қаҳрамони (1997), адабиёт бўйича Ленин мукофоти лауреати (1963), уч марта СССР Давлат мукофоти лауреати (1968, 1977, 1983), Виктор Гюго номидаги халқаро маданият мукофоти (Франция), “Этрурия” (Италия) адабиёт мукофоти, Адабиёт ва санъат соҳасидаги мукофот (Австрия), Жавоҳарларъял Неру номидаги халқаро мукофот (Ҳиндистон),

Үрта Ер денгизи маданий ташаббуслар маркази таъсис этган халқаро мукофотининг (Италия), Америка диний экумен фонди “Виждонга чорлов” мукофотининг, Ф.Рюккарт номидаги Бавария мукофотининг (Германия), А.Мень номидаги ва ҳоказо мукофотларнинг соҳиби бўлди. “Жаҳон фани, адабиёти ва санъатида эришган буюк ютуқлари” учун Альберт Эйнштейн номидаги катта Олтин медал, Токио Шарқ фалсафаси институтининг “Ер юзида тинчлик ва тараққиёт барқ уришига, маданият ва санъат ривожланишига қўшган буюк хизматлари учун” фахрий медали, туркий мамлакатлар маданияти ривожига қўшган хиссаси учун Туркия хукуматининг Олий мукофоти, кўпчилик хорижий мамлакатларнинг (Венгрия, Польша, Россия, Ўзбекистон) орден ва медаллари билан тақдирланди.

Ч.Айтматов 2008 йилнинг 10 июнида Германиянинг Нюренберг шаҳрида, муолажа олаётуб, клиникада оламдан ўтди. 14 июнда Бишкек шаҳри яқинидаги «Ота-Бейит» тарихий-мемориал мажмуасида дағн этилди.

3

Бўлғуси адиб бувисининг қўлида тарбия топди, унинг ҳаёт ҳақидаги илк таассуротлари қирғиз халқининг миллий турмуш тарзи билан боғлиқ ҳолда кечди. У шундай бир муҳитда яшадики, у ерда эртаклар, ривоят, афсона ва асотирлар оғиздан оғизга ўтиб юарди. Айтматовлар оиласида қирғиз ҳамда рус тилларида тенг гаплашар эдилар, бу унинг ижодий фаолиятида икки тиллиликни белгилаб берди. Оила таъсирида Ч.Айтматов болалигидан рус тили ва адабиёти, рус маданияти билан жуда яқиндан танишди.

У умри давомида жуда кўп адолатсизликларга ҳам учради. Унинг ҳаётидаги биринчи адолатсизлик – бу отасининг қатағонга учраши эди. Ёш бўлишига қарамай, у қатағон туфайли қандайдир мудхиш воқеа содир бўлганини тушуниб етди ва бирон-бир нарсани ўзгартиришга ожизлигидан азоб чекди. Инсон қалбида ҳамиша адолатга бўлган яширин бир интилиш мавжуд экан. Афтидан, “мана шунга чида берилса, кейин ҳаммаси изга тушиб, бошқача бўлади”, деган умидвор фикр ёш Чингизни ҳам тарк этмади.

“Жамила”дан сўнг адибнинг иккинчи қиссаси “Сарвқомат дилбарим” дунёга келди, у ҳам ўзининг ҳаётийлиги ва ҳаққонийлиги, истеъод куввати жиҳатидан аввалги асаридан қолишмайди. Асар Айтматовнинг носир сифатидаги имкониятларини янада кенг намойиш этди. Асарнинг мазмундорлиги, фабулага ишлов берилиши, характерлар тавсифи ёш ёзувчининг ишонч билан куч тўплётганидан, ўзига хос құдратли овозидан дарак берди.

Ч.Айтматовнинг рус тилида ёзилган биринчи асари “Алвидо, Гулсари!” (1965) қиссасидир. Асарнинг бош қаҳрамони – қирғиз дехқони Танабойнинг тақдири, худди “қишлоқ прозаси”нинг энг яхши қаҳрамонлари тақдирига ўхшаш типикдир.

Ўша вақтлардан буён Ч.Айтматов асарларини ўқимаслик дунё бўйича адабиётдан бехабарлик сифатида баҳолаб келинди. Номи бутун дунё танилганида, Ч.Айтматов ҳали қирқ ёшга ҳам тўлмаган эди.

1970 йилда унинг яна бир машҳур асари “Оқ кема” дунёга келди ва қирғиз кинематографининг пешқадам режиссёри Бўлат Шамшиев томонидан шу номдаги бадиий фильм суратга олинди. Мазкур фильм Ч.Айтматов асарлари асосида суратга олинган фильмлар ичida энг муваффақиятли фильмлардан биридир. “Оқ кема” асаридаги ёзувлликка тўқнаш келган ва балиқقا айланган қирғиз болакайнинг аянчли тақдири жуда жозибадор тасвирланган. Болакай ёлғиз. Қадимги ривоятлар билимдони, кексайиб қолган буваси Мўмин унга ота-онаси ўрнида. Болакай бобосидан эшитган ривоят ва афсоналарини туйган, воқеликни гўзал эртакдек қабул қилган таассуротлари билан катталарнинг шафқатсиз дунёсига дуч келади. Ҳар қандай ривоят каби, “Оқ кема” асари ҳам китобхон ва томошабинларга

рухий-маънавий ва эстетик сабоқ беради.

Шу тариқа 1970 йилларда Ч.Айтматов жаҳон адабиётида бадиият рамзига, янада аниқроқ айтганда, адабий йўлбошчига айланиб қолди. Унинг қисса ва ҳикоялари асосида саҳналаштирилган томошалар кўпчилик дунё театрлари саҳналаридан ўрин олди. Москвадаги “Большой театр” репертуаридан унинг “Сарвқомат дилбарим” қиссаси асосида яратилган “Асал” балети мустаҳкам ўрин эгаллади.

Унинг биринчи романи – “Асрға татигулиқ кун” 1980 йилдагина дунё юзини кўрди. Бу – Айтматовга хос улуғ фалсафий роман эди.

Ч.Айтматов асарларини оддий, жонли, ўзига хос бир тилда ёзди, уларни берилиб, бутун борлиқни унугтиб ўқийсиз, асар қаҳрамонлари билан бирга қайғурасиз. Ў қирғиз ҳалқи маданиятини, турмуш тарзини жуда мукаммал тасвиirlайди, нигоҳини ҳаётнинг ички, соғ, меҳрли, самимий қатларига қаратади. Шу боис Айтматов асарларини ўқиш мароқлидир. Чингиз оға ҳаётни қандай бўлса шундайлигича, ҳаққоний тасвиirlади. Оддий одамлар ҳаёти, уларнинг урушга бўлган муносабати ҳақида ёзди. Унинг асарлари шу қадар ҳикматга бойки, сизни сеҳрлаб қўяди. Ўқиганимизда ҳар гал ўзимизни у тасвиirlаган шамолни хис этгандек, у тасвиirlаган олам ичра кезгандек сезамиз.

Айтматов матни ўзининг мазмундорлиги, метафорага бойлиги, инсонларга ҳамдардлиги билан ажralиб туради. Шуни таъкидлаш жоизки, Ч.Айтматов адабиёт учун энг қийин кечган даврларда ҳам ҳамиша ҳалоллигича қолди, виждонини сотмади ва зиёлилар учун ибрат мактаби бўлди, унинг ижоди “тоталитаризмга бўлган оппозиция” сифатида танилди.

Адиб асарларининг жаҳоншумул муваффақияти, унинг бутун дунёда тан олиниши билан боғлиқ маълумотлар ЮНЕСКО нашрларидаги қуйидаги хабарлардан маълум: XXI аср бўсағасида Ч.Айтматовнинг асарлари 168та мамлакатда, 165 та давлат тилида, 67.2 миллион нусхада, 830 марта нашр этилди. Бу маълумотлардаги рақамлар эндиликда кундан кунга ортиб бормоқда. Унинг кўплаб асарлари асосида фильмлар яратилди, томошабинлар уларни ҳозир ҳам қизиқиш билан томоша қилишади.

Ч.Айтматов таваллудига 70 йил тўлиши санаси ЮНЕСКО ташаббуси билан бутун инсониятнинг маданий-маънавий ҳаётидаги улкан воқеа сифатида нишонланди. Адибнинг таваллуди муносабати билан ўтказилган тадбирларда унинг жаҳон адабиёти, маданияти ва санъатига қўшган ҳиссасини қайд этиш билан бир каторда, жаҳон ҳалқлари учун ўта зарур бўлган дунё тинчлигини сақлаш, барқарорликни таъминлаш борасида кўрсатган хизматлари ҳам алоҳида таъкидлаб ўтилди.

4

Адиб асарлари инсон цивилизациясини мифологик англашни бошлаб берган XX аср тарих солномасидан мустаҳкам ўрин олди. Бу борада у ижодиёти жаҳоний миқёсида аҳамиятга эга бўлган Томас Манн, Франц Кафка, Альбер Камю, Хулио Кортасар каби атоқли адиллар сирасига киради. уни “қирғизларнинг Толстой”, “қирғизларнинг Гарсиа Маркеси” деб ҳам атashади. Ақл-идрок тараққиёти маърифат оламини остин-устун қилиб ўзгартириб юборганидан саросимага тушмаслик керак, балки бу эврилишлар билан муроса қила олишимиз лозим. Бу фикрга қўникиш керак. Саросима ўтиб кетади. “Бутун бир маданиятни ўзгартирмоқ керак”, – деб ёзган эди Камю. Дарҳакиқат, маданият бизнинг кўз ўнгимизда ўзгармоқда, фақат биз буни сезмаётган бўлишимиз мумкин. Нимага ҳайрон бўлайлик, ахир, Николай Коперник ва Галилео Галилейнинг китоблари ҳам уч асрдан зиёд вақт тақиқланиб, бўғилиб ётди-ку!

Ч.Айтматов дунё миқёсида романга хос янгича тафаккурнинг шаклла-

нишига эътибор билан қаради. Бунда асосан дунё ҳалокатини ҳис қилиш, ВАҚТ, ИНСОН, ТАБИАТ ўртасидаги учлик муносабатлар ўта муҳим эди. “Ч.Айтматов ижоди ўзида Шарқ ва Фарбнинг бадиий ва интеллектуал бирлиги(синтези)ни ташиди”¹.

5

Ч.Айтматовнинг ҳажм жиҳатдан энг катта китоби “Қиёмат” 1986 йилда чиқди. У яшин тезлигига бестселлерга айланди. Мухлислар китобни қўлдан қўймасдан ўқидилар. “Қиёмат” асарида адид шу пайтгача овоз чиқариб айтиш мумкин бўлмаган мавзуларни кўтарди, у Яратганга ишонч, наркотик моддалар, одамзотга хос бўлган ақл бовар қилмас шафқатсизликлар ҳақида ёзди.

Миф – Ч.Айтматов ижодининг ажralmas bir қисмидир. Улар асар матни таркибида ҳозирги воқелик билан тенг мақомда туради. Бу – Айтматов танлаган бадиий усул. У табиатан шундай эди, ўтмишдан сақланиб қолган сехр ва фалсафага китобхонларни жалб этишга ташна эди, зеро, мифлар – аждодларимизнинг бизга йўллаган номалариридир. Таъбир жоиз бўлса, шуни айтиш лозимки, Ч.Айтматов асарларида мусиқа, миф ва афсона уйғунлиги мавжуд. Ч.Айтматов асарларидағи бадиий оҳангдошлиқ сири, сехри шунда.

“Асрга татигулик кун” романни адиб ижодида планетар тафаккур томон бурилиш ясади, инсондаги танлаш имкониятларини излаш, топиш, азалий ҳақиқат мавзусига қайтиш, маданиятдаги ўзгаришларни идрок қилиш йўлларини белгилаб берди.

Романинг асосий қаҳрамони – кичик темир йўл станциясида ишлайдиган оддий қозоқ Едигей. Едигей ва унинг атрофидаги инсонлар тақдири, урушдан аввалги қатағонлар, Жаҳон уруши, ундан кейинги оғир меҳнат фронти, одамлар яшайдиган жой яқинида қурилган атом куролини синаш майдонлари, худди томчида қуёш акс этгандек, мамлакат тақдирига во-баста акс эттирилган. Ч.Айтматовнинг қиссаларида бўлгани каби, “Асрга татигулик кун” романнда ҳам түя образи, шунингдек Найман Она ва унинг ўғли – ёвуз ниятли кимсалар сабабли манқуртга айланган, авлод-аждодини хотирасидан ўчирган, бефаҳм ва қаҳри қаттиқ бир қаттол Жўломон ҳақидаги афсона муҳим жой эгаллади.

“Асрга татигулик кун” романни ҳам бутун дунёда шуҳрат қозонди. “Манқурт” тушунчаси инсон қийматини белгиловчи тамфа, борлиқ билан муносабатни узган, енгиб бўлмас қийинчиликлар комида қолган одамнинг ўзига хос рамзи бўлиб қолди.

Менинг: “Нима деб ўйлайсиз, бизнинг ўта мураккаб замонда, айнан манқуртлар – робот-одамлар, бошқалар томонидан мажбуран битта мақсадга йўналтирилган одамлар инсониятнинг келажагини белгилаши мумкинми?”, – деб берган саволимга Ч.Айтматов куйидагича жавоб берган эди: “Хамма даврларда ҳам бундай хавф бўлган – манқуртлар инсоният тараққиётiga салбий таъсир кўрсатганлар. Бу хавф ҳозир ҳам бор. Эндиликда инсоният жамияти жуда мўртлашиб қолди. Глобаллашув даврида, ҳар томонлама билимга эга бўлишга ҳаракат қилинаётган бир пайтда миллий маданиятлар кўп ҳолларда ўзлигини йўқотади ва бу албатта манқуртликка олиб келади. Барча миллий маданиятлар биргаликда олинганда ягона тоталитар оммавий маданият қалпоғи остига тушиб қолиши ҳам мумкин. Ҳар қалай, мен демократик тамойиллар бизни тараққиёт томон етаклаши ва даҳшатли воқеаларнинг кучайишига йўл қўйилмаслигига умид киламан”.

Ч.Айтматов ижодининг марказида инсон ва жамият муаммоси туради. “Оқ кема” асарида у турмуш билан боғлиқ муҳим масалаларни кўтариб чиқди. У Табиатни ер юзидағи барча тирикликтининг онаси эканлигини, Та-

¹ Мирза-Ахмедова П.М. Классика и современность в аспекте взаимодействия. Ташкент, 2008. с.33.

биятга қарши чиқиш, унга нисбатан қилинган жиноят бутун инсониятни ҳалокатга олиб келиши мумкинлигини барчага маълум қилди. “Инсоният табиат экологиясидан қалб экологиясига ўтишга ҳаракат қилиши лозим. Бугунги замонда дин ҳам ўз қобиғида биқиниб қолмаслиги, ахборотни ривожлантириш соҳасида олдинга қадам ташлаши керак”, деган эди Чингиз оға.

“Кассандра тамғаси” романини ёзганидан кейин унга космополит-ёзувчи сифатида қарашибанини у гоҳ кулиб, гоҳ афсус билан эсларди.

Шуни ҳам унумаслик керакки, дунёдаги глобал жараён миллий ўзликни белгилаш, ўзини ўзи англаш, ўзини идентификациялаш билан диалектик жиҳатдан боғлиқдир. Булар бирини-биридан ажратиб бўлмайдиган категориялардир. Уларнинг мунозараси бугунги кунда тарихни ҳаракатга келтирувчи кучга айланди.

Биз ўлим муқаррар эканлигини биламиз. Бироқ бутун Инсоният ҳалокатга маҳкум бўлиши мумкинлигини XX асрдагина англаб етдик. Айнан мана шу туйғу – “инсон азоб чекишининг умумий баланси” (Ч.Айтматов) инсонни Исо Масиҳ ва Понтий Пилат мунозарасини қайта идрок қилишга мажбур этди. Ривоят янгича талқин қилинаётганини қўпчилик аввал сезмади. “Қиёмат” даги Авдийнинг кўрганлари билан Гефсиман боғида Христоснинг кўрганлари бир-бирига ўхшаш – оламшумул, умумҳалокатни ҳис қилишига асосланган. Замин ҳаробага айланган, биронта тирик жон йўқ. “Наҳотки шафқатсиз дунё инсонни ҳам, худди чаён ўзини ўзи ўлдиргани каби, ўзини ўзи маҳв этишга мажбуруласа?!?”.

Ч.Айтматовнинг ўзига хос томони шундаки, у бирон-бир асарида, у хоҳ “Оқ кема”, хоҳ “Асрға татигулик кун” ё ундан кейинги асарлари бўлсин, ўзининг она юртини тасвирлаш билангина чекланмайди. У қандай мавзу ё масалани кўтармасин, нимани тасвирламасин, ҳақиқий санъаткор ва файла-суф сифатида ҳамиша ўзининг мулоҳазалари ва яратган асарларида уларни умуминсоний манфаат ва муаммо даражасида англашга ҳаракат қиласди. Шу боис ҳам Ч.Айтматов тор миллий доирани ёриб, жаҳоний миқёсга чиқди. Унинг чуқур умумлашма ва мулоҳазаларга бой асарлари америкаликка ҳам, олмонга ҳам, япон ва поляқ, қозоқ ва рус китобхонига ҳам бир хил куч ва кудрат билан таъсир кўрсатади.

6

Ч.Айтматовнинг 75 йиллиги муносабати билан Москвадаги «Воскресенье» нашриёти ўзбек тадқиқотчилари томонидан тайёрланган, адабнинг ҳаёти ва ижодига бағишлиланган “Чингиз Айтматовнинг маҳобатли кемаси”¹ деб номланган тўпламни чоп этди. Ҳажм жиҳатдан салобатли бу тўпламдан адабнинг ҳаёти ва ижоди ҳақидаги илмий тадқиқотлар, адабнинг эстетик-фалсафий қарашибарини, кўп киррали адабий қобилиятини ёритувчи материаллар, шунингдек, XX аср адабиётида адабнинг роли ва ижодининг умуминсоний аҳамиятини белгиловчи адабий мақолалар ўрин олган.

Тўплам кўп сонли библиографик материаллар, ҳужжатлар, суратлар, турили тадқиқотларни ўзида жамлаган. Замонамизнинг кўзга кўринган, йирик адаби номи билан боғлиқ билимлар энциклопедиясини ифодаловчи мазкур тўпламнинг нуфузини ортиқча баҳоламаяпмиз. Унинг саҳифаларидан Луи Арагон, Дайсаку Икэда, Михаил Горбачёв, Дмитрий Шостакович, Федерико Майор, Александр Кинг номлари ўрин олган. Китобнинг қиммати, албаттага, унинг саҳифаларидан ўрин олган шахсан Ч.Айтматовнинг публицистик ва насрый мулоҳазаларида. Тўпламга “Асрға татигулик кун” романининг таркибий қисми бўлган “Чингизхоннинг оқ булути” қиссаси, шунингдек, “Худога қайта юклangan вазифа...” новелласи ҳам киритилган. “Ўлдир – ўлдирма...” ҳикоясининг ҳам аҳамияти катта. мавзунинг долзарб-

¹ Ковчег Чингиза Айтматова. М., 2004.с.688.

лигини Ч.Айтматов асарларининг номланишида берилган кўп маъноли уч нуқталарчалик ҳеч нарса ифодалаб бера олмайди. Булар – ҳақиқатдан ҳам борлиқнинг буюк саволлари бўлиб, инсон бу саволларга азалдан жавоб излайди. Аммо жавоб топилган эмас.

Аслида, дин, эътиқод, ҳар нарсага қодир идрокни қайта баҳолаш – булар Ч.Айтматов публицистикасида янги мавзулар эмас. Айниқса, адид “Қиёмат” асарида бу мавзуларга бевосита ёндашади. Йил ўтган сайин адиднинг метафизика оламига бўлган қизиқиши тобора ортиб боради, асарлари эса янги замоннинг янада кескин ва жиддий фикрловчи кишини изтиробга кўйишда давом этади. Моҳияттан, кўп йиллар давомида Ч.Айтматов асарларининг ягона, бош мавзуси – тинчлик мавзуси эди, у “Ҳеч кимни ўлдирма!” деган диний ақидага қандайдир умумий ва фундаментал маъною юклаш учун бутун инсониятнинг асосий кучини бир жойга тўплашга уринди. Иккинчи жаҳон урушининг 60 йиллиги арафасида чоп этилган “Ўлдир – ўлдирма...” ҳикояси, маълум маънода, бу мавзуни ривожлантиришнинг энг юксак нуқтаси бўлди.

Ч.Айтматовнинг менга айтиб берганларига кўра, 2006 йилда у Германиянинг еттита шахри бўйлаб саёҳат қилган, у ерда турли давраларда учрашувлар ўтказган, маърузалар қилган, ҳатто ўзининг халқпарварлиги билан адидни лол қолдирган ибодатхоналарга ҳам кирган. Ч.Айтматовни немис китобхонлари ҳам ҳайрон қолдирди. Унинг айтишича, “немислар мени шу қадар эътибор билан тинглардики, худди барча ёзганларим уларга тегишилдек”. Эҳтимол бу каби муносабатларнинг замини ва улардаги эътиборлиликнинг уйғониши – немисларнинг XX аср ўрталарида, Иккинчи жаҳон урушидан чиқарган сабоклари билан боғлиқдир?!

Инсон ўз наслини сақлаб қолиш учун узоқ асрлардан бери давом этиб келаётган одамкушлик иллатидан бутунлай воз кечишини талаб қиласди. “Чингизхоннинг оқ булути” қиссасининг қаҳрамони юзбоши Эрден хоти-нига: “Биз ҳали туғилмаган боладан кечишини истамадик”, – дейди. Улар раҳнамоларининг хужум пайтида фарзанд кўрмаслик буйруғига амал қилмадилар. Урушлар, бу хужум ва наслни давом эттиришга монелик қилувчи тўсиқ ҳамдир. Ч.Айтматовнинг хотиrlашича, у болалик пайтида оиласининг ягона бойлиги – сиғирини ўғирлаганларни ўлдиришга ҳаракат қилган. Чўлда ёш Чингизга эшак минган бир қария учраб: “Ҳеч кимни ўлдирма... Бу дунё адолатлидир...”, – дейди. Дунёнинг эса адолатсизлиги маълум бўлди. Бироқ, ожизлигидан ўқсиниб ийғлаётган боланинг қалбида нимадир қолганки, у қариянинг сўзларини унутмади...

“Нима учун сизнинг асарларингизда ҳайвонлар образи кўп учрайди?” – деб берган саволимга Чингиз Тўракулович: “Бу энди менинг табиатим, оламни идрок этишим. Мен инсонни ҳайвондан ажратмайман. Бу услуб эса асарни бутлашга ва камини тўлдиришга ёрдам беради, унга мазмун бағишлидай. “Кассандра тамғаси”даги Кремль бойқушини ўзим ҳам жуда яхши кўраман. Эҳтимол у қуш ҳозир ҳам Кремль минораларида яшаб, ким қайси вақтда келаётганини кузатиб ўтиргандир. Унинг асардаги иштироки воқеани ань-анавий тавсифлаб беришдан кўра кучлироқдир, – деб, гапини яна давом эттириди, – Инсон – ақли бор зот, у яратиши ҳам мумкин ва вайрон қилиши ҳам, яхшилик келтириши ва зулм ўтказиши ҳам мумкин. Ҳайвонларнинг эса ҳаракати чекланган. Улар инсонга қарам бўлиб қолган. Шу боисдан ҳам мен уларни асарга киритаман. Инсон ўзини қандай тутиши лозимлигини англаши учун...” – деб кўшимча қилган эди.

“Тоғлар кулаганда”... романининг ҳам мавзуси долзарб: глобаллашув, шоу-бизнес, тоғ қоплонларини тижорат мақсадида овлаш, тунги клублар... “78 ёшда буларнинг ҳаммасини қаердан биласиз?” – деб сўраганимда, адид: “Мен тирик жонман, даврнинг томир уришини, тўхтаб-тўхтаб нафас олишини имкон қадар ҳис қилишга ҳаракат қиласман, давр ҳақда қайфурман ва

билганларимни ёзгим, кечинмаларимни ифодалагим келади. Глобаллашув даври бошланиши билан кўп нарса ўзгарди. Шу боис менинг романимдаги машхур опера қўшиқчиси шоу-бизнеснинг қурбони бўлади. У ресторанларда юриб, опера театрида оладиган маошидан кўра юз баробар кўпроқ пул топади. Ва бу фақатгина операнинг муаммолари эмас, балки бутун маданият оламидаги бўхронлардан дарак беради”, – деган эди.

Ч.Айтматов ўзининг “Мангу қайлиқ” романида яна файласуф сифатида намоён бўлди. Романинг асосий қаҳрамонларидан бири – тоғ қоплонининг тақдири, асарнинг бошқа қаҳрамони – журналист Арсен Саманчин билан чамбарчас боғлиқ. Роман – мухаббат, яхшилик билан ёмонлик ўртасидаги кураш хақида. Адид: “агар мен нимадир ёза олсан, ҳамиша инсон дунёда ёлғиз эмаслиги, унинг ён-атрофида бошқа жонзотлар ҳам яшаши ва инсон улар учун, умуман Ерда кечётган воқеалар учун масъуллиги ҳақида ёзман”, – дейди.

Чингиз Тўракулович олам фуқароси эди. Унинг чуқур бадиий-фалсафий қарашлари, қаҳрамонларининг ҳаётга бўлган муҳаббати чексиз эди. У ўз ижодида жаҳон адабиётининг ҳалқ ҳаёти билан боғлиқ йўналишларини тадқик этди. У Шарқнинг чуқур фалсафаси ва Европа адабиётининг энг сара анъаналарини ўзида мужассамлаштириди. Шу маънода у – евроосиё адабиётининг энг улкан намояндаси ҳамdir.

Ч.Айтматов “замон ва олами қалбига сифдириш салоҳиятига эга бўлган” (Ф.Шеллинг) инсонлар сирасига кирган. Айнан шунинг учун ҳам у кўпчиликдан ўзиб, ғоялар ифодачиси сифатида танилди ва фақат ўзибгина кетмасдан, балки ўз даврининг йўқотишлари, ютуқларини ҳам белгилаб бера олди. Ишончим комилки, йиллар ўтиб Чингиз Айтматов асарлари бутун жаҳон адабиётида янада кўпроқ аҳамият касб этиб боради, унинг номи, худди юлдузлар жойида қоим турганидек, яна янгиланиб жамол очади. Унинг исми буюк адаб, файласуф ва инсонпарвар одам сифатида мангаликка дохиллигича қолади.



ВЛАДИМИР ЛАКШИН МАЙДОНГА ТУШАДИ

Яқинда Солженицин ҳақидаги Владимир Лакшиннинг “Солженицин ва тарих фиддираги” (тўпловчи С. Кайдаш-Лакшин. М.: Алгоритм, 2008) ҳамда Бенедикт Сарновнинг “Солженицин феномени” (М.: Эксмо, 2012) номли мемуар китобларининг қисман чоп этилиши шундан далолат берадики, “таъқибдаги” ёзувчи асарларини расман эълон қилишда А.Т. Твардовский ва “Новый мир” журналининг роли борасидаги савол шуро ва рус адабиёти тарихчиларини ҳамон хаяжонга солмоқда. Маълумки, ушбу мунозарага сабаб бўлмиш Солженициннинг “Эманга шох ташлаган бузоқча” номли китоби 1975 иили Парижда, Лакшиннинг бу ҳақидаги очерки эса 1977 иили Лондонда эълон қилинганди. Ўшандা юзага келган мунозааранинг баъзи бир тафсилотлари ўқувчилар учун номаълумлигича қолмоқда.

“ЭМАНГА ШОХ ТАШЛАГАН БУЗОҚЧА”

1975 иили Парижда Солженициннинг “Эманга шох ташлаган бузоқча” автобиографик китобининг чоп этилиши Фарбий Европада яшовчи руслар учун катта воқеа бўлган эди. Мен бир неча журналларни вараклаб, китоб эълон қилинадиган санага мўлжалланган такризлар учун унинг рисола шаклини олдим. Англияда у ёки бу китоб тақризи бир вақтнинг ўзида ўша китобнинг рекламаси ҳам ҳисобланади. Шу боис китоблар истеъододли тақризчиларга ўша китоб дўйон пештахталарида пайдо бўлишидан икки-уч ҳафта аввал юборилади. Тақризлар барча янги китобларга ҳам ёзилавермайди, қолаверса, танқид руҳида ёзилган тақризнинг ўзи муваффакият аломатидир. Айниқса, The London Book Review адабий ҳафталигидан қайта-қайта илтимослар тушганини алоҳида айтиб ўтиш лозим. Уларга мақола жуда зарур эди. Ўша пайтда Англияда русча китобларни мутолаа қилувчилар орасида Жорес Медведевгина муаллифни ва китоб қаҳрамонларини шахсан танир эди. 1973 иили Парижда Macmillan нашриёти томонидан рус тилида нашр қилинган “Иван Денисовичдан кейин ўн йил” номли чоғроқ китобим инглиз тилига ҳам таржима қилинган эди. Бироқ кўплаб илтимосларга қарамай, “Бузоқча”га на рус, на инглиз тилида бирон бир тақриз ёзолдим ёки интервью беролдим. Гарчи “Бузоқча”да Александр Твардовский ҳақида айтилган гаплар айнан унинг ўзидан кўриб кўчирилган бўлса-да, мен учун қадрдан хотирага айланган инсон сиймосининг бунчалар сохта акс эттирилгани бунга сабаб бўлди. У ҳақида айтилган гапларнинг бари фирт уйдирма бўлгани учунгина эмас, балки шахсан танимайдиган ўқувчиларга Твардовскийни қай тарзда кўрсатилганлиги ғазабимни қўзғаганди. Ахир, бу салласини деса, калласини олишнинг ўзи-ку!

Нима сабабдан Александр Трифонович уйида икки ҳафталааб қолиб кетишини, таҳририятга ўқтин-ўқтин келмай қолишини “Новый мир”дагилар ҳам, Ёзувчилар Ююшмасидагилар ҳам яхши билар эдилар. Бу муаммо 1939–1940 йиллардаги Фин кампаниясидан бошлаб фронт мухбири ва подполковник унвонидаги комиссар чеккан олти йиллик заҳматнинг натижаси эди. Твардовский

ўзининг барча шеърлари ва достонларини аввалига фронт газеталарида чиқариб юрди. Ҳали ёзганларининг давоми пайдо бўлгунича яшайдими, йўқми, билмай туриб, шеърларини сиёҳи қуримай чоп эттираверди. Бу матннинг ўзидан ҳам аён эди. Галаба учун артиллерия қанчалик керак бўлса, жанговар рух ҳам шунчалик зарур. Твардовский узок йиллар давомида нафакат фронтнинг, балки бутун мамлакатнинг севимли шоири бўлиб қолди (гарчанд кейинчалик кам ёзса-да, 1970 йилгача шундай бўлиб қолди). Оддий пиёда аскар “мансаби”даги собиқ фронтчи, қолаверса, ҳам генетик, ҳам биокимёгар сифатида билардимки, бу каби баҳтиқаролик баъзи жангчиларда пайдо бўлиши мукаррар ва бу инсон характерида эмас, физиологиясида шаклланади. Фронтолди зобитининг таомномасига кириб улгурган “халқ комиссари юз грамми”дан ҳеч ким бош тортмасди (комиссарларга эса бу борада чекловлар мутлақо бўлмасди). Алкоголь тана хужайраларида углеводларга нисбатан тез парчаланиб, баданни қизитади. Оқибатда баъзи бир кишиларда алкоголга тобелик ҳам пайдо бўлиши мумкин.

1971 йилнинг нояброда ташхислар ўтказиб юборилган ўпка саратони мияга метастаза берганини кўрсатиб, (у доимо арzon, кучли, фильтрсиз сигарета чекар, бу ҳам фронтдалигидан қолган одат эди) Александр Трифонович сўнгги жарроҳлик операциясига тайёргарлик кўраётганда аллақачон бўйи етган қизлари – Валентина ва Ольгани видолашиб учун ёнига чакиради:

“...Менинг маст ҳолатимни эмас, хушёргимни эсга олинглар, – дея қизларига бир ривоят сўзлаб беради: – Инжилдаги Нуҳни биларсиз... У ер ҳайдаб, узум экди... май ичиб, маст бўлди ва чодирида яланғоч бўлиб ётди. Ўғли Ҳом отасининг бундай ҳолатини кўриб қулди. Ташқарига чиқиб, акаларига отасининг яланғочлигини айтди... Сом ва Ёфас юзларини терс ўтирганча оталарининг авратини кийимлари билан бекитиши...”

Солженициннинг китоби “Щ-854” (кейинроқ Твардовский “Иван Денисович-нинг бир куни” сарлавҳасини таклиф қиласди) номли қиссанинг “енгиллаштирилган” варианти қай тарзда нашр этилганлиги ҳақидаги воқеадан бошланарди. Китобни Лев Копелев 1961 йил сўнгиди “Новый мир”га олиб келиб, наср бўлими мухаррири Анна Самойловна Берзернинг қўлига тутқазади, ўз навбатида Анна Самойловна қўллэzmани шахсан Твардовскийга топшириши лозим эди.

“Тишимнинг кавагида асраб юрган маҳфий қўллэzmам А.С.Берзернинг столида очиқ ҳолда, ҳар қандай ҷақимчи ёхуд ўғрига “ўлжа” бўлиб нақ бир ҳафта ётди...” А.С.нинг ўзи ҳам таҳрир ҳайъатининг ҳоҳлаган аъзоси қўллэzmани қўлга киритиб парча-парча қилиб ташлаши, “ютиб юбориши”, ишқилиб, Твардовский-нинг қўлигача етиб боришига йўл қўймаслиги мумкинлигини тан олди. Демак, тулкилик қилиб қўллэzmани уларнинг барчаси оша эҳтиёткорлик ва қўрқоқлик боткоғидан олиб ўтиб, биринчи галда Твардовскийнинг қўлига тутқазиш лозим эди... Бунга анча вақт кетди. То Твардовский навбатдаги майхўрлик хуружидан ўзига келгунча ҳам хийлагина кутишга тўғри келди...”, деб ёзади Солженицин “Бузоқча”да.

Охириг жумла мени ҳайрон қолдирди, менимча, бу ортиқча, ишончсиз гап эди. Рязанда яшаб, Твардовский билан бевосита таниш бўлмаган муаллиф бу ҳақда билиши мумкин эмасди. Ўша пайтлари номсиз қўллэzmаларнинг жадал суръатда кўриб чиқилиши амри маҳол эди. Қисса 1960 йил бошида ёзилиб, албатта, муайян мақсадда “енгиллаштирилади”. Муаллиф қўллэzmани “Новый мир”га беришда бир қарорга келгунча анчагина вақт кетади. Қисса ёзув машинкасида бир интервалда қофознинг иккала тарафига ҳошиясиз, муаллиф номисиз босилганди: ўз исми, манзилини ошкор қилишга муаллифнинг юраги дов бермасди. Берзер қўллэzmани бундай аҳволда боз мухаррирга топширишга кўнмайди ва уни таҳририят машинкачисидан уч-тўрт нусхада оққа кўчиришни сўрайди. Номаълум муаллифга Рязанский таҳаллусини Копелев таклиф қиласди. Қайта кўчириб ёзиш ҳам анчагина вақтни олади.

Менга айниқса, Твардовскийнинг 1964 йил баҳорида Рязанга қилган ташрифининг кўпчилик учун қоронғу бўлган тафсилотларини ўкиш алам қилди.

1 Метастаза – касалликнинг бир жойдан бошқа жойга ўтиб кўпайиши (тарж.).

Ўшанды Солженицин эндигина саккиз бобга қисқартирилиб, “енгиллаштирилган” “Биринчи айланада” романининг пухта вариантини ўз уйидагина ўқишига рози бўлади. У ҳатто “Новый мир” муҳаррирининг сейфига ҳам ишонмайди: – Александр Трифонович! Роман тайёр. Умр бўйи атиги иккита роман ёзишни ўйлаб юрган ёзувчи учун романини таҳририятга топшириш қандай аҳамиятга эга эканини тушуняпсизми? Бу худди ўғил уйлантириш дегандек гап. Мана шунака тўйга меникига ташриф буюра қолинг.

Ва у жон-жон деб рози бўлди... муҳаррир ҳаётида камдан-кам учрайдиган ҳодиса... У маҳаллий поездда оддий йўловчилар қаторида етиб келди, чиптани ҳам ўзи олди.”

“Тушунишими, у романни ўқиб тугатгунча (Твардовский қўллёмзани кун бўйи ҳайрат-ла ўқиб ўтиради) хушёрикни йўқотмаслиги керак эди... аммо меҳмондорчилик сифатида дастурхонга ҳам конъяқ, ҳам ароқ қўйилишини талаб килди. Кейин эса у хушини йўқотди, кўзлари ваҳшиёна тус олиб, қаттиқ-қаттиқ гапиришга тушиб кетди...”

Бундайин кераксиз, ғаразли, очиқчасига қасдан ёзилган, ёлғон лавҳалар китобда нафақат Твардовский, қолаверса, бошқа хурматли кишилар ҳакида ҳам тез-тез учрайди (масалан, И.А. Сац – Твардовскийнинг улфати, айниган; А.И. Кондратович – доимо кулоги динг, тез хид олади; Дементьев – ичи қора ва ҳ.к.). Адабиёт осмонига чиқиш учун унда “Новый мир” муҳаррири ва журналнинг таҳрир ҳайъатидек учирувчи ракета бўлмаганини Солженицин шу йўл билан изоҳлашга уринарди. Унинг қиссаси икки марта мұхқома қилиниб, КПСС Марказий Комитети Президиумининг маҳсус қароридан сўнг Твардовскийнинг югур-югурлари шарофати или дунё юзини кўрганлигини Солженицин бирон марта қаламга олмаган.

“Албатта, мен Твардовскийдан миннатдорман – лекин шахсан... Троя ўзининг мавжудлиги учун Шлимандан миннатдор бўлмаганидек, бизнинг тобора ботқокқа ботиб бораётган маданиятимизда ҳам ўзига хос шарт-шароитлари бор”, дейди у китобида.

Лекин Генрих Шлимандининг қазиши ишларисиз Гомернинг Трояси бугунги кунга қадар афсоналигича қолавериши мумкин эди-ку!

Кўплаб дўстларим ва “Новый мир”даги собиқ ҳамкаслар қўлига бу китоб айнан Лондондан келиб тушди. Акам Ройга “Бузоқча”нинг бир неча нусхасини яширинча жўнатар эканман, ундан китобни Мария Илларионовна Твардовскаяга зинҳор кўрсатмасликни сўрадим. Аммо “Озодлик”, “Немис тўлқини” ҳамда “Америка овози” радиоларида китобдан келтирилган иқтибослар мунтазам ўқиб туриларди.

Китоб Твардовскийнинг қизларигача етиб борди. Бу ҳақда менга ионда Рой хабар қилиб, шундай деб ёзганди: “Солженицинни яқиндан билган Твардовскийнинг кенжা қизи “Бузоқча”ни ўқиркан, неча бор кўзига ёш олган – аламидан, албатта. “Бу Солженицин деганларингиз – бир Худобехабар банда экан-ку!” дерди менга доим Оля”.

“СОЛЖЕНИЦИН, ТВАРДОВСКИЙ ВА “НОВЫЙ МИР”

1975 йил бошида Рой Медведев Москвада “Йигирманчи аср” хусусий журнアル-альманахини очди. Лондонда журнални босма шаклда чоп эттиришни менга топширди. Шу мақсадда T.C.D. Publication деб номланувчи нашриётни рўйхатдан ўтказишга эришдим ва журналнинг ilk сонини тайёрлашга киришдим. Журналдан ўрин олган барча мақола ва очерклар ҳам собиқ Иттифоқ ташқарисида яшовчи русларда қизиқиш уйғотавермасди. 1976 йили Лондонда минг нусхада чоп этилган альманахнинг биринчи сонига бир неча мақола, очерклар ҳамда Борис Ямпольский ва Д. Витковскийларнинг вафотидан сўнг берилажетган бадиий асарлари киритилганди. Иккинчи соннинг нашрига тайёргарликни биринчиси чоп этилишидан сал илгари бошлагандим. Фурсат ғанимат эди. Бунинг устига уч йилдирки, Тибий тадқиқотлар миллий институтининг генетика бўлимида

ишилардим. Альманах устидаги ишлар жуда суст борарди. Иккинчи соннинг мундарижаси биринчисига қараганда қизиқарлироқ бўлиб чиқди. Бу сонга В.Я. Лакшиннинг “Солженицин, Твардовский ва “Новый мир” сарлавҳаси остидаги каттагина очерки кирганди. Рой билан мен шунга амин эдикки, айнан мана шу очерк нафақат таъсирчан ёзилгани учун, балки гоҳида “шўро Добролюбови” деб аталувчи муаллифнинг улкан обрўси муносабати билан собиқ Иттифок ва гарб ўкувчиларида катта қизиқиш уйғота оларди. Ундан ташқари Лакшин Твардовский ва Солженициннинг яқин дўсти, “Новый мир”да бош муҳаррир ўринбосари ҳам эди. Лакшин “Новый мир”да чиқарилган Солженициннинг дастлабки асарлари хақидаги очерклари билан ёзувчининг шуҳратини оширганди.

Мен Лакшин билан 1962 йили танишиб, тез орада дўстлашиб кетдим. Владимир Яковлевич адабий оламда ўкувчилар томонидан қадрланадиган фазилат ва иқтидорга эга, олийжаноб, ор-номусли инсон эди. 1975 йили Москвада Солженициннинг Твардовский ва “Новый мир”дагиларни коралаб тасвирлаган “Эманга шоҳ ташлаган бузоқча” китоби кўлма-кўл бўла бошлаганида Александр Трифоновичнинг қизи Валентина ҳамда Рой бунга Фарб матбуоти орқали муносиб жавоб қайтаришга уринишиди.

“Бузоқча” ҳақида ортиқ ҳеч нима ёзиб ўтирумайман. Солженицин, Твардовский ва “Новый мир” алоқалари борасида ҳаммадан кўра яхшироқ ва ишончлироқ қилиб биргина инсон – В.Я. Лакшин ёзиши мумкин эди”, – деб ёзганди Рой мактубда.

Рой ушбу мактубга “З декабря” санасини қўяр экан, у Лакшиннинг “Бузоқча”ни ўқиб бўлган заҳоти бошлаган очеркини ёзиб тутагтанидан бехабар эди. Очерк Лакшиннинг столида бир неча ой ётди. У очеркни ҳеч кимга кўрсатмаганди. 1976 йили февралнинг бошида Лондондаги уйимда Италиядан келган катта хатжилд олдим. Ичida В.Я. Лакшиннинг 45 саҳифадан иборат машинада терилган очерки бор эди. Сўнгги сахифага сана қўйилганди. Очеркни рус тилида ҳали-бери эълон қилолмасдим, негаки, альманахнинг кейинги сонини 1977 йилнинг бошида нашр эттиришни мўлжаллагандик.

Лакшиннинг очеркини зўр дикқат билан ўқиб чиқдим. Очерк жонли, ишонарли, таъсирчан ёзилганди:

“... Ушбу сатрларга кимнинг кўзи тушибди экан, ортиқча эҳтиросга берилганлигим учун мени афв этсин – мен бирор журналга мақола ёзаётганим йўқ, шунчаки яшаган умрим ҳақида тушунтириш бермоқчиман, холос... Ўн йилдан зиёдроқ вақт мобайнида шахсий ҳётим А.Т. Твардовскийнинг “Новый мир” журналину адабиётга ана шу эшик орқали кириб келган Солженицин билан боғлиқ бўлди...

... Солженицин ўзининг охирги китобида мен иккинчи отам деб биладиган азиз инсонни ҳакорат қилибди, яқин дўст-биродарларимни камситибди. Ўз бешигини такаббурлиги билан булғаб, юртимиз ва бутун дунёда миллионлаб кишилар назаридаadolатли ва бенуқсон бўлиб келган журнал номига доғ туширгани ҳаммасидан ҳам ўтиб тушди.

У айтадиганини айтди, энди навбат менга – эрга навбат, шерга навбат... ”

Очеркни бир неча нусхада кўпайтириб, уларни Бирмингемдаги рус адабиёти профессори Майл Гленнига, Париж Albin Michel нашриётидаги рус адабиётидан таржима бўлими мудири Люся Каталага, Туриндаги Einaudi нашриётида рус адабиётидан маслаҳатчи бўлиб ишловчи Витторио Страдага юбордим. Люся Катала ва унинг турмуш ўртоғи Жан билан 1966 йили Москвада танишгандим.

Биринчи бўлиб Люся Каталадан жавоб келди. Хатда, кейинроқ эса телефонда айтишича, Солженициннинг “Бузоқча”си Парижда тўғридан-тўғри қўлёзмадан таржима қилиниб, 1975 йилнинг охирида чоп этилибди (Le Chkne et le Veau, Ed. du Seuil). Люся ишлаётган Albin Michel нашриёти Лакшиннинг очеркини зудлик билан нашрдан чиқаришга тайёр экан. 9 июняда директор билан шартнома туздим. Китобга Валентинанинг “Очиқ ҳат”и, Ройнинг Твардовскийга бағишлиланган мақоласи, Ефим Эткинднинг “Новый мир”нинг аҳамияти ва журналнинг асосий муаллифлари (Михаил Булгаков, Борис Пастернак, Виктор Некрасов, Анна Ахма-

това, Константин Паустовский ва б.) ҳақидаги “La review Novy Mir” сарлавҳаси остидаги кичик мақоласи илова қилинганди.

Очеркнинг французча нашри – Vladimir La Kchine. Response a Soljenitsyne 1977 йили рус тилидагисидан аввалрок чоп этилди. Бу 182 саҳифадан иборат, фотосуратлар билан тўлдирилган ялтирок жилдли китобча эди. Суратлардан бирида 1971 йил 21 декабрда Твардовскийнинг беваси Мария Илларионовнани қўлидан тутгандча шоирнинг Новодевичье мозоридаги қабрига олиб бораётган Солженицин ва Лакшин тасвирланганди.

Майкл Гленни В.Я. Лакшиннинг китобини Кембриж университети нашриётига бериши тавсия этди. Очеркни таржима қилишни Майкл ўз зиммасига олди. Кембриждан кутилганидан тезроқ жавоб келди.

Мен Кембрижга йўл олдим. Ланч вақтида барча масалалар келишиб олинди. Нашриёт университетнинг икки адабиётшуносига қўшимча мақолаларга буюртма берди: бири Твардовский, иккинчиси “Новый мир” журнали ҳакида. Бу мақолалар факат очеркни бойитишига хизмат қиласди.

Қўшимча ёзишмалар ва яна Лондондаги икки учрашувдан сўнг бош муҳаррир ўринбосари жаноб Блек мен билан Майкл Гленнини Кембрижга таклиф қилди. Икки кундан кейин нашриётдан Гленни ва Медведевга аталган умумий хат олдим. Директор китобни 2500 нусхада нашр этишига шартнома таклиф қилиб, муаллифларга камтаргина ва таржима учун мўмайгина қалам ҳаки ваъда қилганди. Гленни ҳам, мен ҳам дарров рози бўлдик. 1977 йили январда Кембриждан бутун бошли китобнинг саҳифаланган шакли қўлимга келиб тушди. Барчаси нашрга тайёр эди. “Бузокча”нинг Британиядаги ноширини танийдиган Майкл Гленни 1976 йил октябрда ёк тугатилган таржиманинг саҳифаланган шаклини қўлга киритди (китобнинг саҳифаланган шакли аллақачон такриз тайёрлаш учун тарқатилаётган эди) ва Солженицин китобининг инглизча нашридан келтирилган барча иқтибосларни ҳамда уларга мувофиқ бўлган саҳифалар кўрсаткичини нашриётга топширди. 1977 йили январнинг охирида кутилмаганда Кембриждан кўнғироқ бўлиб, Солженициннинг АҚШ, Буюк Британия, Канада ва бошқа инглиззабон мамлакатлар учун мўлжалланган китобининг бутун бошли адади нашр этишдан вақтнинчалик тўхтатилганлиги ҳакида хабар келди. Бунга сабаб Ольга Андреева-Карлайл ва унинг турмуш ўртоғи Генри Карлайл ўзлари устидан килинган бўхтонлар юзасидан Солженицин китобининг Британиядаги ношилари устидан судга даъво аризаси билан чиқмоқчи бўлгандарида экан.

Мен воқеаларнинг бундай тус олганидан лол қолгандим. Китобнинг русча нашрида Ольга ва Генри Карлайл ҳакида ҳеч қандай эслатма учрамасди. Аммо иқтибосларни солиштириш учун китобнинг охирги саҳифаланган шаклини ўқиб чиқкан Майкл Гленни менга шуни айтдики, Солженицин “Нобелиян” бобидаги изоҳда эр-хотин Карлайлларнинг номларини келтириб, уларни ҳасадгўйликда, Солженициннинг ишончини сунистъмол қилганликда ва “Биринчи айланада” романининг бутун жаҳондаги савдосидан келиб тушган қалам ҳақининг деярли ярмини ўзлаштирганликда айлаган экан.

“МАХФИЙ АЙЛНА”НИНГ ЯКУНИ

Солженициннинг “Эманга шох ташлаган бузокча” китобининг якунловчи боби ёки “Тўртинчи илова”си 1974 йили Цюрихда ёзилган эди. Иловада муаллиф олдиндан ўйлаб қўйган, яъни “Архипелаг” нашрдан чиққандан сўнг ҳам унинг мамлакатдан чиқариб юборилишига монелик қилувчи стратегик режасини ошкора айтади:

“Китобимнинг русча нашри ортидан америка нашри пайдо бўлиши керак эди. Бунинг учун барча чора-тадбирларни кўриб қўйгандим, бироқ икки-учта гарбона тарбия кўрган таъмагир ва қурумсоқ бандалар барчасини, 1968 йилги учлик сафарбарлигини чиппакка чиқарди: америка нашри ярим йилга кечикяпти, энди у мени жарликка қулаб тушишдан кутқариб қололмайди – шунинг учун

1 Инглизларда иккинчи нонушта. (тарж.)

ҳам сўнгти нуқтани қўяверсам бўлади, деб ўйлайман”.

1975 йилнинг бошида ушбу мисраларни ўқиб, аввалига гап ким ҳақида кетаётганлигини, “икки-учта таъмагир, қурумсоқлар” ким эканлигини тушунолмадим. Бирок “1968 йилги учлик сафарбарлиги” машхур рус адиби Леонид Андреевнинг неваралари – ўша пайтларда Солженициннинг ишончли одамлари бўлмиш Ольга Андреева-Карлайл билан унинг акаси Александр уюштирган “ГУЛАГ архипелаги”нинг учала жилди микрофильмларини Москвадан Парижга олиб чиқиб кетишдан иборат эканлигини сезгандим. Бу “сафарбарлик”да яқин ўтмишда Илья Эренбургнинг котибаси, эндиликда эса Александр Исаевичнинг ишончли ёрдамчиси бўлмиш Наталья Столярова ҳам қатнашади. Ўша кезлари Александр Андреев Парижда, ЮНЕСКОда синхрон таржима бўлими раҳбари эди. У микрофильмларни аппаратурага яширади; БМТ агентлигининг техник жиҳозлари божхона кўригидан ўтказилмас, ЮНЕСКО ходимлари тинтув қилинмасди. Микрофильмдан олинган фотопропродукция нусхалари YMCA-PRESSда жўнатилади. Солженициннинг кўрсатмаларига биноан сир тутилган “Архипелаг”нинг деярли беш йилга чўзилган инглизча таржимаси 1968 йили дархол бошлаб юборилади. Бошқа европа тилларига ҳам таржима қилинади. 1973 йили сентябрда Солженицин YMCA-PRESS орқали “Архипелаг”ни рус ва бошқа чет тилларида зудлик билан чоп этишга руҳсат берганда улар бир вақтда олам юзини кўришини кутганди. У бир ўқ билан икки қуённи отаман деб ўйлаганди. Лекин лоақал биринчи жилдинг кўлёзмадан қилинган таржимасини ҳам Америкада нашр этиб бўлмасди.

Бу Америка ўкувчилари учун “бадийи проза” эмас, аксинча, нотаниш мавзунинг қийин бир тарихий тадқиқоти эди. Нашриёт таржимага тақриз ёздириши, таҳрир қилиши, атама ва иштирок этувчи персонажларга оид изоҳларга буюртма бериши, исмлар ва воқеалар индексини тузуб чиқиши лозим эди. Унда китобга яна 40 саҳифадан ошиқроқ матн кўшиларди. Одатда китоб сотувга чиқишидан бир ой илгари тақризга буюртма берилади. Қолаверса, олдиндан реклама бериш ҳам мухим. Бусиз асар китоб савдоси тармоғига кира олмасди. Шартномага кўра, Солженицин китобнинг юмшоқ муқовали арzon нашри супер муқовали қиммат нашридан аввал сотувга чиқишини талаб қилганди. Лекин арzon нашр қимматидан кўчириб босилади. Бунинг учун бир неча муҳаррир жадал суръатда ярим йилча ишлаши керак эди. Бунинг устига Томас Уитни (Thomas Whitney) таржимасининг матни чиндан-да таҳрирталаб эди. “Икки-уч таъмагир” – бу тўққиз йил собиқ Иттифоқда дипломат бўлиб ишлаган, “Биринчи айланада”нинг таржимони, шунчаки “Солженициннинг таржимони” деган ном учун “Архипелаг”нинг учала жилдини шартномасиз, молиявий рафбатсиз таржима қилган Томас Уитни ҳамда эр-хотин Ольга ва Генри Карлайллар эди. 1967 йили Ольга Москвага ташриф буюрганда Солженицин у билан танишган ва ўз “иш”ларини АҚШда нашр қилишни Ольгага ишониб топширганди. Айнан шулар “Биринчи айланада” романининг таржимаси ва нашри туширилган микрофильмни собиқ Иттифоқдан АҚШга олиб чиқиб кетишини уюштирган эдилар.

Эр-хотин танг ахволда қолганди, шундай эса-да, агар исмлари фош этилмаса, бу куруқ гаплигича қолишидан умидвор эдилар. Лекин бу сароб бўлиб чиқди. Барча тафсилотлардан боҳабар бўлган Патрициа Блейк томонидан битилиб, тез орада The New York Review of Booksда пайдо бўлган “Бузоқча”нинг русча нашрига ёзилган тақризда “гарбона тарбия кўрган таъмагирлар” исми фош қилинди. Улар орасида барча ишлардан хабардор таникли ёзувчи, The New York Timesнинг муҳарриларидан бири, Томас Уитнининг яқин дўстси Харрисон Солсбери номи ҳам бор эди.

Солженицин инглизча нашрга кўшилган изоҳда Уитменнинг таржимасини “сўзма-сўз қилинган таржима” дея танқид қиласди, лекин таржимоннинг номи тилга олинмайди. Солженицин, шубҳасиз, собиқ Иттифоқнинг таржима мактаби тажрибасидан, яъни у ёки бу чет тилини билувчи тилшунос матнни сўзма-сўз таржима қилгандан сўнггина маҳоратли ёзувчи ёки шоир уни юқори савиядаги бадий асар даражасига етказишидан бехабар эди. Англия ва АҚШда рус тили-

дан қилинадиган таржималар билан фақат бир киши шуғулланади. Инглиз тили грамматик жиҳатдан рус тиличалик қийин эмас. Солженицинча оғир услуга ва янги сўз ясашларни тўлалигича инглиз тилига ўғиришнинг имкони йўқ.

Ўргада вужудга келган можаро бир неча йилга чўзилди. Баъзи тузатишлар 1979 йилга келибгина амалга оширилди. Аммо бу Карлайлларни қониқтирмади. Бунақа ишларда асосан дъавогар томонларнинг адвокатларигина ақча ишлаб олишади. Солженицин ва Лакшиннинг китоблари АҚШда 1980 йилда эълон қилинади. Англияда Лакшиннинг китобини нашр эттириш Солженицин адвокатлари томонидан тақиқланади. Майкл Гленнидан таржима учун тўланган қалам ҳакини қайтаришни талаб килишади, шундай бўлса-да, американлик ношир Гленнига қайта қалам ҳаки беради. АҚШда “Бузокча”нинг нашридан сўнг Ольга ва Генри Карлайллар ўзларига қилинган тухмат учун тезлик билан Сан-Франциско судига дъаво аризасини беришади. Дъаво миқдори 2 миллион долларни ташкил этарди. Дъаво юзасидан якуний қарорни 1981 йил 24 июлда Сан-Франциско суди судьяси Уильям Швартцер чиқаради. International Herald Tribune газетасининг 1981 йил 27 июль сонида бу ҳақдаги берилган қайдга тасодифан кўзим тушиб қолди. Буни Лакшиннинг китоби бўйича битилган ёзишмалар жилдидан топиб олдим. People маълумотлар устунида бир неча сатрда берилган хабарнинг таржимасини көлтириб ўтаман:

“Судья Уильям Швартцер жума куни кабул қилган қарорига кўра, Солженицин ўзининг охирги иши “Эманга шоҳ ташлаган бузокча”да рассом ва адаба Ольга Андреева-Карлайл ҳамда унинг турмуш ўртоғи бўлмиш муҳаррир, ёзувчи Генрига тухмат қилмаган. Китобда Солженицин ўзининг аввалги асрлари – “Биринчи айланада” ва “ГУЛАГ архипелаги” нашри бўйича Карлайлларнинг ҳамкорликда қилган ишларини танқид қилган. Швартцернинг хуносасига кўра, Солженициннинг ёзганлари унинг шахсий нуқтаи назаридир ва буни тухмат деб баҳолаш мумкин эмас”.

Жорес МЕДВЕДОВ,
Лондон

(“Литературная газета” ҳафталигининг 46 – 47-сонидан олинди.)
Рус тилидан Сайджон САЙДМУРОДОВ таржимаси



“Театр ҳаётга таъсир кўрсатмоғи учун кундалик турмушидан кучлироқ, жўшиқинроқ бўлмоги лозим. Ўқ узишида мўлжсал ниишондан юқоририоқ олинади...”

Франц Кафка мулоҳазаларини ҳар қандай мамлакат санъатига, исталган халқнинг ҳаётига нисбат қилиб қўллаши мумкин. Асли келиб чиқшини яхудийлардан, яшаши жойига кўра эса прагалик бўлган, австрия адабий анъаналарига содик ҳолда немис тилида ижод қилган ёзувчи бунга бошқалардан-да кўпроқ ҳақли, эҳтимол. Асар, ҳар қандай асар, саҳнадан, полотнодан, қозоз саҳифаларидан ажералиб чиқиб, одамлар орасига, уларнинг идроки, ўй-хаёли, ҳаётига кириб бормоги учун ижодкор “мўлжсал”ни юқори олиши лозим. Ижод маҳсули вақт синовидан ўтиб, ўзга давр, ўзга замон вакиллари қалбларини ҳам зabit этмоги учун эса... бундай “ниишон”ни пойлай билиш ҳаммага ҳам насиб этавермайди!

Журналимиз саҳифалари орқали замон ва макон синовларидан ёргу юз билан ўтиб, тарих зарварақларидан муносаб жой эгаллашга мусассар бўлган алломаларни хотирлашда, жаҳон адабиёти, маданияти ва санъати шоҳсупаларининг юқори погоналарига кўтарилиб улгурган замондошларимиз номини тилга олишида, муҳим саналарни эслатиб ўтишида давом этамиз.



ГЕРМАНИЯ ФЕДЕРАТИВ РЕСПУБЛИКАСИ

Ташкил топган санаси: 1949 йил 23 май

Миллий байрами: 3 октябрь

Расмий тили: немис тили

Пойтахти: Берлин

Майдони: 357 021 км²

Аҳолиси: 81 903 000 киши



* * *

Гёте, Шиллер, Томас Манн, Бах, Вагнер, Бетховен сингари буюк алломаларни етиштирган бу диёрда азалдан маданият, қадимий анъана ва қадриятлар катта аҳамият касб этади. Мамлакатда 820 га яқин театр (шу жумладан, мусиқий ва опера театрлари), 130та профессионал оркестр, жами 6200 та музей (шулардан 630 таси бадиий коллекцияларни ўзида жамлаган), 9000 га яқин кутубхона фаолият юритади. Бугунги кунда замонавий немис мусаввирларининг асарларига дунё бозорида талаб катта. Германияда йилига 94000 атрофида нашрлар ва қайта нашрлар бўлиши боис, немислар дунёдаги “китобхон миллат”ларнинг энг олди сафларида турадилар.

* * *

Германиянинг турли шаҳарларида ўтказиладиган йирик тадбирлар жаҳон маданий хаётида алоҳида ўрин тутади. Байройт, Лейпциг шаҳарларида ўтказиладиган Вагнер, Бах мусиқий фестиваллари, Берлин мезbonлик қиладиган анъанавий халқаро кино ва театр анжуманлари бунга яққол мисол. Гарчанд оммавий карнаваллар тақвимларга расмий байрам сифатида киритилмаган бўлса-да, бир неча асрлардан бўён йилнинг маълум кунларида немис халқи ранг-баранг либосларда, никоблар тақиб, кўча ва хиёбонларни тўлдириб, ўйин-кулгу қиласди.

* * *

Мамлакатда истиқомат қилувчи 82 миллионга яқин аҳолининг таҳминан 15 миллиони асли келиб чиқиши чет эллик бўлиб, булардан 7 миллион киши Германия фуқаролигини қабул қилган. Жаҳондаги қарийб 120 миллион одам учун немис тили – она тили. Маълумотларга караганда, дунёда 17 миллионга яқин одам турли таълим муассасаларида немис тилини хорижий тил сифатида ўрганади.

* * *

Германия сайёҳларни энг кўп жалб қиладиган мамлакатлардан бири ҳисобланади. Бир замонлар Европанинг сиёсий, маданий марказини бошқарган немис императорлари, қироллари, князлари бунёд эттирган иншоотлар эндиликда ўтмиш воқеаларнинг тилсиз гувоҳи, бебаҳо ёдгорликлар сифатида савлат тўкиб турибди. Ўрта асрларда қалъа-қасрлар ўзига хос ҳимоя ва бошпана вазифасини ўтаган бўлса, Янги замон сарой-қасрлари аввало хукмдорларнинг маҳобати ва молу давлатини намойиш этиш воситаси сифатида бунёд этилган. Ренессанс давридан кейин бу, айниқса, барокко услубида акс этган. Бино ва иншоотларда, уларнинг ён-атрофидаги бояғи хиёбонларда ҳашам ва дабдаба яққол кўзга ташланган. Бугунги кунда ушбу тарихий иншоотлар кенг оммага хизмат қилувчи истироҳат масканлари ва маданий марказларга айлантирилган. Уларнинг кўпі музейлар, бадиий жамланмалардан иборат галереяларга айлантирилган.

ГЕРМАНИЯ – КЕНГ ИМКОНИЯТЛАР МАМЛАКАТИ



Германия Федератив Республикасининг Ўзбекистон Республикасидағи Фавқулодда ва Мухтор элчisi доктор Аристид Фенстер

Журналинизнинг Германия адабиёти, фалсафаси, маданиятига алоҳида ўрин ажратилган ушбу сонининг маҳсус меҳмони – Германия Федератив Республикасининг Ўзбекистон Республикасидағи Фавқулодда ва Мухтор элчisi доктор Аристид Фенстер. Жаноб элчи билан бўлган сұҳбатимизда давлатларимиз ўртасидаги маданий ришиналар ҳамда Германия маданияти, адабиётининг кечаги ва бугунги қиёфаларига эътибор қаратилиади.

Савол:

– Ўзбекистон ва Германия ўртасидаги маданий алоқалар ҳақида икки оғиз сўз юритсангиз. Ушбу муносабатларни ривожлантириши йўлида

қандай ишлар амалга оширилган, ҳамкорлик истиқболлари ҳақида нима дейии мумкин?

– Давлатларимизнинг маданият соҳасидаги алоқалари кўп кирралидир. Уларни ривожлантириш авваламбор ижтимоий алмашинув ҳамда немис маданий ташкилотларининг фаолияти орқали амалга оширилмоқда. Тошкентдаги “Гёте институти” ўз лойиҳалари билан пойтахт маданий ҳаётида ўзига хос ўринга эга бўлиб келмоқда. Кўплаб ўзбек ёшлари Германияга ва немис тилига қизиқишиади. Биз “Мактаблар: келажак ҳамкорлари” лойиҳаси доирасида мактаблар билан ҳамкорлик қилиб ҳамда “Гёте институти”нинг немис тили курслари орқали уларни қўллаб-кувватлаймиз.

Афсуски, бюроқратик тўсиклар аксарият ҳолларда серқирра маданий алмашинувларни амалга оширишин қийинлаштиради. Биз ҳам доимо ўзаро мулоқотлар воситасида бундай қийинчиликларни бартараф этиб борамиз. Чунки бевосита мулоқот икки томонлама муносабатларнинг негизидир ва шу сабабли ҳам у иккала давлат учун муҳим аҳамиятга эга.

Савол:

– Германия азалдан оламишумул воқеаларга, жаҳонга машҳур шахсларга бой ўлка ҳисобланиб келган. Миллий маърифат рамзи сифатида кимларнинг номини тилга олишиниз мумкин?

– Германия маърифати, маданияти қатор таникли шахслар номи билан боғлиқ. Аввало, машҳур файласуф, Берлин Фанлар академияси асосчиси Готфрид Вилхелм Лейбниц ёки немис классик адабиётига асос солган буюк маърифатпарвар ижодкор Готхольд Эфрайм Лессингларни ёдга олиш зарур. Кёнигсберглик файласуф Иммануил Кантни ҳам алоҳида қайд этиб ўтмоқчиман.

Кант ўз изланишлари ва сабоқларини фақат бир мақсад йўлида амалга оширган: одамзот инсонийлигини йўқотмаслиги ва яхшироқ яшashi лозим. У халқлар ўртасидаги ўзаро бағрикенглик борасида тиним билмай фаолият кўрсатган. Бундан ташқари, тинчликнинг бир лаҳза ҳам кўз юмиб бўлмас даражадаги зарурат эканлигини таъкидлаб келган. Бинобарин, Кантнинг барча мулоҳазалари ва таклифлари урушга йўл қўймаслик мақсадига қаратилган. Агар бугунги кунда уруш олиб бориш учун асосли важлар, демократиянинг тинчликпарварлиги, глобал миқёсда фаолият юритувчи ташкилотлар ёки ўзгалар ҳақ-хуқуқлари борасида баҳс юритиладиган бўлса, Кантнинг далиллари ҳали ҳам муҳим аҳамият касб этади. Жаҳон ташқи сиёсати ва дипломатияси Кантнинг маърифий фалсафаси ва ҳаётий тажрибасига асосланган идрок борасидаги маслаҳатларидан бугунги кунда ҳам фойдаланса, мақсадга мувофиқ бўларди.

Савол:

– Германия адабиёти кеча ва бугун: XXI аср адабиётининг фарқли томонлари ва ўзига хослиги нимадан иборат?

– Национал-социализм даври ва Иккинчи жаҳон уруши Германия тарихида катта бурилиш ясаган. Бу ҳолат немис адабиётида ҳам ўз аксини топган. Айrim мавзулар ва адабий анъаналар эскириб, янги услуб ва шакллар юзага келган. 1945 йилдан кейин Ҳерман Ҳессе, Нелли Закс, Ҳайнрих Бёлль, Гюнтер Грасс ҳамда Ҳерта Мюллер тимсолида ижоди бир-биридан кескин фарқ киладиган беш нафар немис ёзувчиси адабиёт соҳасида Нобель мукофоти билан тақдирланди. Германия тарихи ва, авваламбор, национал-социализм, Иккинчи жаҳон уруши ҳамда унинг оқибатида Шарқий Европада юзага келган тоталитар тизим билан боғлиқ мавзуларни ёритиши уларни умумлаштириб турадиган жиҳатлар ҳисобланади.

Бунда немис адабиётининг ўзига хос бир хусусияти ҳам намоён бўлади: бизда марказий мавзу тарихимиз талқини ҳисобланади. Кўплаб таникли муаллифлар национал-социализм ва яхудийларни таъкиб қилиш даври, Иккинчи жаҳон урушидан кейинги кувғинлар ёки Германиянинг бўлиниши ва ГДРдаги

қатагон мавзуларида ижод қилишади. Германиянинг 1933 йилдан кейинги тарихига танқидий ёндошган ва бир вақтнинг ўзида коммунистик давлатда сиёсий фаолият олиб борган адиба Криста Вольф ГДР адабий муҳитида етакчи роль ўйнаган. Яқинда Уве Теллкампнинг „Минора“ номли романи катта муваффақият козонди ва унинг асари асосида фильм ҳам суратга олинди. Романда Ҷрездендаги мешчанлар оиласининг Берлин девори қулашидан олдинги даврдаги ҳаёти акс эттирилган.

Бундан ташқари, охирги йилларда Германияда криминал мавзудаги романлар тобора оммавийлашиб бормоқда. Ушбу йўналиш бўйича муваффақиятли ижод қилаётган немис ёзувчиларидан бири Франк Шэтцинг ўз асарларида доимо илмий мавзуларни кўтариб чиқади. Болалар адабиёти соҳасида ҳам бир қанча номдор немис муаллифлари қалам тебратмоқда. Улар орасида Криста Функе халқаро миқёсда танилган, унинг китоблари дунё бўйлаб миллионлаб нусхаларда нашр қилинмоқда.

XXI аср немис адабиётида инсоният тўқнаш келаётган глобал муаммолар катта ўрин эгаллайди. Миграция, иқлим ўзгариши ёки ўзгаришлар давридаги турмуш масалалари адабий талқинга муҳтоҷ. Бу борада янги шакллар ва қарашлар иницијлик билан кутимоқда.

Савол:

– Замонавий Германия санъат оламида қандай анъаналарни кузатиш мумкин?

– Замонавий санъат рассомчилик ва тасвирий санъат қатори бошқа жанрларни ҳам ўз ичига қамраб олади. Фотография, кино, рақс, меъморчилик ва, ҳатто, электрон санъат турлари шулар жумласидандир. Электрон санъат воситасида ижодий тасвир имкониятларининг янги даври бошланди.

Германияда санъат олами ҳали ҳам асосан Кёльн ва Дюссельдорф шахарлари худудида жамланган бўлиб, у сўнгги ўн йилликларда Жозеф Бойс, Маркус Люпертц, А.Р.Ренк, Георг Базелитц, Герхард Рихтер ва Гюнтер Юккер каби номдор ижодкорларни қамраб олган.

Лейпциг шахри санъат дунёсининг яна бир маркази сифатида предметли ва фигурали рассомчилик йўналишида тобора ривожланиб бормоқда. Собиқ ГДР санъат анъаналарининг сермаҳсул вакили сифатида эса таниқли мусаввир Нео Раухни айтиб ўтиш мумкин.

Кассел шахрида жойлашган „Documenta“ ташкилоти 1955 йилдан буён ҳар 4-5 йилда маҳсус кўриклар уюштириб, замонавий санъатнинг муҳим кирраларини намойиш этиб келади (сўнгги намойиш жорий йилда бўлиб ўтди). Ушбу кўргазма бутун дунё санъат ихлосмандларини ўзига чорлайдиган маскан ҳисобланади.

Савол:

– Бугунги кун немис ёшлиарининг санъат ва адабиёт соҳаларига бўлган иштиёқи, қизиқишилари ҳақида нима дея оласиз?

– Ёшлиарнинг қизиқишилари турфа хил ва уларнинг ўзларини намоён қилишлари учун Германияда катта имкониятлар мавжуд. Шу туфайли ёшлиарнинг қизиқишилари борасида умумий бир баҳо бериш мушкулроқ.

Германия ёшлиари юкори технологияларга бой, индивидуал эркинлик ва кўплаб имкониятлар мавжудлиги сабаб йўлини аниқлаб олиш нисбатан қийин кечадиган дунёда яшамоқдалар. Ёшлиаримиз ҳаётида интернет катта роль ўйнайди. Айниқса, 14 ёшдан 24 ёшгача бўлғанларнинг 99 фоизи интернетдан фаол фойдаланади. Интернет улар учун, аввало, мулоқот воситаси – ўзаро муносабатлар ўрнатиладиган макон ва муҳим ахборот манбаи ҳисобланади. Бу, албатта, ёшлиарнинг қизиқишиларини ўзгаририди, уларнинг маданий савиясига катта таъсир кўрсатади. Жумладан, интернет ёшлиар адабиётининг мавзуларини ва, ўзлари сезмаган ҳолда, ёш муаллифларнинг ёзиш услубини ҳам ўзгаририди.

Интернет асри адабиётга қандай ўзгаришларни олиб кириши мумкинлигини олдиндан айтиб бўлмайди. Электрон китоблар оммавийлашиб кетадими? Электрон мулокот азалдан мавжуд бўлиб келган мутолаа ўрнини боса оладими? Ўйлайманки, нима бўлганда ҳам, ёшларнинг маданият ва адабиёт борасидаги қарашларида ўзига хос, қизиқарли ўзгаришлар юз бермоқда.

Юлдуз ҲОШИМОВА сұхбатлашди

УНУТИЛМАС СИЙМОЛАР



ВАҚТДАН ЎЗГАН ОДАМ

Мишель Нострадамус билан бизни деярли тўрт ярим асрлик масофа ажратиб турибди. Аммо келажакни кўролган башоратчининг шуҳрати йиллар ўтиши билан янада ортиб бораётгандай. Китоб, газета-журналларни қўйиб турган тақдиримизда ҳам, мутахассислар дунёни ўргимчак тўри каби қамраб олган Интернет тармоғининг кидирув тизимларида бу исм қайта ва қайта қайд этилишини эътироф этадиларки, бунчалик шарафга ҳатто Америка президентлари ѝаҳон шоу-бизнесининг энг машҳур юлдузлари ҳам мушарраф бўлишмаган. Албатта, бундай фавқулодда қизикишининг сабаби битта, бу ҳам бўлса Нострадамуснинг башоратлариdir.

Айтишларича, машҳур фолбин ўзининг вафоти санаси ва соатини олдиндан аниқ айтган. 63 ёшли Нострадамус 1566 йилнинг 2

июлида ўзига хайрли тун тилаш учун кирган содик шогирди ва издоши Жак Шавиньига: “Тонгда мен абадият уйқусига кетаман” деган. Чиндан ҳам эрталаб шогирдлар башоратчини тўшакда хотиржам вафот этганини кўришган. Сайёralар ва бошқа осмон жисмларининг ҳаракатлари битилган тақвим-жадвалнинг 2 июль санаси қаршисига эса Нострадамус олти ой бурун ўз қўли билан биргина “Ажал” сўзини ёзиб қўйган экан.

Шубҳасиз, инсон умри тақвим саналари билангина ўлчанмайди. Шу жиҳатдан олиб қарайдиган бўлсак, Нострадамус қувонч ва фожиа, муваффакият ва омадсизлик, муҳаббат ва нафрат, олкиш ва қарғиш, баҳт ва кулфат, эътироф ва инкор, синов ва имтиҳонга лиммо-лим узок умр кечиргандай туйлаверади.

* * *

Ҳаммаси 1503 йилнинг 14 декабридан бошланганди.

Шукуни Франциянинг кичкинагина Сен-Реми шаҳарчасидаги яхудий оиласида фарзанд дунёга келди. Мамлакат қироли Людовик XIIning қатъий фармонига кўра бошқа яхудийлар қатори мажбуран чўқинтирилган эр-хотин уйда яширин равиша ўз эътиқодларига амал қилардилар.

Ёш Мишель юлдузли осмон синоатлари ҳамда ҳалқ табобатида шифобаҳш гиёҳлардан фойдаланиш борасидаги дастлабки сабоқларни табиб бобосидан олди. Айнан бобоси туфайли болакай тез

орада юонон, лотин ва қадимги яхудий тилларида эркин гаплаша бошлади, ман этилган алкимё ҳакида чуқур маълумотларга эга бўлди. Болакай ўша пайтлари “осмон илми” деб аталадиган математика ва фалакиётшуносликка шу кадар берилиб кетдики, тез орада атрофдагилар уни “кичик мунажжим” деб атай бошлишди.

Мишель 14 ёшида Авиньонга ўқишига бориб, аввал тривиум – грамматика, нотиклик ва мантиқни, кейинчалик эса квадривиум – ҳандаса, риёзиёт, мусика ва фалакиётшуносликни ўрганади. Афсуски, 1519 йили шаҳарга ўлат тарқалади. Бунинг оқибатида одамларнинг пашшадай қирилиб кетаётганини кўрган Мишель ўқишини ташлайди ва шифокор бўлиб, бу хасталикка қарши курашиш йўлини топишга аҳд қиласди. Ана шундан кейин деярли саккиз йил мобайнида Нострадамус қишлоқма-қишлоқ, шаҳарма-شاҳар, қирма-қир, тоғма-тоғ юриб, ўсимликларнинг тиббий хусусиятларини кунт билан ўрганади.

Нихоят, 1529 йили 26 ёшли Мишель Монпелье университетининг тиббиёт факультетига ўқишига киради. Бирок тез орада у ўзининг бу борадаги билимлари талабаларга сабоқ берадиган профессорларнидан қолишмаслигини англаш етади. Бундан ташқари Мишель ўша пайтлари жуда урф бўлиб кетган айrim даволаш усусларининг аслида заарли эканлигини иботлашга уринади. Оқибатда уни университетдан ҳайдаб юборишиларида бир баҳя қолади. Нострадамус бир амаллаб университетни битиради ва врачлик дипломи билан мамлакат худудига янги шиддат билан ҳужум бошлаган ўлатга қарши курашга отланади.

Улуғлар қисмати ҳеч қачон осон кечмаган. Бугун, тўрт юз эллик йил

берида туриб Нострадамуснинг фақат тиббиёт соҳасида эришган муваффақиятларининг ўзиёқ унинг қанчалар салоҳиятли, изланувчан ва айни пайтда куйинчак инсон бўлганлигини намоён этганлигидан ҳайратга тушамиз. Кечагина дорилфунунни битириб келган ёш шифокор тажрибали ҳамкасларининг анъанавий муолажа амалларини ҳеч қўрқмасдан инкор этади ва шундай жасорат билан ўзининг даволаш усусларини амалиётда қўллай бошлайди. Зеро, ўша замон шифокорлари ўлатга қарши курашишда биринчи ва ишончли восита сифатида шусиз ҳам холдан тойган беморнинг қонини чиқариб ташлаш деб ҳисоблашарди. Ўлат энг авж олган худудларга дадил кириб борган Мишель эса беморларга тоза ҳаво, чашма суви ва ўзи шифобаҳш гиёҳлардан тайёрлаган дориларни тавсия этди. Бугунги кун тилида айтганимизда, таркибида С витамини мўл бўлган дориларни беморларга текинга тарқатиб чиқаётган Нострадамус улардан оддий санитария қоидаларига амал қилишни талаб этарди. Мишелнинг саъи-харакатлари билан қисқа муддат ичida Франциянинг Каркассона, Тулуз, Нарбонна ва Бордо шаҳарларида ўлатга барҳам берилди.

Худди шу пайтлари ёш шифокор бутун мамлакатга довруғи кетган фалакиётшунос олим Сезар билан танишади ва унинг таклифига кўра Ажен шаҳридан қўним топиб, тиббий фаолият билан шуғулланишда давом этади. Худди шу ерда Мишель гўзал қизга уйланади, икки фарзандли ҳам бўлади.

* * *

Гўё ҳаммаси ўз маромида кетаётгандек эди: суюмли ёр, суюмли болалар, суюмли иш. Бироқ фалокат

ҳамишагидай кутилмаганды содир бўлди.

Шаҳарга даҳшатли ўлат ҳужуми бошланди. Минг-минглаб одамларни ўлимдан қутқариб қолган Нострадамус тақдирнинг аччиқ найранги олдида ожиз: маккор касаллик унинг хотини билан болаларини олиб кетади. Шифокорнинг бу қайғусидан фойдаланиб қолишга уринган унинг душманлари, ичиқора ҳамкаслар дархол Нострадамусни фирибгар деб эълон қилдилар. Дарҳақиқат, ўзининг оиласиники сақлаб қололмаган шифокорга бундан кейин ким ҳам ишонарди? Бироқ бу ҳам ҳали ҳаммаси эмасди. Дастробки ғалаба нашидасидан сармаст оломон шифокорни бидъатчиликда айлашга ўтади. Тулузадаги қиличини яланғочлаган инквизиция суди Нострадамуснинг қонини талаб қила бошлайди.

Ва ёш шифокор ярим тунда Франциядан Италияга қочишига мажбур бўлади. Аммо бу ҳали хавфдан бутунлай ҳалос бўлди дегани эмасди: Мишель Италияда бир неча йил инквизициядан яшириниб юради. Бу давр Нострадамус учун ҳаётни, ўзини ва ўзликни англашга уриниш йиллари бўлди. Мутахассислар айнан мана шу сарсонлик-саргардонлик йиллари Нострадамусда башоратчилик иқтидорини шакллантирганини қайд этишади.

Ўтмиш энди ортда қолганди, янги ҳаётни эса оппоқ қофоздан бошлашга тўғри келаётганди.

1544 йили Францияда, хусусан Прованс вилоятида ёмғир ёғаверади-ёғаверади. Натижада мамлакат тарихидаги энг қаттол, энг шафқатсиз ўлат эпидемияси мислсиз тезлиқда тарқала бошлайди. Ҳамма гина-кудуратларни унутиб, Прованс маркази Экс шаҳрига етиб келган Нострадамус ўзини дўзахга тушиб қолгандай ҳис этади: кўчалар, майдонлар жасадларга тўлиб-тошган, уйлардан эса фақат оҳ-воҳ

ва йиги-сиги эшитилади. Шаҳарда шифокор зоти қолмаганди: ким ўлган, ким ўляпти, кимдир эса “тавқи лаънатга учраган жой”дан жуфтакни ростлаб қолган.

Мишель Нострадамус 9 ой мобайнода куну тун ўлатга қарши кураш олиб борди. Унинг буйруғига кўра шаҳардан майитлар йиғишириб олинди, ҳаммага гигиена қоидаларига амал қилиш шарт этиб қўйилди, шифокорнинг ўз пулига тайёрланган дори-дармонлар текинга тарқатилди. Алоҳа ўлат чекинди. Нострадамус қочқиндан миллий қаҳрамонга айланди. Шаҳар маъмурияти Нострадамусга бир умрлик нафака тайинлади.

Мишель бой бева Анни Позар Гемелга уйланди, кейинроқ оиласда олти фарзанд туғилди. Нострадамусдан миннатдор шаҳар ахли унинг кечалари тиним билмай ишлашига кўнишиб ҳам қолади. Айни шу вақтлари ҳалоскор шифокор ҳали дунёга келмаган авлодларнинг тақдирини оппоқ коғозга туширмоқда эди.

“Келажакни олдиндан кўра билишни илм ҳисоблашмайди, – деб ёзади у мактубларидан бирида. – Тўғриси, бунга бошида ўзим ҳам ишонмагандим. Демак, табиат ўзимга ато этган қобилиятга шубҳа билан қараганман...” Бироқ Нострадамус ёзганларини эълон қилишга шошилмайди: инквизиция судининг совуқ нафаси унинг елкасига урилиб турарди.

Фақат 1550 йилга келибгина Нострадамус ўз башоратларини альманах шаклида чоп қилишга журъат этади. Унда ўн иккита тўртлик-катрен жамланган бўлиб, ҳар бир катрен келаётган йилнинг бир ойига бағишлиланганди. Альманах қисқа муддат ичиди жуда машхур бўлиб кетди. Инквизиция унга бир-икки тирғалиб кўрди, аммо башоратларани ғалакиётшунослик илмига таянилгани учун ҳеч нарса қилолмади. Шундан кейин бундай

альманах ҳар йили, муаллифнинг вафотига қадар чоп этила бошлади.

Б и р и н ч и т а ж р и б а с и муваффақиятли чикқанидан мамнун бўлган Нострадамус 1554 йилдан сал олисроқ келажакни башорат қиласидаган центурийлар устида иш бошлайди. 1556 йили Нострадамус Франция қироли Генрих II саройига таклиф этилади. Башоратчи қиролдан рицарлик жангарида иштирок этмасликни илтимос қиласиди. Акс ҳолда ҳалок бўлиши мумкинлигини ҳам очиқ айтади. Бу 1-центурий, 35-катренда ҳам акс этган. Аммо қирол бу огохлантиришга парво қилмайди ва тез орада айнан рицарлик жангига олган жароҳати туфайли вафот этади.

Нострадамуснинг иқтидорига тан берган Франция қироличаси Екатерина Медичи уни сарой табиби ва мунажжими этиб тайнинлади.

Мишель Нострадамуснинг яна қуидаги оламшумул башоратларини санаб ўтиш мумкин:

- Нептун сайёрасининг кашф этилиши санаси;
- 1607 йили фалакиётшунослик фанида кескин бурилиш юз бериши;
- Франция қиролларининг қисмати;
- Инглиз қироли Карл I нинг қатл этилиши;
- Буюк Британия 300 йил дengиз қудратига эга бўлиши;
- Иккинчи жаҳон урушининг бошланиши ва қандай якун топиши;
- XX асрда Россия кечмиши;
- Исроил давлатининг ташкил топиши...

Умуман олганда, Мишель Нострадамуснинг ижодий меросини ташкил этадиган 10 центурий (942 катрен) ва 1550-1566 йиллари мунтазам чоп этилган йиллик альманахларда инсониятнинг 2242 йилгача бўлган ҳаёти башорат қилинган.

Хўш, Мишель Нострадамус олис XVI асрда туриб 2013 йил учун нималарни башорат қилган?

Нострадамус битикларининг талқини турлича, аммо асосий мазмун ўзгармай қолмоқда: 2013 йил тинч, урушларсиз ўтади. Йил бошларида юз берган молиявий инқироз АҚШнинг дунё иқтисодиётидаги етакчилигига салбий таъсири кўрсатиши мумкин. Бу инқирознинг оқибати кўплаб мамлакатларда ҳам яққол сезилади. Шунингдек, Нострадамус 2013 йили Американинг айрим худудларини сув босишини ва баъзи ўсимликлар номаълум касалликка чалинишини башорат қилган.

Нострадамусга кўра, 2013 йилда Россияни улкан илмий-техник ютуқлар кутмоқда. Иқтисодий соҳада ҳам мамлакатда сезиларли ижобий ўзгаришлар юз беради. Хитой, Ҳиндистон, Япония каби шарқ мамлакатлари эса АҚШ иқтисодий инқирози таъсири остида қоладилар, натижада бу мамлакатларда Ғарбга нисбатан ишонч сусяди.

Энг асосийси Нострадамус айнан 2013 йилдан бошлаб инсониятда руҳий тозаланиш жараёни бошланишига ишонади. Ҳатто Қуёшда юз берадиган улкан портлашлар ҳам одамларнинг бир-бирига меҳр-муҳаббати ошишига хизмат қиласиди, деб ёзади у.


Кези келганда таъкидлаш лозимки, Нострадамус ҳақида қарашлар, фикр-мулоҳазалар кўп ва хилмажил. Кимdir уни ҳақиқий авлиё, қароматгўй деса, яна кимлардир “у вакт ўпқонига тушиб, келажакка бориб қелган одам” деган ақидага ишонади. Баъзи тахминларга кўра, Нострадамуснинг башоратлари шунчалик мавҳумки, умумий фикрлардан бошқа нарса эмас.

Эҳтимол, унинг қайси идир башоратларининг амалга ошиши Нострадамус довруғининг янада ортишига хизмат қилгандир. Аммо, шуни ҳам унутмаслик лозимки, у ҳам биз каби оддий бир бандай ожиз. Қолаверса, унинг ҳам амалга ошмаган, ўз тасдиfinи топмаган башоратлари талайгина.

Албатта, Нострадамус ҳаёти ва ижодини маълумот учун ўқиш, ўрганиш зиён қилмас. Аммо, унинг қарашлари, башоратлари, караматомуз байтларини мутлақ

ҳақиқат ўрнида қабул қилиш ҳам мантиққа түғри келмайди. Зеро, эртага нима бўлишини Яратгандан бошқаси мукаммал била олмайди.

Абдуқаюм ЙЎЛДОШЕВ



“ҲЕЧ НИМАНИ ҮРГАНМАЙДИГАН” ИНСОН

Устози шундай деганди: “У ҳеч нимани ўрганмаган, ўрганмайди ҳам!” Галати гап-а?.. Қизиги, устознинг шогирди шаънига айтган бу гапи замирида на таъна бор, на маломат. Аксинча, айрича меҳр уфуриб туради ва шунинг ўзи болакай түгма иқтидор соҳиби эканини билдиради. Дарҳақиқат, дунё тан олган бастакор Людвиг ван Бетховен аввал бошдан “ҳеч нимани ўрганмайдиган” ўқувчи эди...

XVIII асрнинг иккинчи ярмида ҳозирги Германиядаги Бонн шахри Кёльн князлиги таркибидаги кичкина шаҳарча эди. Людвиг ван Бетховен 1770 йили шу масканда таваллуд топган. Унинг туғилган санаси аниқ эмас. Айтишларига караганда, Людвигнинг ўз даврининг таниқли қўшиқчи ва скрипкачиси бўлган отаси Иоганн

ван Бетховен ичкиликка ружу қўйиши оқибатида оиласига етарли даражада эътибор қаратмаган, шунданми, мусиқа даҳосининг чўқинтирилган санасигина (17 декабрь) маълум.

Людвигдаги иқтидор гўдаклигиданоқ кўзга ташланган. Тасаввур қилинг: эндиғина тўрт ёшга тўлган бола мусиқа асбобларини ўзгача иштиёқ билан чалишга ҳаракат қилар, буни кўрганлар ўз кўзларига ишонмасди. Фарзандидаги қобилиятни ўз вактида илғаган отаси уни тажрибали ўқитувчилар қўлига топширади. Бундан кўзланган мақсад эса аниқ – тезроқ концертлар уюштириб, мўмайгина даромад ортириш эди. Людвиг Кёльнда илк концертини берган пайтида афишаларда “Ёш бастакор – олти ёшда!” экани алоҳида зикр этилади. Афсуски, бу намойиш унчалик мувваффакиятли чиқмайди.

Людвиг 12 ёшида бемалол клавесин, скрипка, орган каби мусиқа асбобларини чала оларди. Айни ўша пайтда Бонндаги Капелла саройига Христиан Готлоб Нефе раҳбар бастакор этиб тайинланади. Жаноб Нефе санъатнинг ашаддий ишқибози, шунингдек, ёш иқтидорларни ҳар томонлама қўллаб-қувватлайдиган зодагонлардан эди. Айнан шу инсон сабаб Бетховен Бах, Гендель, Гайдн ҳамда Моцарт каби мусиқа даҳолари ҳаёти ва ижоди билан яқиндан танишади. 1782 йилда унинг илк ижод намунаси чоп этилди. Нефенинг Бетховенга ихлоси баланд эди. Буни қуйидаги гапларидан ҳам билиш мумкин:

“Бу ёш истеъдод эгаси санъатни танлагани учун олқишигасазовордир. Агарда у танлаган йўлидан қайтмаса, камида Вольфганг Амадей Моцарт-II даражасига этади”.

Бетховен 17 ёшида “мусиқа қироли” Моцарт билан учрашиш мақсадида Венага йўл олади. Кимсан Моцартни ўзининг импровизациялари билан лол қолдиради... Бироқ ўзгача завқшавқ билан бошланган ижод авжи қизиган палласида тўхтатилади. Онаси бетоб экани ҳақидаги хабарни эшитган Людвиг Боннга қайтишга мажбур бўлади.

Бастакор 1787 йилда онасини, орадан кўп ўтмай отасини ҳам тупроққа топширади. Сўнг яна орзусидаги шахар – Венага келади. Бу пайтга келиб, Бетховен деярли элликка яқин мусиқий асарлар муаллифиға айланиб улгурган эди. Айни йигит ёшида бошига тушган мусибатлар ҳам унинг ижодига таъсир этмай қолмайди, албатта. Людвигнинг Венадаги илк мураббийи Гайдн сұхбатларнинг бирида шундай дейди: “Сизнинг асарларингиз ажойиб, улардан ҳайратланаман ҳам. Шу билан бирга, уларда қайғули ва файриодий оҳанглар ҳаддан зиёд. Чунки ўзингиз шундай инсонсизда! Мана, менинг асарларимни олинг. Уларда асосан шўх-шодон тароналарни учратасиз, чунки табиатим шунақа...”

1775-1802 йиллар оралиғида бастакор сермаҳсул ижод қиласи: фортепъяно учун 19 та сонет, оркестр жўрлигида 3 та концерт, 2 та симфония ва бошқа кўплаб асарлар айнан шу даврда яратилади.

Бетховеннинг ижоди тобора юксалаётган паллада тақдир уни яна бир оғир синовга дучор этади. Буюк бастакор кун сари... эшитиш қобилиятини йўқотиб боради! Бу касаллик аломати Людвигда 26 ёшида ўз кучини кўрсата

бошлиғанди. Ўттиздан ўтмай унинг қулоқлари батамом эшитмай қолади. У дўсти Вегелерга ёзган хатида шундай дейди: “Биласанми, икки йилдан бери жамоат ахлидан қочиб юрибман, инсонларга кар эканлигимни айтишга журъат этолмаяпман...” Дарҳақиқат, у карлик оқибатида уйдан ҳам чикмай қўйганди, ҳатто. Людвиг маъюс, одамови бўлиб қолади. Айни шу йилларда бастакор ўзининг ягона опerasи “Фиделио” устида ишлайди. Мазкур опера катта муваффакият қозонади. Дастрлаб Венада, кейинчалик Прага, Берлин саҳналарида намойиш қилинади.

Бетховен 26 март 1827 йилда вафот этади. Уни сўнгги манзилга 20 минг нафардан ортиқ одам кузатади. Дафн маросимида кимсан ўз даврининг машхур бастакори ва опера қўшиқчиси италиялик Луиджи Керубини марҳумга бағишиланган месса (католиклар ибодат вақтида айтадиган қўшиқ) ижро этса, қабристонда австриялик шоир ва драматург Франц Грилпарцер томонидан ёзилган нутқ жаранглайди.

Германиянинг энг моҳир пианиночилиаридан бири бўлмиш Доротея Эртман устози ҳақида шундай дейди: “Баланд бўйли, келишган қоматлива ажойиб чехрали бу инсонни илк бор кўрганимда кўнглимда чексиз ҳайрат, нурли орзу-умидлар уйғонган. Бетховен сонатасининг ижросидан қаттиқ таъсирланганман. Ҳеч қачон, ҳатто буюк ва юксак маҳоратли санъаткорларда ҳам бу қадар қудрат ва ўта самимийлик уйғунлигини учратмаганман”.

2007 йил 29 августда веналик патологоанатом ва тиббий эксперт Критиан Рейтер узок тадқиқотдан сўнг Бетховеннинг ўлимига унинг шифокори Андреас Ваврух сабабчи бўлгани ҳақида хулоса беради. Маълум бўлишича, шифокор муолажа жараённида суюқлик

юбориш мақсадида бир неча маротаба бастакорнинг қорин пардасини тешган. Сўнг яра тезроқ битиши учун устига қўрғошинли малҳам қўйган. Рейтер томонидан ўтказилган Бетховен сочининг тадқиқоти шуни кўрсатадики, ҳар муолажадан сўнг бастакорнинг организмидаги қўрғошин миқдори ошиб кетаверган... Эҳтимол, тадқиқотчи хуласаларидан мантиқ учқунлари йўқ эмасдир, бироқ унинг изланишлари

буюк бастакор вафотидан қарийб бир юз саксон йилдан сўнг ўтказилганини ҳам унутмаслик керак. Нима бўлган тақдирда ҳам, бу фоний дунёда мархумларнинг фақат ўлмас асарларигина муалиф барҳаётлигини таъминлаши мумкин. Бетховен ана шундай саодат насиб этган ижоркорлардан эди.

**Гулҳаё АБДУҒАФФОРОВА
тайёрлади**

БУ ҚИЗИК!

Бетховенning гаройиб бир одати бўлган экан. Ҳар сафар ижод қилишдан олдин бошини муздай сув солинган тогорага ботириб олган. Бастакор бу одатидан умрининг охиригача воз кеча олмаган.

Айтишиларича, Бетховен кўпайтириши амалини ҳам ҳеч ўргана олмаган экан. Бир сонни иккинчисига кўпайтириши учун аввал уларни шунча маротаба бир-бираига қўшиб чиқаркан.



ЮҚСАҚ КАМОЛОТ КУЙЧИСИ

Бу йил халқимиз севган етук шоира, ноёб истеъодод соҳибаси Нодирабегим таваллудига 220 йил тўлади.

У 1792 йилда Андижон ҳокими

Раҳмонқулибий оиласида дунёга келди. Асл исми Моҳларойим. Қўқон хони амир Умархонга турмушга чиқиб, 1810 йилдан бошлаб Кўқонда умр кечиради. Халқ орасида уларнинг ибратли ҳаёти, ижодкорлар оиласи сифатидаги юксак маънавий муносабатлари ҳақида кўплаб ривоятлар сақланиб қолган.

1822 йилда амир Умархон – шоиранинг Амирий тахаллуси билан шеърлар ёзган турмуш ўртоғи вафот этади. Бу фожия Нодирани тушкунликка туширмайди. У 14 ёшли ўғли Муҳаммадалихон билан биргаликда Кўқон хонлигини бошқара бошлайди. Нодира оқила, доно ва тадбиркор аёл эди. Унинг Умархон давридаги фаолияти Бибихонимни эслатади. Ўғли тахтга ўтирган даврда эса мамлакатни баравар идора этади. Мадраса, масжид, ҳаммом, карвонсаройлар қурдиради. Илм аҳлига

рахнамолик, факирларга ҳомийлик қилади. Жамият тараққиётида адабиёт, санъат, илм ва маданиятнинг ўрнини тўғри белгилайди. Кўплаб ноёб китобларни кўчиритириб, омманинг маънавий дунёсини бойитишга эътибор қаратади. Шоиранинг бу борадаги хизматлари бекиёс.

Нодиранинг сиёсий ва адабий фаолиятига ўзига замондош алломалар юксак баҳо беришган. Жуда кўплаб тарихий, бадиий асарларда у ҳақда маълумотлар етиб келган. Айниқса, Увайсийнинг “Воқеоти Мұхаммадалихон” ва Нодирнинг “Ҳафт гулшан” номли достонларида шоиранинг ижодкор, давлат арбоби ва оддий ўзбек аёли сифатидаги қиёфаси қисқагина парчадаёқ муфассал ёритиб берилган:

*Ҳама бошдин аёги эрди идрок,
Жаҳон ичра аниңдек келмагай пок.
Агар ҳар ишини ул этса ирода,
Карам бобида юз эрдин зиёда.
Аниңдек келмагай даҳр ичра ойим,
Аниң кўнгли саховат ичра доим.
Жаҳон гулзорида андоғ сифатлик,
Топилмас хотун ичра оқибатлик.*

Нодирадан ўн минг мисрага яқин шеърий мерос қолиб, девонларининг бир неча кўлёзма нусхалари орқали бизгача етиб келган. Нодира – зуллисонайн шоира. У ўз асарларини икки тилда, ўзбек ва форс-тожик тилларида яратган.

Шоира мумтоз адабиётимиздаги ғазал, мухаммас, рубоий, фард каби кўплаб жанрларда ижод қилган. Навоий, Фузулий, Бедилни ўзига устоз деб билган. Уларнинг асарларидан таъсирланган, ижод сирларини ўрганган. Асарларига кўплаб мухаммаслар боғлаб, устозлари фикру ғояларини ривожлантирган.

Нодира умр йўлдоши Амир Умархонни ҳам ўзига устоз деб билган. Камтаринлик билан

шеър ёзиш сиру услубини ундан ўрганиб, назм салтанатига қадам қўйганлигини эътироф этади: “Мен ҳам алар мутобаатида назм услубидин баҳра топиб “Ас-сұхбату муассиратун” натижаси бирла кам-кам шеър қонунидин хабардор бўлур, гоҳо бирор мисра ва гоҳо бирор байт тақлид бирла айтур эрдим”.

Нодира – ишқ ва вафо куйчиси. Ҳамфирк устози Умархоннинг фожиали вафоти шоира кўнглига, хаётига катта зарба бўлди. Унинг шеъриятида маҳзунлик кучайди. Шеърлари ғамгин изтироблар, мунгли наволар ифодасига айланди.

Аммо Нодира шеъриятини факат Сайид Умархондан айрилик изхорлари деб баҳоласак, бирёқлама тушунган бўламиз. Чунки шоира шеъриятининг илдизи чуқур. Маъно-моҳияти жудатеран.

Фироқ ғамида ёлғизланган кўнгил бир ғамгусорга эҳтиёж сезади. Ана шу эҳтиёж шоира шеъриятини тафаккурнинг юқори босқичига кўтаради. Яъни, ҳаётий заминдаги ошиқлик илоҳий ишқ сари юксалиб боради.

Нодира замонасида мажозий ишқни куйлаш ҳам, ҳақиқий мұхабbatни васф этиш ҳам аёл киши учун осон бўлмаган. Мана бу оташин байт шундан нишона:

*Манъи мұхаббат на құлурсан
менга,
Рамзи ҳақиқат эрур ишиқи
мажоз.*

Шоира юраги турли маломатлардан куюниб, “эй замондош, менга мұхаббат навосини маън этма. Ахир, Ҳақ ишқини куйлашим учун бу дунё ишқи фақат рамзу тимсолдир, холос”, дея надомат чекади.

Шоира наздида илоҳий ишқ инсонни камолотга етаклайди. Ундан бехабарлик эса тубанликка элтади.

Эзгу фазилатлардан маҳрум этади:

*Мұхаббатсиз киши одам әмасдур,
Гар одамсан – мұхаббат ихтиёр эт.*

Нодира ижодида, айникса, юқсак эътиқод ифодасининг мукаммал тасвирига дуч келамиз. Ү шариат талаблари ва амалиётига шоирона теран тафаккур мезонидан туриб муносабатда бўлади:

*Кўнгилни хоби гафлатдин даме бе
дор қил, ё раб,
Оқорғон кўзларимни маҳрами дай-
дор қил, ё раб.*

Инсон ҳаёти ҳамиша қарама-каршиликлар исканжасида кечади. Кўнгил хоҳишлари, мақсадлари турлича бўлган кишиларнинг дунёкараши ўзаро тўқнашади. Нодира шеъриятида ҳам бепарво, такаббур замондошлари зарбаларидан захмдор дил нолалари эшитилади. Шоира локайд, ошиқликнинг файзосор муждаларидан бебахра, бепарво кимсалар мавжудлигидан таассуфлар чекади. Бундайлар билан ҳамқадам бўлиш туйғуларни ўлдириши, рухни қашшоқ этишидан куйинади:

*Бевафолар меҳрини тарк айла, эй
шайдо кўнгул,
Йўқса бу йўлда алингда ҳар на вор
алдин кетар.*

Нодира ана шундай замондошлари кўнглига дунё, ҳаётнинг моҳияти борасидаги ўзи англаб етган ҳақиқатларни сингдиришига эҳтиёж сезади. Уларни ҳаёт нерьматларини ғанимат билишга, ундан баҳраманд бўлишга даъват этади. Олам ва одамнинг мазмунни, бир-бирига муносабати хусусидағи фалсафий хulosаларни ошкор этади. Натижада, асарлари теран мазмунли ирфоний мактаб дара-жасига кўтарилади.

Қадим-қадимдан намозга ўзликни

ва кўнгилни покловчи муқаддас восита сифатида эҳтиром билан қаралган Нодира бир ғазалида намоз туфайли муқаддас мартабага эришишни орзулаган эди:

*Нодира, жоми мұхаббатни лабо-
лаб ишибон,
Мастлиқ бирла қиласай ишқ намо-
зини адo.*

“Жоми мұхаббатни ичиш ва мастилик билан ишқ намозини адо этиш...” Бу ўз вужудини, ўзлигини буткул унугиб, бехудлик ва сархушилик илиа Оллоҳ билан сухбат куриш мартабасини орзулашдир.

Тасаввуф – бу инсоннинг ўзини таниши орқали Оллоҳни таниш ва севиши илмидир. У “Инсоннинг ички олами, яъни ботинини тадқиқ этувчи илмдир”.¹ Инсон умри тадрижи икки қарама-қарши кутб – эзгулик ва ёвузликнинг курашидан иборат. Тасаввуф таълимотининг моҳияти одамзодга ўз вужудида мавжуд нафсоний интилишларни фош этиш, уларни енгиш йўлларини кўрсатиш, руҳидаги илоҳий фазилатларни уйғотиш, тараққий топтиришдан иборатдир. Чунки инсоннинг яшашдан бош мақсади илоҳийлашиш, асл моҳиятга этишдир. Бунинг йўли эса битта – ўзини енгиш, ўзидан ўтиш ва ўзига этиш. Бу борада “Насойим ул-муҳабbat”да келтирилган Боязид Бистомийнинг хулосаси ибратлидир: “...Боязид дедики, Оллоҳ таолони туш кўрдум, сўрдумки, бор худоё, йўл санга не навъдур? Дедиким, ўзунгдин ўттунг, еттинг”².

Нодиранинг ҳам висолга этиш йўли борасидаги қарашлари ана шундай улуғ алломалар нуқтаи назарига мутаносиб:

*Васлин топмоги ўзлук била не мум-
киндор,*

1 Н.Комилов. Тасаввуф 2-китоб. Т., 1999, 194-б.
2 Алишер Навоий. Асарлар, 15 томлик, 15-том, 79-б.

Етмагай анга, агар кимса ўзин гум қилмаса.

Нодира шеъриятидан қўринадики, шоиранинг фалсафий дунё-қараши ва эътиқоди асарларидаги ирфоний, маърифий хуросаларига, тасаввуфий ғояларнинг равнақига асос бўлган. Шоира меросидаги ахлоқий-фалсафий хуросаларнинг маърифий аҳамиятини таъминланган. Унинг донишманд, ориф бир сиймо даражасига кўтарилишига ҳаётий замин яратган.

Нодира шеърияти мазмун жиҳатдан ҳам, бадиийлик жиҳатидан ҳам баркамол асарлардир. У қарашларини ўзига хос янгича топилмалар, қиёслар билан ифодалайди. Кузатишларига аёлларга хос нозиклик ва синчковлик билан муқоясалар топа олади. Натижада, тазод, тажохул

ул-ориф, талмех, хусни таълил, ташбех каби бадиий санъатлар билан музайян янгича талқинлар, янгича образлар, янгича ифодалар яратишга эришади.

Кўринадики, Нодира лирик қаҳрамони ислом соғлиги ва тасаввуф равнақи йўлида жонфидолик кўрсатган. Миллат, ватан тақдири, келажаги учун қайғурган. Шунинг учун унинг самимий туйғулар тасвиридан иборат асарлари бугунги кунимиз учун ҳам ардоқли ва муҳимдир.

**Иқболой АДИЗОВА,
филология фанлари номзоди**



ФЛОБЕРНИНГ БУЮКЛИГИ НИМАДА?

Жаҳон адабиёти хазинасига ўзининг бекиёс асарлари билан хисса қўшган атоқли француз адаби, реалистик роман устаси Гюс-

тав Флобернинг номини эшитмаган адабиёт аҳли бўлмаса керак.

Гюстав Флобер 1821 йил 12 декабрда Франциянинг Руан шаҳрида Ашель Клеофа Флобер исмли жарроҳ хонадонида таваллуд топган. Гюстав оиласда иккинчи фарзанд бўлган. Тўнғич ўғлининг жарроҳ бўлиб етишишини астойдил истаган ота иккинчи ўғлининг ўқишига эътибор бермайди. Оиласдаги бу беътиборлик ёш Флоберни ижодий изланишларга ундайди. Флобер 11 ёшида Рояль коллежига, сўнгра Руан лицейига ўқишига киради. Кейинчалик у Парижда хуқуқшунослик бўйича таҳсилни давом эттиради. Бўлажак адаб ўша ерда адабиёт ва санъат аҳли билан учрашади, жумладан, ҳайкалтарош Жан Прядье, адаб Максим дю Камп ва драматург, романнавис Виктор Гюголар билан яқиндан алоқалар ўрнатади. Шу йилларда ёш ёзувчи

ҳаётий кечинмалар ва руҳий изтиробларга бой илк асари “Сентиментал тарбия”ни ёзишга киришади. Адид 1844 йилда “Епископлар кўприги”га саёҳат уюштиради. Борган жойининг “юқ”и тушадими ё аввалдан мойиллиги бўладими, хуллас ўша ерда Флобер тутқаноқ касалига чалинади. Бу касаллик унга кўп азоб беради. “Мен ўзимни кучли аланга зарбалари ичидаги ҳис қиласдим”, – деб ёзди адид. Бундай ҳолатда у хукуқшунослик йўналишидаги ўқишидан воз кешишга мажбур бўлади ва бир умр Руан дарёси бўйидаги Круассе шаҳарчасида яшаб қолади.

1845 йили “Сентиментал тарбия”нинг биринчи вариантини ёзиг тугатган адид, Италияга саёҳат қилади. У ерда “Сент-Антуаннинг ҳиссиётлари” номли картинага назари тушади. Картина ёш, таъсирчан адидни эпонимик театр учун асарлар ёзишга ундейди.

1846 йили Г.Флобернинг отаси, орадан кўп ўтмай тўлғоқ азобига дош беролмаган синглиси оламдан ўтади. Бу икки жудолик ижодкорнинг ҳаётини остин-устун қилиб юборади. Боз устига, туғилибоқ етим қолган жияни унинг қўлида колиб, тоғасининг бағрида ўсиб-улғаяди.

Гюстав Флобер 1849-1852 йиллар оралиғида дўсти Максим дю Камп билан Шарқ бўйлаб узок саёҳат уюштиради. Саёҳатни Миср, Фаластин, Ливандан бошлиб, Константинополь ва Италия оркали ортга қайтади. Истеъодли адиднинг кейинги асарлари кузатишлар, тадқиқотлар натижасида дунёга келади. Флобернинг эндиғи асарлари илгаригиларидан кўра анча муқаммал ёзилади, унинг қалами чархланиб, ҳақиқий роман-навис сифатида ном қозона бошлиди. 1851 йилда дю Кампнинг маслаҳатига кўра Флобер ўзининг

йирик асари “Бовари хоним”га қўл уради. Ёзувчига ҳақиқий шуҳрат олиб келган реалистик ва психологияк руҳдаги бу роман, беш йил деганда ёзиг тугатилади. Асарда тарихда муносиб ўрин эгаллаган “Йикки империя”нинг олийнаса вакиллари, Париж зодагонлари ҳаётидан лавҳалар келтирилади. Ўша кезларда Флобер таниқли француз адабаси Жорж Санд билан танишади. Ижодкор ўзи яшаб турган Круассе ва пойтакт Париж ўртасида мунтазам қатнаб туради, юзлаб адабиёт аҳиллари билан алоқалар ўрнатишга ҳаракат қилади ва бунга эришади ҳам. Хусусан, ака-ука Гонкурлар, Сент-Бёв, Шарль Бодлер, Тургенев ва малика Матильдалар билан доимий мулоқотда бўлади.

Ўша йилларда ёзувчи “Саламбо” асарини ёзишга киришади. Бу асарнинг яратилишига милоддан аввалги учинчи асрда бўлиб ўтган Картаж инқилоби сабаб бўлади. Флобер Картажни кўриш ва тарихий воқеалар тафсилотини жойида ўрганиш учун Тунисга жўнайди. Узок уринишлардан сўнг 1862 йилда асар тайёр ҳолга келади. Орадан икки йил ўтиб, адид “Сентиментал тарбия”нинг охирги талқинини ёзишга киришади. 1848 йилги инқилобнинг авж олиши, курашчиларнинг руҳий кечинмалари ва яна мағлубият алами ифодалangan мазкур романда таржимаи ҳол чизгиларидан фойдаланилган. Роман нашрдан чиққач, танқидчилар ўта салбий муносабат билдирадилар, асарни ҳеч ким “қучоқ очиб” кутиб олмайди, бунинг натижаси ўлароқ кўпгина нусхалар сотилмай қолади.

Эл орасида танилиб қолган Флобер киборона ҳаётини давом эттиради, мамлакат императори билан яқиндан танишади, “Фахрий легион ордени” билан тақдирланади. Жан-Жак Повер ва Жак-Луи Ду-

шинларнинг қаламига мансуб “Флобернинг ишқий ҳаёти” номли китобда ёзилишича, Гюстав бир пайтлар болалиқдаги дўсти Альфред де Пуатвеннинг опаси, Ги де Мопассаннинг онаси билан анчайин яқин муносабатда бўлган экан. Нима бўлганда ҳам, Г.Флобер ёш Мопассанни ўзига яқин олиб, адабиёт соҳасида унга йўл-йўриқ кўрсатади, кўп маслаҳатлар беради. Флобер Мопассанга: “Бир предметни бошқа предметлардан ажратиб турадиган муҳим фарқларини билиб олгунингизга қадар ва уни сўз билан ифодалай олгунингизга-ча ўрганинг, ўрганаверинг!” – дея васият қилган экан.


1870 йилларда ҳаёт ташвишлиари ва изтироблари остида адабнинг анча қадди букилиб қолади. Франция-Пруссия уруши натижасида Флобер бошпанасиз қолади, онаси вафот этади. Бу давр унинг учун иқтисодий инқизорзлар даври ҳам бўлади. Лекин ҳаётнинг бу зарбалари адаб ижодига тъсир ўтказолмайди. Унинг бадиий асарлари силсиласи яна икки юксак ижод намунаси ҳисобланмиш “Уч эртак” новеллалар тўплами ва “Бовар ва Рекюше” романлари ҳисобига бойийди.

Адаб умрининг сўнгги йил-

ларини қайфу ичра ўтказди. Дўстларининг вафоти, иқтисодий тақчиллик, шу билан бирга, саломатлигидаги муаммолар унинг қаттиқ тушкунликка тушишига сабаб бўлди. Улуғ адаб 1880 йил 8 майда мияга қон қуолиши туфайли оламдан ўтади.

Флобернинг кўплаб машхур адабий маслақдошлари уни ўз устозлари деб билишади. Хусусан, Эмиль Золя, Альфонс Доде, Эдмон де Гонкур, Теодор де Банвел ва Ги де Мопассанлар Флобернинг фаолиятини юқори баҳолаганлар. Унинг предметларни ифодалаш маҳоратини санъат даражасига чиқарган буюк ижодкор ҳисоблаганлар. Флобернинг ўзига хос хусусиятга эга ижодини, ҳеч ким билан адаштириб бўлмайдиган бадиий тасвир услубини юксак қадрлаган Марсел Пруст шундан ёзади: “Дунёга файласуфона қараган Иммануил Кант категориялари билиш назариясида қандай янгилик бўлган бўлса, Флобернинг услуг борасидаги новаторлиги атрофдаги нарсаларни кўра билишимизни деярли шундай янгилади”. Флобернинг буюклиги ҳам айнан мана шунда!

**Маҳмадиёр АСАДОВ,
Қарши ДУ ўқитувчиси**



“МАУГЛИ”НИНГ ОТАСИ

Оскар Уайлд унга “Хиндистон лаҳжасида сўзлашган даҳо” дея таъриф берган. Генри Жеймс бу инсонда “инглиз Бальзаки” сиймосини кўрган. Аммо дунё болалари учун бундай илтифотлару ва юксак эътирофлар (ҳатто Нобель мукофоти)нинг аҳамияти ҳам, қизиги ҳам йўқ. Улар учун

худди одамлардек сўзлашувчи жунгли ҳайвонларининг Mauglini ёлғизлатиб қўйшишмагани – қизиқ! Жасур Рикки-Тикки-Тавининг эса ҳар қандай вазиятда яқин дўсти – ногирон болакайга ёрдамга келгани – аҳамиятли!..

Ёввойи жониворларни “кўлга ўргатиб”, “тапирирган”, Гарб ўқувчиларига Шарқнинг сирли тропик ўрмонлари оламини очиб берган инглиз ёзувчиси ва шоири Жозеф Редъядр Киплинг 1865 йил 30 декабрда Ҳиндистоннинг Бомбей шаҳрида дунёга келган. Эмишки, адабининг отаси – хайкалтарош-декоратор Жон Локвуд Киплинг ва онаси Алиса Макдональд Англиядаги Редъядр кўли бўйида танишган, ўша ширин лаҳзалар ҳаққи-хурмати тўнғич фарзандларига шу исмни беришган экан.

Бомбей санъат мактаби ректори, профессор ота ҳам, унчамунча қалам тебратиб, маҳаллий журналларда номи чиқиб қолган она ҳам фарзандлари қалбида гўдакликдан гўзаллик, санъат, адабиётга меҳр уйғотишга интиладилар. Қолаверса, болалиги Ҳиндистоннинг рангин, турфа синоатларга тўла табиати қўйнида ўтганлиги сабаб Редъядрнинг шуурида ижод куртаклари жуда эрта кўз очади. Бироқ орзулар оғушидаги бегам-бегубор болалик узок давом этмайди. Ҳиндистонда кўним топган аксарият инглиз оиласлари каби Киплинглар ҳам иккала фарзандлари – б ёшли Жозеф ва унинг сингилчасини Англиядаги хусусий пансионлардан бирига жўнатадилар.

Болакай пансионнинг талабчан ва қаҳри қаттиқ бекаси Роза хонимнинг зуғумиу таъкибларидан фақат уйқусиз тунлари қочиб кутуларди. Йўқ, узок-узоқларга эмас, балки ўзининг хаёлий оламига! Бу оламда ҳамма – каттаю кичик, набототу ҳайвонот бир-

бири билан аҳил-иноқ, ёвузлик эса албатта яхшилик қаршисида мағлуб бўларди. Пансионда ўтган ҳасратга тўла йиллардан хотира-лар Киплингнинг “Қора қўзичоқ”, “Чирок ўчди” асарларида ўз акси-ни топади. Адиб бу даврдан машъум хотиралардан ташқари уни бир умр қийнаган уйқусизлик касалини ҳам орттириб олади.

1878 йилда Жозеф талабаларни нуфузли ҳарбий академияларга тайёрловчи Девон билим юртига юборилади. Ушбу муассасанинг директори профессор Киплингнинг дўсти бўлибгина қолмай, адабиётнинг ашаддий муҳлиси ҳам эди. Шу боис ёш талабанинг илк ижодий ишларини кўриб, уни кўллаб-куватлашни лозим топади. Жаноб Киплингга ҳам кела-жакда ўғлидан яхшигина ижодкор чиқиши мумкинлигини уқтириб кўяди. Жозеф таҳсил олаётган соҳаси бўйича мутахассис бўлиши анчайин муаммо эди. Унинг кўриш қобилияти паст, бундайлар ҳарбий хизматга олинмасди. Ҳарбий бўлишдан батамом умидини узган йигитча ўн йил деганда киндик қони тўкилган диёр – Ҳиндистонга қайтади.

Фарзанди ёзган ҳикоялардан таъсиранган отаси уни Лаҳор (хозирда Покистон худуди)да чоп этиладиган “Фуқаровий ва ҳарбий газета”га ишга жойлаб кўяди. Журналист сифатида фолият бошлаган Киплинг кичик ҳикоялар, шеърлар ёзиб, асосан газеталарда чоп эттиради. Мухбирлик унга ҳиндистонликлар турмушини яқиндан ўрганиш, ҳалқ орасида бўлиш имкониятини беради. Р.Киплинг инглиз тилида ижод қиласкан, болаликдан ўзига яхши таниш ҳиндий ва урду сўзлардан ҳам кенг фойдаланади. (Дарвоқе, “Маугли” эртаги бунга яққол мисол, асардаги аксарият қаҳрамонлар номлари ҳиндий

тилидан олинган. Масалан, она бўри “Ракша” – ҳимоячи, “Ҳатҳи” – фил, “Бандар-лог” – маймунлар тўдаси, “Балу” – айик, “Акела” – ягона деган маъноларни англата-ди).

1880-йиллар ўрталарида адаб Аллоҳободдаги “Пионер” газетаси билан имзоланган шартномага кўра, сафар очеркларини тайёrlаш учун дунё бўйлаб саёҳатга чиқади. У Бирма, Хитой, Япония, Шимолий Америка, Англия таассуротла-ри акс этган қайдлар билан эъти-борга тушади. Ижодкорнинг илк “Департамент қўшиқлари” шеъ-рий тўплами 1886 йилда босмадан чиқиб, шу қадар тез тарқалиб кета-дики, ўша йилнинг ўзидаёқ қайта нашр этилади. Орадан икки йил ўтиб босмадан чиқсан “Тоғлардан тушган оддий ҳикоялар” китоби ҳам ўкувчилар томони-дан илиқ қарши олинади. Киплинг 1887-89 йиллар оралиғида “Хиндистон темирийуллари ку-тубхонаси” туркуми учун олти-та ҳикоялар тўпламини ёзади. Сайёҳларга мўлжалланган мазкур туркум туфайли ижодкор нафақат Ҳиндистон, балки бутун Бри-тания империяси, Европанинг бошқа давлатларида ҳам танила-ди. “Чироқ ўчди” романи, “Шарқ ва Ғарб ҳақида баллада”, “Ростгўй Томаснинг сўнгги қўшиғи” асар-лари Киплингнинг атоқли адаб сифатида эътироф қозонишига са-баб бўлди.

Лондонда ёзувчи америкалик ёш ношир Уолкотт Бейлстир билан та-нишиб, у билан ҳамкорликда “На-улахка” қиссаси устида иш бош-лайди. Ижодий ҳамкорлик 1892 йилда куда-андачилик ришталари-га уланиб кетади – Редъяд Бейл-стирнинг синглиси Каролинага уйланади. Афсуски, оилавий ҳаёт остонасига эндинина қадам кўйган ёшларнинг асал ойи дилхиралик билан кечади: Киплингнинг бор маблағи сақланадиган банк касод-

га учраб, келин-куёв бир чақасиз қолади. Амаллаб йўлкирага пул топган жуфтлик Шимолий Аме-риканинг Вермонт штатида яшов-чи қариндошларини кўчиб ўтадилар. Ўша ерда икки қиза-лок – Жозефина ва Элси дунёга келади. Вермонтда адаб ўзининг энг машҳур “Жунглилар кито-би”, “Иккинчи жунглилар китоби” асарларини, шунингдек, “Кўпгина эрмаклар”, “Етти денгиз”, “Жасур дengизчилар” каби тўпламларини яратади.

АҚШдаги ҳаётидан кўнгли тўлмаган Киплинг 1896 йилда оиласи билан Англияга қайтиб, Европа адабий оламида унути-лаёзган номи, нуфузини тиклаш-га уринади. Маҳаллий матбуотда мақолалари, шеър ва ҳикоялари билан фаол қатнашади. Тез орада унинг номи яна тилга тушади.

Табиатан болажон бўлган, шу-нинг учун ҳам беғубор асарла-ри билан минглаб, миллионлаб жажжи муҳлисларнинг қалбига йўл топа олган Редъяд Киплинг 1898 йилда ўғилли бўлганида, қувончдан боши осмонга етади. Аммо отанинг шодлиги чуқур қайғуга уланиб кетади – қизи Жо-зефина ўпкасини шамоллатиб, оламдан ўтади. Бу жудолик ёзувчи-нинг ўша йилларда битилган қатор асарларида ўз аксини топган. 1901 йили нашр этилган “Ким” романи адебнинг энг яхши асари сифатида тан олинган. Унда тарки дунё қилиб, Ҳиндистон бўйлаб дарба-дар кезиб юрган роҳибнинг боши-дан кечирганлари акс эттирилган.

1902 йилда Киплинг Суссекс графлигига дала ҳовли ҳарид қилиб, оиласи билан ўша ерга кўчиб ўтади. Табиатдан таскин топишга, қоғоз-қалами билан ову-нишга ҳаракат қиласи. Болалар учун қадимги Англия тарихига оид кўплаб ҳикоялар, жумладан, “Шун-чаки эртаклар”, “Тўлтепалик эльф” тўпламлари шу ерда дунёга келади.

1907 йилда Р.Киплинг “ҳикоянавис сифатидаги кузатувчанлиги, ёрқин бадиий фантазияси, пухта ғоялар ва улкан иқтидорга эгалиги учун” адабиёт йўналиши бўйича Нобель мукофотига сазовор бўлади. Дарвоҷе, қаҳрамонимиз ушбу нуғузли мукофотга муносиб кўрилган биринчи инглиз адаби эди. Шу йили ижодкорга Оксфорд, Кембриж, Эдинбург ва Дарем университетларининг фахрий унвонлари ҳам топширилади. Бу пайтга келиб Редъядр Киплинг 13 жилдли ҳикоялар тўплами, тўртта роман, болалар учун учта ҳикоялар китоби, кўплаб сафар қайдлари, очерклар, мақолалар, юзлаб шеърлар муаллифи эди. Бироқ вакт ўтиб, адабнинг ижодий фаоллиги пасая бошлайди. Биринчи жаҳон урушида ёлғиз ўғлини ўқотган Киплинг рафиқаси билан биргаликда ҚизилҲоч жамиятида хизмат қилишни лозим топади. Урушдан кейин ёзувчи кўп саёҳат қиласи. 1922 йили Францияга қилган ана шундай сафарларнинг бирида Киплинг Англия қироли Георг V билан танишибина қолмай, умрбод қадрдон дўст бўлиб қолади. Шу йилларда ёзувчи мамлакат сиёсий ҳаётида фаол қатнашади, жаҳонда кечётган жараёнларга нисбатан муносабатини ўз асарларида акс эттиради.

Гарчанд умрининг сўнгги йилларида адаб ошқозон касалидан жиддий азият чеккан бўлса-да, ижоддан тўхтамайди, бир қатор ҳикоялар тўпламини нашрдан чиқаради. 1936 йил 18 январда Киплинг ўз дўсти – қирол Георг V дан атиги икки кун илгари ду-

нёдан кўз юмади. У Вестминстер аббатлигидаги Шоирлар бурчагида дафн этилади. Унинг “Ўзим ҳакимда икки оғиз” биографик асари вафотидан бир йил ўтгандагина олам юзини кўради.

Редъядр Киплинг ўзининг маҗоз ва рамзларга бой тили билан инглиз тили ва адабиёти хазинасини бойитишга катта ҳисса кўшган. Шундай бўлса-да, XX аср бошлари мунаққидлари адабни унча хушламас, ёзиш услубини ўта анъанавий, жўн деб ҳисоблар, асарларида ўша пайларда урф бўла бошланган модернизм йўналишининг “ҳиди”ни тополмаганлари учунми, ижодини кўп-да эътиборга лойиқ кўрмасдилар. Аммо қизиги шундаки, адаб вафотидан кейин, аникроғи 1943 йилда “Фейбер энд Фейбер” нашриёти томонидан янги шеърий тўплами нашр этилгач, танқидчи ва муҳлисларнинг Киплинг ижодига бўлган қизиқиши қайта уйғонди. Унинг асарлари янгитдан туғилди гўё.

Аслини олганда... мунаққидлар нима деса, деяверсин! Маугли Шер-Хон устидан ғалаба қозонса, мангуст Рикки эса илон Нагни ўйқила олса бўлгани! Бир асрдан ошибдики, жаҳон болалари каттаю кичик, одамлару ҳайвонлар бир-бири билан иноқ бўлган, ёвузлик эса албатта яхшилик олдида бош эгадиган дунё борлигига ишониб яшайдилар... Редъядр Киплинг ўйлаб топган оламнинг борлигига, ундаги эзгуликка ишониб, вояга етадилар.

Ю.ХОШИМОВА тайёрлади



МУЛТИПЛИКАЦИЯ ҚИРОЛИ

1901 йилнинг 5 декабрида Чикаго шаҳрида туғилган Уолт Диснейнинг аждодлари инглиз, ирланд, ҳатто олмонларга тақаладиган оиласи 1906 йили Миссурига, кейинроқ Канзас-ситига кўчиб ўтишади. Тез-тез бир жойдан иккинчисига кўчишлар хонадон ахлини камхаржликка дучор этади. Шу боис ҳам Уолт 14 ёшидаёт тириклик этагини тутишга мажбур бўлади: газета тарқатиб пул топади, ҳатто Биринчи жаҳон урушида Францияда – Халқаро Қизил Хоч жамиятида ҳайдовчилик қиласи. Вақти келиб унинг жаҳон мултипликацияси қиролига айланниши кимнинг ҳам хаёлига келибди, дейсиз...

Уолт ўн олти ёшида кинорекламалар тайёрланадиган студияга рассом сифатида ишга олинади. Ана шу ерда унда расмли анимациялар устида ишлаш тажрибасини ортириш истаги пайдо бўлади. Бироқ илк уринишлар муваффақиятли чиқмайди. Ҳатто ўша даврнинг етакчи мултипликатори А.Айверкс билан ҳамкорлик ҳам кутилганидек натижка бермайди. Аксинча, катта умидлар билан очилган илк “Лаф-О-Грэм” анимацион студияси касодга учрайди.

1923 йилга келигина, Дис-

нейнинг ишлари бироз олдинга силжийди. Бу пайтга келиб Уолт акаси Рой билан Лос-Анжелесга кўчиб, Голливуд қошида унча катта бўлмаган “Уолт Дисней Компани” анимацион студиясига асос солиб улгурганди. Роппа-роса бир йилдан кейин Дисней ўзининг илк «Алисанинг денгиздаги бир куни» мультфильмини тақдим этади. Болалик дунёсига ўзгача нигоҳ билан қаралган ушбу картина кенг жамоатчилик эътиборидан четда қолмайди. Бундан руҳланган Дисней «Алиса мультипликациялар мамлакатида» номи остида нақ эллик олти мультфильмдан иборат тўпламни яратади! Ана шу тарзда мультипликацияда янги услуб – диснейча фильмлар дунёга келади.

1927 йилда яратилган «Күёнча Освальд» фильмни катта шов-шувга сабаб бўлди. Унинг қаҳрамони эса Дисней фильмларидағи машҳур персонажлар галереясини очиб берди. А.Айверкс томонидан чизилган Микки Мауснинг дастлабки номи Мортимер эди, аммо бироз вақт ўтиб, уни дунёга танитган ном билан атай бошлишди. Микки Маус илк марта “Телбанамо аэроплан” номли овозсиз фильмда пайдо бўлди (1928), шунингдек, ўша йили Диснейнинг биринчи овозли мультипликацион фильмни бўлмиш “Виллининг кемачаси” қаҳрамонига ҳам айланади. Қизиги шундаки, илк мультфильмларда сичқончага Диснейнинг ўзи овоз берган ва ана шу муваффақиятли ижро режиссёрга шон-шуҳрат эшикларини очади.

“Оппоқойим ва етти митти одам” мультфильми Дисней фаолиятини янги босқичга олиб чиқади. У болалик пайтлари, Канзас-сити кўчаларида газета сотиб юрган кезлари Оппоқойим ҳақида қисқа метражли овозсиз мультфильмни томоша қилганди. Асар унинг хотирасига бир умрга муҳланади. 1934 йилнинг кузидаги Дисней ака-

ука Гримм эртаклари асосида илк хомаки сценарийни ёзади. Ушбу лойиҳага соҳанинг энг моҳир вақилларини жалб этади. Шу тариқа 1937 йилнинг 21 декабрида Америка экранларида илк маротаба тўлиқ метражли анимацион фильм намойиш этилади. “Оппоқойим” Диснейга мисли кўрилмаган обрӯ келтириш баробарида ҳамёнини 8 миллион АҚШ долларига бойитади. Шундай катта шуҳрат қозонган тўлиқ метражли фильмларидан яна бири, – шубҳасиз, машхур итальян ёзувчisi Карло Коллодининг “Пиноккио” эртагига ишланган мультфильмdir (1940). Албатта, муваффақиятлар катта меҳнатнинг самарасидир. Масалан, Пинокционинг китдан қочаётган сахнасини ҳаққоний чизиш учун рассомлар росмана китларнинг қиликлари, хатти-ҳаракатларини ўрганишга мажбур бўлишган. Ли Харлайн, Поль Смит ва Нед Вашингтон томонидан фильмга ишланган мусиқа “Оскар” мукофотига ҳам сазовор бўлади.

Диснейнинг тўлиқ метражли фильмларини ҳақли равища оиласавий фильмлар, дея номлашади. “Дамбо” (1941) мультфильми ҳақида ҳам айнан шу гапни айтиш мумкин. Цирқда томоша кўрсатадиган, яъни осмонда парвоз қилишни ўрганган митти филча тўғрисидаги ушбу фильм турли воқеалар, саргузаштларга бой, қаҳрамонлари ажойиб тарзда чизилган бўлиб, фильм катта шуҳрат қозонади.

1950 йилда Дисней “Золушка” фильмида меҳнаткаш етим қизнинг анимацион образини яратади. Уилfred Жексон, Гамильтон Ласки ва Клайд Жеронлар режиссёrlигида олинган ушбу фильмнинг энг эътиборли саҳналари – ошқовоқнинг мўъжаз соябон аравага, уни тортаётган сичқонларнинг гижинглаган арғумоқларга,

қизчанинг устидаги йиртиқ-ямоқ кийимларнинг аслзода маликалар либосига айланиши эди. Фильм Берлин кинофестивалида техник маҳорат учун “Олтин айиқполвон” мукофотини қўлга киритади.

Уолт Дисней нафақат мултипикация устаси, балки жуда оиласаварвар инсон ҳам эди. У 1925 йилда котибаси Лилиан Боундсга уйланди. 1933 йилда туғилган қизларига Дайана Мэри деб исм беришди. Эр-хотин бошқа фарзанд кўролмаслиги сабабли, 1937 йилда яна бир гўдак қизчани ўз қарамоқларига олиб, унга Шарон Мэй Дисней (1936–1993) исмини кўйишади.

Дайана Мэри Дисней отаси Уолт Дисней ҳакидаги машхур биографик асарнинг, кўплаб лойиҳаларнинг муаллифи, “Уолт Дисней Компани” раҳбарларидан бири, шунингдек, Сан-Францискодаги Уолт Дисней музейининг асосчиларидандир. Дайананинг айтишича, унинг отаси бўш вақт топди дегунча, оиласи бағрига шошилар экан. Тез-тез чиқиладиган оиласавий сайрларнинг бирида унинг миясига ажойиб бир ғоя – экрандаги эртакларни ҳаётимиизда “жонлантириш” режаси келади. Ушбу ғоя каттаю кичикка бирдек манзур бўлган. Зоро, “Диснейленд” ана шу ғоянинг меваси саналади.

Дисней 1966 йилнинг 15 декабрида, олтмиш беш ёшида ўпка сараторидан вафот этади. Ана шу воқеадан сўнг унинг номи остидаги компанияда ишлаб чиқариладиган фильмларда сигаретани намойиш этмасликка қарор қилинади. 1968 йилда Дисней АҚШнинг олий мукофоти – Конгресс олтин медали билан тақдирланди.

Анвар ШЕР тайёрлади



ЮКСАК ИЖРОДАГИ МИЛЛИЙ ҚИЁФА

Бу санъаткорни узоқдан танимиз: қадамидан, овозидан, ўзбекона лутфининг оҳангидан. Унинг ижросидаги бетакрор образларда ўзбек аёлининг аввало самимияти, соддалиги, жонсараклиги ўрни келганда талабчанлиги “мана ман” деб туради. Шу боис ҳам у ҳамма учун бирдек қадрли, бирдек меҳрибон... Сахнада ҳам, экранда ҳам ўзигагина хос бўлган “имзо” қолдириш ҳамма санъаткорларга насиб этавермайди. Эҳтимол, у яратган образлари миллат қиёфасига айланишини хаёлига келтирмагандир, бироқ томошабин меҳрини, ҳақли эътирофини орзу қилгани рост. Тақдир бу орзу-ниятларнинг ижобатини ортиғи билан берди. Шу тариқа Ўзбекистон халқ артисти Зайнаб Садриева театр ва кино санъати афсонаси даражасига етди...

Мовий кўз Зайнаб бундан нақ бир аср аввали, 1912 йили узоқ Россиянинг Волга дарёси бўйидаги шаҳар – Астраханда дунёга келган. Отаси Садри ота маҳаллий ун заводида одий ишчи, онаси уй бекаси эди. 1916 йилда Астра-

хандаги ун заводи Тошкент вилоятининг Янгийўл туманига кўчирилади. Шу муносабат билан Садри ота оиласи билан туманнинг Қовунчи қишлоғига кўчиб келади. Ўшанда Зайнаб тўрт ёшда эди. Шундай қилиб, бўлажак актрисанинг болалиги пойтахтнинг ёнгинасидағи ўзбек қишлоғида ўтади. Вояга етгач, Тошкентдаги хотинқизлар билим юртига ўқишга киради. Ушбу даргоҳда Зайнаб Садриева Зулфияхоним билан бирга таҳсил олади. Қарангки, тақдир бу қизларнинг бирини адабиёт, иккинчисини санъат маликасига айлантириди.

Билим юрти яқинида жойлашган Ҳамза номидаги Ўзбек Давлат академик драма театри (Ҳозирги Ўзбек Миллий академик театри)да эълон қилинган танловда қатнашган ўн етти ёшли Зайнаб машҳур санъаткорлар эътиборига тушади ва шу тариқа бутун умрини санъат билан боғлайди. 1929 йилда дастлаб ишчи-сайёр труппада фаолиятини бошлаган актриса кейин умрининг охирига қадар Ўзбек Давлат академик драма театрида фаолият юритади.

Театрда ишлаб юрган кезлари Зайнаб Садриева актёр Обид Ҳасанов билан танишади. Оилада икки ўғил ва икки қиз дунёга келади. Афуски, ўғиллар хаётдан эрта кўз юмади. Қизлари Розаҳон бошқа соҳани танлади, аммо Дилбархон ота-она касбининг том маънодаги давомчиси бўлди. Эндиликда Ўзбекистон халқ артисти, кино ва театр, дубляж актрисаси Дилбар Исмоилованинг санъатда ўз ўрни бор.

З.Садриева узоқ ва сермаҳсул фаолияти давомида табиати, қисмати хилма-хил бўлган образларни бирдек маҳорат билан гавдалантира олганлиги билан эътиборга сазовордир. У жаҳон адабиётининг Ф.Шиллер, М.Диб, А.Островский, М.Горький каби

ёркин вакиллари асарларининг қаҳрамонларини саҳнага олиб чиқкан. “Макр ва Мұхаббат” песьасида Мильфордхоним, “Жазоир – менинг ватаним”да Зайнаб, “Айбизиз айборлар”да Глафира, “Васса Железнова”да Васса каби бадиий жиҳатдан баркамол образлари билан ўзбек театри ривожига муносиб ҳисса қўшди. Турли йилларда яратилган Пощаойим ва Ҳожи она (Ҳамза, “Бой ила хизматчи”), Холниса (А.Қаҳҳор, “Шоҳи сўзана”), Танга бека (М.Карим, “Ой тутилган тунда”), Марина Иванова (Ў.Умарбеков, “Комиссия”) каби мураккаб ва кучли драматик образлар санъаткор ижодида алоҳида ўрин тутади.

Санъатда шундай киёфалар борки, беихтиёр уларга эргашинг, оламни уларнинг кўзи билан кўринг келади. Шу маънода Зайнаб Садриева ўзининг яратган образларига ирова, ҳақгўйлик, қаттиққўллик, жасурлик каби туйғуларни маҳорат билан уйғулаштирганки, беихтиёр томошабин унинг ижросидан ҳаётий сабоқ олади.

Актриса умрининг сўнгги йилларида саҳнада яна бир карпра ўзини намоён эта олди ва ҳалқ қаҳрамонига айланди. У Ўзбекистон ҳалқ ёзувчиси Сайд Аҳмаднинг “Келинлар қўзғолони” пьесаси асосида атоқли режиссер Баҳодир Йўлдошев томонидан саҳналаширилган спектаклда Фармонбиби образини гавдалантириди. Режиссер бош қаҳрамон роли ижрочисини танлашда янглишмаган эди. Ижрода актриса ҳақиқий ўзбек аёлининг ҳаётий ақидаларини миллий қадриятларга

шу қадар маҳорат билан уйғулаштирганки, ҳеч бир томошабин унинг қаттиққўллигидан, ҳатто бир мунча қўрслигидан озор чекмайди. Аксинча, унга меҳри ортгандан ортиб боради.

Кинорежиссер Мэлис Абзалов ҳам Зайнаб Садриева учун навбатдаги муваффақиятни, томошабинга эса навбатдаги завқни тақдим эта олди. 1982 йилда суратга олинган “Суюнчи” кинокартинасида ўзбекона қадриятларнинг соғ ва самимий чизгилари яққол намоён бўлди. Ушбу фильм давомида томошабин Анзират кампирнинг ёнидан бир зум жилмайди, унинг ташвишларига, қувончларига шерик бўлади.

Дилбар Исмоилова онасини шундай хотирлайди:

— *Онам қалби меҳр-муҳаббатга лиммо-лим бувижон эдилар. Улар нафақат ўз набираларининг, балки бутун ўзбекларнинг бувижониси бўлганлар, десам адашмайман. Онам ҳалқа яқин эди, мухлислар билан эринмай, оғринмай сүҳбатлашарди. Камтар, камсуқум, аммо шу билан бирга ғурурли аёл эди. Онамни таниган-бўлганлар ҳамиша яхии хотиралар билан, “Зайнаб опа ҳеч кимга ўҳшамасдилар, унақаси ўзи битта эди”, деб эслашади.*

Саҳнаю экранда кўплаб турфа образларни гавдалантирган бўлсада, барибир кўз олдимизда мудом адолатли, оқила... йўқ, қайнона эмас, Она, ўзбек Онаси сиймосида гавдаланадиган Ўзбекистон ҳалқ артисти, Давлат мукофоти сохибаси Зайнаб Садриева 1991 йили Тошкентда вафот этган.

Севдо НИЁЗОВА



ЭДИТ ПИАФ: ҚАҚНУСГА АЙЛАНГАН “ЧУМЧУҚЧА”

Эдит Пиаф ҳакида сўз юритилганда, баъзан “хиёбонда туғилган чакалоқ...” деган сўзлар қулоққа чалинади. Йиллар ўтиб, хонанданинг “Чумчукчага ўхшаб дунёга келдим, чумчукчага ўхшаб яшайман, чумчук бўлиб ўйқликка кетгум...”, дея хотиниш қилгани “оловга мой пуркагандай” бўларди. Онаси – омадсиз актриса Анита Майяр (Лина Марса тахаллуси остида ижод қилган)дан фарқли ўлароқ, Эдит асрларга татигулик шуҳратга эришди. Унинг кўшиқлари бугун ҳам санъатнинг юқори поғоналарини эгаллаб келаётir.

Бироқ сокин ва фаровон умр, аёллик баҳти ҳакида гап кетгандан, ҳаёт сахнасининг бу каби “пардалари” унга гўёки бегона. Эдит Пиаф дунёга келганда (1915 йилнинг 19 декабри) отаси – Париж кўчаларида томоша кўрсатиб кун кўрадиган оддий масҳараబоз Луи Гассион кўнгиллилар қаторида Биринчи жаҳон урушига йўл олиб бўлганди. Чакалоқни эплай олмаган Анита эса гўдакни онасига ташлаб кетади. Доим ўз юмушлари билан банд шафқатсиз буви невараси халақит бермаслиги учун унга сут ўрнига вино бериб,

ЖАҲОН АДАБИЁТИ

ухлатиб кўйишдан нарига ўтмасди. Урушдан қайтган оила бошлиғи болосининг аҳволи, хотинининг тараллабедод юрганидан дарғазаб бўлиб, қизалоқни ўзи билан онасиникига, яъни Нормандияга олиб кетади.

Кунлардан бир кун уч ёшар Эдитнинг кўзлари ожиз эканини сезган бувиси Гассион бир қанча аёллар ҳамроҳлигидан невараси ҳаққига дуо қилиш учун Францияга, Лизъедаги Авлиё Тереза черковига боради. Қизалоқ олти ёшга тўлганда, мўъжиза юз беради – унинг кўзлари очилади! Машхур француз шоири Жан Кокто Пиаф билан боғлиқ хотираларида “Сўқир кўзларнинг очилиши” деган ибора қўллашининг сабаби шунда.

Исловатхона бекаси бўлган бувижониси унга ниҳоятда меҳрибон ва ғамхўр бўлса-да, қизалоқнинг бошига ёғилган мусибатлар бу билан якун топмайди. Аксинча, синфдошлари мактабга қатнай бошлаган Эдитни ахлоқи бузук аёллар билан бир уйда яшагани учун ажратиб кўйишар, камига устидан кулиб, ҳақоратлашарди ҳам. Алалоқибат, таҳқирлардан кўнгли ўксиган қизалоқ мактабга қатнамай қўяди. Шундан сўнг масҳараబоз ота уни ўзи билан Парижга олиб кетади. Энди қиз кўчаларда қўшиқ айтиб кун кўришга мажбур бўлади.

Вақт ўтади... Булутлар ортидан қуёш кўрингандек бўлади. Эдит “Жуан-ле-Пен” кабаресига ишга киради. 1932 йили Луи Дюпон исмли ўзига тўқ дўкондор билан танишади ва бир йилдан сўнг, ўн етти ёшида фарзанди Марселни дунёга келтиради. Қаллигининг ижодга шўнғиб кетганини кўрган Луи уни оиласига вақт ажратмаётганликда айблайди. Мустақил, эркин ҳаётга ўрганган Эдит танбеҳу чекловларга чидай олмай, қизалоғини олиб кочиб кетади.

Қизини ёлғиз тарбиялаётган она кунларнинг бирида одатдаги-дек ишдан қайтгач, уйда хеч ким

йўқлигини кўради. “Болани олиб кетсан, қайтиб келади, яна мен билин яшайди, қабилидаги пуч хаёлларга берилган эрим қанчалик адашганини билганида, жуда кеч бўлганди...”, – деб ёзади Эдит ўзининг хотиралар китобида. Уша вактда Европада “испанка”¹ касали тарқалган эди. Марсель ушбу касалликка чалиниб, шифохонага тушади. Қизини кўришга борган Эдит ҳам бу касалликни ўзига юқтиради. Она-ку тузалади, аммо гўдак касалликни енга олмай, ҳаётдан қўз юмади. Қалби ларзага келган Эдит умрининг охиригача на эрини кечирди, на фарзандлик бўлди.

Тақдир синовларига дуч келавериб, кулганда ҳам кўзидан мунг кетмайдиган жуссаси кичик, нозиккина Эдит яна оёқка туришга харакат қиласди. Йигирма ёшида “Жернис” кабареси хўжайини Луи Лепле билан танишиади. Айнан Лепле хонандага “Пиаф” (“чумчуқча”) тахаллуси остида ижод қилишни тавсия этади. Кўчаларни ялангоёқ кезиб, “Чумчуқчага ўхшаб дунёга келдим...” дея хиргойи қилиб юрадиган қизча қўшиқчилик санъатининг барча сир-асорларини айнан Лепледан ўрганди.

1936 йилнинг 17 февралида эндиғина танила бошлаган Эдит “Медрано” циркининг катта аренасида Морис Шевальде, Мистингетт, Мари Дюба каби афсоный хонандалар қаторида қўшиқ куйлаб, машҳурлик шоҳсупасига қадам босади. Унинг қўшиқлари радио тўлқинларида янграй бошлайди, шинавандаларнинг “сехрли овоз соҳибаси” ҳақида батафсил маълумотга эга бўлишдек иштиёқи кун сайин ортиб боради.

Ўзини эндиғина баҳтли хис эта бошлаган хонандани тақдирнинг яна бир зарбаси кутиб турарди – Луи Лепле бошига теккан ўқдан

халок бўлади. Энг ёмони, унинг ўлимидаги гумон қилинувчиларнинг рўйхатида Пиафнинг ҳам номи бор эди. Чунки марҳум васиятномасида “Чумчуқча” учун мўмайгина даромад ёзид қолдирган эди-да! Матбуотларда “Пиаф Лепленинг ўлимидаги айбдор бўлиши мумкин...” қабилидаги мақолалар пайдо бўлгач, хонанданинг атрофида гилар “қотилни жазолаймиз”, дея очиқдан-очик тажовуз қила бошлиайдилар...

Эдит ҳаёт дея аталмиш чекиззлик осмонига янги парвозини шоир Раймон Ассо билан танишганидан сўнггина амалга ошириди. “Буюк Эдит Пиаф” бўлиб танилишида айнан шу инсоннинг хиссаси бекиёс эканини хонанданинг ўзи ҳам кўп бор эътироф этган.

Дарҳақиқат, Раймон Ассо қўшиқчини шансон қироличасига айлантириш учун унинг кайфияти, қарашлари, ҳаёт тарзидан келиб чиқиб, фақатгина Эдитга хос ва мос бўлган “Пиаф услуби”ни яратди. Янги-янги қўшиқлар басталади. “Париж – Ўрта ер денгизи”, “Пигаль қўчасида яшарди...”, “Кичкина Мари”, “Иблис менинг ёнимда” шулар жумласидандир. Энг асосийси, айнан Раймон Эдитга Париждаги энг машхур саҳналар, жумладан “ABC” мюзик-холлида қўшиқ куйлаш имкониятини яратиб берди. Шунда журналистлар “Куни кеча Франциянинг “ABC” саҳнасида янги ўлдуз порлади!”, – дея бонг урдилар. Жозибаси, ноёб овози, гўзал қўриниши, драматик қобилияти, меҳнатсеварлиги ва талабчанлиги унинг омад шоҳсупаларининг юқори поғонасига қўтарилишида асосий омил бўлди. 1940 йилга келиб, Эдит театр ва киноларда ҳам суратга туша бошлади.

Санъат осмонида тобора порлаётган Эдит Пиафнинг ёлғизликдан чексиз азият чекаётганини ким ҳам

¹ Ўчоги Испаниядан топилган юкумли грипп.

биларди ўшандада... “Оломон сени ҳар томондан қуришаб олади. Қалбларни меҳрга лиммо-лим тўлдиради. Кейин... саҳна чироқлари секин-аста сўнади... Узоқлашаётган товушларни эшиштасан. Ҳаяжон завқи бироз сусайгандек туюлса-да, кайфиятиңг барибир чоғ. Кўчага чиқсан... Қоронгу, ёнингда ҳеч ким йўқ. Ана ўшандада ич-ичингдан нимадир зил кетганини ҳис этасан... Сен... Ёлгизсан!”.

Эдит қалби доим инсонларга яхшилик қилиш истагида ёнарди. Шунинг учун бўлса керак, Иккинчи жаҳон уруши йилларида ҳам хонанда Германиядаги француз маҳбуслари учун намойиш этилган концерт дастурларида фаол қатнашар, дастхат кўйиш баҳонасида асиirlарга қочиш учун қурол-яроқ, бошқа зарур нарсаларни бериш ҳаракатида бўларди. Қолаверса, айрим қочоқлар билан “эсдалика” суратга тушиб, Парижда улар учун янги ҳужжат тайёрлашда ҳам кўмаклашарди. Бу ҳужжатлар билан маҳбусларни она ватанига қайтариб олиш осонроқ кечарди.

Санъатда юксак мэрраларни забт этган Пиаф ўзидан қатор издош-шогирдлар қолдирди. Францияликлар, ҳатто Англияning бўлажак қироличаси, казо-казолар, зодагон хонимлар, хуллас, барчабарча унинг қўшиқларига, ширали овозига мафтун эди. 1950 йили Эдит Пиаф “Плейель” саройида ўзининг ilk яккахон концерт дастурини намойиш этди. Мухлислар олқиши-ю эътиборидан сармасст хонанданинг ҳаётига баҳорий илиқлиқ киргандай эди. Шоир ва хонанда Жак Пильсга турмушга чиқиб, оиласвий турмуши изга тушгандек бўлди. Аммо 1952 йили бир эмас, икки маротаба автоҳалокатга учраб, қаттиқ тан жароҳати олди. Азобли дардга чидай олмай, кучли оғриқсизлантирувчи воситалар қабул қила бошлади. Натижада “оғу

кули”га айланганини ўзи ҳам сезмай қолди. Бир умр курашиб яшашга ўрганган аёл бу кўргиликларга ҳам тақдирнинг навбатдаги синови дея қараб, яна оёқка туришга ҳаракат килди. 1954 йилда “Менга Версаль ҳақида айтиб беришса...” тарихий фильмиде суратга тушди. 1958 йилда Франциянинг энг нуфузли сахналаридан бири – “Олимпия”да навбатдаги концерт дастурини намойиш этишдек бахта мушарраф бўлди. Америка, Франция бўйлаб 11 ойлик концерт турнесини уюштириди.

Адоқсиз сафарлардан силласи қуриган Эдитни яна бир кўнгилсизлик кутиб турарди: у жигар саратонига чалинган экан! Бу хабар 46 ёшли хонандани батамом эсанкиратиб кўяди. Шунга қарамай, “Чумчукча” “Йўқ, мен ҳеч нимадан афсусланмайман”, “Оломон”, “Милорд”, “Эшитяпсанми?”, “Севиши хукуки” каби қўшиқларини шу қадар кучли ҳаяжон ва дард билан куйлайдики, тингловчилар сехрланиб қолгандек бўлишарди. 1963 йил 18 марта берилган концертда мухлислар уни нақ беш дақиқа тик турган ҳолатда гулдурос қарсаклар билан олқишлийдилар. Гўёки ҳамма бу видолашув концерти эканлигини билгандек... Ўша йилнинг 10 октябрь санасида Эдит Пиаф ҳаётдан кўз юмади. 40 мингдан зиёд одам уни сўнгти манзилга кузатиш учун Париж кўчаларига тўпланади. Машхур киноактриса Марлин Дитрих таъбири билан айтганда, “Эдит Пиаф – чумчукчадан афсонавий какнусга¹ айланган аёл” бўлиб бу дунёни тарқ этади.

Дарвое, Париж майдонларидан бирига Эдит Пиаф номи берилган бўлиб, у ерга машхур хонанданинг хайкали ҳам ўрнатилган.

**Садоқат АСЛАНОВА
тайёрлади**

¹ Қакнус – ўлаётганида ёниб, ўзининг кулидан қайта туғиладиган афсонавий күш.



ҲАЙНРИХ БЁЛЛЬ – НЕМИС ХАЛҚИНИНГ АДАИЙ ИФТИХОРИ

“Келажакда бирор кимса мендан немис халқида чинакам таъсир куучи ва ҳаққонийликка тааллуқли қандай китоблар борлигига оид мисол келтиришишни сўраса, мен албатта Бёллни кўрсатаман” (Карл Корн, FAZ, № 79, 1953 йил 4 апрель сони).

Ҳайнрих Теодор Бёлль (1917 йил 21 декабрда Германиянинг Кёльн шаҳрида таваллуд топган, 1985 йил 16 июлда Кройцау-Лангенбройхда вафот этган) немис тилида ижод қилган ёзувчи ва таржимон бўлиб, Германиянинг урушдан сўнгги йиллардаги энг машҳур адиларидан бири хисобланади. 1972 йилда у адабиёт йўналиши бўйича Нобель мукофотига сазовор бўлган.

Ёзувчининг отаси Виктор Бёлль – дурадгор, онаси Мария хоним ўз азму қарорида қатъий турадиган аёллар тоифасидан эди. Ҳайнрих оиласа саккизинчি фарзанд (учинчи ўғил) бўлиб, Мария хоним Викторга иккинчи рафиқа бўлиб турмушга чиққанди. Бёлларнинг оиласи католик мазҳабига эътиқод қиласарди.

Бёлль 1924-1928 йилларда Редертал католик халқ мактабида ўқиб, кейинчалик Кайзер-Вильхелмномидаги давлат гуманистик гимназиясида таҳсил олади. Уни тамомлагач, 1937 йилда Боннаги “Мат Лемперц” китоб дўқонида савдо ишини ўргана бошлайди. Бу вақтга келиб, у ўзининг илк ёзувчилик машқларини бошлаб қўйган эди. 1939 йилда Кёльн университетида филология соҳасида таҳсил олади ва ўзининг илк “Черков ёнида” романини ёзib тугатади. Ёз фасли охирларида ҳарбий хизматга чакирилади. 1945 йилнинг апрель ойида Америка ҳарбийлари томонидан асирга олиниб, ярим йилдан сўнг озодликка чиқади. 1942 йил Ҳайнрих Аннемари Чех исмли қиз билан турмуш қуради. Уларнинг тўнгич ўғли Кристоф 1945 йилда туғилиб, шу йилнинг ўзида нобуд бўлди. Уларнинг яна Раймунд, Рене ва Винсент исмли ўғиллари бўлган.

Урушдан сўнг Бёлль бир пайтнинг ўзида тириклик ташвишида турли жойларда ишлаб юради, университетга қайта қабул қилинади ва бу сафар озиқ-овқат карточкасига эга бўлиш учунгина ўқииди. Бу вақтда оиласини асосан унинг рафиқаси ўқитувчилик орқасидан келадиган даромади сабаб тебратиб турган. 1946 йилда адаб уруш пайтида ёзган иккинчи романи “Севгисиз тақдир”ни ёзib тугатади ва асарни маҳсус танловда қатнашиш учун юборади. Бу орада Бёллнинг илк хикоялари журналларда босилиб чиқади. Унинг бу хикояларини ўша пайтдаги “урушдан сўнгги адабиёт” ва “уруш, таназзул, ватангча қайтиш ҳақидаги адабиёт” каби оқимларга оид дейиш мумкин. Уларда урушдан сўнгги Германия хаёти, уруш сабоқлари ва келажакдаги ижтимоий тараққиёт муаммолари марказий ўрин эгаллайди. Унинг

энг ёркин ҳикоялари 1950 йилда нашр қилинган “Сайёх, Спа... га келмоқдамисан?” тўпламидан ўрин олган бўлиб, бу тўплам Бёллни бутун мамлакатга иқтидорли ҳикоянавис сифатида танитди.

Бу даврдаги асарларга унинг қадрдан дўсти, ёзувчи ва сценарийнавис Эрнст-Адольф Кунц (асли исм-шарифи Филипп Вибе) билан ёзишган мактублари манба бўлиб хизмат қилди, улар Францияда асирилик чоғида танишган эдилар.

1951 йил май ойида “47-лар гурӯҳи” ташкилотига аъзо бўлиши Ҳайнрих Бёлль учун катта ютуқ бўлди. Гарчи Бёлль бу пайтга келиб бир неча асарларини нашр қилдириб ултурган бўлсада, улар ҳали ҳалқаро даражада довруқ қозонмаганди. “47-лар гурӯҳи”нинг Бад Дюркхаймдаги еттинчи анжуманига у Альфред Андерш таклифига кўра чакирилади. Бёлль анжуманда ўзининг “Қора қўйлар” сатирасини ўқиб эшигтиради ва шу сатираси учуноқ “47-лар гурӯҳи” мукофотини қўлга киритиб, 1000 марка микдоридаги пул ютуғини олади. Қолаверса, “Kiepenheuer&Witsch” нашриёти билан муаллифлик шартномаси тузишга эришади. Бундан кейинги йиллар Ҳайнрих Бёлль ҳаётида энг сермаҳсул ижод босқичи бўлди. Далил сифатида унинг қаламига мансуб қуйидаги асарларни келтириш мумкин: “Адам, қаерда эдинг?” (1951), “Бир сўз ҳам демади” (1953), “Қўриқчисиз уй” (1954), “Ирландия кундалиги” (1957), “Доктор Муркенинг хотиржам сукути ва бошқа сатиralар” (1958), “Тўққиз яrimдаги бильярд” (1959), “Бир масҳарабоз қарашлари” (1963), “Хизмат сафарининг тугаши” (1966).

Университет таҳсилидан сўнг Ҳайнрих Бёлль бир қанча жамоатчилик ва давлат мансабларида ҳам ўзини синаб кўрди, юқори поғоналарга кўтарилди. Аденауэр

даврида унга рақобатчи сифатида консерватив кучлар томонидан канцлерлик лавозимига номзод қилиб қўрсатилган Бёлль бир муддат ўтиб, Германиянинг ПЭН-клуби президентлигига тайинланди ва 1974 йилга қадар у шу лавозимда хизмат қилди.

“Хоним билан биргаликдаги сурат” романни чоп этилганидан бир йил кейин, (яъни Нобель мукофоти билан тақдирланган 1972 йилда) у бир ички сиёсий можарога аралашиб, “Шпигель” журнали учун ёзган “Ульрике шафқат тилайдими ёки кишансиз эскорт?” номли эссесида қизил армия террорчиси Ульрике Майнхоф шахси ва қилмишларини қаламга олиб, “Шпрингер” рўзномасини қаттиқ танқид қиласди.

1974 йилда Бёллнинг бугунга қадар энг машҳур асари ҳисобланувчи “Катарина Блумнинг номуси” асари дунёга келди, бу эса “Шпрингер” рўзномаси билан икки ўртадаги янги-янги баҳсларга сабаб бўлди. Қисса ўттиздан ортиқ тилларга таржи-ма қилиниб, шу асосда фильм ҳам ишланди, уч йил ичida Германиянинг ўзида қайта-қайта чоп қилиниб, 6 миллион нусхада ўқувчилар қўлига етиб борди. Асарни мунаққидлар ҳам, хусусан, кейинчалик ГФР президенти лавозимини эгаллаган Карл Карстен ҳам “террористик зўравонликни оқлаш” деб баҳолади.

Кейинги йилларда Бёлль кўпроқ ўз ватани, Польша, собиқ Иттифоқ мамлакатлари ўртасидаги сиёсий муаммолар билан шуғулланиб, танқидий мунозараларда қатнашди. Баъзи-баъзида собиқ Иттифоққа муҳолиф бўлган кишилар ҳам унинг уйида меҳмон бўлганлиги сир эмас. Қолаверса, шу йиллари у Жанубий Африкадаги ва бошқа мамлакатлардаги кўплаб сиёсий-этник ва миллий можароларга ҳам муносабат билдириб, мутасадди партиялар би-

лан мулоқотга киришди. Масалан, Боливия аёллар делегацияси билан мамлакат ичидағи муаммоларни ечишда иштирок этди.

Хайнрих Бёлль кўп миқдорда тамаки истеъмол қилгани сабабли Эквадор мамлакатига сафар чоғида касалланиб қолади, унинг оёғида қон-томирлар билан боғлиқ касаллик пайдо бўлди. Оқибатда у ўша ерда ва кейинчалик Германияда жарроҳлик столига ётиб даволаниб чиқди.

У католиклар черкови билан ҳам мунозараларга киришиб, кейинчалик ҳатто черковдан ҳам юз ўтиради. Бёлль НАТОнинг куролланиш пойгасига қарши йўналган тинчлик йўлидаги оммавий харакатларни ҳам қўллаб-кувватлади, 1983 йилда Мутланген ҳарбий ракета базасини қамал қилишда қатнашади.

Унинг сўнгги асари бўлмиш “Дарё сохилидаги аёллар” романи 1985 йилда Бонн шаҳрида нашр килинади. Бугунги кунда бу роман Вольфганг Коэппеннинг “Иссиқхона” асари билан бирга ГФР пойтахтининг 1949-1989 йиллардаги ҳаётини ҳақконий тасвиrlовчи адабий ёдгорлик ҳисобланади.

Адабнинг силласини қуригтан касаллик изсиз кетмади, аксинча, ҳаётига зомин бўлади. 1985 йиль июль ойи бошларида Бёлль Кёльн шаҳридаги касалхоналардан бирида навбатдаги жарроҳлик муолажасига ётқизилади. Ушбу муолажадан сўнг у Эйфель тоглари этағида жойлашган уйига қайтади. У шу ерда 16 июль тонгида дунёдан кўз юмди. Вафотидан уч кун ўтгач, унинг жасади Кёльн яқинидаги Мертен туманида, минглаб халойик куршовида, қадрдан дўсти бўлган католик руҳоний бошчилигига, диний урф-одатларга кўра дафн этилди. Барibir, Бёлль ўлимни олдидан яна черков анъаналарига эътиқод қила бошлаганлиги ҳақидаги миш-мишлар асоссиз эди. Дафн маросимида адабнинг кўплаб

ҳамкаслари ва сиёsatчилар ҳозир бўлишди. Ўша пайтдаги Германия Федератив Республикаси президенти Рихард фон Вайцзекер ҳам мотам маросимида иштирок этди, бу Бёлль шахсига бўлган юксак хурматнинг рамзи бўлди.

Хайнрих Бёллдан қолган адабий-маънавий мерос ҳамон китобсеварлар учун, бутун ҳалқ учун бадиият ҳазинаси бўлиб хизмат қилиб келмоқда.

Бугунги кунга келиб, буюк ёзувчининг номи билан аталувчи кўплаб муассасалар фаолият юритмоқда. “Хайнрих Бёлль фонд” ва “Хайнрих Бёлль архиви” адаб ҳаёти ва ижодига бағишлиланган ҳужжатлар ва маълумотлар марказлари ҳисобланади. Германиядаги кўплаб мактабларга Хайнрих Бёлль номи берилган. 1985 йилда Хайнрих Бёлль номидаги мукофот таъсис қилиниб, муносиб шахслар ҳар йили немис адабиёти соҳасидаги юксак хизматлари учун ана шу мукофот билан тақдирланади. 1987 йилда таъсис этилган Хайнрих Бёлль номидаги жамғарма илм-фан ва таълим соҳаларидаги лойиҳаларни маблағ билан қўллаб-кувватлашга хизмат қилмоқда.

Хайнрих Бёлль асарларини ўқир эканмиз, сатрдан сатрга ўтган сари қаҳрамонлар руҳиятига кириб борамиз, ёзувчи сўзларни шундай маҳорат ва топқирлик билан танлаб, жумлаларни шу қадар равон ва ёркин туза билганки, воқеа иштирокчиларининг дилидан ўтган ҳар бир туйғу ва фикр, танаси туйған оғриқ ўзимизга кўчаётганини сезиб турамиз. Сўзлардан маҳорат билан матн тузиб, энг долзарб, ўлмас мавзуларни, қадриятлар ва муаммоларни шу сўзлар ичига жо қила билгани, жамоатчилик дикқатини айни муаммоларга торта билгани учун адигба беихтиёр тассаннолар айтамиз.

Давронбек МАМАРАСУЛОВ



«ОЛАМ ДАРДИ ЧЎКТИРГАН ОДАМ...» (ёхуд Асқад Мухтор ҳақида сўз)

Беназир инсон ва адаб Асқад Мухтор таваллуди боис қачонки сўз айтилса, анъана бўйича, унинг таржимаи ҳолига обдон тўхталиб, 1920 йил ниҳояси, аниқроғи, 23 декабрда Фарғона шаҳрида туғилгани, эрта етим қолиб, боловлалар уйида тарбиялангани, Ўрта Осиё Давлат университетида таҳсил олиб, сўнг Андижон Педагогика институтида муаллимлик қилгани, турли даврларда “Шарқ юлдузи”, “Гулистон” журналлари, “Ўзбекистон маданияти” (ҳозирги “Ўзбекистон адабиёти ва санъати”) газетасини бошқаргани ҳақидаги тафсилотларга берилмай, балки ўта субъектив туюлса-да, фақат ўз таассуротларимни баён қилишни маъқул кўраман.

Мен – бу зоти шарифни адабий саводим чикқан, яъни ўзимча яхши-ёмон китобни фарқлаб ўқидиган пайтларимдан бери таниган, турли ижодий йиғин ва издиҳомларда кўрган ҳамда тақдир инояти билан Асқад акани хаста ҳолатларида бир-икки йўқлаб, мўъжаз сұхбатларидан баҳраманд бўлган бир кичик замондош-

лари ўлароқ уч-тўрт сўз айтишга ўзимда журъат сезаман. Сабаб, устоз айтмоқчи, “улуғлардан “афоризмнамо” иқтибослар излаб, “дидактик консерватизм”га берилмасдан, “оригинал тафаккур” илинжида оддий ҳақиқатни ўзимча такрорламоқ истагидандир бу балки.

Мана ўша кимдир қачонлардир айтган ва тушунчаларимизга сингиб кетган оддий ҳақиқат: “Вақт – олий ҳакам”. Дарҳақиқат, шундай! Бу ҳикматни мақсаддан келиб чиқиб қуидагича талқин қилиш мумкин: Вақт гўё бир элақ, неча минг йиллик тарихлар, неча-неча ўтмиш, кечмиш воқеалар, инсонлар, ҳукмдору зурафо, олиму фузало, шоири адиблардан саноқлиларигина умумбашарият ёки муайян бир миллат тарихи сахнасида туриб қолади, даврлар ўтган сари тафаккур элақларида эланавериб, саноқдаги яккаш ҳодисалар, миллат Шахслари қаторидан жой олади. Илм шуларнинг шарофатидан ўша давр, ўша муҳит ва уларнинг атрофидагиларни ўрганади, аниқлайди, аён этади – тарихлар битади. Бинобарин, бу айнан ўша элақланган яккаш ҳодиса ёки яккаш Шахсга тааллуклилик ва дахлдорликдан бўлади. Асли барча тадбирлардан “ғараз” ўша ҳодиса ёки Шахснинг ўзи.

Ҳазрат Алишер Навоийни ўрганарканмиз, унинг муҳитини, устозу шогирдлари, воқелик, кўйингчи, асарларида тилга олинган қарийб беш юзга яқин “ахли нафоис”ни аниқлаймиз, қашф этамиз, илмий истифодага йўллаймиз. Аммо... аммо барчасидан бўйчанроқ, барчасидан маҳобатлироқ, барчасидан теранроқ, зўрроқ бўлиб ҳазрат Навоий сиймоси ажралаверади, яккаланаверади. Шу таҳлит бизга аён минг йиллик ўзбек адабиёти тарихидан ўн-ўн беш “улуғ” яккаланниб, энг мўъжаз, энг тароватли ва энг ардоқли адабий гулдаста жам

бўлади. Сўнгра – саноқлар ҳам шулар, миллат ғурурию бойлиги, шаънию шарафи, ибрати, дастуру дарслиги ва ҳоказо.

Вақти-соати бугун етгандир. Ҳар қалай XXI асрнинг биринчи ўн йиллигини ҳам қаритдик. Агар XX юз йиллик ўзбек адабиётидан гулдаста сараланса, миллат адабиёти шарафи бўлган Шахслар номи белгиланса, адабий авлодлар мақомида янги давр адабиёт тарихидан жой олган сиймолардан нечалари ё қайсилари XXI юз йилликдаги бадиият, бадиий тафаккур гулшанида муқим жой олади, истиқбол манзилларига етиб боради дея ўз-ўзимизни саволга тутсак, беадаблик бўлмас. Аксинча, ўша кўпчилик хаёлидаги оддий ҳақиқатни юзага чиқаришга бир уриниш бўлар, холос. Албатта, бу уринишлар аввало ва асосан бокий дунёга риҳлат этган адабий авлодлар хусусида бўлмоғи тайин. Чунки ҳеч кас тириклар ичра қозилик қилиб, ғавғога бош сукмоққа журъат қилолмас.

Агарки ўша ўтган аср адабий авлодларидан дастлабкиси миллий бадииятимиз осмонида Абдулла Қодирий ва Чўлпон, Ҳамза ва Фитрат юлдузларини ҳануз порлатиб турган бўлса, кейинги авлоддан ОйбегуFaфурҒуломни, Қаҳҳору Олимжон, Миртемири Шайхзоданинг само фонуллари ёрқин шуъла таратмокда бардамомдир.

Икки сана аввал Асқад Мухтор тенгдоши, авлоддошларидан Сайд Аҳмад аканинг 90 йиллигини қувноқ хотиралар завқи-ла нишонлаган бўлсак, ундан яна икки сана аввал Шуҳрат домланинг маънавий жасорати ва ҳаётдаги, ижоддаги меҳр-оқибати, садоқати борасида дил сўзлари айтдик. Мувоғиқ ҳолда бу авлод давра дошларидан Туроб Тўла, Ҳамид Гулом, Мирмуҳсин, Рамз Бобо-

жон, Шукрулло номлари, асарлари ҳам турли муносабат билан ёдга олиниб турибди.

Бироқ бу авлод түғини тутган ҳам, авлодларга элтадиган ҳам Асқад Мухтор эканини бу кун зарофат ва фасоҳат аҳли юрак-юрагидан ҳис килиб, англаб турибди.

Асқад домла “Тундаликлар”ида “Бизнинг авлодда замондан қочганлар кутулди” деб ёзган эдилар. Аммо замонадан қоча олган бирор авлоддошининг номини айттолмагандилар. Чунки бундай ижодкорнинг ўзи йўқ эди бу авлодда. Шуни теран англабми, мутафаккир зот ўз авлодининг аламу азоби ҳақида яна шундай умумлашма берадилар: “Сизиф афсонасини биласиз, “абадий харсанг”ни ҳам биласиз. Менинг авлодим ўша харсангни 70 йил давомида “чўкки”га юмалатди.

Ичимда нола бор. Гоҳо шу нолани эшитиб, Максим Горькийнинг гапи эсимга тушади. Ундан “Ахволингиз қалай?” деб сўраганларида “Максимально горъко!” деб жавоб берган экан”.

Хаёлимдан Лев Толстойнинг “Тазарру” (“Исповедь”) сидан тортиб, шу йўсиндаги дардли “нола”лар – то Озод Шарафиддинов домланинг “Эътиқодимни нега ўзгартирдим?”игача бир-бир ўтади. Уларда бутун бир ижтимоий-фалсафий трактат даражасида ёзилган истиғфорлар Асқад акада саккиз қаторда жо бўлибди. Йўқ, уларнинг даражоти, киммати, аҳамияти, ўрнини қиёслаш фикридан йироқман, мутлақо. Фақат, самимиятда, моҳият инкишофида, юрак аламлари, қалб қийнокларида, айнан нолаларида муштарақлик туюман. Лекин Асқад домла улардан бироз фарқланиб, фақат ўз кечмишлари, яккаш ўз қалб нолаларини ифода этибгина қолмайди. У бутун авлоди учун айтади, унинг оғир масъулиятини зиммасига олиб айтади.

Ва бунда у ҳақ эди, айтишга эса ҳақли эди. Чунки у ўша етмиш йил виждон билан яшашга ҳаракат қилди, ҳалол яшамоққа интилди ўзини чеклаб, тўғри деб билганини айтмокка уринди. Сабри, бардоши, қуввати етганича бунинг уддасидан чиқа олди! Аммо... лекин... Йўқ, шубҳа-гумонга ўрин йўқ. Гарчи одам-одамга ёв, адаб айтмоқчи “бахтли бўлиш уят” бўлган замонларда не бир гумроҳликлар ўтган эса-да, бунинг учун юрт раҳнамолари, тузуму тизим “ижодкорлари”дан бўлак ҳеч кимсани айситиб бўлмас. Ахир бўғзи булғанмаган бирор кас бормиди ўшандა?! Инчунун, Асқад аканинг виждони, ҳалоллигидан сўз очилса, буни истеҳзо қилиш керак эмас. Бинобарин, бизнида анчайин фикри мойилликка йўйиш керак эмас. Кимсан, шахсан Миртемир домланинг ўзлари Асқад Мухтор ҳалоллигига кафолат:

*Асқад, ҳей, дунёда ҳалоллик бор
бўлсин,
Гуромлик уиоққа зор бўлсин, хор
бўлсин.*

Қизиқ, тавба-тазарруларга одатда “гуноҳ”идан кўра савоб амаллари кўпроқ ҳамиятили, виждонли кишилар қодир бўлади. Гуноҳкорроқларнинг эса бундай юмушлар хаёлига ҳам келмайди. Буқаламунликни касбга айлантириб оладилар, холос.

Асқад Мухторнинг ҳалоллиги бор суратию сийратидан, ёзган ҳар бир шеъри, достони, қиссаю романларидан, лафзи-ўйларидан аён эди. Ўша қизил алвонларга ўралган “Опа-сингил”лардан тортиб “Аму” ё “Чинор” романларигача, “Дарёлар туташган жойда” ва “Қорақалпок қиссаси”дан “Бухоронинг жин кўчалари” қиссаларигача, “Заркадри”, “Самандар” пьесалари-

ри, “99 миниатюра”дан “Сизга айтар сўзим” каби шеърий тўпламларигача, жаҳон адабиётидан таржимаю публицистик маколаларигача бирор асар инсоний ва ижодий ҳалоллиқдан холи эмас. Аксинча, ана шу кўпчилик сафдошларида танқис туйғу Асқад домлада беадоқ. Агар шундай бўлмаса, шоирнинг ҳаёт ақидасига айланган мана бу сатрлари самимият бўлиб қалбларга чўғ ташлай олмасди.

*Яшаш қийин, чунки виждон очиқ
ярадай,
Ноҳақликни дарддек сезиши учун
ярагай.
Ўз деб билдим ўзгаларнинг ғамин,
севинчин,
Ўзим билан муросада яшашим
учун.*

Эътибор қиласайлик, ўзгалар ғамида яшамоқ лирик қаҳрамоннинг ўз қалби, виждени билан муроса қилмоғи учун ҳаётий эҳтиёж...

Бугун бутун дунё, инсоният, инсон худбинлашиб кетаётган замонга нечоғлик зарур фикр. Шу фикрнинг тасдиғи ўлароқ солиҳ шогирд Тоҳир Малик Асқад акани сўнгги бор хаста ҳолида йўқлаб таърифлаган мана бу ибора эса ул жафокаш буюк зотнинг айни аниқ сифатидир:

“Олам дарди чўқтирган одам...”

Мана адабни авлоддошларидан яккалаб, авлоддан авлодга йўллаб, саодатманд этаётган асосий сифат. Бу классик адаб, аллома, мутафаккир, замондош Асқад Мухторнинг ҳалоли...

Хоссатан беназир устознинг Софокл, Шекспир, Шиллер, Пушкин, Лермонтов, Т.Шевченко, М.Горький, Р.Тагор, А.Блок, Ю.О’Нил, В.Маяковский каби жаҳон адабиёти улуғларидан қилган таржималари хусусида сўз айтмоқ машрут эди. Билғеъл, бун-

дай йўл тутмоққа монеълик бор. Сабабу боис яна устознинг “уйку қочган”да айтгандаридир:

“Танқидчи ва адабиётшунослар асосан асар ҳакида гапирадилар. Ёзувчи ҳакида эса...

Ваҳоланки, асар ёзувчидан униб чиқади; фарзандидай унда туғилади, улғаяди, камол топади; у фарзандини авайлайди; ҳимоя қиласи. Асар – ёзувчининг тақдиди; керак бўлганда ёзувчи қурбон бўлишга ҳам тайёр. Унинг бу гайритабиий садоқати, ёзмасдан туролмаслиги, рухиятга, фалсафага, мушоҳадага мойиллиги, шахси, феъли, услуби, қарашлари, дарди, қийналишлари ҳеч кимни қизиктирамайди. Ёзувчи ўз шахси ва ўзгаларнинг шахси билан бириниб кетган – асар унинг субъекти.

У бошқа ишда ҳам ишлаши мумкин (ёзувчи ҳеч қачон бадавлат бўлмаган), аммо унинг моҳияти, эҳтироси – ижод. Қобилияти қанча катта бўлса, шунча катта куч сарф қиласи. У – беихтиёр фидойи; ҳам баҳтиёр, ҳам баҳтсиз – бу унинг иро-дасига боғлиқ эмас.

Бу ҳақда кўп гапириш мумкин, аммо танқидчилар...”

Ёзувчи инсоннинг моҳияти ҳакида Аскад Мухтордан ўтказиб сўз айтиш мушкул. Устознинг гинаю танбеҳларида эса чўнг ҳақиқат бор...

Шуҳрат РИЗАЕВ



КЎП ВА ХЎП ЁЗГАН ОЛИМ

Жорий йилнинг 12 декабрида табаррук 80 ёшни қарши оладиган Наим Каримовнинг инсон сифатида ҳам, олим сифатида ҳам фазилатлари бисёр: таърифлаб сўз топиб айтиш қийин. Бу шунчаки йўлига айтиладиган куруқ мақтov

эмас. Бори шу аслида. Наим ака гўё бировга халал бериб қўйишдан иймангандек секин, паст товушда гапиради, овози жуда майин. Бу ҳам маданиятнинг, зиёлиликнинг бир кўриниши, албатта. Домлани яқиндан танийдиган ёки бир марта сухбатлашган одам борки, у ҳақда факат ва факат яхши гап айтади. Узи билан шахсан таниш бўлмасада, асарларини мутолаа қилган, ҳеч курса биргина мақоласини ўқиган одам у ҳақда ижобий тасавурга эга бўлади, уни яхши кўриб қолади. Адабиётга, сўз санъатига беҳад меҳр қўйган, уни қисмат деб билган, умрини буткул шу соҳага бахшида этган, гўё адабиётдан бошқа дарди ҳам, ташвиши ҳам бўлмаган Наим ака каби фидойи олим ҳакида бошқачароқ ўйлаш мумкинми?! Шуқр, бундай инсонлар ҳали бор орамизда, лекин кам – бармоқ букиб санарави.

Наим аканинг ўзбек адабиётшунослиги равнақи йўлида қилган беминнат хизматлари, яратган ўнлаб

дарслик ва монографиялари, йирик илмий-таҳлилий тадқиқотлари, мътирифий романлари, ранг-баранг мавзулардаги сон-соноқсиз илмий, публицистик мақолалари, эссею таржималари, қўйинг-чи, адабиётнинг бошқа жанрларида битилганд асарлари ҳақида деярли барча – дўйстлари, ҳамкаслари, шогирдлари кўп муротаба ёзган, ёзмоқда. Шунингдек, домланинг ўта самимий, хушмуомала, кўнгли юмшоқ ва ниҳоятда камтарин одам, шогирдсевар чин устоз эканини ҳам ҳамма таъкидлайди. Бу гапларни тақорорлаб ўтиришга ҳожат бўлмаса керак. Шунигина қўшимча қилиш мумкин: адабиёт, санъат, маданият мавзуида ҳеч бир олим Наим ақачалик “кўп ва хўп” ёзмаган, улкан ва салмокдор ижод хирмони уймаган.

Баъзан домланинг ишхонасига бориб қолсангиз, уни доим қизғин ижод устида учратасиз. Ёки хузурида албатта бирор шогирдми (улар орасида домлани кўраман деб азза-базза чет элдан келганлар ҳам бўлади), зиёратга ёхуд бирор илтимос билан келган вилоятлик мухлисми бўлади. Ихчамгина хонанинг ҳамма ёғида: жавону тагкурсиларда китоб, газета ва журнал тахламлари. Иш столи устида ҳам турли қўлёзмалар, суратлар, фотоальбомлар, архив материаллари ўюлиб ётади. Домланинг ўзи компьютерини чиқиллатиб ўтирган бўлади. Домлага тенгқур ёки ҳатто ундан ёшроқ баъзи ижодкор ёки олимлар борки, ҳалихамон қўлда ёзади. Энди компю-

терни ўрганиш улар учун гўё ойга учишдек мушқул кўринади. Аммо бу ерда ёшнинг ҳеч аҳамияти йўқ экан, хоҳиш, ҳафсала бўлса – бас экан! Наим ака бу борада ҳам бошқалардан бир қадам олдинда, замонавий техникани тезда ўзлаштириб олади, компьютер, интернет тармоқларидан бемалол фойдаланади.

Наим ака ўзи меҳр қўйиб, чорак асрдан кўпроқ вақт мобайнида тақдирию ижодини ёниб-қуйиб ўрганаётган, бутун куч-гайратини номини оқлаб юзага чиқаришга бағишилаган ўзбек маърифатпарварлари сингари тараққийпарвар, табиатида шарқона нозиктабликка оврупоча замонавийлик омихталашиб кетган том маънодаги зиёли, маданиятли бир инсон. Адабиёт соҳасида бўладими ёки бошқа соҳадами, ҳар қандай янгиликдан хабардор, матбуотни муңтазам кузатиб боради. Яна денг, ўзи олим қилиб чиқарган шогирдларининг кейинги тақдири билан ҳам доим қизиқади. Уларнинг матбуотда чиқкан кичик бир мақоласи, сухбати ёки таржимаси бўладими, албатта ўқиди, фикр айтади, кўнглини кўтариб қўяди. Ўзи эса ҳамон ўша-ўша – ўн-йигирма йиллар аввалгидек: ташки кўриниши ҳам, шашту шижоати, пухталиги, ҳозиржавоблиги, тиниб-тинчимаслиги, меҳнаткашлиги ҳам. Ишлаб, ўқиб, изланиб, ёзиб чарчамайди. Чарчамасин ҳам!

Шоҳсанам СОПИЕВА

МУҚОВАМИЗДА...

ТАБИАТГА ЧЕКСИЗ МЕХР ИЛА...

Жаҳон санъати тарихида Уйғониш даврининг ўзига хос, такрорланмас ўрни бор. Фан, адабиёт ва санъат одамзоднинг мислсиз ақл-идроқи, чексиз имкониятлари ила гуллаган даврдир бу. Унда инсоннинг орзу-истаклари, ҳис-туйғулари биринчи ўринга қўйилган. Бунинг натижаси ўлароқ, бу даврда юксак инсоний, чин маънода ҳалқчил асарлар яратилган.

Уйғониш даври санъати XV аср охири, XVI аср бошларида Европанинг Италия, Нидерландия, Англия, Франция мамлакатлари қатори Германияга ҳам кириб келади, лекин бу жараён аста-секинлик билан, турли зиддият ва тўсиқларни енгтан ҳолда кечади. Немис санъаткорлари ҳам анъанавий услубларда, ҳам итальян санъатидан илҳомланиб, ажиб уйғунликдаги асарлар яратадилар. Рассомлар ўз асарларида инсоннинг ички дунёси ва кайфиятини чукур ифодалашга, руҳий зиддиятларни очиб кўрсатишга ҳаракат қиласидилар. Уларнинг ижодида инсон гоҳида ширин орзулар оғушида, гоҳида эса исёнкор хаяжонларга тўлиб-тошган ҳолда турли драматик вазиятларда тасвириланди.

XV-XVI аср немис реалистик санъатининг ривожланишида Альбрехт Дюрер, Мартин Шонгаэр, Иоганн Гутенберг, Альбрехт Альтдорфер каби мусаввирларнинг ҳиссаси катта бўлган. Ушбу даврнинг ютуклари, ихтилофлари, ўзига хос таровати ва мураккабликлари айниқса, буюк немис рассоми Альтдорфер асарларида ёрқин ифодасини топган. Мусаввир мумтоз немис санъатининг эътиборга молик хусусиятларига таянса-да, ижодини реалистик йўналишида ривожлантирган.

Тасвирий санъат устаси, рангтасвиричи, чизма тасвиричи ва гравюрачи рассом Альбрехт

Альтдорфер (1489–1538 йиллар) Дунай рассомлик мактабининг асосчиларидан биридир. У Германиянинг Регенсбург шаҳрида таваллуд топган. Бошлангич таълимни отаси – рассом Ульрих Альтдорфердан олган. Ўспиринлик чоғидаёқ Баварияга саёҳатдан таъсиранган рассом бу диёр чиройини асарларида жуда гўзал акс эттиради. Альтдорфер фаолиятининг аввалида Альбрехт Дюрерга тақлид сезилади. Кейинчалик етук рассом сифатида ўз услуби ва йўналишига эга бўлади. Дюрернинг кескин, бир кадар қаҳрли рух ҳукмрон бўлган асарларидан фарқли ўлароқ, А.Альтдорфер ишларидан лирик кайфият, атроф-муҳитга чексиз меҳр уфуриб туради. Айниқса, деталларга бой манзара жанрида ўзини намоён этган ушбу мусаввир гўзал табиатни, унинг бетакор ва эртакнамо кўринишларини сокин оҳангларда тасвиirlайди. Ижодкор Дунай дарёси, Австриянинг Альп тоғлари бўйлаб кўп саёҳат қиласиди. Пурвиқор тоғлар манзараси, куюқ ўрмонларнинг фусункорлиги, шаршара, дарё ва кўуллар чиройини нозик қилқалами орқали динамик кўринишда ифода этади. Айнан шу жиҳатлар унинг Дунай мактаби вакили эканлигидан далолат беради.

ЖАҲОН АДАБИЁТИ
199



ди. Бу ўринда унинг “Кўприкли манзара” ва “Шахар манзараси” асарларини мисол килиб келтириш мумкин. “Александр Македонскийнинг Доро билан жангি” тарихий картинаси Альтдорфер ижодининг энг юксак чўққиси хисобланади. Тарихий ёзма манбаларга асосланган бу асарда юнон ва форс жангчилари тўқнашуви тасвириланади. Рассомнинг “Илоҳий тун”, “Аёл портрети”, “Авлиё Флориан”, “Чўмилаётган Сусанна”, “Гўдак кўтарган Мария” каби қатор асарлари ҳам жаҳон тасвирий санъатининг олтин хазинасидан ўрин олган. Альбрехт Альтдорфернинг Уйғониш даври немис санъати нодир унсурларини ўзида жамлаган асарлари дунёнинг нуфузли маданият масканлари, хусусан Берлин Давлат музейи, Мюнхендаги Қадим Пинакотеа, Лондон Миллий музейида сакланмоқда.

Шахноза ҚОСИМОВА, санъатшунос

ТАҚВИМ



УЛАР ҲАМ ШУ ОЙДА ТУФИЛГАН ЭДИЛАР...

2 ДЕКАБРЬ

1923 йил. Мария Каллас (асл исми шарифи Сесилия Анна Мария Каллогеропулос), америкалик опера қўшиқчиси.

7 ДЕКАБРЬ

1598 йил. Джованни Лоренцо Бернини, италиялик меъмор, ҳайкалтарош, барокко услубининг юртли вакили. Римдаги Авлиё Пётр ибодатхонаси меъмори. Ҳайкалтарошлиқда ҳам самарали ижод қилган. Унинг “Давид”, “Авлиё Тереза жазаваси”, “Аполлон ва Дафна” асарлари машҳурdir. Унинг ижоди XVII аср Италия санъатида муҳим ўрин тутади.

8 ДЕКАБРЬ

1832 йил. Бъёренстерьне Бъёрнсон, норвегиялик шоир, драматург, ёзувчи ва журналист. “Шўх йигит”, “Золим Зигурд”, “Мария Стюарт Шотлан-

дияда”, “Арнлют Геллине” сингари кисса ва драмалар муаллифи. 1903 йилда Швеция академияси томонидан “мусаффо жўшқинлиги ва бетакор соғлиги билан ажralib турувчи юқсак шеърияти ҳамда эпик ва драматик истеъоди учун” адабиёт бўйича Нобель мукофотига лойик деб топилган.

10 ДЕКАБРЬ

1891 йил. Нелли Йозеф Закс, “яхудий ҳалқининг тақдири тадқиқ қилинган юқсак лирик ва драматик асарлари учун” Нобель мукофотига сазовор бўлган олмон адабаси ва шоираси. “Қочиш ва ўзгариш”, “Кейин нима бўлишини ҳеч ким билмайди” тўпламлари машҳур.

11 ДЕКАБРЬ

1911 йил. Нажиб Маҳфуз, машҳур миср ёзувчиси, “Раққоса Родопис”, “Ибтидо ва интиҳо”, “Ёмғир остидаги севгиги”, “Ўгри ва ит”, “Еттинчи осмон” каби 50 дан ортиқ роман ва киссалар, 100дан ошиқ ҳикоялар яратган ижодкор. 1988 йили “башарият учун аҳамиятли бўлган араб ҳикоячилигининг ҳаққонийлиги ва ранг-баранглигини кўрсатиб бергани учун” Нобель мукофоти билан тақдирланади.

12 ДЕКАБРЬ

1799 йил. Карл Брюллов, таниқли рус рассоми, академизм йўналиши вакили. Тарихий ва портрет жанрларида самарали ижод қилган. Унинг “Помпейнинг сўнгги куни”, “Чавандоз аёл”, “Й.П.Самойлова портрети”, “Псковнинг ишғол қилиниши” каби асарлари машҳурdir.

1903 йил. Одзу Ясудзиро, XX асрнинг дунёдаги энг машҳур япон кинорежиссёrlаридан бири. “Токио қиссаси”, “Арслон рақси”, “Ёшлиллари” каби 60 дан зиёд фильмларни суратга олган.

15 ДЕКАБРЬ

Милодий 37 йил. Нерон Клавдий Цезарь Август Германик, қадимги Рим императори, Юлий-Клавдий сулоласи-нинг сўнгти вакили.

16 ДЕКАБРЬ

1866 йил. Василий Кандинский, таникли рус рангтасвир ва графика устаси, абстракт санъатининг йирик вакили, тасвирий санъат назариётчisi. Кандинский ҳуқуқшунослик, мусиқа ва тасвирий санъатга оид билимларни мукаммал эгаллаган серкіrrа инсон. “Сарик-қизил-ҳаворанг”, “Номсиз композиция”, “Пушти рангга ургу”, “Икки отлиқ”, “Рангто-ранг ҳаёт” каби асарлари билан танилган.

18 ДЕКАБРЬ

1921 йил. Юрий Никулин россиялик актёр, цирк артисти. “Операция ЎГ ва Шурикнинг бошқа саргузаштлари”, “Кавказ асираси”, “Бриллиант қўл”, “Қароқчи чоллар”, “12 стул”, “Улар ватан учун жанг қилдилар” сингари фильмлардаги роллари билан кино ихлосмандлари меҳрини қозонган.

1946 йил. Стивен Спилберг, американлик кинорежиссёр. “Ўзга сайёраплик”, “Күёш империяси”, “Юра даври боғи”, “Шиндлер рўйхати”, “Амистад”, “Оддий аскар Райанни қутқариш”, “Қўлингдан келса, мени тут”, “Оламлар жанги”, “Мюнхен: интиқом”, “Жанговар тулпор” каби дурдона фильмларни суратга олган.

22 ДЕКАБРЬ

1937 йил. Эдуард Успенский россиялик атоқли ёзувчи. Болалар учун яратган “Чебурашка ва унинг дўстлари”, “Тимсоҳ Гена ва унинг дўстлари”, “Фёдор амаки, кўппак ва мушук” асарлари билан машҳур.

23 ДЕКАБРЬ

1881 йил. Хуан Рамон Хименес, “Ёз мавсуми”, “Бинафша”, “Ғамгин оҳанглар”, “Бахор балладалари” шеърий китоблари билан дунёга танилган испан шоири. 1956 йилда “испан поэзиясидаги юксак руҳият ва бадиий софликнинг намунаси бўлган лирик шеърияти учун” Нобель мукофотига лойик деб топилган.

24 ДЕКАБРЬ

1798 йил. Адам Мицкевич, ўз ижодини Польша озодлик ҳаракати билан боғлаган шоир, поляк адабий тили асосчиси, жамоат арбоби. “Конрад Валленрод”, “Пан Тадеуш”, “Дзядлар” достонлари билан ном қозонган.

27 ДЕКАБРЬ

1901 йил. Марлен Дитрих, олмон ва америка киноактрисаси, қўшиқчи. “Мухаббат фожиаси”, “Мовий фаришта”, “Марокаш”, “Етти осий” каби ўнлафильмларда суратга тушган.

1948 йил. Жерар Депардье, машҳур фаранг актёри. “Сирано де Бержерак”, “Граф Монте-Кристо”, “Темир никобли киши”, “Оталар”, “Сен гапирма”, “Ваттель”, “Янги Франция” каби фильмлардаги ажойиб роллари билан машҳур.

31 ДЕКАБРЬ

1869 йил. Анри Матисс, машҳур француз рассоми ва ҳайкалтароши, фовизм йўналиши вакили. Матисс хистайтуғу, ўй-хаёлларини шакл ва ранглар жилоси орқали асарларга жо қилган. У XIX аср француз санъатида етакчи рассомлардан бири сифатида эътироф этилган. “Шириналик”, “Мева ва идиш”, “Шароб”, “Ясатилган стол – қизил ранг гармонияси”, “Рақс” каби қатор асарлар муаллифидир.

ТАРИХДА БУ КУН ...

8 декабрь

Ўзбекистон Республикасининг Конституцияси қабул қилинган кун.

1992 йил 8 декабрда ўн иккинчи чакирик Ўзбекистон Республикаси Олий Кенгашининг тўққизинч сессиясида 6 бўлим, 26 боб, 128 моддадан иборат Ўзбекистон Республикаси Конституцияси қабул қилинди. Ушбу сана мамлакатимизда умумхалқ байрами сифатида нишонланади.



Ўзбекистон Республикаси Конституцияси мазмун-моҳиятига кўра, халқчиллиги, инсонпарварлик ва демократик тамойиллар асосида тайёрлангани, инсон хукуклари энг олий кадрият сифатида белгиланиб, миллий кадриятлар уйғун инфода этилгани билан жаҳон миқёсида ўзининг ҳақли эътирофини топган.

Асосий Конунумиз мамлакатимиз мустақиллигининг муҳим хукукий асоси, тинч, осуда, фаровон ҳаётимизнинг мустахкам кафолатидир.

11 декабрь



Халқаро танго куни

Ушбу сана аргентиналик машхур қўшиқчи, киноактёр, “Танго кироли” номи остида танилган Карлос Гардель (1887-1935)нинг туғилган куни шарафига танланган. “Танго” сўзи мазкур раксдан анча аввал пайдо бўлиб, аввалбошда Канара ороллари туб ахолисининг миллий дўмбира садоллари остида ижро этадиган раксига чакирик маъносини англатган.

... Эҳтирослар түғёни, зиддият ва муроса, рашк ва лоқайдлик, нафрат ва, албатта, муҳаббат! Эркак ва аёл ўртасидаги муносабатларнинг барча кирралари, ҳаётнинг ўзи жўш уради бу ракса. Тангода на гап-сўзга, на илтифоту табассумга ўрин йўқ. Унда жуфтининг кўзига тик қаралмайди, ҳатто, енгилгина имо-ишоранинг ўзи етарли. Унда ҳаракатлар ила тана сўзлайди... Буларнинг барчаси тангони дунё ракси даражасига олиб чиқкан.

15 декабрь

Халқаро чой куни.

Ушбу сана ҳар йили чой етишириб чиқарувчи давлатларда Халқаро чой куни сифатида нишонланади. Асосан чой савдоси муаммоларини бартараф этишга қаратилган мазкур байрам Бутунжаҳон жамоатчилик форумининг 2004-2005 йиллари Мумбай ва Порте Аллегреда бўлиб ўтган йиғилишларидан кейин маҳсус қарор билан таъсис этилган. Ушбу кунда жаҳондаги чой етишириш бўйича етакчи давлатлар – Ҳиндистон, Шри-Ланка, Бангладеш, Непал, Хитой, Вьетнам, Индонезия, Кения, Малайзия, Уганда, Танзанияда катта сайллар уюштирилади.

Дарвоже, чойнинг кўплаб халқлар маданиятида нафақат чанкобосди ичимлик, балки миллий анъаналар, меҳмоннавозлик рамзи сифатида қабул қилиниши адабиётда ҳам ўз аксини топган. Хусусан, буюк япон адаби Ясунари Кавабатанинг “Минг қанотли турна” киссасида айнан анъанавий чой маросимлари қаламга олинади.

16 декабрь

1868 йили буюк ёзувчи Лев Николаевич Толстойнинг “Уруши ва тинчлик” роман-эпопеясининг илк нашири дунё юзини кўрди.

Ушбу эпопея рус халқининг Франция императори Наполеон Бонапартга карши кураши воқеликларини (1805-1812 й.й.) ўз ичига олади. Адиб роман устида нақ олти йил ишлайди. Ўзининг ёзишмаларидан маълум бўлишича, Толстой бутун бошли асарни етти


маротаба окка кўчирган экан. Дастрлаб мазкур романдан парчалар “1805” сарлавҳаси (Толстой асарни “Уч фасл”, “Охири бахайр бўлсин” деб ҳам номлаган эди) остида “Русский вестник” журналида эълон қилинади. Қизиги шундаки, ёзувчининг рафиқаси Софья Андреевна эрининг хужжатларини тартибга келтираётib, роман қораламасининг устига “Уруш ва тинчлик” деб ёзиб кўйган экан.

“Уруш ва тинчлик” энг кўп персонаж иштирок этган (романда 550 дан зиёд персонаж бор, улардан 200 га якини тарихий шахслардир) асар сифатида “Гиннес рекордлар китоби”га киритилган.

19 декабрь

1997 йили миллионлаб киномухлислар қалбини ларзага солган “Титаник” фильмни катта экранга чиқди.

Гарчанд “Титаник”да режиссёр Жеймс Кэмерон томонида йўл кўйилган мантиқка зид катор хатолар учраса-да, картина оламшумул шуҳрат қозониб, 11 та йўналиш бўйича Оскар мукофотига лойик кўрилган. “Титаник” бу билан “Бен Гур” (1959 й.) картинаси рекордини такрорлайди. Томошабинни уч соатдан ортикроқ вакт давомида экран қаршисига “михлаб” кўйган бу фильм етти ой давомида суратга олинади. Таасирга олиш ишлари ниҳоялангандан сўнг “Титаник” кемасининг модели темир-терсақка топширилади.



Маълумки, ушбу фильм ўзининг илк сафаридаёқ (1912 йил 14 апрель) улкан айсбергга урилиб, ҳалокатга учраган “Титаник” лайнерига боғлиқ вокеликларга курилган. Қизиги шундаки, кема ҳалокатга учрашидан 14 йил аввал америкалиқ ёзувчи Морган Робертсон “Титаник” фожиасига ниҳоятда мос келувчи “Бесамарлик” романини битган эди. Ёзувчи китоби нашр этилган пайтда эмас, айнан “Титаник”нинг ҳалокатидан сўнггина шуҳрат қозонади. Негаки, ўқувчилар уни башоратчи сифатида қабул қила бошлидилар.

ШУНИНГДЕК, УШБУ ОЙДА ...

✓ 1933 йили Москвада Максим Горький номидаги Адабиёт институту очилган. Аввалбошда Ишчилар кечки адабиёт институту деб номланган бу олий ўкув юртида вақти келиб жаҳонга танилган Евгений Евтушенко, Константин Симонов, Расул Ҳамзатов, Сергей Михалков, Лев Ошанин, Роберт Рождественский, Белла Ахмадулина сингари ёзувчи, шоирлар таҳсил олган.

✓ 1732 йил 7 декабрда Лондонда Қироллик театрининг тантинали очилиш маросими бўлиб ўтган. Кейинчалик “Ковент-Гарден” номини олган мазкур театрга режиссёр Жон Рич асос солган. Ҳозирги кунда театр репертуаридан мумтоз ва замонавий саҳна асарлари ўрин олган.

✓ 1901 йил 10 декабрда Нобель мукофоти илк бор ўз соҳибларига топширилган. Маълумки, мазкур мукофот илтор иммий тадқиқотлар, инқилобий қашфиётлар ёки маданият ва жамият тараққиётига кўшилган улкан ҳисса ҳамда ютуқлар учун тақдим этиладиган энг нуфузли ҳалқаро мукофотлардан ҳисобланади. Бу мукофот беш йўналишда – кимё, физика, тиббүёт, адабиёт соҳаларида кўлга киритилган улкан ютуқлар ва тинчлик ўйлида кўшилган ҳисса учун берилади.

✓ 1909 йил 11 декабрда Нью-Йоркдаги Мэдисон-сквер-гарденда илк ранги кинофильмнинг намойиш этилиши ранги кинематография даврини бошлаб берди.

✓ 1954 йил 19 декабрда Европа Маданият конвенцияси имзоланди. Ушбу конвенцияда Европа Иттифоқига аъзо давлатларнинг таълим, маданият, спорт соҳасидаги мақсад ва вазифалари белгиланган.

✓ 1913 йил 21 декабрда The New York World ҳафтапарсон газетасининг якшанба сони иловасида дунё матбуотида илк кроссворд чол этилди. 32 сўздан иборат ушбу бошқотирмани журналист Артур Уинн тузган эди.

Сайджалол САИДМУРОДОВ тайёрлади.

2012 ЙИЛ “ЖАҲОН АДАБИЁТИ” ЖУРНАЛИДА ЭЪЛОН ҚИЛИНГАН АСАРЛАР МУНДАРИЖАСИ

НАВОИЙ САБОҚЛАРИ

Омон МУХТОР. Алишер Навоий ғазалига мухаммас. №2.

Максуд ШАЙХЗОДА. **Асрлар оша.** №2.

Навоий сабоқлари. Туркум таҳлилий мақолалар, ғазал ва унинг таржималари, шарҳ ва талқинлар. № 6,7,8,9,10,11, 12.

НАСР

Стефан ЦВЕЙГ. (*Австрия*). **Шахмат новелласи.** (*Немис тилидан Д.Мамарасулов тарж.*) № 1.

Отажон ТОФОН. (*Туркменистан*). **Бегона.** (*Туркман тилидан М.Аҳмад ва М.Сафаровлар тарж.*) № 1, 2, 3, 4, 5.

Болеслав ПРУС. (*Польша*). **Фиръави.** Роман. (*Рус тилидан А.Комил тарж.*) № 2, 3, 4, 5.

Марсель АРЛАН. (*Франция*). **Аёл – уйнинг чироги.** Ҳикоя. (*Рус тилидан Д.Алиева тарж.*) № 3.

Анна САКСЕ. (*Латвия*). **Билмас ҳеч ким мендек севишни.** Лирик бадиа. (*Рус тилидан Н.Жўраева тарж.*) № 4.

ЭЛЧИН. (*Озарбайжон*). **Болададаш қиссалари.** (*Озарбайжон тилидан У.Кўчкор тарж.*) № 5.

Генри Райдер ХАГГАРД. (*Англия*). **Клеопатра.** Роман. (*Рус тилидан А.Файзула ва М.Махмудов тарж.*) № 5, 6, 7.

Виктор Астафьев. (*Россия*). **Ғамгин саргузашт.** Роман. (*Рус тилидан Ж.Фозил тарж.*) № 6, 7.

Ясунари КАВАБАТА. (*Япония*). **Ойнинг акси.** Ҳикоя. (*Рус тилидан Д.Алиева тарж.*) № 6.

Карел ЧАПЕК. (*Чехия*). **Апокрифлар.** (*Рус тилидан М.Сафаров тарж.*) № 6.

Ким Ю ЖОН. (*Хитой*). **Занжабил гули.** Ҳикоя. (*Хитой тилидан М.Файз тарж.*) № 6.

Сомерсэт МОЭМ. (*Англия*). **Ёмғир. Малла.** Ҳикоялар. (*Инглиз тилидан А.Отабоев тарж.*) № 7.

Ясуси ИНОУЭ. (*Япония*). **Жилвагар тўтича.** Ҳикоя. (*Рус тилидан Д.Алиева тарж.*) № 7.

Ёвдат ИЛЁСОВ. **Олачипор ажал.** Роман. (*Рус тилидан Ш.Мансуров тарж.*) № 8, 9, 10.

Дино БУЦЦАТИ. (*Италия*). **Катталаштирилган сурат.** Қисса. (*Рус тилидан Н.Жўраева тарж.*) № 8, 9.

Масадзи ИВАКУРА. (*Япония*). **Олтин балиқча.** Ҳикоя. (*Рус тилидан Д.Алиева тарж.*) № 8.

Абдукаюм ЙЎЛДОШЕВ. **Пуанкарे.** Ҳикоя. № 9.

Рюноске АКУТАГАВА. (*Япония*). **Сувости мамлакатида.** Ҳикоя. (*Рус тилидан О.Нисо тарж.*) № 10.

Ирвинг СТОУН. (*АҚШ*). **Ҳаётга ташналик.** Роман. (*Рус тилидан Р.Жабборов ва М.Норова тарж.*) № 11, 12.

Жек ЛОНДОН. (*Англия*). **Интиҳо.** Тун фарзанди. Ҳикоялар. (*Рус тилидан С.Сайдумаров тарж.*) № 11.

Йоҳанн Петер ЭККЕРМАН. (*Германия*). **Гёте билан гурунглар.** (*Немис тилидан Я.Эгамова тарж.*) № 12.

Хусрав ШОХОННИЙ. (*Эрон*) **Ҳикоялар.** (*Рус тилидан М.ПАРПИХЎЖАЕВ тарж.*) № 12.

ШЕЪРИЯТ МИНТАҚАЛАРИ

Али ОҚБОШ. (*Туркия*). **Умримиз бир қум соати.** Шеърлар. (*Турк тилидан Т.Қаҳҳор тарж.*) № 1.

Имодиддин НАСИМИЙ. (*Озарбайжон*). **Ғазаллар.** (*Озарбайжон тилидан Э.Очилов тарж.*) № 1.

Бакир ЧҮПОНЗОДА. (*Украина*). **Бу севги юракка шуълалар солур.** (*Кримтатар*

ЖАҲОН АДАБИЁТИ

тилидан У.Кўчкор тарж.) № 2.

Калими КОШОНӢ. (Хиндистон). Газаллар. (Форс тилидан Ж.Сироқсидин тарж.) № 2.

Расул ҲАМЗАТОВ. (Догистон). **Оналарни асрнг**. Достондан парча. (Рус тилидан А.Мўмин тарж.) № 3.

Евдокил ЛОСЬ. (Белорусия). **Софинганман сени**. Шеърлар. (Рус тилидан О.Хожиева тарж.) № 3.

Ибройим ЮСУПОВ. (Қорақалпогистон). **Эсар Жайхун шамоллари**. Шеърлар. (Қорақалпок тилидан Я.Кўчкоров тарж.) № 4.

Рабиндранат ТАГОР. (Хиндистон). **Бу қўклам қўшиғи эгаси мениман**. Шеърлар. (Рус тилидан О.Мухтор тарж.) № 4.

Муса ЖАЛИЛ. (Россия). **Дунё, сени Лайлидай севдим**. (Татар тилидан М.Бобоев тарж.) № 5.

Габриэле КЕЛЛЕР. (Германия). **Мен навқирон, дунё навқирон**. (Немис тилидан Ш.Салимова тарж.) № 5.

А.С.ПУШКИН. (Россия). **Ватан даъватига соламиз қулоқ**. Шеърлар. (Рус тилидан Миртемир, Зулфия, И.Муслим, Р.Бобојсон тарж.) № 6.

Болқон эпкинлари. (Косово). Муаллифлар жамоаси. Шеърлар. (Турк тилидан Т.Қаҳҳор тарж.) № 7.

Вьетнам шеъриятидан лавҳалар. (Вьетнам). **Шуълаланган мавжларнинг саси**. (Рус тилидан Гўзал Бегим тарж.) № 7.

XX аср француз шеъриятидан. (Франция). **Жасорат**. (Рус тилидан Тоҳирбек тарж.) № 8.

Хўжа Ҳофиз ШЕРОЗИЙ. (Эрон). Газаллар. (Форс тилидан Ж.Камол тарж.) № 8.

Фёдор ТЮТЧЕВ. (Россия). Шеърлар. (Рус тилидан Р.Субҳон тарж.) № 8.

Хинд мумтоз шеъриятидан намуналар. Муаллифлар жамоаси. (Инглиз ва рус тилиридан Ўқтамой тарж.) № 9.

Янги хинд шеърияти. Муаллифлар жамоаси. (Хинд тилидан А.Файзула тарж.) № 9.

Перси Биши ШЕЛЛИ. (Англия) Шеърлар. (Рус тилидан Ҳумоюн тарж.) № 9.

Озарий баётилар. (Озарбайжон тилидан К.Бахриев тарж.) № 10.

Озарбайжон шеъриятидан намуналар. (Озарбайжон тилидан Р.Абдурашид, К.Бахриев, Т.Қаҳҳор, Ү.Сатторий тарж.) № 10.

Михаил ЛЕРМОНТОВ. (Россия). **Денгиз тўлқини**. Шеърлар. (Рус тилидан С.Раҳмон тарж.) № 10.

Сергей ЕСЕНИН. **Безориман қўшиғимда ҳам**. Шеърлар. (Рус тилидан Э.Воҳидов тарж.) № 10.

АҚШ мумтоз шеърияти. **Буюк йўллардаги излар**. Муаллифлар жамоаси. (Рус тилидан М.Аъзам тарж.) № 11.

Замонавий АҚШ шеърияти. **Энди күш сайрасин**. Муаллифлар жамоаси. (Инглиз тилидан А.Обид тарж.) № 11.

Александр БЛОК. (Россия). **Қанотли еллар**. Шеърлар. (Рус тилидан Э.Воҳидов, Шукруло, М.Икром, Ж.Жабборов, О.Суюндиков тарж.) № 11.

ЭДИГЕЙ. (Россия). Достондан парча. (Татар тилидан Х.Даврон тарж.) № 11.

Немис мумтоз шеъриятидан намуналар. (Рус тилидан К.Бахриев, Т. Мирзо, немис тилидан А. ШЕР тарж.) № 12.

Замонавий немис шеъриятидан. Муаллифлар жамоаси. (Немис тилидан М. Акбаров, Б. Рўзимуҳаммад тарж.) № 12.

Николай НЕКРАСОВ. (Россия) Шеърлар. (Рус тилидан Р. Абдурашид тарж.) № 12.

ДРАМАТУРГИЯ

Уильям ШЕКСПИР. (Англия) **Бехуда шов-шув**. Драма. (Рус тилидан М. Исмоилий тарж.). № 8, 9.

Ҳусайн ЖОВИД. (Озарбайжон) **Шайх Санъон**. Драма. (Озарбайжон тилидан У.Кўчкор тарж.) № 10, 11.

АДАБИЁТШУНОСЛИК. ФАЛСАФА.

Александр КУПРИН. **Чехов хотирасига**. (Рус тилидан О.Суюндикова тарж.) № 1.

Катарина МОММСЕН. (Германия). **Гёте ва ислом**. (Немис тилидан М.Умархўжаев, И.Жабборов тарж.) № 1.

Наим КАРИМОВ. **Туркий оламнинг мунаvvар фарзанди**. № 1.

Григорий КРУЖКОВ. (Россия). **Уисти Ҳью Оден**. (Рус тилидан М.Мирзо тарж.) № 1.

-
- Муҳаммаджон ХОЛБЕКОВ. *Оскар Уайлднинг эстетик олами*. № 1.
Тўра МИРЗО. *Эътиқод ва “Паблик релейшнз”*. № 1.
Дилфуз ҲОТАМОВА. *Шарқ поэтикасида тасниф*. № 1.
Пардабой НУРЖНОВ. *Қалбимда ой, қўёшим кулди*. № 1.
Улугбек АБДУЛЛАЕВ. *“Мунтакаб ут-таворих” ўзбек тилида* № 1.
Б. СТАВИСКИЙ. (*Россия*) *Кушон даври алоқалари*. (*Рус тилидан А. Файзула тарж*) № 1.
Эркин ВОХИДОВ, Шодмон ОТАБЕК. *Икки олам заҳмати*. Суҳбат. № 2.
Улугбек ДОЛИМОВ. Нурбой ЖАББОРОВ. *Илмий ҳақиқатнинг туғилиши*. № 2.
Хасан КУДРАТИЛЛАЕВ. *“Бобурнома” – озарбайжон тилида*. № 2.
Лев ТОЛСТОЙ. (*Россия*) *Асосий қаҳрамонларим – ҳақиқат. Ҳатлар. Қундаликлар*. (*Рус тилидан О. Абдуллаев тарж.*) № 2, 5.
Сомерсет МОЭМ. (*Англия*) *Романинавис ёхуд савдогар*. (*Рус тилидан М. МИРЗО тарж.*) № 2.
Дэвид ҲЮМ. *Шубҳапараст*. (*Инглиз тилидан Х. Йўлдошев тарж.*) № 3.
Афтондил ЭРКИНОВ. Амир Умархоннинг тухфаси. № 3.
Матлуба ТЕМИРОВА. *Ижодий изланишлар йўлида*. № 3.
Француз адиллари хикматлари. Тўпловчи М. Асадов. № 3.
Үулом КАРИМИЙ. *Илмий ҳамкорлик самараси*. № 3.
Алимурод ТОЖИЕВ. *Ўзга оламга саёҳат*. № 4.
Амир ФАЙЗУЛЛА. *Ўзбек ва ҳинд адабий алоқалари*. № 4.
Умарали НОРМАТОВ, Ҳамидулла БОЛТАБОЕВ. *Бугунги адабиётда эстетик идеал ва қаҳрамон муаммоси*. Суҳбат. № 4.
Абдулла ШЕР. Аччиқ ҳақиқатлар фалсафаси. № 4.
Ўлжас СУЛАЙМОНОВ. (*Қозогистон*) *Тоғларсиз яшай олмайман*. Суҳбат. (*Рус тилидан М. Мирзо тарж.*) № 4.
Фозил ИСКАНДАР. (*Россия*). *Номус ва виждан яшаб қоладими?* Суҳбат. (*Рус тилидан М. Мирзо тарж.*) № 5.
Акмал САЙДОВ. *Бутун билимимни шоирлардан олганман*. № 5.
Санобар ТЎЛАГАНОВА. *Катта адабиёт орзуси*. № 5.
Хуршид ДЎСТМУҲАММАД. *Жон Мильтон ва Абдулла Қодирий*. № 6.
Зайнобиддин АБДУРАШИДОВ. *Устози музазам*. № 6.
Франческо ПЕТРАРКА. (*Италия*). *Авлодларга мактуб*. (*Рус тилидан М. Маҳмуд тарж.*) № 7.
Лион ФЕЙХТВАНГЕР. (*Германия*). *Шаккок фикрлар*. (*Рус тилидан И. Ҳафизов тарж.*) № 7.
Муҳаммаджон ХОЛБЕКОВ. (*Лотин Америкаси*). *Сеҳрли реализм жозибаси*. № 7.
Улугбек ҲАМДАМ. Раҳимжон РАҲМАТ. *Ижодий эркинликнинг тотли меваляри*. Суҳбат. № 7.
Жан Жак РУССО. (*Франция*). *Халқ баҳти ҳақида*. Фалсафий рисола. (*Рус тилидан А. Абдуқодиров тарж.*) № 8.
Холгер ФОК. (*Германия*). *Адабий таржима муаммолари*. (*Немис тилидан М. Ақбаров тарж.*) № 8.
Қиёмиддин НАЗАРОВ. *Муаллимлар муаллими*. № 9.
Абдулла ШЕР. *Абдият ва умр*. № 9.
Маҳатма ГАНДИ. (*Ҳиндистон*). *Давлат тили*. (*Ҳиндий тилидан З. Шодиева тарж.*) № 9.
Наим КАРИМОВ. *Хусайн Жовид – буюк озарбайжон драматурги*. № 10.
Сирохиддин САЙЙИД. *Доғлар кетмиш мажрух қўнгилдан*. № 10.
Марям ЁҚУБОВА. *Ўлуг ва садоқатли мухаббат*. Хотиралардан парча. № 10.
Комилжон ЖЎРАЕВ. Муҳайё АҲМЕДОВА. *Жойс сийратига чизгилар*. № 11.
Роберт СТИВЕНСОН. (*Россия*) *Адабиётнинг маънавий қиёфаси*. (*Рус тилидан Р. Иброҳимова тарж.*) № 11.
Александр МЕЛЬНИЧЕНКО. (*Россия*) *Есениннинг сирли ўлими*. (*Рус тилидан А. Файзула тарж.*) № 11.
Муҳаммаджон ХОЛБЕКОВ. *Навбатдаги Нобель мукофоти соҳиби*. № 11.
Акмал САЙДОВ. *Тинчлик элчиси*. № 12.
Иброҳим ҒАФУРОВ, Хуршид ДЎСТМУҲАММАД. *Таржима мухаббати ва оҳанрабоси*. Суҳбат. № 12.
Шавкат КАРИМОВ. *Хозирги немис насли: анъана ва янгиланишлар*. № 12.
Хуршид ЙЎЛДОШЕВ. *Немис фалсафий тафаккури*. № 12.
Зигрид КЛЕЙНИХЕЛ. Баҳодир КАРИМ. *“Яна ва яна Навоий ижодига қайтаман*.

Сұхбат. № 12.

Нафас ШОДМОНОВ. **Оғажийнинг таржима мактаби.** № 12.

САРГУЗАШТ. ДЕТЕКТИВ. ФАНТАСТИКА

Густав ЭМАР. (*Италия*) **Соҳибчангали**. Роман. (*Рус тилидан Э.Носиров таржс*) № 1, 2.

Михаил КУЗЬМИН. (*Россия*) **Буюк Искандар зафарномаси**. Қисса. (*Рус тилидан К. Носиров таржс.*) № 3.

Яннис МАРИС. (*Греция*) **Нафақадаги хусусий изқувар**. Роман. (*Рус тилидан К. Мирмуҳаммедов таржс.*) № 4, 5, 6.

ПУБЛИЦИСТИКА

Муҳаммад АЛИ. **Жаҳонга айтилган сўз**. № 1.

Вячеслав КОСТИКОВ. (*Россия*) **339-рақамли табассум**. (*Рус тилидан М. МИРЗО таржс.*) № 3.

Ёсихиса КУРОДА. (*Япония*) **Мен ўзбек халқига ҳавас қиласман**. № 4.

Сабуҳий АҲМЕДОВ. **Амир Темур ва Озарбайжон**. № 4.

Шуҳрат РИЗАЕВ. **Тақдиримсан, баҳтимсан, эркин ва обод ватан**. № 9.

ЖАҲОН МАДАНИЯТИ ВА САНЪАТИ

Глобус. № 6,7,8,9,10,11, 12.

Унутилмас сиймолар. № 6,7,8,9,10,11,12.

Тарихда бу кун. № 6, 7, 8, 9,10, 11,12.

Тақвим. № 6, 7, 8, 9,10, 11,12.

Resume

In this issue of the magazine devoted significant place of German literature and culture of different times.

■ In “Conversation with Goethe”, Johann Peter Ackermann describes the life and literary activity of Goethe, his views of life and literature, as well as his attitude to young poets and writers. The invaluable conversation about life, arts and science not only clarifies various occurrences but also enriches Goethe’s personality. The work was translated into Uzbek by Y.Egamova.

■ The present issue of the magazine carries German classic ballades and poems by Heine, Brecht and several contemporary German poets, translated by A.Sher, T. Mirzo, K.Bahriev, B.Ro’zimuhhammad, and M.Akbarov. There are also new translations of plays by Russian democrat poet A.Nekrasov, translated into Uzbek by R.Abdurashidov.

■ In the article entitled “Again and again, I return to Navoi’s creative work” German scientist Sigrid Kleinmichel and Doctor Bakhodir Karimov talk about the study of the Uzbek literature abroad and foreign scientific-creative projects.

■ The article entitled “Contemporary German prose: tradition and innovations” by literary critic Shavkat Karimov, and the article “German philosophical intellection” by Xurshid Yuldashev talk about German classical philosophy and a short history of prose, as well as its current process and trends.

Резюме

В данном номере журнала отведено значительное место немецкой литературе и культуре разных времён.

■ Книга “Разговоры с Гёте в последние годы его жизни” Иоганна Петера Эккермана внесла значительный вклад в исследование творчества великого поэта. Она включает в себя не только записи бесед с Гёте, но также информацию о самом поэте: его образ жизни, глубокие размышления о жизни и литературе, отношение к современникам и к молодёжи, в частности. Эти беседы, состоящие из драгоценных мыслей, вносят ясность во многие события своего времени и вырисовывают образ Гёте в процессе освещения повседневной жизни. Перевод с немецкого Янгиш Эгамовой.

■ На страницах журнала вы можете ознакомиться с балладами, стихами классиков немецкой литературы, в том числе Г.Гейне и Б.Брехта, а также произведениями современных поэтов Германии в переводах А.Шера, Т.Мирзы, К.Бахриева, Б.Рузимухаммада и А.Мирзаева. Также даны образцы творчества известного русского поэта-демократа Н.Некрасова в переводе Р.Абдурашидова.

■ В беседе под заголовком «Вновь и вновь возвращаюсь к творчеству Навои» известная немецкая учёная, автор ряда научных работ и статей Зигрид Клейнмихел делится своими размышлениями с доктором филологических наук Баходир Каримовым. Речь идет о научно-творческих проектах, вопросах изучения узбекской литературы за рубежом.

■ Статьи Шавката Каримова «Современная немецкая проза: традиции и обновления» и Хуршида Йулдошева «Немецкое философское мышление» – краткий исторический экскурс и рассуждения о сегодняшних процессах в области немецкой философии и прозы.